



شہزاد ادیبی کاروان ڈاک نوشکی بلوچستان



ایٹھم خدا خوشے؟

عمران فہریق



ایٹھم خدا خوشے؟

عمران فہریق

# اینو ہم خدا خوشے؟

(براہوئی افسانہ خاک)

عمران فریق

شیوان ادبی کاروان ڈاک نوشکی

اینو ہم خدا خوشے؟

عمران فریق

حقاک خوندی و

۵۰۰ روپي	بہا
۱۰۰۰	کرڑوک
۲۰۱۸ء	سال
الحجیل کمپوزنگ سینٹر کوئٹہ 0300-3898601	کمپوزنگ
بلوچ اسٹیشنری، عیسیٰ چاہ اسٹاپ نوشکی	مانگ ناہند
جان بک اسٹال منان چوک جناح روڈ کوئٹہ	
ارسلان بک سیلرز میزان چوک کوئٹہ	
یونائیٹڈ پریس سیٹھ اسماعیل روڈ کوئٹہ	پریس
شیوان ادبی کاروان ڈاک نوشکی بلوچستان	چھاپفوک

## پنٹ

”ہمولہ غا تا پنٹ ہر افتا خنک تین، اسٹوپ او دیگ دانا تا موٹل آن دیر مشر۔“

”ہموباوہ غا تا پنٹ ہر افتا دوک پاٹ کر ساپت او کوٹور آن پُر مشر۔“

”ہموگودی تا پنٹ ہر ایچ تینا دوی تے استعمال کنگ کتور۔“

”ہمومارتا پنٹ ہر اُرا نا فکراٹ تین کن زندگی کنگ کتور۔“

ہمو راج نا پنٹ ہر اوخت کس ننا اُستاتے ہُشک

وخت کس اوڑ کن ننا اُست ہُشنگ۔“

## مہشون

۶	پروفیسر غلام دستگیر	۱۔ ریکی ناوارث
۱۰	شیخ عتیق حسرت مینگل	۲۔ راج نناخن
۱۳	عمران فریق	۳۔ اُستاتا مجلس
۲۶		۴۔ تینا
۵۳		۵۔ مٹھائی
۶۳		۶۔ گچھا کاک
۷۷		۷۔ کاریبی
۹۲		۸۔ احساس
۹۴		۹۔ انا
۱۰۹		۱۰۔ بھلا بابوہ
۱۲۴		۱۱۔ خان جانو
۱۳۶		۱۲۔ دروت
۱۵۰		۱۳۔ اُست مفک
۱۵۷		۱۴۔ مشاعرہ
۱۷۲		۱۵۔ اِرمیکو

۱۹۴	۱۶۔	اینو ہم خدا خوشے؟
۲۰۲	۱۷۔	ذالہول اوڈون اَسہ وڑو
۲۱۹	۱۸۔	مہر
۲۲۴	۱۹۔	ارمان
۲۳۳	۲۰۔	ٹیپو
۲۴۲	۲۱۔	ایلم ناہوشیاری
۲۵۱	۲۲۔	سردار ناشار
۲۶۳	۲۳۔	مُسہ خوائے
۲۷۷	۲۴۔	کٹ
۲۹۶	۲۵۔	اَسہ رنگ
۳۱۷	۲۶۔	پیرہ ناچ
۳۳۷	۲۷۔	آخر یکو خط
۳۴۵	۲۸۔	بے غیرت
۳۵۸	۲۹۔	کنا چالاک

## ریکی نا وارث

لمہ وطن بلوچستان نا کاٹم ہمیشہ فخر آن بڑا ارے کہ اونا اولاد اک ہمیشہ ہر شعبہ ٹی تینا حقے ادا کریںو۔ ہندن نوشکل کنا بھلا وطن بلوچستان نا ہمو جاگہ ے کہ ہر میدان ٹی تینا مٹ تینٹ مٹے۔ افغانستان نا بارڈر آ بھلا خشک انگار یگستان ڈاک اگہ اسہ نیمہ غان ہمیشہ ڈکال نا گواچی مٹے ولے ایلو نیمہ غان دہنو اولاد ودی کرینے ہرا فک لمہ وطن بلوچستان ناخن تادیدہ غاک شمار مریرہ۔ اسہ دانشور نئے نا قولے کہ ہمیشہ دنیا نا بھلا بھلا تہذیب اک ریگستان تے ٹی وجود ٹی بسٹو۔ بالکل ہندن کنا ریگستان ڈاک براہوئی نا بھلا کلاسیکل شاعر ریکی نا لمہ وطن متنگ نا ہم اعزازے دوی کرینے ریکی ہرا نا لافانی آ شاعر

اینو ننن دے دیگرے

پھگہ نوا وارس برے

نا اینو ہم مٹ و بدل اف۔ کنا خشک انگا ڈاک شاعر بشام ے ودی کرے۔ تیمور ے ودی کرے۔ ڈاک نا ڈ غارتینا آزادی نا پرک غازی محمد مراد نا تر نا خوشبو ے خنا۔ ہندا دھرتی ٹی غازی علی دوست تینا جانے لمہ وطن کن ندر کرے۔ ڈاک نا ریگستان مولانا محمد افضل مینگل ے ودی کرے۔ مفسر قرآن مولانا اختر محمد مینگل، شیخ الحدیث حضرت مولانا

عبدالباقی لہری سابق ممبر اسلامی نظریاتی کونسل پاکستان، قاضی محمد ہارون مینگل، پروفیسر مولانا حاجی محب اللہ مینگل اوپین چندی پنی آ عالم ادیب، دانشور تالمہ ٹی آڈ غارے۔

داڈیھ اوڈ غار قومی اوکلاسیکل شاعر ریکی ئے پیدا کرے ہندن ریکی ناپد ہم دا ریگستان اینواسکان ادیب وشاعر پیدا کر سابتگے۔ داورناتے ٹی شیخ عتیق حسرت، بابل شاد، صدمینگل، سید خان دانش، حفیظ مینگل اوپین چندی پنی آ ورنا ادیب وشاعر اک او اراریر۔ ہرا وختا ڈاک نا ورنا انگا شاعر اک شیخ عتیق حسرت او ایلو ورناتا کماشی ٹی شیوان ادبی کاروان ئے جوڑ کریر تو ڈاک نا علم و ادب نا دنیا ٹی دا گچیو گام نس مس۔ شیوان ادبی کاروان چٹکو وخت نسے ٹی ادبی دنیا ٹی بھلوپن نسے نا خواجہ مس۔ ہندن چٹکو وخت نسے ٹی چندی کتاباتے شینک کرے۔

ورنا انگا شاعر، ادیب، افسانہ نگار عمران فریق ہم ہندا کاروان ڈیھ اوڈ غار نا پنی و قلم کار نس ارے۔ دا کان مست اونا گچینا شاعری نا کتاب ”کر و“ شینک مس۔ ہرا ادبی دنیا ٹی بھلوپن نس کٹا۔ ای تیٹ براہوئی ادب نا طالب علم نس اریٹ۔ ہندن بحیثیت استاد براہوئی ادب ئے کالج نا شاگرد اتے خوانفنگ نا ذمہ داری ئے ہم ادا کنگ اٹ۔ ہندا وجہ غان براہوئی ناہر کتابے خوانفنگ کئے آ فرض ارے۔

کنے پاننگا کہ عمران فریق افسانہ غاتا کتاب نس لکھتگ ٹی ئے۔ ہرا ڈاکنے تبصرہ نس لکھتگ نا حکم تننگا۔ یقین کیرے بھلو وخت نس ای دا وجہ غان دا افسانہ غاتے خوانتوٹ کہ اینو پھگہ ہر بندغ شاعری او افسانہ لکھتگ کیک دا ہم ہندن رسمی و منہ مہرنا قصہ مرور۔ ولے ہرا وخت ای او نا اولیکو افسانہ ئے خواناٹ تو کنا چند او ٹی ڈب ہلکٹ۔ ولدا کل افسانہ غاتے داخہ شوق اٹ خواناٹ کہ کئے خبر ہم متو۔ تیٹ ای تینا اُست اٹ



پاریٹ کہ یقین بنک کہ داچکا عمرنا عمران فریق داخہ جوانو افسانہ تخلیق کرینے۔ بس اُسٹ اٹ عمران ءے شاباشی تَسٹ۔

براہوئی زبان ٹی افسانہ نویسی ناچا عمر بیرہ شصت سالے۔ براہوئی افسانہ نویسی ۱۹۵۶ء آن شروع مس۔ ولے داٹی ہمو وخت پختگی بس ہرا وخت ۱۹۸۰ء آن پد براہوئی ادب ٹی ورناتا جوانو کھپ نُس بس۔ اولیکو وار براہوئی ادب خصوصاً شاعری او افسانہ ٹی پوکسنی و جدت بس۔ براہوئی افسانہ غاتا اولیکو مجموعہ ”انجیر نا پھل“ ہرا کہ ڈاکٹر تاج ریسانی نا لکھوک اس۔ داکان پد براہوئی ٹی افسانوی مجموعہ غاتا شائع متنگ باقاعدگی اٹ شروع مس۔ ہندن زو براہوئی افسانہ ہم ایلو زبان تا افسانہ غاتے تو ہم گام و ہم کو پیہ مس۔

عمران فریق نا دا افسانوی مجموعہ ءے خوڑتی اٹ ہننگان پد قارئین تے خبر مریک کہ واقعی براہوئی افسانہ بھاز ترندی اٹ تینا منزل کن روان ءے۔

ہرا حد اسکان عمران فریق نا افسانہ غاتا نوشتہ نافی تعلق ارے کنے اوئی افسانہ نا چافی ضرورتا ک نظر بُسر۔ اونا افسانہ غاتے ٹی پلاٹ، کردار، مکالمہ، منظر نگاری، کلائمیکس بھاز جوانی اٹ نظر بریک۔ عمران فریق نا افسانہ غاتا باروٹ پاوہ کہ اونا افسانہ غاتا کلائمیکس ہنداخہ تجسس ارے کہ قاری اونا افسانہ غاتے ٹی ڈب ہلیک۔ ولدا کلائمیکس نا انتظار ٹی بے صبر مریک۔ آخر ٹی کلائمیکس ہندن مریک کہ قاری یکدم مچہ حیران مریک او سوچ ٹی تمک۔

عمران فریق نا افسانہ غاتے ٹی تینا وطن، تینا مش، ریک، تینا ڈاک تینا نوشکی او تینا بلوچستان نا خوشبو تالانے۔ اونا افسانہ غاتا کردار زمان او مکان ہم اونا زبیاہ انگا سر زمین لمہ وطن ارے۔

بس آخری ہند اخہ پاوہ کہ عمران فریق نا افسانہ غاک براہوئی ادب ٹی بھاز گچینو  
افسانہ کس اریر۔ مونی فیصلہ قارئین تینٹ کرور۔

کنار یکی بٹام، قیصر خان، رحیم دادنا ڈ غارسنٹ اوبانجھ وخت کس متنے۔ ریکی نا  
ادبی وارثاک اینو ہم اونا پدے تورینو۔ بلکہ براہوئی ادب داور ناتے آناز کروئے۔  
دعا کیوہ کہ اللہ پاک کنا وطن ناچٹناے علم و ادب ناروشنو بینار کس جوڑ کے۔ کنا  
دعاک عمران جان کہ مسٹو او مرور۔

غلام دستگیر صابر

اسٹنٹ پروفیسر (براہوئی)

گورنمنٹ کالج نوشکی

## راج سناخن

ملک او دھرتی نارکھ ہمو وخت اسکان مریک ہر اتم اسکان بارڈر آ سپاہیک  
سلوک مریرہ۔ ہندن قوم زبان نارکھ ہم وخت اسکان مریک ہر وخت اسکان ہمو قوم او  
زبان ٹی حساس انگا بند غاک اوڈر دخور وورنا ساڑی مرے۔

زبان لمہ مریک اولمہ نا خدمت ٹی جنت نا وعدہ ہم ارے۔ ہر کس ناتینا اسہ جتاؤ  
خدمت نا وڈر ڈول ٹس مریک۔ انتے کہ نالہ ٹی آ زبان نیخی ملاسے۔ او ہر پہلو آ دیر  
خوانک۔ چندی ورناک دا کوشش ٹی لگانو کہ زبان نا ملاسی کم مرے۔

اوفتے ٹی چنکو وخت ٹسے ٹی اسہ بھاز بھلو پین ٹس عمران فریق نا ہم ارے۔  
عمران فریق براہوئی زبان نا بے مٹ آ شاعر اتے آن اسٹ ارے۔ او خواجہ اسہ بھاز  
گچینو انداز ٹسے اٹ افسانہ نگاری کنتلہ۔ ای دعویٰ اٹ داپانگ کیوہ کہ عمران فریق اولیکو  
وار براہوئی ادبے افسانہ نا حقیقی دروشے تنگلہ۔

خواجہ عمران فریق صاحب ناداکان مُست ہم کتاب ٹس ”کڑو“ ناپنٹ چھاپ  
مُسے۔ ہر مخلوق ٹی بھاز بھلو پزیرائی ٹس خنا۔ ”اینو ہم خدا خوشے؟“ اوفتار ٹمیکو کتابے۔  
اینو نا عمران فریق کنا پھلک نا کسر شونی کنتلہ۔ دا حقیقت اٹ اسہ کسر شون ٹسے نا اسہ گچینو  
لاٹھی ٹس سر پند متگ کیک۔

عمران فریق نادا کتاب ٹی کل افسانہ غاک پیست و شش اریر۔ ہر افسانہ مجبور  
 یک کہ کنا عنوانے نوشتہ کرو لے گڑ اس افسانہ غاک کئے حقیقت اٹ نوشتہ کنگا مجبور  
 کریرد ہنکے ”تینا“ مٹھائی، دروت، مشاعرہ، سردارنا شار، آخریکو خط، ٹیپو۔  
 ”تینا“، پنی آ افسانہ ٹی او بند غا تا تینا بند غا تے بے غرضی ناویل کس مونا پیسنے۔  
 ”مٹھائی“، ٹی غریبی نا اسہ ہند نو درشانی کسے ہر بلوچستان نا ہر اٹمیکو چٹا ناخن ٹی نظر  
 بریک۔ ”دروت“، بلوچ راج نا اسہ ہند نو ویل کسے آ نوشتہ کسے ہر اچندی ورنہ انگامسن تا  
 خونے کرینے اوکر سانبنگہ۔

”مشاعرہ“ افسانہ اسہ ہند نو سر حال کسے آ نوشتہ کسے کہ دائی ننا فکر او ننا غیرت نا  
 نیام نا جنگ کسے۔ ”سردارنا شار“، ٹی بلوچستان نا ہموکل خلق آ تا بھلا ویل کسے ہر خلق آن  
 شاری مسر و لے او قلاماسی، لنگڑی، اوفاز ندگی نا طرز بدل متو۔ ”آخریکو خط“، ننا دا دور نا ہمو  
 غمے کہ دائی بھازا کردار تا اصلی درو شم مونا بریک۔

دافتے آن بیدس ایلوکل افسانہ غا تا پلاٹ ہندا وڑ بلوچستان ٹی مروکا ویلاک، بلوچ  
 راج او بلوچ قوم نا ہموڈ کاتے آ نوشتہ و ہر افتے ٹی قاری تینا یا تینا خوک نا بند غ کسے نا عکسے  
 ضرور خنو۔ فریق نادا افسانہ غا تے ٹی خصوصاً ذال بولا تا باروٹ بھاز گچنی اٹ نوشتہ کرینے۔

کنے یقینے ننا راج نا ہر قاری دا افسانہ غا تے تون بھلو وخت اسکان سفر کرو۔  
 فریق نادا افسانہ غا تے ٹی پلاٹ، قصہ، وحدت تاثر، نقطی عروج، اسلوب، سر حال، ذاتی  
 تجربہ، مشاہدہ، کردار نگاری او اونا انداز بیان ننے بھاز زبانی اٹ نظر بریرہ۔

دافتے بیدس افسانہ ”مہر احساس“ کنا چالاک، براہوئی افسانہ غا تے ٹی جتاؤ  
 رنگ کس ہم پیسو۔

کنے یقینے کئے آن باردا افسانہ غاک قاری تے ہم بھاز دوست برور۔ عمران  
فریق واقعی دالانخ ارے کہ ہر افسانہ کن خصوصی داد کڑزک۔

ہر اتم قاری دا کتاب نا افسانہ غاتے خوانا تو او ہم ساعت لے کن تین تون سوچ  
خلواو آسمان نا پارہ غاہر واو تین تون پارو ”اینو ہم خدا خوشے؟“

اللہ تعالیٰ آن خصوصی دعا کیوہ کہ فریق جانے بھلو عمر کس ایۃ۔ صحت نصیب  
کے تاکہ عمران فریق جان تینا بے وس آ مخلوق نا خد متے کنگ کے۔

شیخ عتیق حسرت مینگل

مرکزی چیئر مین

شیوان ادبی کاروان ڈاک نوشکی

## اُستانتا مجلس

زندگی نالیہُن ہزار ہا ڈیفنیشن آکو۔ ہر انسان تینا نظر، نظریہ، سفر، خیال اوسوچنا حساب اٹ زندگی ءے بیان کیک۔ ای ہمو بندغ تو اتفاق کیوہ ہرا زندگی ناباروٹ پارہ کہ ”زندگی اسہ بے بہاؤ نعمت نَسے۔ ہرائی انسانک تین تورشتہ تفرہ۔ ہرائی چناتالمہ باوہ تون، ہرائی ایڑنا ایلم تون، ہرائی ایڑنا ایڑتون، ایلم نالیلم تون رشتہ ءے۔ ہرائی ایلمی نارشتہ ءے ہرائی سنگتی نارشتہ ءے ہرائی لحاظ نارشتہ ءے، ہرائی احساس نارشتہ ءے، ہرائی ماراوسٹرنا نیام اٹ اُستانتا خوکی نارشتہ ہم ارے۔ ہرائی اَرغ اوزایفہ نارشتہ ہم ارے۔ ہرائی ہندنو رشتہ ہم ارے ہرافتے پن اف۔ ہرائی داگل رشتہ غاتے پختہ اوسوگو کنگ کن مہر، اخلاق، بھروسہ، اعتبار، وفا، خلوص، جوانی، عزت، احترام، پردہ پوشی، رازداری، محبت، احساس، کمک، بخشش ناوڑا نگالفاظک بنیادی آکاریسے کیرہ۔“ انسان لَمہ ناچھڈا آن لحد نامشتے اسکان ہندازندگی نا پنجرہ ٹی زندتیرکیک۔ دهنوا انسان کس اف کہ اودا پنجرہ غان پیشن مرے او آزاد مرے۔ دانا آزادی ہمو تم مریک ہراوخت انسان تینا کاوکول آن تھے، اونا پڑہ خاک باز، اوانانت آسیک کٹے۔

اسہ پنجرہ ٹی متنگ آن بغیر ہم انسان آتا زندگیک اسہ وڑ افس ہرانا سو بے  
بھازاک بخت نصیب، مقدر ناپن ایترہ ولے ای داگر اغان سختی اٹ اعتراض کیوہ انتے  
کہ بخت اسہ بندغ نئے نابدمتنگ کیک، ارٹ نایامنٹ نئے نا۔ مچا قوم اوراج نابخت مقدر  
خراب خوار متنگ تو کیک۔ ہندا خاطر ان ای برملا انکار کیوہ کہ دانیون اسہ بھازضعیف و  
نزور و نیون نئے ہر ادے بچو دلیل نُس اف۔

اصل اٹ زندگی ناہر اتم پنجرہ تیار مس تو ہر بندغ تین کہ تینا کنڈان اسہ درگہ  
نُس کرے او تینا تب، تینا وڑ تینا سوچ ڈول نامطابق زندگی ریفنگ نابناے کرے۔ مدان  
مدان تینائی ناویل آن پنجرہ ٹی ریٹنگو کا ہر بندغ تینا مزاج فکر ناوڑ نابندغ تین تو اوار کر سا  
کرے او ہندا وڑ مر سا مر سا اسہ بندغان ارا بندغ، ارٹ آن مسٹ او آخر اسہ خاہوت نُس  
مسر ولدا اسہ قوم نُس ولدا اتالان مر سا چندی قوم جوڑ کرے۔ آخر داکل اسہ راج ناباتی  
مسر۔ دا بد بختی ایلو بندغاتے تو ہم مس ولے ایلو فتنے تو کنے کاریم اف ای فقط تینا اونما بد  
بختی ناپیتے کیوہ۔ ہرا کہ دا پنجرہ ٹی بروکانا راج نا اویکو بندغ اس۔ دانا سوچ ہندا اس کہ  
اوناراج ٹی کاٹم نُس مرے ہرانا پن سردار مرے ایلوکل اونا حکم و اونا فیصلہ غاتا مرید مریر  
ولے دیرے سما اس کاٹم نا اسپاراک کاٹم نازمخ مریرہ۔ داراج بیرہ ہمو فتائے مرے ہرا  
نرینہ۔ وذا البولاتے داراج ٹی قدر مف حالانکہ داگر انا ورنندی کنے دا اسکان ملتو کہ دا  
ذالبول آتون نفرت کروکاک امر گیرام کریر کہ اودیر آن ودی مسٹو یا بلکہ اوفا نفرت بیرہ  
ذالبولاتا دوئی، اُسٹ و دماغ آتون اس۔ ایکان او ذالبول آتا زیبائی، حسن، اوفا بدن  
تیاں نفرت کتورہ۔ خیر داگر اے ای تینا ذہن اوگمان آن کنگن اٹ بلکہ حقیقت داوڑ  
اف۔ ولے گپ ہندا اس کہ او ذالبولاتے بیرہ تینا حوس او چرکا تا سنگ کن توریرہ یا  
اوفتنے آن نرینہ ودی کنگن نالالچ آن۔

پنجرہ ناداکنڈ ہراڑے ای بھلن مسٹ ذالولاتا چو حیثیت کس الو۔ داڑے  
 ذالولاتا زندا راتاروفنگ، دلا تا پرکننگ، نپا داتا شاعنگ ترشاعنگ، تین اوتندور آتے  
 لگفنگ، ارغ بسنگ، گر وکننگ، ساہدارتے بے تننگ اوساننگ، پاٹ چمولی کننگ، لاب  
 کننگ، چناتے ہر فنگ، تینا نرینہ غاتا مراد و حکم تے پور وکننگ اٹ تیر مسکہ۔ داڑے  
 ذالبول سوچ خلنگ کتو کہ۔ داڑے ذالبول اُست آن کاریم ہلنگ کتو کہ۔ داڑے  
 ذالبول کل نامونا خننگ کتو کہ۔ داڑے ذالبول بیرہ ہو غنگ کر یکہ اوہم کچ اٹ۔ داڑے  
 ذالبول سوچ خلنگ کر یکہ ولے بیرہ تین تو۔ بھازاک داپارہ کہ دا ذالبول آتاق حق مسنے اوفقا  
 کاریم مسنے ولے سوال داودی مر یک کہ انت اوفقا حق تے ٹی بیرا ہندا گرا نوشتہ اس یا اودنیا  
 نایلو ذالولاتے آن جتا اسرہ یا اوفقا نرینہ غاک بے احساس و جان بڈ اسرہ۔ ہیت ہرا  
 مرے گپ داس کہ اوفک خوار و ذلیل اسرہ۔

اسہ وخت کس ہندن مس کہ ای گوازی کرسا کرسا پنجرہ ناداکنڈ ان ایلو کنڈ اسر  
 مسٹ۔ ہر اتم داپوسکنا راج او اوانا باقی تے خنٹ تو کنا ہوش پرینگا ای حیران مسٹ کہ اسہ  
 پنجرہ ٹی اراجتا و منظر اراجتا و زمان امر منگ کیرہ۔ داڑے ذالولاتا اسہ جتا و مقام اودنیا  
 کس اس۔ داڑے ذالبولاک سوچ خلنگ کریرہ، تینا اُست نا پیتا تے کننگ کریرہ، داڑے  
 ذالبولاک تیر آن خننگ کننگ کریرہ، داڑے ذالبولاک زندگی کننگ کریرہ، داڑے آزادی نا  
 ماحول اس، داڑے کس کس آ مسلط الو، داڑے کس کس نامحتاج الو، داڑے ذالبولاک ذالبولی  
 آزات آن خلیتورہ، داڑے ذالولاتے طلاق ناہر ز الو، داڑے ذالولاتے چناتا غم الو۔ او  
 علم تخرہ قانونے پہہ مسرہ اودین آن واقف اسرہ۔ ذالبول نا حق تے آن واقف اسرہ اوفقا  
 نرینہ غاک ہم دا گرا تا علم تخرہ۔ کنگہ داماحول دانا بند غاتا زند بیرہ اسہ عبرت کس اس۔



ای ہر اتم داڑے مسنتے مخمک آخناہ تو کنا ذہن ٹی یکدم کنا خلق نامسن تا خشک انگا  
جوڑک بٹہرہ۔ ای دافنتے آزادی آخناہ تو کنے کنا غلاما ک یاد بٹہرہ ای دافنتے آسودی آ  
خناہ کنے کنا خوار انگا ایڑا ویلمک یاد بٹہرہ دافنا دنیا کنگہ اخس خوشی کس اس اوکان زیات  
اے جہان کنگہ پریشانی اوویل کس اس۔ کنے پیر انگا تا نیم تہارا انگا خنگ ہو غفیرہ کنے ورناتا  
دڑوک انگا چہرہ غاک گلوئی کریرہ کنے مسنتا سوچ کروکا خنگ نیمسرک کریرہ کنے باوہ غاتا  
ڈڈا انگا دوک لمہ غاتا ترخوک انگا پوس پادا ک بے تق کریرہ۔ ای دا جہان نے خچر و سٹ تو  
داخہ ناشاد متوٹہ۔ ای ارمانی متوٹہ۔ ای دا مخلوق خنگان مست ہندا سوچاٹہ کہ مچا دنیا ننا  
راج آن بارے۔ مچا دنیا ننے آن بار خوارے۔ مچا دنیا ننے آن بار مخک ننے آن بار  
ہو غک ننے آن بار میشل ناہینگ آخوش مریک او جوڑوک نا کہنگ آنا شاد مریک۔ ای سوچاٹہ  
کل دنیا نامسک ننا مسنتے آن بار چڑہ دسک نا کاریم کیرہ چنا بھلن کیرہ۔ ای سوچاٹہ کل دنیا  
نا ذابولا ک ننا نیازی تے آن بار بس لیپ جوڑ کیرہ او مسن تا برام کن زرنچ کیرہ۔ ای تو  
سوچاٹہ کل دنیا نا زینہ غاک پیسہ کن یا تو بچ ترہ یا ملک آتے ٹی خواری کیرہ۔ ای تو دنیا نا کل  
ورناتے بیروزگار سرپند مسٹہ۔ ای تو سمجھاٹہ کہ دنیا نا کل چنا ک گڑ دوٹی ثانی سے کن  
ہو غیرہ۔ کنے انت سما اس دنیا دا وڑاف۔

داراج او سماج ٹی بھلن مرساتینا راج کن خڑینک شولسا کنے بچ درک لکنو کہ امر  
اوہرا وخت کنا تہہ ٹی اسہ پین بندغ کس ودی مس۔ ای سئی وڑٹ درست ہم کنگ کٹوٹ  
اوانت کسے۔ بندغ کسے یا بیرہ اسہ تو ارکسے ولے داخہ علم مس کنے کہ اسہ ادب آن تعلق تخو کو  
فکر کسے۔ ہرانا پنے آخرای ”فریق“ سخاٹ او اونا سنگت جوڑ مسٹ۔

اسہ دے شام نا اذان آن گڈ ای او فریق میدانی سے آتو لوک مجلس کنگ اسن



کن تو اوقات ذکرے کیسہ لیکن نی اوفتے آن ہمو وختا بھاز خوک مریسہ ہراتم اوفتے تو زند تیر کیس۔ ہراتم اوفتے تو اوار مرلیس، گڑانی اوفتاویل، خوشی او خواستاتے آن واقف مریسہ۔ اوفتے محسوس کیسہ۔ نے احساس مریک او احساس آن گڈنا کروکا پیناک نا پاروک آگپاک اثر تخور۔ احساس آن بغیر کس فی دنیا ناسہ گڑاس جوانی اٹ بیان کنگ کپسہ، ای اودے پہہ کرسا پاریٹ۔

”ناہیناک تینا جاگہ غار استو ولے نی انت پانگ خواسہ ای نامقصدے پُہہ متوٹ۔ مچہ پھاش کرتینا گپے“ فریق پارے۔

”ای داپانگ خواہ کہ نی ہمو گڑاتے مون آہتہ ہرافتے آن ننا خوانوک مچہ بھاز مالو آن آگاہ مرے۔ اودے ہندا گڑاتا مچہ خبر مرے تاکہ اولدا ہندا نظراٹ ہندا نظریہ اٹ راجے ہرے۔ نی ہراتم کردار کسے ناذ کرے کیس تو اونا ذہن ٹی ہمو کردار یکدم دڑگی ناکردار آک، ندارہ غاک، کروکا پیناک غم او خوشی ناگپاک زواونا ذہن ٹی بریتا کہ او زونے تو نا افسانہ غاتون connect مرے“ ای پاریٹ۔

”دہیناتے آن بیدس خوانوک کنا افسانہ غاتو بھاز جوانی اٹ سفر کنگ یک۔ ای اوڑکن پوسکنو گڑا ہتیو ہ اودے جتا information ایتیو ہ اودے تینا افسانہ غاتے ٹی جتا و جہان نشان ایتیو ہ ولد اوتینٹ دُہن انگا گڑاتون سفر کنگ ہیل یک۔ اگہ نن خوانوک ناخوف آن پوسکنا گڑاتا بنائے کچن تو قیامت اسکان ننا ادب ہمواسہ گڑاتون اختہ مرو۔ نن ایلو ادباتے بچو وخت کسے ٹی رسیفنگ کپرون،“ فریق ورنڈی تس۔

”نہ ایلیم نہ“ ای افسانہ نگار کس تو افٹ ولے داہرا گڑاتا ذکرے نی کرلیس دا افسانہ غان زیات چانداری او نوشتہ غاتو نوشت مرو۔“

کنا ہیبت ولد اپور و متوکہ فریق خار کُنسا پارے ”گڑانی انت خواہ ای انت  
نوشتہ کیو۔ ای امر و گڑا تخلیق کیو؟ نے علم ارے تو پا“۔

”ای داپانگ خواہ کہ دا آسمان ناشیف آسہ گڑاس ہم پوسکن اف۔ دنیا ئی  
ہر تخلیق مر یک او ہمودور ہمودور نابند غیا اسہ خلق او نا ثقافت یا اسہ قوم او اونا باتیک یا مچ آ  
دنیا ئے اونا انسانا تے کن نوشتہ مر یک۔ نی اول براہوئی ادب کن نوشتہ کنگ اُس۔ ہرا  
تخلیق بیرہ براہوئی خوانوک اسکان محدود مر یک۔ اونی نوشتہ کیسہ تینا علاقہ نا مخلوق کن اوفتا  
نرینہ غاتے کن اوفتا چناتے کن اوفتا مسنتے کن اوفتا ذالبولاتے کن اوفتا سردار تے کن اوفتا  
پروفیسر اتے کن پین پین۔ اگہ نی اوفتے کن نوشتہ کیسہ وا منظر آتے خلیج نایا یورپ نا  
شاعس تو داوڑا مر مٹنگ کیک؟ اسہ منٹ سسے کن فرض کر کہ نی ”چچ“ نا سر حال آ افسانہ سس  
نوشتہ کر سس۔ نا بچے نا بگت مہار کرینے او پیرس (paris) نا بازاراٹ چکر کنگلہ نی خچہ  
غور کر یا نا کردار ہر تری سوٹ لُحی کرینے، لیپ ٹاپ دوئی گدان سسے ٹی تو لوک ایرانی  
چاہ کنگلہ خنی شکر خلا سنگلہ نی ولد امخاس یار نی خچہ اچھا داسا داوڑا ہر کہ نی اسہ افسانہ سس امریکا  
نا بازارا ونا کردار او اونا ویل آ نوشتہ کرینس۔ ہرا ٹی مسٹر سس تینا ارغے دا وجہ غان طلاق  
ایتیک کہ اونکان تیغ نی خورکا و کشک۔ انت دا گڑا غان نا خوانوک خوش مر یک؟۔ انت او  
ذالبول کن افسوس کیک او نا تیغ کن ارمان کیک یا نرینہ کن گڑاتی کیک یا اوفتا چناتے کن  
فکر مند مر یک؟۔

نادا پوسکنا افسانہ غاتے ٹی مسٹر پیشیم نا وختا تیغ آن بش مرو و لے ناراج نا مسٹر  
اذان تا وختا بش مر یک او تہار مہ ٹی ترا پڑیٹنگسہ ساہدار تے دیرا و بے کیک۔ نا افسانہ غاتے  
ٹی مسنک تینا چند نا گلاس سس صاف کپہ ورا و ناراج ٹی اُراتار و فنگ آن مسست مسنک اسہ وار

خلق نامسیت ے روفہ (جاڑو) خلیرہ۔ نا افسانہ غاتے ٹی مسٹر نا نیمہ دے بیوٹی پارلر ٹی تیر مرواونا ماسا مسٹر تر حسی کریم آن بغیر ایلو فتا پن تے ہم تپک۔ نا افسانہ غاتے ٹی مسٹر تون گاڑی وارا نا چا بیک مرور اونا داڑے کس تینا مسٹر ے پٹی نا چابی تے ایتر اونا بخت۔ نا افسانہ غاتے ٹی مسٹر نانت تے ٹی سینڈل مرور اونک گوڈ آتسکان پھاش مرور اونا منسک جو اونا چیل خنپسہ اوپا جباک تاڈ غار آن گرو۔ نا افسانہ غاتے ٹی مسٹر موبائل آن آن لائن تینا پسند نا خوراک آرڈر کرواونا مسنتے آن کس اونا پسند نا سبزی نا ہم ہر یفک۔ انت کس بازار آن بس ہمو فتنے چپ چپ بیٹ کیک کنیک۔ نا افسانہ غاتے ٹی مارمرسڈیز گاڑی آن دنگوشیشہ ٹی دفتر ٹی پترینگوا وایپ ٹاپے ملو۔ کافی کُنسا تینا کاریختے کرواونا ماسا ماک روزگار کن سرگڑدان چوک آتو لوک مفت نادو بروکا اخباراتے خوانرہ۔ نا افسانہ غاتے ٹی مار دولت مچ کنگ ناچم کرواواڑے مار نا نیمہ عمر ہندا سوچ اوامیت اٹ تیر مریک کہ تینا لمہ کن ہر اتم جوڑ کس پچ تینے آن ہلوٹ۔ نی تینا افسانہ غاتے ٹی باوہ غاتے پھین آصاف انگا پچاتے ٹی، تسبیح دوٹی اُراٹی صافو جاگہ کس تو لوک ٹی وی نا مونا نشان تنگ خواسہ ولے داڑے باوہ نا پھینا ٹوپ خازگی مرسا شیرچائی مسنے اوڑا سے آتو لوک یا تو بوٹ گنڈنگے یا چناتا باخو سے کن بخ ٹی لچغاتے ٹی بیل دوٹی ملک آتے کن دیر تغلہ۔ نا افسانہ غاتے ٹی لمہ غاک اُراٹی تو لوک خاموشی اٹ قرآن خوانسا مرور ولے داڑے لمہ غاک اُرا نا کاریختے ٹی رم کرسا دیٹکسا صاف ے شام کیرہ او بے ہوشی اٹ تنگان ہلیرہ۔ فریق جان داڑے خوانوک نا وڑ نا کردار خواپک۔ داڑے خوانوک تینا ماحول او تینا راج نا زندہ او کردار خوانک۔ منگ کیک ننا راج ٹی ہندو کردار ہم مروے ہراوڑ نا کردار آکو ولے اکثریت اووڑ اف۔ ولدا داڑے نا داراج ٹی حکومت ارے قانون ارے فیصلہ غاک مریرہ انصاف

مریک ایڑے سردار اک فیصلہ ہمو تم کیرہ ہر اتم تا مکہ نا اُرانا آخری رزان ہم بہا متنے۔  
 ایہن ہم اینو پگہ راست گواچی آن ادیب ہم تَرنگ ٹی اے او خوانوک ہم۔ ننا مخلوق خل  
 مسنے۔ ننا ادیباک تینے ریفہ او ننا افسانہ نگاراک ننا راج نا کنڈا ائنگ کپسہ۔ او جدیدیت نا  
 پنٹ تینا لغوری تینا نزوری اے ڈھلنگ خوارہ ولے نی داوڑ کپہ نی ہمو گڑا تے نوشتہ کر  
 ہرا فتنے محسوس کیسہ نی ہمو گڑا تے لکھ ہرا فتنے ای پنجرہ نا اے کنڈا تینا چٹکی ٹی خناٹ۔ نے  
 سمائے ای چٹکی ٹی انت خناٹ؟“ ای ہیبت کر سافر بق آن ہر فیٹ۔

او کاٹھے آخا ٹی سُر فسا ورن دی تس۔ ”ای خناٹ کہ ای اسہ ہند نو اُر اسے ٹی ودی  
 مسنٹ ہرا ٹی مسہ کچہ و کو ٹی و۔ اسہ تیرمہ ناشنکی نئے، اسہ ساہدار تے کن بی نئے، اسہ چکا تا  
 کدو نئے او ہرانا راستیکو کنڈا اسہ تندور نئے او اُرانا تہہ ٹی اسہ چراغ نئے او اسہ موٹل کرو کو  
 اسٹوپ نئے۔ اسٹوپ ناماس آبلہ نئے تو لوک ہزاری او تسبیح کس بٹینگہ۔ اولہ نئے ریڑی مخار  
 ناوڑ کن رم کنتگہ۔ اوڈبہ غاتے پُر یک ہیک اسہ واردلا تے پُر یک ولد اسموارے پُر یک۔  
 ولدا بھلو چا دان نئے ٹی دیر ہیک اسٹوپ آبلہ نامون سلنگ کن تنک۔ او کنا باوہ ملک آن  
 پیشن خواری کنتگہ۔ اونانٹ او بورہ کن پیسہ راہی یک۔ ننا خلق ہفت جاگہ غابشو کے او  
 بھلا غم دادے کہ داڑے کل اُر ا تینٹی اندا قصہ۔ کنا لٹہ صُحب آن شام اسکان تینا ماروتینا  
 پیرانگا لٹہ کن وارس ارغ بسک، وارس چا بیٹ یک، وارس چچ سلک، وارس ساہدار تے  
 بیڑک تو وارس گڑو یک او آخر شام تون ننا پادا تے شاغک۔ نے آن مست تنگان ہلیک۔  
 کنا بلہ ہر اُصُحب تون اُرانا مونا چٹائی آ تو لوک نیمروچ اسکان تسبیح بٹک ولدا  
 چھڑی نا کمک اٹ بٹش مر یک او مون سلگ بر یک نماز یک او ہنداوڑ پیالہ نئے چا کنیک  
 او اللہ اللہ یک۔ ای ہرا کہ لٹہ او بلہ نا خواری تے آ سودی سر پند مٹہ دے اونن یا کچک

جنگ تھٹھ یا چدو خلکٹھ۔ ای خنٹ کہ کنے ہندو مسٹر کسے تون محبت مسنے ہر ادے دوی  
 اف۔ ہرانا باوہ ئے ضمیر اف۔ ہرانا لٹھ کنالٹھ آن بار ایلو لٹھ غاتے آن بار ہڑز کروک  
 کسے خلوک کسے۔ ای ہر امسٹر ئے تینا کنگٹھ خواہٹھ او محبت ناپن آن خلیسکھ اوڑکن محبت  
 کفر اس۔ ولے ای علم تنخوہ کنے معلومے او ہندن محبت ناپن آ الزام خلکٹھ۔ اصل اٹ او  
 محبت آن آخا دا بند غاتے آن خلیسکھ۔ داراج آن خوف کریکھ۔ او دے محبت ناپن آن  
 خلیفیر۔ ای خنٹ او نا باوہ ئے تینا مسٹر نا پرواہ اف۔ ای خنٹ او نا باوہ دستار ثقافت او  
 ننگ ناموس ناہیت کیک ولے تینا چنا نا خوشی نا احساس اف۔ ای خنٹ او نا باوہ تعلیم نا  
 صفتا تے بیان کیک، علم نا پنت او نصیحت کیک ولے ایلو زینہ غاتے آن بار تینا مسٹر نا  
 اُسٹ نا حال آن بے خبرے۔ ای خنٹ او نا باوہ پچڑا خپک، ای خنٹ او نا لٹھ پچڑا ہنگ  
 خواپک، ای خنٹ کنا خنگ کنے برباد کریا ای خنٹ او مسٹر دا سا خنگ آن نفرت کیک۔  
 آخر خدا نا کنگ مس کہ ای خنی مسٹ او کنے خبر مس کہ دا خلکاک خلق افس دا  
 جہنم و۔ دا زندگی زندگی افس۔ دہن انگا زندگی انسانا تے چٹ کیرہ۔ دا مسنتے  
 ذابول، ذابولاتے بلہ ورناتے پیر او چناتے ورنہ جوڑ کیرہ۔ داڑے بیرہ زندہ منگے  
 داڑے زندگی اف۔ کل آن بھلا ویل دا اس کہ دا خلکیک دا گڑاغان بے خبرا سرہ۔ او ہندا  
 سمجھہ دا روح زمین آخہ انسان ریٹگرہ اوکل ہندا ویا او فٹے آن زیات خوارو۔ او فتا  
 نظر ٹی دنیا نا کل آن آسودہ انگا اُرا ہمواس ہرا ٹی پینکو سا ہدار مروس، کل آن آبادانگا اُرا ہمو  
 اس ہرا اُرا ٹی مٹھ چار نشار مروسر۔ کنا سنگت عامر نا بھلا خوشی ہمواس ہرا تم او نا گزہک  
 چک کس الوس۔ ننا پیر انگا تا بھلا غم ہمواس ہرا تم فصل نا تیار منگان گڈ پھر کروس۔  
 داسانی کنے داپا کہ ای داما حول ٹی بھلن مروکانے امر اجازت ایتو کہ فی دا انسانا تے کن

پوسکنو قصہ لکھ۔ فریق جان تا نکہ ناراج ننا ماحول ننا زندگی ٹی پوسکنی بتنے ننا ادب ٹی پوسکنی  
 بفک او چاہے نثر مرے یا شاعری۔ جدیدیت دا وختا ہمو دے کہ فی تینا متکنا غے پوسکنو  
 انداز نئے ٹی بیان کیس بس۔ داکان بغیر ایلو پیتاک بکواسو۔ منگ کیک کس اعتراض کے  
 ولے گوا چنی ہندادے۔

نے سمائے فی ہر اتم کنا دڑنا ذکر کس کیس کنا اُسٹ نا ہیئت کس مون آہتیس ای امر خوش  
 مریوہ کہ دابندغ کئے پہہ مس۔ دابندغ کئے سر پند مر یک۔ نا افسانہ غاک قاری ئے ہمو  
 تما خوش کرور ہر اتم فی اونا ویل کس اونا خنکو منظر کس اونا بنکو ہیئت کس اونا کرو کا فعل کسے نا  
 ذکرے کیس۔ گڑا او خوش مر یک کہ دابندغ کنا وڑنا زندگی کس بیان کرینے۔ داکنا غے  
 بیان کرینے، داکنا خوشی تے پہہ مر یک۔ دابندغ احساس ارے۔ اصلی رشتہ ہندادے  
 ایلو رشتہ غاک بیرا سئی و رشتہ جوڑ مسو۔ داسا ایکان نا مرضی، ای فریق ئے سنجیدی اٹ  
 پنت تر سا پار یٹ۔

کنا ہیئت تے آن گڈ فریق دم کسے کن خاموش سوچ خلک او ولد اکاٹھے سرفسا پارے ”بس گڑا  
 داسا ہندن کینہ فی علاقہ نا زندے خناس، علاقہ نا مخلوقے خناس او فتادڑ ویل، خواست او  
 خواہشات تے پہہ مریسہ داسن ہر تو ماک اوارد افسانہ غا تا بنا کینہ گڑا۔“  
 ای کاٹھے ہوئی سرفیٹ او وکان گڈ دا افسانہ غاک بنا مسر۔

ای دا گڑاے ایمانداری اٹ پاوہ کہ کئے دا گڑا نا سما ف کہ دا افسانہ غاک علامتی (Symbolic)  
 تجریدی (Abstract) کلاسیک یا استعاراتی افسانہ غاتے ٹی نوشتہ  
 کنگنا نوا آخا۔ دانا وجہ دادے کہ ای بیرہ تینا تہہ نا انسان نا غے، اونا پریشانی تے، تینا چٹکی نا  
 ڈکھ وڈ دے افسانہ نا درو شم اٹ بیان کنگ خواہسٹ۔ اینو پگہ افسانہ غاتے ہم زیلاتے ٹی



بشنگ نا دود بنا مسنے ہرانا وجہ ے بھازاک زمانہ نا Narrows آتا پیچیدہ نامنگ پارینو۔ داہیت ہم منہ ٹولی اسکانے ولے کنا نظر ٹی دنیا ناخہ افسانہ نوشتہ کنگا نو چاہہ سماجی ویا کہ سیاسی یا ایلو وژنا داکل ٹی بیرہ ارا گڑا نظر بریرہ۔

اوداکہ بھازاک اڑزان اسلوب اٹ نوشتہ او بھازاک افس۔ یعنی جاگہ کس افسانہ نگار خواری کر ساخوانو کاتے کن اڑزانی کرینے جاگہ کس نگارش قاری ے محنت کرینے۔ دافتنے آن بیدس پین چو گڑا نظر بنگ۔ ای داہر تو ما گڑاتے دوست تخواہ او تنخاٹ ہم۔ دافتنے آن بیدس افسانہ ناہیت ہرا کہ کنے براہوئی افسانہ غاتے ٹی نظر بتوس ای کوشش کریٹ کہ اورنگ او دروشم ہم اوار مرے۔ او امین ہم افسانہ نا Analysis افسانہ نازیکل تا پانک۔

دا افسانہ غاک کنا اُست نا بھلو بڈ کس کم کریر۔ دا افسانہ غاک کنے ساعت کسے کن آرام بشخار ای دافتنے نوشتہ کنگ نا وختا ہو غاٹ ہم ارمان ہم کرینٹ اودعا ہم کرینٹ کہ اللہ ناراج نا دافنامے بدل کے او نا مخلوق آسودہ مرے ولے کنے قرآن نا دا آیت یاد ہم بسکہ کہ

”اللہ ہمو (نعمت) ہرا اسہ قومے (حاصل) ارے بدل کپک۔  
تاکہ او تینا حالتے بدل کتنو۔ او ہرا تم اللہ ہرا قوم تون برائی نارادہ  
ے کیک تو او چپ متنگ کپک۔ اللہ آن بیدس کس اوقتا کمک  
کروک مفک۔“ (الرعد)

ای امیت کیوہ دا افسانہ غاک نھے دوست برور۔ کن تو او ار نما ڈداک ہم زرس کم مرور۔ یقیناً ای وخت وخت سوچوہ اگہ کنے ٹی دافریق پنی آ بندغ جاگئی مفروس ای

نوشتہ کارئس مفروسٹ تو کنا سینہ تہہ ٹی دُر داوگرتی آن تر خاکہ۔ کنا خٹک کنا خط یںکاتا  
 سیلاب آن آوار سرہ۔ کنا بدن نا لڑزہ اچیر ایسر متوکہ۔ داپیہنا کاغداہمت اونا خیر خوائی  
 ئے کہ اودا دینا نا بھلا آبادی آن چپ تینا سینہ غانا غمتے نوشتہ کنگ نا جاگہ ایتک۔ نئے تینا  
 سینہ غا ہو غنگ کن الگ۔ ننا خط یںکاتے سلگ۔ ننا کاٹے تینا کوپہ غا تھک نئے نوار یفک  
 نئے امیت ایتک۔

ای منتوار اُٹ شیخ عتیق حسرت مینگل صاحب نا، ای منتوار اُٹ تینا مہروان آ  
 ایلم زیر راز نا، ای منتوار اُٹ تینا کوپہ صلاح الدین آزاد صاحب نا کہ او فک کنا غیر  
 موجودگی ٹی دا افسانہ غاتے کتابی و درو شم کس تسر۔ ای تینا ہنیا خولجہ محترم عطاء اللہ سرپرہ  
 نا منتوار اُٹ اودا افسانہ غاتے کنگ کمپوزنگ کرے۔

دا افسانہ غاتے ٹی ای ہر اکردار اتے کن اٹھ پن استعمال کرینٹ اوکل فرضی و۔  
 لہذا ای نمے آن خواست کیوہ کہ دافتنے بیرہ قصہ نادر و شم اٹ ہلیرے او خوانرے۔

نماہمومست نا

عمران فریق

## تینا

سوریا (شام) نا حالت تے ٹی وی تے ٹی ختگ او جنگان ہندا معلوم مسکہ کہ  
 مسٹیکو عالمی جنگ نابنا مسنے۔ سوریا نادامروکا جنگ ٹی اراجتا و فریق اوارا سر۔ ہرا ٹی اسہ  
 کندان دنیا نا چکا چکا طاقی آملاک او ایلو پارہ غان امریکہ او امریکہ نا حواریک اسر۔  
 داک دنیا نا جتا نگا علاقہ غاتے آن دہشت گرداتے ارفیرہ او سوریا ٹی جنگ کن یلہ کریرہ۔  
 ہرا دہشت گرداک زندان آتے ٹی تینا سزاتے پورا کنگ اسرا وفتے ہم پیسر او  
 ایلو دہشتگردون او ارشام ٹی بیڑتا کہ بشارنا حکومت تمہ او اگہ بشارنا حکومت تمہ تو کم کس کم  
 دا جنگ ٹی دہشت گرداک تو مڑدار مریرہ۔

دا اسہ بھلو سیاسی و سوچ کس اس و لے مسئلہ ہمو تما و دی مس کہ دا دہشتگردا تا  
 جنسی خواست آتے پورا کنگ نا سوال بش مس۔ ہرا نا حل ے دہشتگردا تا کما شک داوڑ  
 کشار کہ مجوسی تا ہر افریق ہر علاقہ ے فتح کرے تو او ہمو علاقہ نا ذال بولا تے تینا کینر جوڑ  
 کیراوتین تو ہڑسر او ہرا وخت اسکان اُستاک تا خواہسر او فتنے تور تینا خواہشتا تے پورا  
 کریرولدا کہسفر تہ یا یلہ کیرتا او فقا مرضی۔

منہ وختان گڈ دہشت گردا تا دا فیصلہ غا پابندی ختنگ او اوقا جنسی خواست

آتے کن مجوسی تا اسہ ٹولی کس، جہاد النکاح، ناپن آفتوی کس تس۔ ہرائی بالغ انگا مسنتا  
ڈوہنگ شروع مس۔ ہراڑے نکاح ناپن آ مسنک او ذالبولاک مجوسی تون اوفا جنسی  
خواست آتے پورا کننگ کن او فتون منہ گھٹھ گدر بیفیرہ او داوڑا وہم خلنگ ٹی شریک مسرہ  
او تین کن جنتے واجب کریہ۔

بھلا مسئلہ ہومتہ ودی مس کہ اسہ ذالبول کس مجوسی سے نا جنسی خواہشے پورا کننگ  
آن انکار کرے او مجوسی تا خلیس آن تین توار تینا ہڑتو ما مسنتے ہم زندہ خاخر تس ہشا۔  
دا ذالبول نا تینے او تینا مسنتے ہشنگ نا خبر دنیا کن اسہ بھلو سوال کس مس۔ ہراڑن  
گڈ شرق الوسط اسہ جرگہ کس اڈ تس او ہرائی دا فیصلہ کننگ کہ شامی تا عز تا تے پچھنگ کن  
اوفا ذالبول او مسنتے سوریا آن کشن او تینا ملکاتے ٹی ہتین۔

شرق الوسط نا فیصلہ غا عمل کننگہ او شامی مسنتے آن ہرا کہ دا جنگ ٹی چوری مسوسر  
ہمو فتنے خلیج نا ملکاتے ٹی ہشنگ شروع مس۔ قاہمہ غاشامی مسنتے ہتنگ آن منہ دے گڈ  
حکومت اعلان کس کرے کہ ہمو بند غاک ہرا سرکاری و ملازموا گہ او فتنے آن کس دا سوریا  
نا (شامی) مسنتے آن برام کننگ خوانک توفلان جا گہ غابرے۔

دا خبر صُحب تون اخبار ٹی بس او شام اسکان کل سرکاری ملازمین آتے آسر مس۔  
قاہمہ ٹی سوریا نا بھلو بند غ کس سرکاری عہدہ غاتے آ کاریم کریک ہرا فتنے  
آن بھازا زینہ غاک نیت کریک کہ او تینا علاقہ نا مسنتے آن برام کرو رانتے کہ او ایلو  
بند غاتے آن زیادہ اوفا بیوسی و درڈ دے پُہہ مسرہ ولد اشامی تا تور و اج کسے کہ اوفا ہر زینہ  
ارامسہ برام ضرور کریک۔ تو ہرا ہرا شامیک اسہ اسہ برام کریسر او نار ہمو جا گہ غا او تینا پسند  
نا مسن تون نکاح خوانار۔

دانیام اٹ پیست دے گدرینگا او شامی مسنتے آن ہشت پین مسٹر داسکان  
 بچا سرکہ ہرافتا برام متوس۔ حکومت ئے خبر مس کہ دامسنتے کن داسا شامی تو کس بفق  
 ہرافتے بروئی کس او تو بسر۔ داسا دامسنتے ایلو قوم اوزبان نابندغ آتون برام تروئی تمگ او  
 ایلو قوم نابندغاک بغیر مفاداولچ آن شامی مسنتے انتے برام کرور تو آخرے سرکار اسہ پڑو  
 کس کرے کہ ہرابندغ دامسنتے آن کسے برام کرے تو اودے ہر تو حکومت ناکندان صد  
 لیر املو۔ دا خبر نا عام متنگ تون بھلونرینہ سے نانیت بدل مس او برام کن راضی مسر۔ منہ  
 دے ٹی ہفت مسٹر نا برام مس۔ داسا بچا سس اسہ مسٹر کس۔

چا کرخان ہرا کہ قاہمہ نا پولیس ٹی کاریم کریکہ۔ ہرانا اُست نارمان اس کہ او  
 شامی مسٹر کس برام کے۔ چا کرخان ئے ہرا دے سئی کریر کہ داسا اسہ مسٹر کس بچانے تو اوڑا  
 ڈغار کٹا۔

چا کرخان بیوس تو سے آن دے اونن اللہ اللہ کریکہ کہ اونا برام شامی و مسٹر کسے  
 تون مرے۔ ہراڑ کن او ہر شام نیت کریکہ کہ تینا زایفہ ئے پاوہ کہ اونا اُست خوانک او  
 شامی کس برام کے او تینا اللہ ئے راضی کے ولے مسکین زایفہ نامونا ہمت کنگ کتو کہ۔

چا کرخان اینو آن پانزدہ سال مست قاہمہ پولیس ٹی بھرتی مٹس او بھرتی آن  
 گڈ شروع نا چار سال او بلوچستان کن مون کتو۔ چار سال کاریم کرے او جوان پیسہ مچ  
 کرے۔ آخر ہندا پیسہ غاتے اٹ اونا باوہ تینا بھلا ایلیم نامسٹر سوز پری تون اونا برامے  
 کرفے۔ برام آن گڈ مسہ تو نا چھٹی گدریفنگان پد چا کرخان ولدا قاہمہ آلس۔ قاہمہ غا  
 بنگان گڈ چا کرخان ولدا علاقہ کن انتو۔ دانیام اٹ اودے ہندا خبر کنگا کہ اودے مار کس  
 مسنے ولے واہم اونا اُست تینا مار نا خنگ کن کشتو۔

چاکر خان ہر اتم داخلہ سال چھٹی انتوتو علاقہ ٹی اونا پن آ افواہ کس شاعر کہ چاکر خان قاہمہ ٹی عرب کس برام کرینے ہرانا سوبان اوتینا دا چناتے یاد کپک۔ داہنک ہر اتم چاکر خان آسر مسرتو علاقہ والا تا ضد آن تینا ز ایفہ اومار کن فیترہ کرے او او فتنے قاہمہ آبنگا۔

اینو چاکر خان نا چناتے قاہمہ ٹی پورا ارا سال مننگہ۔ ہرا اوڑتون دالک ٹی بھاز خوشو۔ چاکر خان نے اولیکو مار آن گڈ ولد اچ چناتو او ہرانا غم فقط اونا ز ایفہ سوز پری نے اس۔

اینو پھگہ چاکر خان نے فقط اسہ غم کس اس کہ وڑسے اٹ شامی آسرتون اونا برام مرے او ہراڑکن دے اونن او اللہ غان دادعاے کریکہ کہ اوڑن مست کس شامی مسٹر کن انپ او او دے برام کپ۔ ایکہ جندتا ہم دا خوہمت کس کتو کہ کہ تینا ز ایفہ تون گپ کے۔ اوڑن اجازت ہلے او کا نہہ تینا برامے کے۔

خیر بھاز سوچ اوہمت آن گڈ اسہ دے شام تون تینا ز ایفہ تون تو لوک او دے بیوس وارمانی ولجہ سے ٹی سئی کرے کہ ”قیامت ہسے۔ خدا نا خوف اُستاتے آن مرہسے، کپ خدا دالک آتا سیاست آتے نازرک انگا مسنتہ ذالولاتا چناتا بلاتے ارفیر تینا دہشتگرد آتون۔“

سوز پری ناملی ٹی ہیبت کس ہم تمنو او حیران کس کہ چاکر انت پانگلہ۔

”دنا پاسہ؟“ سوز پری ہر لیفے۔

”شامی بیوس آتا پاوہ اُراتا ہشار لہہ باوہ ایڑ ایلیم بندغاتا چٹ کریر توبہ توبہ“

چاکر سوز پری نے پھہ کر سا پارے۔

”شامیک دیرو؟“ سوز پری معصومیت اٹ ہر لیفے۔

”او بختاور! شامیک مطلب سوریا نابند غاک۔ سوریا ملک کسے مسلمان تا“ چاکر سوز پری  
 نے سبق ترسا پارے۔

”گڑا دافتمد دے انتے کس کپک؟“ سوز پری ارمان کر ساہری لے۔

”دے مد دے تاکے؟۔ کل تین کن خلیہ، واہم خدا نا شکرے کہ دا خلیج ناملاک  
 اوتا مسنتے اوذا البولاتے ہمو خاخر آن کشار پیسر۔ داسا داڑے خدا والا ک تینا ثواب کن خدا نا  
 رضا کن ہمو مسنتے آن برام کنگو“ چاکر داخہ وخت نا تیار کرو کاہیتا تے سوز پری نے پارے او  
 تینا چپکوخن ناکک اٹ اودے ہر سہ کرے کہ معلوم مرے دا گپاک اوڑا اخس اثر کریر۔

سوز پری نے چپ او پریشان خنگ تو او ولد اپتے مونی درسا شروع مس  
 ”الحمد للہ قاہمہ جوانو ملک کسے۔ جوانو نیکو بند غ ارے داڑے ہرافتے پین تا  
 دڑنا احساس ارے۔ دا اللہ نا مومناک داسنتے آن کلے برام کریر، دریر تینا اراتا عزت  
 جوڑ کریر اوفتے شرف بشخار“۔

”کلے برام کریر؟“ زانیفہ تاہری لے۔

”ہو، کنا خیالے بس ارٹ مسٹ بچانو“ حالانکہ چاکرے جوان معلوم مس کہ  
 فقط اسٹ کس بچانے، اوانت کسے کن ارٹ مسٹ پارے دا توکنے ہم معلوم اف۔  
 سوز پری اوناہیتا تے غور ٹی بنگ اس کہ چاکر خن تے زکس خمار تو ارے ارمانی  
 کر سا زانیفہ ناخننے ٹی خن تے شاغسا پارے

”نے سمائے سوز پری، اہسکہ فی کنے دوست اُس ہمو خس کنا چنا کنے دوستے۔  
 بس، وخت وخت اُست ٹی ارمان کس بریک کہ کاش خدا جان کنے اسہ مسٹر کس ہم ایتوس ننا  
 زندگی اٹھ ہنین مسکہ۔ شروع ٹی کنا اُست ٹی خیال بس کہ داسکین بیوس شامی انگا مسنتے

آن اسٹس برام کیو لے ولد اکنا خنتے ٹی نی بسس تو اُسے خاموش کرفیٹ او تین تو پاریت کہ خدا مالک نئے، اودے تروی مس تو تینا خزانہ غاتے آن نئے ضرور اسہ مسٹرئس ہم ایتک اوسیس دامسنا بیوی ناگپ تو ای آخا تو پین اسٹس اوفتے آن اسٹس برام کیک۔ ایہن ہم حکومت برام کروکاتے ہرٹو نا صد لیر ایتک اودا صد لیر اکن ہر بندغ تیار مریک۔

سوز پری آچا کرنا پیتاک بھلو اثرئس تجار اودے مارئس منتگان باوجود بے اولادی نا احساس متنگ اس۔ ایکہ اُسے ٹی تا خوفئس ڈرینگہ کہ دہن مف چا کر برام ئس کروے دا کل ڈڑداتے سینہ ٹی دین کرسا اوچا کر آن ہر یفے ”صد لیر ایتک حکومت؟“۔

”ہو، ہرٹو صد لیرا۔ اخس مریرہ علاقائی۔۔۔ سی ہزار، آن پوروسی ہزار۔ بھلو پیسہ سے سی ہزار، داخس پانگان گڈ چا کر بالشتے سرچہ کرے او خنتے تر کرسا دعا کرے کہ خدا کے سوز پری ئے سی ہزار نا لالچ ار فے۔

سوز پری ہم تینا کاٹھے بالشت آتھا اوسوچ ئے ٹی اختہ مس کہ ”چا کرنا ارمان ئے کہ اودے مسٹرئس مرے او ای تو اودے مسٹر تینا جاگہ غاپین مارئس ہم تننگ کپرہ۔ اونرینہ غاتا تو دستور ئے کہ اولاد کن پین برام ئس کیرہ۔ اینو آخا تو پھگہ چا کر ہم برام ئس کیک، او خدا چاہہ امروس برام کرو۔ اگہ اودے برام ئس کروئی ئے تو داٹرن جوانے شامی ئس کے، ہرٹو نا صد لیرا ہم رسینگک اوارا تون اوارکنا خذ متے ہم کرو۔“

چا کر اُسے ٹی اللہ ئے زاری کنگک اس کہ بس اللہ جان کننا پیتاک داڑے اثر کیرا سوز پری کئے خوشی خوشی اجازت ایہہ برام کن۔



سوز پری ہندا سوچ ٹی اس کہ یکدم اونا ذہن ٹی اپوکی نا خیال دڑینگا، اود خوف نس  
 اُسٹ ٹی ووی مس کہ دہن مف پھگہ داشمی نا وجہ غان کنا عزت چا کر ناخن ٹی کم مروے  
 اومست نامہر سلپر وے۔ ہنداڑ تو اچانک اودے جمعہ گل نا اڑمیکو زائیفہ یاد بس ہرا دے  
 جمعہ گل کچی غان برام کریس او برام آن گڈ تینا بھلا زائیفہ او چناتے کلے بے غرض کرے  
 او چنکا زائیفہ نا غلامی ئے شروع کرے۔ اودے دا پریشانی ہم اس کہ شامی ئے چنا  
 مروے او چنک تا ورنامنگ تون ہمو ہر گڑا ٹی شریک مرور ہرا اینو کنا مارناؤ۔ نہ نہ بیج  
 ضرورت اف چا کرے برام نا۔ نن تینا دا خوش حال آزندے انتے خراب کین۔ ایہن  
 ہم ایلوکل مسنتہ برام مسے تو داسلوکا تا ہم مریک سلیس چنا ناگپ اللہ تس تو اسہ پین چنائس  
 لیتک، اودا نا انت یقین کہ شامی آن اودے چنا مریک او ہم مسٹرکس۔ سوز پری جوان  
 ہرے اسکان تین تو پڑ پڑا او آخرے فیصلہ کرے کہ چا کرے برام نا ضرورت اف۔

صُحب تون جمعہ نادے نس او چا کر خان نا چھٹی اس۔ ٹُغ آن بش متنگ تون  
 چا کر خان نا خنک سوز پری نا پٹنگ شروع کریر کہ اونا فیصلہ ئے بنوا نت پانک۔ سوز پری  
 دالان ٹی سوارہ نا برنجاتے کن مچھی تے صاف کنگ اس۔ ہرا چا کر خان نا خاص انگا  
 خوراک اس۔ ہر جمعہ نا سوارہ غا او مچھی کنگلک۔

غسل، پچ، تیل اور ندنگ آن گڈ چا کر بس کو ٹی ٹی تو س تو سوز پری چاتے بیس  
 مونا تہ تہا او سر ہلک دالان کن۔

چا کرے اُسٹ وار دما جوک خلک کہ فیصلہ نا ہر یفو ولے چا کر ہرا کہ صاف  
 صاف دن ہر یفنگ کریکہ۔ اودے خلیس اس کہ دہن مف سوز پری غصہ کروے۔ چا کر  
 تو اودے پاریس کہ او اللہ نارضا کن تینا ثواب کن شامی نس برام کنگ نا سو چا س گڑا  
 داسا امر اودے پائہ۔

ولے اصل انگا گپ تو نے سمائے کہ چا کرے شامی مسن تو بچو ہمدردی کس الو۔  
 اودے ثواب کنگ نا اصل شوق الو۔ حقیقت دا اس کہ چا کرے شامی مسک بھاز دوست  
 اسر۔ چا کرتون بھاز آ شامیک پولیس ٹی کاریم کریرہ ہرافتے آن او اکثر ہنگلہ کہ ننا ماسا  
 چٹکی آن تینا مسنتے ارغ، ہنینی او پین ہروڑ نا کنگ جوڑ کنگ ہیل امترہ او واقعی اس ہم  
 ہندن۔ دختس ڈیوٹی آ چا کرنا سکتا کہ تینا اراتے آن ارغ پیسہ تو چا کر اوفتے کم کس کم  
 چنچ وار آن بھاز ہر یفیکہ کہ ”دا کنگا تے ہرا ہول آن پیسہ“۔

ہرانا جواب ٹی شامیک بھاز فخر اٹ پاریرہ ”دافتے اراغان پیسن“۔  
 او چا کر حیران مساکہ او اُسٹ ٹی تارمان کس ردا کہ کہ کاش ای ہم شامی کس  
 برام کرو سٹ، ہرا کنگ کن دہنو گڑا کروس، دہنو ہنینی جوڑ کروس۔ شامی مسنتا زبانی نا  
 اندازے او اوقات زینہ غاتے آن خلکوسس، کہ اوقاتا دخیسن آپہن آ کاغذی رنگ، شکن آ  
 بامس او بالاد اٹ ماشاء اللہ کل بڑز۔ یقین جنت نا پری او۔

اونا اُسٹ ٹی کئی سالاتے آن دارمان جاگہ ٹی اس کہ او شامیس برام کے۔  
 داسا داونا اُسٹ نارمان نا پورا کنگ نا اولیکو او آخریکو موقعہ اس ہرا دے او چو وڑٹ پوک  
 کنگ خوا تو کہ۔

سوز پری نے اڑسا ہر لے

”آلہ مُرید ہرا دے؟“۔

”مُرید ہندا خہ مچھی تے پیس اونرا آنا گوازی کن“۔ ہندا خس پانگ تون

سوز پری دالان ٹی پترینگا۔

چا کر چاہ کنسا سوچ خلنگ اس کہ داسا ہرا وڑٹ دادے سوچ کیو؟۔

ہندا فکر و سوچا تے ٹی اذ انک شروع مسر چا کر نماز کن پیشتما، ایکان بس تو برنج و  
 مچھیک تالان مسر۔ مچی تا ختنگ تون چا کرنا ذہن آن شامی نا برام نا خیال پرینگا۔ جوان  
 مچھی تے خلا سسا، چند سا، برنج کنسا ہر اتم سیر کرے تو شامی نا بیوسی او نا برام نا خیال ولدا  
 دماغ ٹی تا حاضر مس۔ ایہن تو عموماً انسان نا پھڈ پُرس تو او ایلو فنتے گیرام کیک ولے  
 داڑے قصہ پین وڑاس۔

ارغاتا مچ کننگان گڈ سوز پری بس ہموڑے چا کرنا ماسا تو س تو دم سے نا پچی  
 آن پد چا کر ہر یفے ”نی انت پاسہ قاہمہ نا حکومت جوان کرے کہ داشامی آمسنے ار فے  
 بیس؟“۔ حالانکہ اودے دا سوالے کروئی الوو لے مجبور اس امر کرو س، وڑ سے اٹ تو  
 سر حالے شروع کروئی اس۔

”ہو، بھاز جوان کرے اے خاخر او عذابا تے آن کشہ تہ“۔ سوز پری بے رضا  
 بے رضا ورندی تس۔

چا کر کن دا جواب تسلی تر کو جواب نس الوو لے واہم چپ کرے۔  
 سوز پری مونوی ہیئت کر سا پارے ”اسہ گڑاسے آنی غور کر لیس مُرید نا باوہ؟“۔  
 ”انت سے آ؟“۔ چا کر زوزو ہر یفے۔ او تو لوک ہندا سوالا تے کن اس۔  
 ”عرباک تینا بندغاتے کن، تینا بندغاتا عزت او شرف کن او فتا خس کمکے  
 کیرہ۔ دا تو چتکو کاریم نس اف کہ جنگ نا نیام آن مسننے ارفنگ ہتنگ او فنتے داڑے برام  
 تنگ، او فنتے پوسکنوز ندگی تنگ، دا تو بھاز بھلو کاریم سے۔ ننا بندغاتے تو بوڑ نس ہم کپک  
 تینا بندغاتا کمک کن“۔

”بلکل سئی پاسہ۔ ہندا وجہ غان خدا تو عربا تے آن خوشے او ہر گڑا ٹی او فنتے

نوازانے۔ اسے گڑا سے ناکمی اف تا۔ ہندانیت و نیک انگا کاریمتے آن اودا وڑ خوشحال او  
 آسودئی نازندگدریفنگو۔ دے اونن تینا تا کمک کن سلکو ہروڑ نا کاریم او ہروڑ ٹ تینا تا  
 خذمتے کیرہ او ایلو دے ننا مخلوقے ہرا خدا کیرہ کہ تینا بندغ کس دُون سے ٹی تمی اونن  
 زوزو دُون نابائے ملین، اوننے ننادانیت آتا صلہ ہم تورسینگانے کہ عمر بھر خوار در پد اُن“  
 چا کرسوز پری ئے سنجیدگی اٹ ورنندی تس۔

”ہیت ہندادے۔ نی اسہ کاریم کس انتے کپسہ؟“ سوز پری ہر یفے۔  
 چا کر حیرانگی اٹ سوچ کرے ”انت کس؟“۔

”الواد خدا نانتے سے۔ ہندا وڑ کہ نا اُسٹ خوانک نے مسٹر کس مرے ہندا وڑ  
 کنا ہم ولے خدا نا فیصلہ غا تو ن نن کاریم تو تو نگ کپنہ۔ اسہ چنا کس تو او نن تینا در آن  
 تس اگہ تروئی مس تو پین کس ہم ایک، واہم اگہ نا اُسٹ خوانک تو ای نے برام سے آن  
 تو پرہ۔“

برام نا پین تو چا کر نا ختا مون آپوٹلکن آرو چیکو دان نا تیل تے ٹی فرائی مروکا  
 ڈڈانگا مچھی تا پروطشت کس بس خوشی آن جوڑک تا کوش ہلکر۔ او خاموش بشندہ کس کہ سوز  
 پری تینا پتے موئی درسا پارے

”اگہ نے برام کروئے او کئے سمائے نا اُسٹ خوانک ہم، تو گڑا عر باتے آن  
 بارنی ہم تینا تا خیال او فکرے تخسہ اسہ تیناس برام کر۔“

سوز پری نا ہندا گپ تو ن چا کر نا مون آن بسوک انگا چھیک بال کریر او  
 پریشان مرسا ہر یفے ”امر؟“۔

”کنا پانگ نا مقصد دا اس کہ اگہ نی داشامی نا جاگہ غا اسہ تیناس تینا علاقہ

غان برام کیس تو انت خرابی نئے۔ داعرب آن جوانے تینا زبان تینا علاقہ ناس مرے۔  
سوز پری جواب تس۔

چا کرے اینو خبر مس کہ سوز پری ے او اخبو بد وئس سمجھا کہ او تو اوکان زیات  
ہوشیارے۔ اودے داہم معلوم اس کہ سوز پری داہیتے دا سوبان کنتگہ کہ او علاقہ نامسٹرئس  
برام کے ہر اعرم بھر علاقہ ٹی مرے او سوز پری داڑے اوڑتون زندگدریفے۔ سوز پری ے  
غلط ثابت کنگ کن او نا مشورہ ے غلط قرار تنگ کن بھاز دانہ او جواب ئس ترسا پارے

”سئی پاسہ“ ولے نے سمائے ای اگہ برام کن علاقہ نامسٹرئس ہر یو تو اوڑکن کنے  
کئی لکھ آتے لب تر وئی تمک ولد مخلوق نا دعوت جتا۔ ننا اننگ بنگ نا خرچہ غاک، او فتا  
کنڈان طلب کرو کا خیسک، ایلو سامان تازر آک، دا کل انو پیسہ ئس مریرہ۔ داڑے اسہ  
گڑاس کروئی اف، بس نکاح ئس خوانوئی ے ہر ادے سرکار خانفک تینے آن او داڑن  
بیدس تمام عمر تو نا صد لیران کن بریک، چا کر بیوس انگاخن تون جواب تس اوچپ کرے۔  
سوز پری ے ہم محسوس مس کہ چا کر نا تو کل گپاک راستو ولے داکان باوجود او

چا کرے اجازت تنگ کن تیارالوا و ہندا برام ناہیتے ڈم تنگ کن تینا ہوشے چلم تون چپ  
کرے اوچپ توس۔ چا کر ہم تینا سوچ و فکر اٹیٹی اختہ مس او اراٹی خاموشی تالان مس۔

زئس بت آن بار تو لنگ آن گڈ چا کر کر اکر ایش مس او اراغان پیش تما۔ ایہن  
تو ہر جمعہ او تینا چناتے ہر فیکہ گارڈن آدریکہ ہراڑے مرید گوازی کریکہ او جندا سوز پری  
تون خرنا پینکا خرسی تے آچا و پلا کنگو کا ولد ادے کیہلنگ آن گڈ ہڑتو مارغ اوزانیفہ  
سمندر ناما ساواک کر سا مجلس کریرہ۔ خفتن نا نماز آن گڈ سوز پری نا پسند نا کتغ ئس ہلکرہ او  
اُراغا انا رہ کنگرہ ٹی وی ہر ارا او تینا مرضی اٹ ہرے آخا چارہ۔ ولے اینو چا کر تینا پیشتما او

گاڑی نے ارفے کھونڈے سے آسربلک۔ ہرانیہ کن سربلک دا اودے ہم معلوم الو۔ جوان سفرئس کنگن آن گڈ اودے خیال بس ”برام تو ایہن داسا مشکلے اوزند چ ارمان کننگان جوانے اسہ نظرئس تو شامی مسٹرے خنوسٹ امروسے ہراڑتون ای برام کن تیاراٹ ای تو اونا کاٹم ناتارئس ہم خنٹے۔“ چا کرے داخس تو معلوم اس کہ مسٹرنگ اٹ پیہن کاغذی سے انتے کہ شام ناکل بندغا کہ ہندارنگ ناؤ ولے نقش اٹ امروسے داگڑا نا اودے دئس ہم معلومات الو۔

خیر او ہندا خیال ٹی اس کہ یکدم نیت کرے کہ کاوشامی نے خنیو دنیاے خدا تو رینے۔ او سربلک ہموکتب کن ہرانا عنوان (پتہ) اودے معلوم اس۔

دمئس متو کہ چا کر سربکاری وبلڈنگ سے ناگیٹ آن پترینگا۔ گاڑی نے پارک کرے او گام کرے ہموکتب کن ہرا اودے جتاؤ زندگی ئس بستنگ اس۔ دروازہ غاسر منگ تون پچاتے آتینا نظرئس شاغا تو حیران مس کہ دا امرای ہندا پچاتے تو سربلکونٹ ولدا خیال بس کہ اگہ دا پچا تو خدا نا مونا جمعہ نماز خوانگ کیوہ گڑا داسا انتے شرمگؤ دروازے اراوار اخلاقی ثبوت گن ٹکلفے تو تہہ آن ذالبول سے ناتو اربس

”فضل (بو)“ چا کر دروزے ملہ او پترینگا۔

مکتب ٹی پترینگ تون چا کر سلام بیٹے

”اسلام علیکم“ سلام نابڈنگ تون نظر تا ذالبول سے آتما ہرا استقبالیہ نابڑز وکری سے آتو لوک اس۔ دادے خنگ تو چا کر ابلہ مس او اُسٹ ٹی پارے ”اے خدا! نا کارخانہ ٹی دہنو بد صورتو ذالبول ہم ارے کنے دا کان مست معلوم متے۔“ دا ذالبول بالاد ٹی زور خلوس چار فٹ ناس مسکہ۔ اشکنو چکنو مون ئس تا اس ہراڑے بیچ کلونا میک اپ لیپائی

مُسّس، خفنا کونہ غاتے آن شیفک ے ہندن کشاس دہنکے چٹوک کرو کو کوٹی سے نا دیوال آپھر نا دیک خنکر۔ ہندا خو چنکو بامس نُس تانس کہ اللہ جان بس دمہ نا کشنگ کن خلکوس تا پین نُسے کاریم ٹی بتوکے۔ او خیرات ہمودمہ کن ہرادا بامس آن انا کہ بسکہ۔ چا کرے خوف نُس ار فے کہ دابامس آن انگ بنگ ے دمہ نامہ سلف۔

مسٹر کو چا کرنا سلام نا ورندی ے ہند نو انداز نُسے ٹی تس کہ چا کرے ہندن لگا کہ او مسٹر آن زیات بد صورتے۔ سلام آن گڈ ہڑتو ما تانیام ٹی عربی زبان ٹی ہیئت مس ہرانا ترجمہ ای نمکن کیوہ۔

چا کر پارے ”ای ہمو شامیا مسٹر نا خنگ کن بسنٹ“۔

مسٹر کو ے چا کرنا ہندا ہیئت آخننگ ہلک او تین تو پارے ”تینے خناس وختس کہ مسٹر نا خنگ کن بسنس“، مسٹر نا اُسٹ خوا نس کہ چا کرنا مونا دا پیتے کیو و لے نو کری کن تینا خلیسکہ، ولدا مجبوری آن اودے پاروئی تما

”جوان، نم اوڑے صوفہ غاتو لبوای میجر تون گپ کیو“۔

دا خس پاننگ تون مسٹر کو بش مس او تہہ ٹی کمرہ سے ٹی پترینگا۔ دم نُس انتظار آن گڈ مسٹر کو تو او اراسہ جوانو زیبا و صاف ستھرا او مار نُس کمرہ غان پیش تما او چا کر خان ناماسا بس او اونا دو ے ہلسا پارے ”بیو کنتو“۔

مار مہہ اٹ چا کر خان پداٹ کمرہ سے ٹی پترینگار او ہڑتو ماک صوفہ سے آ تو سر۔ دیر او چا نا صلہ غان گڈ مار چا کر آن ہر یفے ”تو نم مسٹر نا بنگ کن بسنرے؟“۔

”جی ہو“ چا کرخان پارے۔

”مطلب برام کن بسوزے؟“ مارہریفے۔

”جی ہو“ چا کرخان جواب تس۔

”ماشاء اللہ! تو گپ دادے۔ اچھا، پن نمایرے“ مارہریفے۔

”جی چا کرخان“ چا کرخان پارے۔

”اچھا“ شا کرکان کنے کل آن مست نما باروٹ نما زندگی ناباروٹ معلومات

کروئی ئے ہراڑکن کنے نما آئی ڈی کارڈنا ضرورتے“۔ مارکو پارے۔

چا کرخان نا کارڈ مون ناجیب ٹی تنخوک اس ہرادے بکدم کشاتس۔ مارکو

کارڈے ارفسا پارے ”مجھ انتظار کیرے“۔

چا کرخان تو لوک انتظار کنگ اس مارکو کارڈے تینا سسٹم ٹی شاعا تو چا کرخان نا

کل زندگی مونابس، اراسال ٹی قاہمہ غائبے، اٹ وار علاقہ کن انانے، سوز پری زانیفہ ئے

اونان۔ اسہ مارنئے تا مرید پنی او اوپین پین۔

مارکو داکل انفورمیشن تے بکدم شامی مسٹر آسر کر فے۔

شامی مسٹر بھاز انگا انتظار او سو ریانا عذابا تے خفنگان گڈ ہرا کہ انکار کنگ

کر یکہ جواب ٹی تینا نیمہ غان ہو کرے۔

مارکو ولد ابس چا کرخان ناما سا تو س او ہریفے کہ

”اچھا“ تو شا کرکان گپ دادے کہ ای نمے مسٹر نافو ٹوئس نشان ایتوہ نم ہر بو او فیصلہ کبو، مسٹر

نانشان تنگان نئے سختی اٹ منع کرینو۔ گپ دہن ئے کہ اوانت سمجھوے کہ کنے خاخر آن تو

کشتار داسا داڑے نمائش کن سلیفیر۔ نم پُہہ متنگرے ای انت پانگ اٹ“۔



”جی جی، بالکل، واقعی داگڑا جوان ہم اف“ چا کر خان دا بیٹے تو پارے ولے  
اُسٹ ٹی تینا قسمت آچڑا ہم۔

مار بش متنگ کس کہ چا کر خان ہر لیفے

”ننا تصویرے ہم نشان ایتورے تہ؟“۔

مار بشخندہ کس کرے ”جی نہ۔ سرکار نا کنڈان اسہ شرط کسے کہ چل سال آن  
زیات عمر نابند غ کس مف، اونم تو چل سال ناس افرے“۔

چا کر خان بشخندہ کس کرے اوصوفہ غا بیکہ مس۔

مار بش مس ٹیل آتخوک فاعلا تے آن فاکل کس کشا ولد چا کر خان ناما سا تو س  
لفافہ سے آن فوٹو کس کشا او چا کر خان آ مر لیفے  
”شا کرکان، ارف“۔

چا کر خان فوٹوئے دو آن تا چچی ہلک او ہندن کرا کرامونے تا اڑسا دہنکہ  
چناک تینا رزلٹ ئے اولیکو وار امر خنتے نیم تر کرسہ کرا کراملسا سیدھا کیرہ ہریرہ اودعا  
کیرہ کہ بس پاس لکھوک مرے۔ چا کر خان ہمووڑ فوٹوئے اڑسا او خنتے فوٹو آ شاغا تو خنا  
کہ تصویر ہندن الوکہ دہنکہ پاسپورٹ کسے کن ہلنگانے۔ کام آ اسکارف کس شاغوک کس  
جوان زبیاؤ گنڈ و پیشانی کس تا اس خنک نئے بادام آن بار بھلن اسر نئے کشمش آن بار  
چنگ، اشکنو بامس کس تا کس چٹ ہمووڑ ہراوڑ چا کر خان مالو سوچا س۔ جوڑک خیسن تو  
اور بور ہم اسراودا فتنے آن بیدس چہرہ غاتا اسہ دہنو معصومیت او بزگی کس اس کہ انسان نا  
خنتے آن تینٹ خویزناک روان مسرہ ولے چا کر خان ناخنک دبخس ہم پالتور۔

مسٹر ماشاء اللہ چا کر خان کس دوست بس او بشخندہ کرسا فوٹوئے مارے واپس  
کرے حالانکہ اُسٹ تا خوا تو ولے کروئی تما۔

مارفوٹوئے تتھا او چا کرے ہر یفے ”تو شا کرکان، انت سو چارے؟“۔  
 چا کرکان دماغ ٹی مسٹر نا تصویر چٹ جگہ کریس او نا ہوش ہندن مسٹر تون گٹ کس  
 کہ او نا بچ یا دتو کہ او برامی ئے چٹ ہندا وڑ دہنکہ ای افسانہ لکھنگ نا وختا گیرام کیوہ کہ  
 ای چڑہئے اٹ برامی کس آخا۔

چا کرخان یکدم ورندی تس ”جی، کنے ماشاء اللہ دوست بس“۔  
 ”ماشاء اللہ! گڑ انم برام کن تیار ارے؟“ مارکو ہر یفے۔  
 ”جی ہو“ چا کرخان پارے۔

فائل ناتہ خان منہ پیپر کشسا مار چا کر آ مر یفے  
 ”نم دادے خوانبو دستخط کبولد ای بریوہ“۔  
 ”دا انت کسے؟“ چا کرخان پارے۔

”داسر کارنا کنڈان منہ شرطو ہرائی دانوشته ئے کہ نم تینا زانیفہ غا دوارنگ  
 کپیرے، اوڑ تون ہچ وڑ نا ظلم کنگ کپیرے، اوڑ ان کاریم ہلنگ کپیرے تاکہ او تینا مرضی  
 اٹ کپ اوپین پین“ مار جواب تس۔

چا کرخان حیران مس کہ داسر کارنا قانون ارغ اوزانیفہ نا نیام ٹی ہم اوارے  
 پیپر آتے اڑسا تو شش ہفت صفحہ اسر ہر افنتے آ دنیا نا نوشتہ غاک اسر چا کرخان سوچ  
 خلک اگہ دافنتے کلے ای خوانیو تو صُحب تمک اوائیہُن ہم خواننگان گڈ کنے دافتا سمجھ ہرا کہ  
 بریک دا کل عربی ٹی و۔

”ای داسا داڑے دستخط کیوہ۔ ولد ادا فنتے اُرائی خوانیوہ۔ ٹھیکے“ چا کرخان  
 مارکوئے پارے۔

”مرے امر کن نما مرضی“ مار جواب تس۔

چا کر خان آن دستخط متنگ آن گڈ مار پیپر آتے ار فے او کمرہ ٹی پترینگا۔ جوان  
ہیست او ہیست پنج منٹ آن گڈ کمرہ خان پیش تما او چا کر خان لے پارے  
”شا کر کان، کل بندوبست آک مسر۔ داسا بیرہ نمے ار اشاہد بٹنگوئی لے۔“  
چا کر خان ابگہ و حیران مس کہ دا امرای فقط مسٹر ناہنگ کن بسٹ او داڑے کنا  
برام ناکل تیار یک مسر۔

”ار اشاہد، او ہم داسا؟“ چا کر خان ہر لے۔

”جی ہو داسا۔ ایلو کاریمک کل مسر، نما شاہد آتا ضرورتے فقط“ مارا کو ہندا  
پانگ تون ولدا کمرہ ٹی پترینگا۔

چا کر خان سوچ لے ٹی اختہ مس کہ دا عجیبو قصہ لُس مس او دا عجیبو قانونی و طریقہ  
سے کہ ہندا جاگہ غا برام ایترہ داسا مسٹرے ہم ہنداڑے ہتور کنا شاہد اک برور او ہندا  
مکتب ٹی کنا برام مرو حیران او پریشان اس او تیو پاریکہ چا کر خان موٹو دانت نظام لے  
دانت طریقہ سے دا امر و برام لے، ولے داڑن بیدس او صوفہ غا بادشاہ تے آن بار  
تو لوک ہم اس۔

چا کر خان سوچ خلک کہ دیرے فون کیو دیرے سئی کیو دیرے بٹنگو، او دا وختا دیرے بروے؟۔  
خیر او لیکو فونے سنگت لے آ خلک تو او سنگت تے ڈیوٹی ٹی اختہ اس ایلو سنگتے  
کال کرے تو او تینا فیملی تون پشن اناس۔ داسا پریشان مس کہ جوان انگا سنگتاک تو ہندا  
اسر ہراختہ و۔ داسا دیرے فون کیو؟ خیر ہکدم خیال بس کہ حاجی برکت لے فون لُس خلیو  
اینو او دے ہم آزما بھو۔

حاجی برکت فونے ار فے تو چا کر ناگپ آن گڈ پنچہ سوال لے وار تون کرے

”چا کرخان فی اوڑے انت کس کیسہ؟ مگہ ایڑے سئی کرینس؟

ای شاہد مر یو پھگہ کنگن تو مسئلہ کس مفک؟

ای امر دہن زواوڑا سکان سر منگ کیوہ؟ اوپین پین۔“

چا کرخان داخل سوالا تا جواب فی اسہ ہیئت کس کرے

”خدا حافظ حاجی“ کنے خدا خلک کہ ای نے فون کریٹ“ او فونے کاٹ کرے۔ داسا چا کر

خان ہفت حیران مس کہ دیرے فون کیو آخرے مجبوری آن عرب سنگت کسے آفون کرے

ہر اجواب تس تا کہ نیم گھنٹہ سے فی بریوہ۔ چا کرخان دم کشا کہ الحمد للہ اسٹ کس تو ملا۔

ہند اڑتون مار کو ہم بس

”جی شا کرکان“ امر کر لیس؟“

”اسٹ کس ملا بس بنگہ ایلو پین کس اف“ چا کرخان پارے۔

”جوان خیر او برے ارٹمیو ای مر یو ناشاہد“ مار بشندہ کس کر سا چا کرے پارے

او کرہ ٹی پترینگا۔

چا کرخان نا جوڑک خوشی آن کوش کس کنگر او اللہ ناشکرے ادا کرے کہ پین تے

زاری کنگ آن پچاٹ۔

جوان دم کسے نا انتظار آن گڈ چا کرخان نا سنگت تینے مکتب آ سر کرے مار کو ہم

تین تو اسہ پین کما شو بندغ کس ایس ہرادر وشم اوصورت فی تو ملا کس لکتو کہ ولے نکاح نامہ

غاد سخط کرو فک ہند اس۔

چا کرخان صوفہ غا تو لوک اس کہ ہمو بد صورت انگا مسٹر تون اسہ بے میکپ او

چہرہ نا پری کس بس“ چا کرخان نا نظر تما اوڑے تو یکدم بش مس کہ دا تو اونا ہم سفرے اونا

زائیفہ نے۔ ہر اوٹکنا بڑز انگا بالاد اتون سلوک اس اوٹنگ تاشرم آن شیف اسراو ہندا  
شرم نوجہ غان اوپین زبیا پین حسین خنزگا کہ۔

چا کر خان او فاطمہ غان کا غذا آتے آ دستخط کر فزنگا ولد اشاہداک دستخط کریر تو بد  
صورت انگا مسٹر انا کمرہ ٹی اوایکان تین تو تینے آن بار او ناز کوڈبہ سے ٹی ہیننی پیس، چا کر  
خان او فاطمہ تون اواریلو غٹ ناباک ہم ہنین کننگار او ہڑتو ماتے برام نامبارک بادی  
تنزگا۔ چا کر خان چٹ سرگڑدان اس کہ دا امر و برام ٹس مس۔ نئے ملائے نکاح فقط دستخط  
کر فزنگا و لے امر کہ مس ہراوڑٹ مس چا کر خان نابرام مس ہرانا تصورات چا کر خان تینا  
مون، بشند ہٹس او حیران ہم۔

برام مس تو چا کر خان نکاح نامہ غاتینا زائیفہ ناپنے خوانا ہرا  
”فاطمہ بن محمود محمد سگار اس“ حالانکہ او فاطمہ ناپنے اوڑان ہم سوچ کنگ کر یکہ و لے شک  
کر یکہ اودا کان مست او ناہج خیال ٹی ہم بتوس کہ او تینا زائیفہ ناپنے مار کو آن ہر یفے۔  
چا کر خان ناسنگت اشتافی اس ہرے اسکان اڈ کنگ کتو کہ تو اجازت ہلک او  
پیش تما۔ مار کو تینی کا غذائی کاروائی تے کنگ اس فائل آتے تیار کر یکہ۔

چا کر خان صوفائے فاطمہ تون اواریت آن بار چپ چپ تو لوک اس۔ نئے  
فاطمہ ناکنڈا ہرا کہ نئے ہیئت ٹس کر یکہ۔ فاطمہ تین تو سوچ خلسا ٹس کہ شا کر تو اوڑان زیادہ  
شک کنگ۔

ہڑتو مارغ او زائیفہ تو لوک تینا سوچاتے ٹی اختہ اسر کہ مار کو بس اواری الفافہ چا کر  
خان نادو ٹی تس او چا کر خان نے پُہہ کر سا پارے  
”والفافہ ٹی نازائیفہ نادو ناخرچے ایلو بروکا ٹو ناپیہہ غاک نا اکاونٹ آبرسا کرور۔ دا  
ایلو لفافہ ٹی مسہ صدیر او سرکار نانیامہ غان نما برام نا تحفہ۔“

چا کر خان پیسہ تابنگ آن پین زیات خوش مس او مارنا شکریہ بے بشندہ سے  
توں ادا کرے۔

مار بشندہ کس کر سا چا کر خان بے پارے ”نم داسا انگ کیرے“۔

چا کر خان کرارو گام ارفسامہ اٹ سر ہلک او فاطمہ اونارنداٹ۔

چا کر خان گاڑی بے بس مون نادر گہ بے ملا او فاطمہ بے سوار کرے ولداجند  
تہ سوار مس تو سوچ خلک کہ فاطمہ تون بے جوڑ کس پیچ ارے بے پین گڑاس، کل آن  
مست دیوتا مارکیٹ آن پیچ گڑاس بایدے ہلیو اوڑکن۔

او آخر شک بے پر غسا فاطمہ آن ہرینے

”نے تو پیچ اف۔ اسہ وارکان نے کن پیچ بلین مارکیٹ آن گڑا ولدا اراکن

کان، انت پاسہ؟“۔

ہرانا جواب ٹی فاطمہ کاٹھے آخانی سرف تو چا کر خان بے لگا کہ اوشک کنگہ اواقعی

شک کنگ اس خیر ولد اچا کر فیصلہ کرے کہ شاپنگ کن ولد ادیوتا۔ او سر ہلک اراکن۔

کسری چا کر خان فاطمہ غان ارامسہ سوال کرے ہر افتا جوابا تے ٹی فاطمہ فقط

کاٹھے ہو یا آخانی سرفیکہ۔ چا کر خان نا اُست ٹی خوف کس تما کہ خدا خلوے سرکارے

گنگ کس تروے کنے۔ ہندا خیال اٹ چا کر خان ناپیشانی آن حید آک یلہ مسر اُست تا

لڑنگ شروع کرے کہ یا خدا اسہ ہیئت کس تو کے۔

آخرے چا کر خان مجبور مس تو ہرینے

”فاطمہ! نی گنگ کس تو افیس؟“۔

چا کر نادا پیتہ بنگ تون فاطمہ مخنگ کس خلک او جواب تس

”آن گنگ نُسے اُٹ“۔

فاطمہ ناتوارے بنگ تون چا کرنا روح مسرور مس او جواب ٹی تا او ہم مخا او پین خوش مس کہ او ناز ایفہ مسخرہ کروک نُسے ہر ہر نرینہ نا خواہش نُسے کہ او ناز ایفہ مسخرائی مزاج والاں مرے۔

فاطمہ تون سفر کرسا کرسا چا کر خان نُسے بچ درک لکتو کہ او دہن زو ارا غا سر مس۔ فاطمہ نُسے دڑ فے۔ دروازہ غا انا تو درگہ نُسے لکتو کہ دہن مف ارا والا ک چا چوک مرور۔ خاموشی اٹ درگہ نُسے ملا او ہڑتو ماک پترینگار۔

اسہ کوٹی ٹی مُرید اولمہ تہ اسر تو ایلو کوٹی نادرگہ نُسے ملا فاطمہ نُسے ہموڑے تولیفسا پارے ”نی ہنداڑے تول ای بریوہ“۔

سوز پری او مرید ناباروٹ فاطمہ نُسے تو مالو آن معلوم اس۔

چا کر خان ایلو کوٹی ٹی پترینگ تون لائے خلک تو سوز پری یکدم خنتے تینا ملا او نا خنتے آن معلوم مسکہ کہ او چا چوک الو۔ مرید او نا ماسا بغیر بالشت آن مسن تموک تنگان اس۔ ”بشہ دیرئس جوڑ کر مہمان نُسے بٹنے“ چا کر خان مونے شیف کرسا خنتے ڈکسہ پارے۔

”مہمان دیرے مہمان؟“ سوز پری ہر یفے۔

”فاطمہ فاطمہ نُسے“ چا کر خان پارے۔

”فاطمہ فاطمہ دیر نُسے؟“ سوز پری حیرانگی اٹ ہر یفے۔

”ہمو سوریا والا مسٹر“ چا کر خان جواب تس۔

سوز پری ناگمان اٹ الو کہ چا کر برام کرینے او موٹو ہمسایہ غاتا باروٹ سوچ

خلنگ اس او یا دکنگ اس کہ فاطمہ بچی دیرے ولے ذہن ٹی تے اسہ فاطمہ کس ہم بتو۔

ولد اہر لے ”دافاطمہ دیر کسے۔ ہر اسور یا والا؟“۔

”مریدنا ارٹمیکو لمہ“ چا کر خان زوزداشتانی اسہ دم ٹی جواب تس، اونا داورندی

آن اونا لغوری تون اونا ہوشیاری نا اندازہ ہم خلنگہ۔

مریدنا ارٹمیکو لمہ، مرید مسکین ہندالمہ ناٹنگ اوکاریمتے آن بیزار کس کہ چا کر پین لمہ کس بیس اوڑکن۔

چا کر نادا جواب آن سوز پری نالی کاریم الا کہ دانت گپ کس مس۔ زر کس خاموشی آن پد اونا یاد آ چا کر نا استواو اینو صُحب نا کرو گپاک بسر تو پیتے پک کنگ کن ہر لے ”نی برام کر لیس؟“۔

”ہو“ چا کر خان خلوک انگا دلیر آن بارورندی تس۔

سوز پری نا اُسٹ چا کر نا جواب آن ژدغہ ژدغہ مس او چپ چپ خاموشی ٹی بش مس انا دیر جوڑ کرے بیس فاطمہ لے تس او اخلاقن اونا ماسا دم کس تو س۔ ارامسہ وار ہڑتو ما تا نظرک تین تو ٹھکرا اینگار تو ہڑتو ما ک بشندہ کریر ولے دا ارا اسہ وڑنا بشندہ غاتے ٹی زمین او آسمان نافرک اس۔ او فانیام ٹی اسہ گپ کس ہم متوا مروس امر کہ سوز پری عربی تتو کہ او فاطمہ برا ہوئی۔ ولے واہم او فک تین تون تینا تعارف لے کریر او دا تعارف فقط نظر نا ذریعہ اٹ مس اودا ہنرے ہم برای آذالبولاک چارہ کنا اونا ماس آن پیشن لے۔

سوز پری میزبانی نا حقاتے ادا کرے بیس فاطمہ لے چا گئے ولد ارغ نا تیار ٹی لگا س کہ چا کر خان منع کرے کہ ”فاطمہ ننا خوراکاتے آن کنپک“ حالانکہ دا پیتے فاطمہ کتوس۔



چا کر خان ہیئت ے مونی درے ”ای کا وہ ہوٹل آن اِرخ ہتیوہ او انداڑتون  
پیش تما“۔

چا کر خان ہوٹل آن بس تو سوز پری اِرخا تے جوڑ کرے بیس برامی او بادشاہ نا  
مونا تخوا وفا خذمتے کرے ولد اِرخا تے مچ کرے۔ ولد اِرخا چنگ کن جاگہ کس شاعا۔ تینا  
پچا تے آن فاطمہ کن بیس ہر فاطمہ آن گوٹڈ ہم اسرا و پرا ہم۔ اِرخا خذمتا تے آن گڈ جند  
تا اِرخا چنگ کن۔ کاٹھے سڑجہ غا تخمکون خنتے ٹی تور و کا جوے یلہ کرے او جوان ہرے  
اسکان ہو غا خویک کید آ۔ فاطمہ ے بد دعالتس۔ چا کر ے کیرنگ تس جوان اُسے تینا  
سبک کرے ولد اِرخا چا داکان زیات او بیوس بین اسے گڑ اس کنگ ہم کتو کہ۔

صُحب تون وختی چا کر خان اُرا سے نا پٹنگ کن پیش تما کہ دا اُرا نا کمرہ غاک بھاز  
چتکو اودا سا پسکن آز ایفہ کن بایدے مچہ مرغو کمرہ والا اُرا نس مرے۔

خیر آخر مُسہ کوئی اسہ ہال والا اُرا نس خنا۔ اُرا نا کرایہ دا اُرا نا کرایہ غان زیات  
اس ولے چا کر ے دا گڑا نا غم ہم الو۔ بھلا گڑا کمرہ تا پرائی ناس۔ اودا سا ایہُن ہم تونا  
صد لیر اوڑ کن بسکہ۔

شام تون مرید ے تین تون ارفے اِرخا فاطمہ ے شاپنگ کن درے۔ مرید ے  
دا خا طران ارفتو کہ اوڑ کن مہر کیک یا اونا استے خوش کنگ کن اودے مارکیٹ آدیک وجہ دا  
اس کہ مرید ایڑے اودے کمک ایٹک سامان تے گاڑی ٹی تنخک دڑفک۔

دانیام اٹ پانزدہ بیست دے گدرینگا۔ چا کر خان اُرا ے ہم بلیفیس۔  
دا سا اسہ کوئی کس مہمان تینکن تیار کر یسر اسہ کوئی کس متکنا یعنی بھلا ز ایفہ نائس ہرائی اونا  
متکن انگا سامانک اسر اسہ کوئی کس پوسکن انگا ز ایفہ نائس ہرائی کل پوسکن انگا سامانک  
تنخوک اسر۔ دُہنکہ اسہ ایل سی ڈی ٹی وی کس تنخوک اس۔ اِرخا خانہ والا زیبا و الماری کس

اس۔ عربی ثقافتی آ بو پاک دیوال تون خلوک اسر۔ اسہ کندھسے آ ناز کو ٹیبل کس اس ہراڑے فاطمہ ناپسنداٹ بلوک انگا گلدا ناگ تنخوک اسر۔

فاطمہ ناشک اُراوالا تے آن پناس مطلب سوز پری آن پین اُراٹی بندغ الو ہرا فتے آن اوشک کروس۔ داسا او اُرا نا زیادہ تر کل کاریمتے تینا شوق اٹ کر یکہ خاصاً تینا جندنا کاریمتے۔

چا کرنا کاریمتے ہم اوتیٹ کر یکہ ہراڑن سوز پری اُے بھاز زور بسکہ ولے سوز پری سگ نا گودی اس بچ ہیٹ کس ہم کتو کہ بس چپ چپ تماشہ سیل کر یکہ۔

فاطمہ نا دامہر آتا وجہ غان چا کر خان نا محبت اوڑکن دے پہ دے آن زیات منگ اس ہراڑن فاطمہ بھاز خوش اس۔ او ایلو دوے سوز پری دے پہ دے آن ناشاداو پریشان مرسا اس کہ چا کر خان نا محبت اوڑان او مرید آن کم منگ اس او ہرانا احساس چا کر خان اُے بچ منگ الو۔

چا کر خان نا فاطمہ کن دا بے کچ انگا محبت ہم تینا جاگہ غاسی اس۔ اونا جاگہ غا امر و زینہ کس مرو س فاطمہ کن قائل مسکہ۔

سوز پری دے اون چلم پڑ کر یکہ کشاکہ او فاطمہ پوسکنا زندنا خوشی ٹی اوتینا ماضی نا عذابا تے گیرام کنگ کن صُحب اوشام تینا پینگنا محلی آ زلفا تے عطر بخور گند تسکہ تو چا کر خان گنوک کس الو کہ دامسکیہ زلفا تا سیخا غان بش مرو س او سوز پری نا تاب تاب انگا تمباخی آ جند آ تانیوان ٹی آرام کروس۔

فاطمہ ہڑ دے اسہ پوسکنو عربی و خوراک کس تیار کر یکہ اوتینا دو تے اٹ فلمی وڈ چا کر خان اُے کنفیکہ تو چا کر خان امر داسوریا نامزہ دارا انگا کتغاتے الو س او سوز پری نا دوناجوڑ کر وک انگا ہمو ارسال متکن انگا بیدیرا و سبزی تا طعام اُے چکوسس اوڑتون اِرغ کنوسس۔

اسہ کنڈان پوسکن ردو کا نہال ایلو کنڈا مٹھان چوٹ مرو کا نیم پیرانگا درخت۔  
 اسہ کنڈان شباب نا ورنائی ایلو کنڈان ورنائی نا پیری۔ اسہ کنڈان عربی زبان نا پیتاک ہرانا  
 خف تو نگ آن انسانے لگک کہ قرآن خف تورنگ اٹ ایلو کنڈان براہوئی نا ہمو متکن  
 انگ لفظک ہر افتا بنگان چا کر نا خفک بیزار۔ اسہ کنڈان فاطمہ نا بشخندہ مخنگ، مسخرہ  
 شو غلک، ایلو کنڈا سوز پری نامون مٹی، ترندی، ناراضگی، رنگ۔ اسہ کنڈان فاطمہ نا عشقی آ  
 فرما شاک ”اینو سمندر آ کان، اینو گارڈن سے آ کان، اینو ہوٹل سے آ کان، ارغ کنگ کن  
 یا اینو مش تے آ کان“۔ ایلو کنڈا سوز پری نا حکم ”کنے اینو ایڈنیک بی بی کس تے در اینو مر  
 انپس کنے ہسپتال آ دروئی کس، کنے اینو فلانی آ در فاتحہ سے“۔

داہرا دنیا نا نیام اٹ سلوک آچا کر گنوک تو الو کہ سوز پری نا دنیا سے زیادہ وخت یا  
 زیادہ اہمیت ایتوس۔

چا کر خان نا محبت فاطمہ کن حد آن زیادہ مس ہندا خہ زیادہ کہ چٹ فاطمہ نا  
 معشوق جوڑ مس۔

چا کر خان نا برام نا سال پور و متوس کہ فاطمہ چنا خنا او ہم جاڑ، اسہ مارکس اسہ  
 مسٹرکس اودا اراچناہ او فتا محبت نا بھلا ثبوت کس کہ او تین تو اٹس محبت کیرہ۔

چا کر خان نا خوشیک سمندر آ تا چو لکاتے آن بھاز مسر۔ او خدا غان اسہ مسٹرکس  
 خوانسکہ او خدا جان اودے اراچنا عطا کرے۔

فاطمہ نا دا اراچنا نا خنگ آن سوز پری نا اُست پو غ آن پُر مس اودے محسوس مس کہ چا کر  
 خان نا ہمو خیرات والا مہراک ہم اوڑان داسا کارہ۔

چا کر خان فاطمہ غان زیادہ تینا چنا تا خیا لے تہا کہ وڑ وڑ نا تحفہ، بالو شملکو ک  
 گوانزہ، واکر پدمو، انت گڑا کس بازار ٹی خنا کہ بڈ کر یکہ تینا چنا تے کن ہیسکہ۔

چا کرنا داحال اودا مہراتے خنا کہ تو سوز پری ناسینہ زراب کر یکہ کہ مرید ناچنکی  
بے باوہئی آن، مش تا پکنگ اٹ گدرینگا اوداسہ دارا گئی تاچنکی ئے سیل کبو۔

مرید ناچنکی، تینا جوانی، علاقہ ناخواری، مخلوق ناشغاک، بیوسی اوبزگی نادے تا  
کل دڑ دآتے سوز پری تینا سینہ نا قبرستان ٹی دفن کریس او مجال کس کہ اودا فتا ذکرے  
چا کرتون کرو س یا اوڑان تینا اوتینا چنانا زندگی نا حسابے خواہوس۔

چا کرخان ہم فاطمہ اوتینا چناتا محبت آن داخس وارالو کہ اوسوز پری ناماسا  
تو لوس او اوناختے آن اونا درد آتا ہر یفس۔

چا کرخان نا محبت نا زیادہ متنگ تون اونا خرچہ غاک ہم زیادہ مسر۔ ارازا بیفہ  
مُسہ چنا او ہم ہراغڈ واوچنا ہرافتا پال، پیپر، پیچ، بیماری، دوائی، غسل ناسا مانک دا کل خرچہ  
غاک اراوالا تا خرچہ غاتے آن زیادہ اسرا ویلو ارا نا خرچہ غاک جتا۔

دا آخری مسہ تو چا کرخان کن مسہ سال آن بار گدرینگا زپہلی آن مُست اونا زر  
آک کٹرہ اوسنگتا تے آن وام کر یکہ او آخرامو وامتے ہم ادا کنگ کتو کہ۔ اے صد لیرا  
فاطمہ کن بٹرہ اودا خرچہ غاتے ٹی بیج درست متورہ۔

بھاز سوچ او فکر آن پدا آخر او فیصلہ کرے کہ سوز پری او مرید ئے علاقہ کن رادہ  
کیو اودا ارا ئے ہم بدلیفوی چکو ارا کس پٹوہ ہرانا کرایہ کم مرے۔

منہ وخت گدرینگتو سر کہ چا کرخان تینا فیصلہ غا عمل کر سا سوز پری ئے ریفے کہ او  
نافیزہ بدل خوانک ہراڑکن اودے مُست تو کن انوئی تمک ولد اپوسکنا فیزا غا بروئی مریک۔

سوز پری ہم تینا اراوالا تے کن زہیری اس اوا یکہ فاطمہ او اونا چناتے آن  
دڑ دی اس۔ چا کرخان آلیقین کر سا مرید ئے ار فے او علاقہ غا مسر۔

پداہے متکن انگا کوٹیک ملنگار، ہمو متکن انگا زندگی شروع مس۔

داسہ چا کر خان او فتنے کن تُو نادہ ہزار راہی کیک او ہر تُو ہندا گئے کیک کہ  
داسکان نما فیہ ناکاریم متنے منہ وخت پین صبر کبو۔

سوز پریئے داسا علاقہ ٹی اراسال مننگہ اوداسکان تینا اومریدنا فیراغاتے کن  
انتظاریئے۔

اینو ہم خلق والاتے آن ہر کس کہ سوز پری نا مجلس آبرے تو سوز پری اوڑ کن ہمو  
سوریا والا تاقصہئے کیک کہ

”عرباک امر تینا بند غاتا عزت آتے چچفنگ کن او فتنے شرف تنگ کن ہمہ او فتنے خاخر او  
عذابا تے آن کشار آسودئی نازندگی تسر“۔

## مٹھائی

چلو نا بھلا پن مادر حیم اس ولے دا پن فقط خلق نامنہ بند غاتے معلوم اس۔ ایلو  
چناؤ بھلاک کل اودے چلو نا پٹ چائسره اوتوار کریرہ۔ چلو نا عمر سیزده یا چانزده سال  
اس۔ رنگ اٹ سوزارنگ اس۔ اُونو گڑدومون کس تہ اس۔ چنکو چنکو بار نو پڑہ تہ اسر ہرا  
اونا جندے ہم دوست الور۔ اونا اُست خوا نسکہ کہ خلق نا ورنا انگا مارتے آن بار او ہم بھلو  
پڑہ ملی و نیام آن سیم ے تینا کشتے ولے غریبی نا دو آن اونا دامراد پورا مننگ کتو کہ۔ ہر ارا  
مُسہ تونا ذی آلمہ تہ پنچ رپی نور مادے تسکہ (ہرا کہ خلق نانائی اس) اونا نور مادے حکم ملا کہ  
کہ پڑہ غاتے تہ چٹ چنک کیس کہ زور دپس۔ چلو نا خنک اُزبک آتا خنکے آن بار چہدہ و  
خن اسر ہرا نا وجہ غان چناک اکثر اُزبک پاریرہ تہ ولے جواب ٹی او چنا تون او ار مخا کہ او  
خاموش مسکہ۔ چلو نا چچاک اونا بدن تون ہیج وفا کتورہ۔ وختس ہندو پیچ لُخ ٹی کریکہ کہ  
بدن ے تہ لچارہ او پھڈنا تہ کوسک مر آن درست مسرہ۔ او ایڑا تا چیر یفنگ کن اودے پو  
پو پاریکہ او چلو آ مسخرہ خلسا تینا لمہ ے پاریکہ ”تا تو ناز بی بی نا بھازانگا کُنفنگ آن دز  
مُسہ پھڈتا مسنؤ“۔

اودے کس مرغنو پراو پیچ لُخ ٹی کریکہ ہرانا سوبان رم ہم کنگ کتو کہ کہ پاچہ

باتے ٹی ہشنگوٹ۔ او بھلا بھلا آستونک آتے ٹی پنچہ غاک تاہنج خٹکو رہ۔ دا پچا تا بے  
وفائی نا وجہ ہم اونا شوم انگا غربی نُس کہ تیٹ پچ ہلنگ کتو کہ تین کن تو خلق والا ک تینا چناتا  
متکنا تے اودے تسرہ او چلو خسا گلان مر سالح ٹی کر یکہ تہ۔ چلوئے اونا ایڑ نا چیر بمفنگاک  
خراب لگارہ ولے داڑن باوجود اوتینا ایڑے ہنج پاتو کہ۔ اوتینا ایڑ کن بھاز مہر کر یکہ او اونا  
خیالے تہا کہ حالانکہ او چنکا اس ولے اسہ ایڑ نامنگ نادڑ دآن اودے ہنج پاتو کہ۔ ہرانا  
پن افسانہ اس ولے بد نصیبی دا اس کہ دا جوان انگا پن ے ہم خلق ٹی کس ہلو کہ اوکل  
اودے اونا چنکا پن شک اٹ توار کریرہ۔ شک چلو آن مسہ یا چار سال بھلن اس او اونا  
کل کاریمک اونا ذمہ داری ٹی اسر۔ شک نال مہ غربی نادو آن سیلہ دسک نا کاریم کر یکہ او  
ہندا ڈول اٹ تینا اُراے چلیفیکہ۔ اونا ارغ اینو آن ہشت سال مست دون نُسے نا  
خُتنگ نا وختا دُون ٹی تہما او کہسک۔ غربی او بے روزگاری او چنکا عمر نا سوبان چلو تا تو  
نازی بی نا اُرا ٹی مزوری کر یکہ۔ ہراڑن اودے تُو نا پنچ صدر پئی، صُحب او سوارہ نا ارغ، چا  
بسکوٹ او بیگ کن وخت نُس طاہر نا متکن انگا پچاک ہم رسینگارہ۔ تا تو نازی بی نا ارغ  
سعودی ٹی کاریم کر یکہ او چند نا تہ اسہ مارا وارا مسٹر اسر۔ مارنا تہ عمر نو زدہ سال اس ہر خلق نا  
سرکاری آسکول ٹی خوانا کہ۔ تا تو نازی بی نا ہڑ تو ماسنک عمر ٹی چٹکو اسر۔ اسٹ نا عمر نہہ  
سال اس او ایلو چار سال ناس اس۔ چلو مسہ سال آن دا اُرا ٹی کاریم کر یکہ۔ اُرا کن ناوڑ  
آن دیر پیسکہ، بوچاتے دُپ آخسا کہ۔ دکان تے آن سودا ہتنگ کن انا کہ او ہم اکثر طاہر  
نا سائیکل آ۔ اگہ مہمان نُس بروس تو اوڑ کن دیر اوچا تا دنگ ہتنگ اونا ذمہ ٹی اس۔ داڑن  
بیدس تا تو نازی بی بی ے اُرا نا ایلو کاریمتے ٹی ہم کمک تسکہ دہنکہ پچاتے تارا آیلنگ  
چکاتے کن دیر او دانہ شاغنگ، ساہداتے بیڑنگ نا وختا وفتے تو ننگ او پین پین۔ دا

کاریمتے آن بیدس اوتا تو نازی بی ناغڈ و آ مسٹرے ہم خوش کریکہ۔ اودے گوازی تسکہ۔  
ریکا تے آدریکہ یاباغیچہ ٹی چکر تسکہ۔

چلو تینا عمرنا حساب اٹ واقعی نادانو مارئس چاہنگا کہ ولے بے باوہ ئی ناویل  
غربی نادرڈ لمہ نادے اونن تا خواری اودے تیار و زینہ کس جوڑ کریس۔ اوزندگی ناہمو  
مقام آسلوک اس ہراڑے پیست و پنج سال نابھازاما کہ ہم تینا عمر ٹی سرمنگ کپسہ۔ زر  
نا قدر اُست نا خرابی سگ او برداشت ناصلاحیت چزکا بھلانا عزت دونا مریفنگ عزت  
نا قمت، تینے خوش تنگ ناہنر زندگی نابھازانگا سبھتے آن اوسخ ہلکوس۔

چلو صُحب تو وختی تا تو نازی بی نا اُرا غا بسکہ۔ چلہ نادے تے ٹی اُرا غا بنگ تون  
اسہ وار چاکن پاٹ پرغا کہ اوہموڑے اُرا ٹی طاہر استواوار جندا ہم چا کنتککہ۔ ولدا اُرا نا  
کاریمتے ٹی آختہ مسکہ۔ کاریمتے آن گڈ ہموڑے طاہرنا ایڑے گوازی تسکہ اوافتون گوازی  
ہم کریکہ۔ شام نا اذان تون اوار چھٹی کریکہ اوتینا اُرا کن سر ہلککہ۔ اوشام نار غے تینا لمہ  
وایڑ تون کنتککہ اوہموڑے خاچاکہ۔

طاہر و طاہرنا لمہ اوڑکن بھاز مہر کریہ۔ اگہ اوگڑ اس پرغوس یا خراب کروس  
اودے ہیچ پاتورہ۔ اودا مہرنا وجہ اونا غربی اوانا مسکین انگا خنک اسر ہرا فتے ٹی ہنگ آن  
کافرے ہم اوڑکن عذاب بسکہ۔ طاہرنا کا کا نوشکی آن وخت کس طاہر نُسے کن فروٹ  
راہی کروس تو طاہرنا لمہ چلو نا بشتے جتا اوڑکن تنحا کہ اوولدا تسکہ تہ۔ چلو فروٹے خنک  
تون دہنو بختہ کس کریکہ کہ خدا نا خدائی تینے آن سوال کریکہ۔ چلو نا عادت اس کہ  
فروٹے تینا جیب ٹی ڈھکا کہ اوشام تو تینا اُرا ٹی حیان کشاکتہ نیمہ کریکہ تا اوشلک تون  
اوار کنتککہ۔ تینا لمہ ے ہم صلہ خلککہ ولے لمہ تا فوراً جواب تسکہ نم کنبو کنا اُست ہیچ اندا



مالٹ آتے بٹک اواگہ فروٹ سوفئس مروسس تولمہ پاریکہ نم کنبوکنے سوف ناخنگان  
اولٹی بریک۔ اوہندن ہر فروٹ ٹی عیبئس کشاکہ اوکنو کہ ولے حقیقت اٹ اونا اُست  
فروٹ ناگندکن سکا کہ۔ زمانہ نئے آن فروٹ ناطعائے چکتوسس ولے بیوس کروسس ہم  
انتئس فروٹ ناسہ دانہ اٹ جاگہ غامشخوسس۔

طاہر نابا وہر ارایامسہ سال نازی آچھٹی بسکہ اوتینا چناتون اوار چلوکن ہم  
ضرور گراس پیسکہ۔ وارئس جوڑئس چچ، وارئس ربڑی وگھڑیئس اوارئس پین گراس۔  
ہرافتے چلو بھلوشوق نئے اٹ قبول کریکہ اوتینا عیدکن ڈھکا کہ۔

آخریکو ووار کہ طاہر نابا وہ سعودی آن بس تو منہ دے آن گڈ طاہرنا کا کاتینا ایلم نا  
خوش آمدکن نوشکی آن تینا چناتون تینے سر کرے۔ ارامسہ دے خلق ٹی گدریفے۔ مجلس  
کرے، چکر خلک، مکاتے انا آخر ایلم ناز ہیری کم مس تو ولد اوالپسی ناتیری اے کرے۔  
اوقتا اینگان مست تاتو ناز بی بی تینا اَرغ تون مشورہ کرسا پارے ”ایلم آن تینا اونا مسٹرنا  
دوے طاہرکن خوا ولد ایہئن نی کاسہ سعودی کن۔ اودہن مف اونا رشتہ اے ہموڑے  
نوشکی ٹی جاگہئس کرفور تو بہتر ہندادے داسا داپتے پک کرے۔

طاہر نابا وہ اوکا کاتینے آن ارا ایلم اسراو ہڑتو ماتانیام ٹی جوان مہراو محبت اس۔  
بغیرئس سوچ اوفر آن طاہرنا کا کا ہمو وختا رشتہ کن ہو کرے او خوشی خوشی ایلم او چناتے  
رخصت کرے۔

منہ دے آن گڈ طاہر نابا وہ تینا ایلمے فونئس کرے اوسئی کرے کہ کنا چھٹی تے  
آن توئس بچانے اگہ ناجازت مرے سانگ ناتیری تے کین۔ او ہندا ورنندی رینگا کہ  
ننا کند ان چو مشکلئس اف۔ بیشک تیاری تے کبو۔

چاشت ناوخت اس طاہر ناباوه اولمہ دے مونو تو لوک دنیا داری ناہیت او  
 گپاتے ٹی آختہ اسرکہ طاہر نالمہ چلم ہاتمباغاتے لگفسہ پارے ”طاہر ناباوه! داننا اُرانا اولیکو  
 سانگے۔ داسانگے ای پوسکنو گڑ اس کنگ خواہ تینا مارکن، اوہم ہندنو گڑ اس کہ مچا خلق ٹی  
 کنما مارنا سانگ نامثال بروکا سالاتے اسکان تنگٹی۔“ طاہر ناباوه راستیکو دو آن کھنچی ے  
 شیف کرے ہرا ٹی او تینا پینکنا بروتاتے جوڑ کر سا اس پارے ”مرے مرے دا جوانو گپ  
 نسے ولے انت کس کروں؟“۔

چلو ہموڑے اوفقا ماسا چنکا مسٹرے تا گوازی تنگ اس کہ طاہر نالمہ چلمے کند  
 نسے تخسا پارے ”ای سوچاٹ کہ نن تینا مارنا سانگے پتاسہ نا جاگہ غامٹھائی بشخن“۔  
 مٹھائی ناپن متو کہ جنت نا طلب کس مس چلو نا چڑو آخنک اونا کوس ناہنتے آن  
 بارڈک پیشتمارا واپاچ تا تو نازی بی بی ناباے سیل کنگ شروع کرے۔

طاہر ناباوه ے ہم ہنداپن زر کس پین وڑ لگا تو سوالی اندازاٹ پارے ”مٹھائی“۔  
 طاہر نالمہ یکدم جواب تس ”جی ہو مٹھائی۔“ نے سمائے ننا خلق اٹ دا اسکان چو  
 سانگ نسے آ مٹھائی بشخنٹے۔ اگہ نن مٹھائی بشخان تو ننا مارنا سانگ مثال کس مریک او ہندا  
 سانگ نا ثواب اٹ خلق والا کہ ہم مٹھائی کیرے“۔

طاہر ناباوه زور آن دمہ ے کشسا ”ہوہیت نا تو سئی ے ولے نے سمائے کہ  
 کنا چھٹی ناپیہ غاک ہم آخیر کریو کن تو داخہ زر پختنے کہ دا خلق ناسی اُرائے مٹھائی کفیو او  
 ای تینا واپسی ناٹکٹ ے ہم کتھٹ“۔

ہنداپن چلو تو او را طاہر نالمہ نامون ہم دڑ یگا اوزر کس خاموشی آن پد طاہرنا  
 لمہ ولدا پارے ”اچھا گڑ ادہن کینہ تینا خلق نا زینہ غاتے بشینگنہ او ہرا اُرا خواجہ ے ارا ارا  
 دانہ مٹھائی ناہتہ۔ ولدا اوفقا مرضی ہنداڑے کیر یا تینا چناتے کن دیر“۔

طاہر نابا وہ زرس سوچ آن پد ”ہو“ دا جوانو ہیبت نسے۔ داوڑ ہر اُر اے مٹھائی ہم  
رسینگ او پیسہ ہم بھازلکپک۔“

باوہ نا ہندا ہیبت نس کہ چلو نابا غان مٹھائی نا پنے دیک یلہ مسر۔ ولدا فیصلہ پک  
مس کہ سانگ آ مٹھائی بشنگک او ہر اُر اے اِرادانہ رسینگ۔ دے نس گدرینک تو کہ دا  
حوال مچا خلق ٹی تالان مس او خوشی نا ماحول نس جوڑ مس۔

ہمودے آن کہ مٹھائی بشنگک نا فیصلہ مٹس۔ ہمودے آن چلو سانگ نا دے کن  
بے صبری اٹ انتظاری اس۔ صُحب او شام تین تو مٹھائی مٹھائی کریک۔ شام آتینا اُر انا کہ تو  
مٹھائی نا شعر خلک کہ او شعر خلسا خلسا لہمے تینا پاریکہ ”اِرا مٹھائی ملک۔ اِرا مٹھائی ملک۔“  
اولیکو شام اُر انا سر منگ تون مٹھائی نا شعرے خلنگان گڈ تینا معصوم آ تبسم  
تون لہمے تینا پارے ”اِرا مٹھائی ملک۔ اُسٹ کنا اُسٹ نا او شنگ نا۔ ہرس پا پس  
کنے مٹھائی نا راز آن بد بریک کنے مٹھائی دوست اف۔“

چلو اُخس کے خوش اس او نا لہمے ہموخس مٹھائی نا پن آن پریشان اس۔ او تین تو  
سوچ خلک کہ اُسٹ تو بے باوہ کی تا وجہ غان چلو بیوس بچ زنداٹ مٹھائی چکتنے۔ ایلو خلق نا  
چناک تینا باوہ غا تون شار آ کارہ مٹھائی کنیرہ ولے او بد نصیبے دروک کس اف۔  
داسا خلق ٹی مٹھائی بشنگک تو او ہم تینا زینہ غاتے آ او بد بختے تو باوہ نس اف او نا اُر  
غان دے انوے۔ دا گپ او نا لہمے ناسینہ ٹی کتار آن بار لگا کہ او خنتے آن ٹوینکا ک روان  
مسرہ ولے چلو نا ذہن ٹی دا خیال نا درک الو۔

چلو مٹھائی نا تصور اتائی مست او مکن اس۔ انتظاری نس کہ طاہر نا سانگ زوزو  
مرے۔ مٹھائی تا وجہ غان چلو خوشی خوشی اُر انا کل کاریمتے کریکہ واہم ددنگئے تھو کہ۔  
ایڑے چلو نا لہمے نا پریشانی دے پہ دے آن وڈھنگ نس اودے معلوم نس کہ چلو خود دارو

مارئے اوبغیر صلہ غان اُسٹ نا گڑ اس ارٹپک۔ دانگ آن بے باوہ ئی نا ڈکھا یکہ فقط  
زرنینہ غاتا بٹنگ نادود داویل چلو نا اُسٹے خراب کپ۔

خیر شام کہ مس تو چلو بچ خلسا اُرا غا بس اولمہ کس تون تینا پڑ ویک آ تو لوک  
حوال تس ”طاہرنا باوہ پھگہ وختی کا ہک مٹھائی تے ہتیک اودیکر نماز آن پدسا نگ  
مریک۔ مٹھانیک بٹنگرہ۔ اوپھگہ ای وختی کا وہ خلق ناکل زرنینہ غاتے بٹگوہ سا نگ کن۔“  
لمہ غان تابرداشت متو کہ چلو دا خوشی ٹی گیرام کنگہ کہ اودے دے بٹگوے۔ تو  
اوسوچا کہ داسا اونا خوشی زرس کم کیو کہ بھازانگا امید انسان کن جوان اف۔ توارے  
زرس بڑ کر سا چلوے پارے ”نی کلے بٹگہ نے دے بٹنگ الہ؟“۔

چلو مچہ خاموش مر سا سوچ خلک اوولدا کبین انگا گٹاٹ جواب تس ”کنے تا تو  
نا زبی بی بٹنگ یا طاہرنا باوہ۔ ایہن ہم ای ہموڑے مروٹ تو کنے تو کننا بٹخ ملک۔“  
اونا دا ورنڈی آن گڈ لمہ تہ مونئی ہیئت کتو۔ صُحب نا وختی چلو بٹش مس تو خنک تا  
اینو بغیر سلنگان ہم صاف صاف گرو شک تھرہ۔ ہرافتے ٹی مٹھائی نا طلب مرآن خننگا کہ۔  
چلو طاہر کس تے انا تو معلوم مس تا کہ طاہرنا باوہ وختی انا نے شارا مٹھائی تے کن تو دا خبر آن  
چلو نا اولنا سوزانگا کلکک خوشی آن خیس مسر۔ تا تو نازبی بی چلو او طاہرے پُہہ کرے کہ  
انوزرنینہ غاتے سانگ نادعوت ایٹو ہراژن طاہر صاف انکار کرے کہ ای اپرہ کنے آخرہ  
کہ تینٹ تینا سانگ نا بٹنگ کن بسنے بس ولد اچلو تینا سر ہلک اوبغیر کس تینا اُرا غان خلقے مچا  
بٹنگا کہ زرنینہ غاک سر کیرے تینے طاہر جان نا سانگے مٹھائی ملک۔ مٹھائی۔

خلقے بٹنگان گڈ چلو اُرا نا کاریمتے ٹی اختہ مس۔ اینو اونا کاریمک اسٹل بھاز  
اسر۔ زرس ہم آرام کن اودے وار ملتو ایہن ہم اودے اینو آرام نا ضرورت الو۔ مٹھانیک  
اونا ذہن ٹی ہنین ہنین پالن پالن چرپ چرخ کریرہ گڑ امجال کس کے چلو دم دروس۔

پیشیم ناپاس نُس کے طاہر نابا وہ مٹھائی تون بس۔ مٹھائی تے آچلو نا نظر تمسوس  
ولے طاہر نابا وہ خنگ تواونا بادیر آن پر مس اودعا کرے کہ اللہ زود دیگر مرے۔ دیگر  
نا خیال تون اودے خیال بس کہ دا اسکان تا تونا زبی بی طاہر یا طاہر نابا وہ غان کس اودے  
سا نگ نا دعوت تنے۔ اُسٹ ہم اودے پاتنے کہ چلو نی اڈکیس تینا بٹھے دیس یا مہمان  
تون تولس کہ نے نابا وہ مسکین نا جاگہ غا بٹگان۔ دا خیال آن چلو نا چڑو آخنک خشک  
مُسّر۔ داسا اوانتظاری اس کہ اُرا نا فردا تے آن کس اودے صلہ نُس غلے اودا صلہ نا خیال  
اونا ذہن ٹی استو آن جاگہ کریس کہ ہر اتم اونا لمہ اودے پارے ”نے دے بٹگوے  
الہ؟“۔ اگہ اونا لمہ داسوالے کپرس تو چلو نا داغ ٹی داسوال ودی متوکہ ہراڑن او  
پریشان متوکہ۔

دیگر نا نماز کٹا۔ خلقیک بھازی اٹ مجلس کر سا طاہر نُس تا اُرا کن بنگ اسر۔  
داڑے تا تونا زبی بی مٹھائی تے سیٹ کنگ اس۔ خلق نا منہ پین ذالبول اودے کمک  
تنگ کن بسوسراو چاتے تیار کنگ اسر۔ مہمانک بسر تو چلو اومنہ سنگت تا شربت او چاتے  
ار فیر او مہمان تا خذ متے شروع کریر۔

تا تونا زبی بی طاہر نابا وہ تے توار کرے او مٹھائی تے اودے تس کہ نی تینا دو تے  
اٹ کلے ارا ارا دانه ایتس ہر س چناتے تفتیس تا بڑرتا۔

نرینہ غاک تولوک چا کنگ اسر اودا نگان ہر اُسٹ تینا مٹھائی تے استلم کنگ  
نُس او تینا مونا تخسا اس۔ بھازا تے اُسٹ آرام تہو ہموڑے تینا بٹھے کنگر۔ بھازاک صبر نا  
دوے ہلسا برداشت کریر کہ تینا چنا تون اوار کینہ۔ چلو درگہ نابا غا سلوک ارامانی آخن تو  
کلے سیل کنگ اس۔ طاہر نابا وہ اونا ماس آن گدرینگا تو چلو سوالی آختے اٹ ارامسہ وار اونا

کنڈا ہرا کہ کنے پائہ۔ ”بر چلو بٹھے تینا ارف“۔ ولے طاہرنا باوہ نا ہوش اللہ چائہہ ہراڑے آختہ اس کہ چلو بچ اودے نظر بتو۔

چلو وارد ماتا تو نازی بی بی ناماسہ آن انا کہ اوبسکہ کہ بلکہ تا تو کنے پائہہ ”چلو ہندن اراکن انیس تینا بٹھے دیس“۔ ولے تا تو نازی بی بی خلقی آذابول آتون ہندن مجلس اوچلم کشنگ ٹی آختہ کس کہ چلو نا خیال بچ بتو۔

مہمانک بش مسرتینا مٹھائی تے ارفیر او پیش تمّار ولد اچلو بس پیالہ گلاس کوپ اوتر ماساتے مچ کرے درے تا تو نازی بی بی ناماساتھا۔ تا تو نازی بی بی کاریتے ٹی ہندخہ آختہ کس کہ بچ چلو نا کنڈا ہرتو۔ چلو صلہ سے نا انتظار ٹی ہر وک اس کہ شام نا اذان شروع مس اوچلو چٹکو چٹکو گام ارفسا خالی دوارا کن سر ہلک او کسری ارامسہ وار چک خلک کہ تا تو کنے توار کرو ولے خیرے توار کرو ک کس الو۔ کوئی تے آن اندر منگ تون چلو نا خنتے آن خڑینکا ک یلہ مسرا اولنا کلکا ک تا پالنگ ے شروع کریر۔ چلو نانٹے آن سیک انا او ہموڑے گلی ٹی دیوال ے بچو کہ کرے تینے تو اسہ وار ولد اچو یزکا ک تا دیدہ غاتے آن یلہ مسر۔ چلو ہو غنگ خواتو کہ ولے داخو یزکا تے تو ننگ ہم اوناوس ٹی الو ہرافتے ٹی مٹھائی کنگ نارمانک اسر۔ ہرافتے ٹی بھلو انتظار کس شامل اس۔ خڑینکا ک وہنگ اسر کہ چلو نا نظر شک آتما تو زو زو بش مس او خنتے تینا صاف کرے اوسر ہلک۔ شک بنگ تون ہر یفے ”آلہ ہرے کر لیس۔ لمہ ہمے دے انتظارے نے کن۔ آلہ کنا مٹھائی؟“۔

چلو نا اُست خواس کہ بورہ کس خلیو او شک ے پاو مٹھائی ملتو ولے اُستے بھلن گٹ ے سخت لہجے دیر آ بند غاتے آن بار کر سا پارے ”نامٹھائی، نامٹھائی ے ہم ای کنگٹ بھاز بیگن اُسٹ“۔

شک نا اُسٹ خوش مس کہ چنکا ایلیم آخر مٹھائی کنگ۔ اُسٹ نا تا مراد پورا مس او بختدہ کر سا چلوئے چیر یفنگ کن پارے ”مزہ پھڈ! کننا بٹھے ہم کنکس“۔

چلوئے اولیکو وارزندٹ مزہ پھڈ نا بنگ خراب لکتو او ہڑتو ماک چپ چپ اُرا کن سر ہلکر۔ اُرا غا سر متنگ آن گڈ لٹہ تا پڑز و نکے تالان کرے او ہڑتو ماتے تو ار کرے ”ہو ارغ کنبو“۔ چلو سا نگ نا کاریمتے ٹی داخہ مشغول مٹس کہ صُحب ناے پھڑا کٹوس۔ بینگنی آن پھڈتہ غل کر یکہ۔ او پڑز و نک کن گیگی کرے تینے کہ شک نا تو ار بس ”لٹہ داپو کننا مٹھائی نا بٹھے ہم کنگنے۔ اودا سا ارغ اُرا کہ کُنوئے“۔

مٹھائی تا پن آن چلو نا خنگ ولد ا خوی نیکی مسراو کرار کرار تو ار کرے ”ہو لٹہ۔ ای ارا بھلو بھلو مٹھائی کنگٹ داسا چٹ سیراٹ کنا اُسٹ بفک ای کا وہ خا چوہ دم درینٹ“۔ ہند اڑتو تو ار تا چٹ سلیمس اوسیدھا رلی ٹی پترینگہ او خوی نکا تا بر فنگ ولد ا بنا مس۔ خوی نکا ک خنتے آن ڈک ڈک آتھارہ او اُسٹ ٹی امیدا تا پننگ نا تو ار بسکہ۔ جوان ہرے اسکان خوی نکا ک شولنگسا کریر او اُسٹ تا گبین مرسا کرے او آخر ہندا حالت اٹ تینگان انا۔

صُحب تو ن لٹہ تہ بش مس او چلوئے بش کنگ کن تو ار کرے تو چلو جواب تنو۔ لٹہ تہ رلیئے ار فے تو خنا کہ چلو نا گڑ دا نگا مونا خوی نکا ک بار سٹو او کلکا ک تا ہندن خنگرہ کہ پھر آن گڈ ڈغارے دیر نا نشان سلہ۔ لٹہ فریاد کر سا چلوئے ٹوہا و لے چلو نا دم تو بال کریمس او امر لٹہئے جواب ایتوس۔ لٹہ چلو نا سر جہ غا ہو غنگ اس کہ شک اُرا ٹی پترینگہ اودو ٹی تا ارا مٹھائی اسراو کرار ہو غو کو لہجہ سے ٹی لٹہئے پارے ”طاہر چلو نا بٹھے پس“۔

## گچّاک

اُمیمہ نا ابا تھانہ نا بھلا افسراس۔ او نا اسہ پین مارُس اس ’نواز‘۔ ہرا اوڑان بار  
 بلوچی غیرت او عزت کن تینا کاٹھے ہم تنگ کر یکہ او پین نُسے ناے خلنگ ہم کر یکہ۔ دا  
 باوہ او مارنا ہر عمل ہر فیصلہ بلوچی غیرت او عزت نا حساب اٹ کنگا کہ۔ اگہ فیصلہ اسلام  
 آن خلاف مروسس ہم فرق کتو کہ۔ اوفا سوچ داوڑ تنخو کہ اس کہ بلوچی دود او رسم او ایلو  
 فیصلہ غاک کل اسلامی و فیصلہ و۔

اُمیمہ نا پریشانی ہمو دے آن وڈھا کہ او نا لمہ کوٹی ٹی تو لوک او دے سئی کرے  
 کہ ’ابا نا تینا تھانہ نا افسر نُسے تو نا سا نگے کنگ نا فیصلہ نُسے کرے‘۔

اُمیمہ صُحب او شام ہندا فکر ٹی نا شاد اس کہ ’باوہ! دا تعلیم یافتہ انگا افسر امر بغیر  
 نُس کنا ہر فنگان کنا زندگی نا فیصلہ نُسے کیہ۔ او کنگہ ہندو ہمسفر نُس گچین کنگہ ہرا نا ای  
 صورتے ہم خنٹ۔ دا ظلم اوزیاتی نا خیال جوان منہ دے اسکان او نا ذہن ٹی چکر کرے  
 ولد او دے سُبّا کہ تینا دا غم نُسے لمہ تو پاوہ بلکہ او کسر نُسے کسے‘۔

صُحب نا وخت اس باوہ تہ تھانہ غا انا سس۔ نواز ہم اُرائی الو تو اُمیمہ ہمت



کر سالمہ ناماسہ انا اوگڑ دا نگامو نے شیف کر سا پارے ”لمہ! ابا امر دا وڑ کننگ کیک کہ بغیر کس کنا سوج آن کنا سانگے کر فک؟“۔

لمہ تاسنجیدگی ٹی ورندي تر سا پارے ”کنا مسٹر! نی داپا نابلو چاتے اٹ دتا باوہ تینا مسٹر نارضائے ہر یغینے؟۔ ہو، نا ابا داپارے کہ ای مارنا عکس کس ہتیوہ ہر بوتہ“۔  
اُمیمہ خجری آختے بڑز کر سا ہر یغے ”نی فوٹوئے تہ ہر اس اگہ او نے دوست متو توانت نی دارشتہ غان انکار کروس؟“۔

”کنے دوست متو تو ای پاوہ تہ ولے نے سمائے نا ابا تینا فیصلہ ئے ہراڑے بدل کیک“ لمہ بیوسی ٹی جواب تس۔

اُمیمہ نا چہرہ غصہ غان خیسُن مس او ترند مر سا پارے ”گڑا انت کن ہتیک فوٹوے؟“۔ او بغیر جواب نابزنگان بش مس تینا کوئی کن انا۔

اُمیمہ نالمہ ئے سما اس کہ او نا غصہ جائزے۔ بغیر کس او نارضا غان نئے تو حق اف کہ او نا زندنا فیصلہ ئے کین۔ ولے او بیوس نا دوٹی ہم اختیار الو کہ او تینا مسٹر کن گڑا اس کے۔ بغیر کس ارمان آن۔ او نا چندنا برام ہم بغیر او نا ہر فنگان مس۔ او نا ایلو ایڑتا برامک ہم ہندا وڑٹ مسراودا سا او نا مسٹرنا برام ہم ہندا وڑٹ اٹ مر یک۔ دا اسہ متکنو دستور کسے ہر ازمانہ سے آن روانے ولے گڑتی دا اس کہ حاضر انگ دور موجودہ انگ زمانہ مُستنا زمانہ غاتے آن جتا اس۔ داٹی ایلو قو مک ایلو مند ہباک تینا بے مقصد انگ دستور تینا وخت نا دو داتے بدل کریسر۔ او حسبِ زمانہ ایلو باوہ غاک تینا چنا تا برام نا فیصلہ غاتے او قارضا مندی اٹ کریرہ۔

اُمیمہ نا ہمسا یہ ہرا غیر مسلم اسر۔ او نا مسٹر اُمیمہ نا جوان انگ سنگت اس اولمہ تا اکثر اُمیمہ نالمہ تو ن مجلس کن او قارغا بسکہ۔ منہ دے مست بس تو گپ گپ ٹی تینا مسٹرنا

رشتہ ناپیتے کر سا پارے ”سسٹر! داکنا مسٹر بھانخرائی نئے۔ ارامسہ فوٹو نشان تسنن تہ ولے کسے پسند کچک۔“ اُمیمہ نالمہ اونا پیتا تے یاد کر ساتین تو سوچ خلنگ اس کہ دا غیر مذہباک ہر افٹے آنا مخلوق خوش ہم اف۔ اوفقا دوداک ننے آن زیات اسلامی و۔ اونا تو مرمر اسکان اسلامی رنگ ٹی نظر بنگ افس۔ داڑے بس ثقافت ناتا جے سلامت تھوئی۔

داڑے اُمیمہ نالمہ تینا سوال و فکر اتے ٹی آختہ اس ایڑے اُمیمہ گلوٹی تو لوک تینا مستقبل نا سوچے خلنگ اس۔ اُمیمہ نا بھلا غم او خوف دا اس کہ اونا ہمسفر امروس مروے۔ ہموڑ و شہزادہ اُس ہرا اکثر اونا تھتے ٹی بریک۔ ہرانا ذکرے اوتینا ہمسن تون کر یکہ کہ دھنوبادامی نشئی وخن، دھوشیفک آن بارا شکنو باموس نئے تہ۔ دھوانداز نئے اٹ گپ کیک کہ اُسٹ خوانک مچا عمر اونا تنگ انگا جوڑتے آہر سا اونا سنجیدہ انگا پختہ انگا شاعرانا انگا ہیئت او گپا تے بنیو۔ یا اونا آرغ ہم تحریم نا آرغ آن باروس مروے کہ دے اون تحریمے کوٹی بند کیک۔ بے سوب ڈپک تہ ترندمریک اوڑاسلا تا سال لمہ نا اراغا الپیک تہ۔

اراٹمیکو غم سمیع اس۔ سمیع ہمو ماراں ہرا اُمیمہ نادیوانہ اس۔ ہرا اُمیمہ تینا محبت نا ثبوتے مدام ترسا کر یکہ۔ ہرا اُمیمہ ہم دوست اس او اُمیمہ اونا محبت نا اونا چاہت نا عزتے کر یکہ۔ سمیع اُمیمہ نا شہزادہ آن بارالوولے اونا خنک مچہ مچہ ہموڑ خنزگارا او ہندا خاطران اُمیمہ اودے دوست تھاکہ۔ سمیع او اُمیمہ نا ملاقات ہم مٹس او سمیع اوڑتون وعدہ کریس کہ اونا براہ اُمیمہ تون مریک او ہر حال اٹ اودے حاصل کیک۔ ہرانا جواب ٹی اُمیمہ فقط بشندہ اُس کریس۔

اُمیمہ نا غمک وڈھنگ اسر۔ پریشانیک اونا سکون او آراے پلاسر۔ دیک ہم مونجا مونجا اسراونک تو اہن غم اوڈکھنا علامتا کو۔ اُمیمہ ہر وار تین تو نیت کر یکہ کہ تینا باوہ

ئے پاوہ کہ کنے نادا فیصلہ قبول اف ولے خوفان اونا اُست داخدر کبین مسکہ کہ نک تا  
ارنکتورہ۔ مارنا فوٹو ناہنگ آن ہم متوس ولے فیصلہ پک مٹس کہ اُمیمہ ناسانگ ہمو  
انسپکٹرون مریک ہرانا نئے بالادنا سما س نئے رنگ اوصورت نائے سوچ نائے پن نا  
سوائے رتبہ غان۔

اُمیمہ نالہ نامونا دہنو بھازار شتہ غاک مسوسر۔ اودے دا فیصلہ نئے کہ عجیب  
لگا کہ نئے پوسکن۔ ہا، اوڑکن حیرانی ہمو تم مسکہ اگہ اُمیمہ ناباواہ اوڑان ہر یفیکہ کہ نے دامار  
دوستے یانہ۔ یا او تینا چنا آن ہر یفوس کہ کنا مسٹر نا اُست خوانک یا اخہ۔ گڑا پریشانی کس  
مسکہ۔ داسا انت غم کرو سر کہ کل گڑاک حسب ثقافت حسب غیرت مرسا سر۔

اُمیمہ او اونا اُستے دا فیصلہ بھاز کبین تما۔ اونا شاد تو لوک تینا قوم تینا کما شاتے  
تینا ہمو ہر پیرانگا او ورنانگائے بد پاریکہ ہر ثقافت او غیرت نا پنے تینا مسن تا زندگی نا  
فیصلہ غاتے کیرہ۔ ہر فیصلہ غاتے ننا خدا منپک۔ ہراڑن ننا رسول خوش اف ننا ہمو وٹ  
رشتہ غاک منگو۔

اُمیمہ نادا تو ارے بنوک کسس الو بغیر کس بیوسولمہ نئے آن ہرانا خفک تو کاریم  
کریرہ ولے دوئی باریٹس کہ اوکا نہہ تینا ارغے پانہہ کہ خدا ارادہ نو فیصلہ کپہ۔

ایلم کس ہم اس ہر ادے ایڑنا خوشی تے آن زیادہ تینا غیرت نا اوراج نا پیتا تا فکر  
اس۔ دُہن انگا ایلم تون ہرا ایڑ تینا اُست نا پیتا تے کنگ کیک ہرا اونا خوانگا ہم راضی الو۔

خیر خوانگان ہم داسا اُمیمہ نا اُست پناس کہ داراج ٹی اسے تعلیم یافتہ وایس  
ایچ اؤس تینا مسٹر نا زندگی ناباروٹ دہنو فیصلہ کنگ کیک اوراج ٹی ننا مسن تا خوانگ آن  
انت تبدیلی کس بروے۔

غمک کا ٹم آسرسوسر۔ سانگ نادے خوک منگ اس کہ اُمیمہ ئے خیال بس  
سمیج بیوسے سئی کیو کہ کنا سانگ منگ۔ اودا پاو کہ ناکروکا وعدہ غاک وعدہ منگ کتور۔  
داسانی کنے گیرام کر کہ ای پین اُسٹ نا امانت کس منگ اُٹ اوہم زبردستی نا امانت اس۔  
ہر امانت آن زیادہ دزی کس معلوم مرک۔

شروع ٹی اونا اُسٹ خواکس کہ سمیج ئے انتے پریشان کیو ہج سئی کپڑہ تہ ولے  
ہندار تون اودے خیال بس کہ اونا محبت نا صلہ ٹی داخس تو کنگ کیوہ کہ اودے خبر کیو۔ او  
ہم مچے پریشان مرے اوہم کنکہ ہونے۔ تیا ای انتے تین کن ہو غیو اُسٹ کس تو پین مرے  
ہر اودے کنا غم گئے۔ کنکہ ارمان برے۔

شام تو تینا کو ٹی تیا تو لوک سانگ نا ویلاتے ٹی گرفتار مونجا انگا چہرہ تون تینا  
موبا نلے ار فے او سمیج ئے میج کس کرے ”السلام علیکم! امرس سمیج؟“۔

دم کس گدرینگو کہ سمیج نا ورنڈی بس۔ اودے ہم احساس مس کہ محبت کروکا ک  
انتظار کر فیسہ۔ ”الحمد للہ! ای جوان اُٹ فی امرس گودی؟ اُرا والا ک امرو؟“۔ سمیج  
لکھاس۔

ایہن تو داسمیج نا عادت اس یادہن پانگ کینہ کہ اونا جوان انگا عادت اس کہ او  
ہر اولیکو میج ٹی اُمیمہ آن ہر بیکہ کہ نما اُرا والا ک امرو او اُمیمہ جواب تسک تہ ولے اینو  
اُمیمہ ئے اونا داسوال وڑتو او تین تو پارے کہ دادے انتے ہمو بند غاتا ہر فنگے ہر افٹے کنا  
زندگی نا پرواہ اف۔ بلکہ اودے معلوم اف کہ ہر بند غاتا و طبعیت او صحت نا فکر مندے  
ہمو فک کنے اوڑن جتا کر سا پولیس والا سے نا قید ٹی تنگو۔ اوہم تمام عمر نا قید۔

”کل جوانو ولے ای اقٹ“۔ سمیج ئے ورنڈی تر سا لکھا۔

دامیج نے راہی کنتگان گڈاوتین تو پارے ای تو واقعی جوان اف اٹ ولے  
سمیج انت نس کنگ یک کہ ای اودے سئی کریٹ۔ خیر اودا اسکان سوچ ٹی نس کہ ورنندی  
بس ”ہو اللہ خیر کے۔ انت مسنے نے؟۔ ڈاکٹرے نشان تئس تینے؟۔ نی بچ تینا صحت نا  
خیالے تخیسہ۔“

بچہ فکر اس سمیج نے تینا محبت نا۔ لا حاصل آ محبت نا۔ تینا بد نصیبی آ آڑ سندہ نس  
کشسا لکھا ”اگہ ای تینا خیالے تخرہ بایدے ایلو فک تخر۔ ہو دامرض ڈاکٹر اٹ مر  
مفک۔ دامرض پولیس والا سے آنے۔ اگہ سرکار گڑا اس کے تو گڑا نا گڑا اس مننگ یک۔  
اوہم بھلا سرکار۔ بڑزنا سرکار“ اُمیمہ مایوسی اٹ جواب تئس۔

اُمیمہ نا دامیج سمیج نا کاظم نازی آن ہندن گدرینگہ دہنکہ سیرانگا چک ناوڑ نا  
ذی آن۔ دم نس جوان دماغا زور تئس ولے بچ بتو عاشق نا ملی ٹی۔ آخر مجبور مس لکھا ”پہہ  
متوٹ۔ انت مسنے نے؟۔“

اُمیمہ نے بیوس نازی آعذاب بس اوبغیر فلسفہ غان صاف اوسیدھا لکھا  
”کنا سا ناگ منگہ منہ دے ٹی۔“

دمیج نا خواننگ تو اسہ وار سمیج نا حید اک یلہ مسر۔ چہرہ غان تا تبسم بال کرے۔  
جوان دم نس خنتے آ اور تے خوشکا پڑہ غاتے پنچہ اٹ راستی چپی کرے او آخر بیوس مس لکھا  
”دیرتون؟ ہراوخت؟۔“

اُمیمہ نے مالو آن سا اس کہ اونا اوسمیج نارشتہ اسل مننگ کپک ولے اوسمیج نا  
محبت نا احترام ٹی داپیتے بچ پاتو کہ۔ داسا تو دا گڑا پک مس۔ اوفقط سمیج نے خبر کنگ  
خواہسکہ بس۔ داڑن بیدس نہ اودے سمیج غان گڑا اسے نا امید نس اونہ سمیج نے داخہ

طاقت اس کہ او اُمیمہ ناسانگے پولیس والا تون کنگ کن الپروس۔

”پولیس والا سے۔ بس ہندامنہ دے ٹی مریک“ اُمیمہ جواب تس۔

دامیج عے خواننگان سمیج ناخنک ز رُس پین بے تعی و نشی ڈول مسرا و درندی ٹی

لکھا ”نی خوش اُس داسانگ آن؟“۔

اُمیمہ میج عے خوانا تو اودے عجیب لگا کہ دا امر و سوال نُسے دا بے سمانت

ہر یفک۔ ہرانا جوابے اودا وڑتس ”جی ہو“ بھاز خوش اُٹ او خوشی ناوجہ غان بیمار مسُٹ“۔

میج ناخوانگ تو سمیج عے تینا بیوقونی نا احساس مس کہ دا امر و فضلو سوال نُس

کریٹ۔ داکان گڈ جوان ہرے اسکان سمیج ناکنڈان ہچو میج نُس بتو۔ اُمیمہ تینا مستقبل نا

پریشانی ٹی آختہ او سمیج تینا محبت نانا کامی آسوچ خلنگ اس۔

سوچ او تینائی ناوجہ غان اُمیمہ ناخنک تر مسرا و پلنگ آ تنگان ہلک کہ اچانک

موبائل نا تو آرخنک تا ملنگار۔ موبائلے ار فے تو سمیج نا میج نُس ہرا ٹی ز رُس بھلور سالہ

نُس لکھوک اس۔

”اُمیمہ! کنے سمائے نی کنامنگ کپسہ۔ اگہ ای نابا وہ غار شتہ راہی کیو تو مسئلہ

پین وڈھک کہ ای بیگانہ انگا مار اُمیمہ عے ہراڑے خنٹ ہمہ کنے دوست بس او پین

پین۔ کنے خوشی عے کہ کنے ناوڑ و مسٹر نُسے تون محبت مس ہرا کننا محبت ناعزتے کیک۔ ای

نے آن پچ نُس خواپارہ بس اسہ خواست نُس کیوہ کہ کن تو اسہ ملاقات نُس کر۔ داکنا اُست نا

ارمان عے کہ ای نے تو تالاب نا کرّہ تو لوک مجلس کیو۔ کنے معلومے نی سوچ خلوس کہ دا

امروار مان نُسے امر و استخوانی نُسے و لے خدا چانک داکنا زندنا اسہ بھلور مان نُسے۔ پلیز

انکار کپس، پلیز“۔

میچ ناخوانگان گڈ اُمیمہ ناتھ پرینگا اوسوچ خلک کہ انت جواب ایو۔ اگہ انکار کیو تو دانا پنوکا اُسٹ بور بور مرک۔ اگہ ہو کیو تو امرلوٹ اوڑتون۔ خیر ملاقات تو مالوہم کرینٹ ولے تالاب ناما سا کتھ۔ گڑا انت پاوتے یا خدا۔ ”مرے مگر چنکو مجلس کس اوہم ہندا اسہ ارادے ٹی، ولداسا نگ ناتیار تے لمہ شروع کروے“۔ آخر دا جوابے میچ کرے۔ سمیچ ناٹھی آ استا ملہم کس لگا او منہ دے کن سکون کس نصیب مس۔

”تینک یوسوچ“، نا میچ کس راہی کرے۔

پیشیم ناپاس کس اُمیمہ کالج آن بس تو لمہ دالان ٹی نواز کن ارغ شاعنگ اس۔ باوہ تھانہ غان دا اسکان بتوس۔ جندتہ تیج بدلیفنگ کن تینا کوٹی ٹی پترینگا۔ دم کسے آن گڈ لمہ تہ ارغ کن توار کرے ہرانا جواب ٹی اولمہ پارے کنا ارغاتے ہندا ڈے ہت کنا کوٹی ٹی ہرانا سوب دا اس کہ او تینا ایلم نا چہرہ کسے ہنگ خواتو کہ۔ ہرا بس رسمی وایلم کس اس۔ ایلمی نافرض وحقاتے آن بھازمراس۔

اُمیمہ ارغ کنگ اس کہ سمیچ نا میچ بس ”السلام علیکم! گودی! امر اس؟۔ اُرا والا ک امر؟۔ پھلہ تیج بجه ناوخت امرے؟“۔

ارغان فارغ منگان گڈ سمیچ نا ورنندی لکھا ”کل جوانو۔ نی امر اس؟۔ او بیگہ تو ن منگ کپک، صُحب نامرے تاکہ کالج ناوختا“۔

سمیچ دم کسے ناسوچ آن پدراضی مس ”مرے گڑا پھلہ شکور نا دکان نا خیر آ نے کن انتظار کیوہ۔ ہمو کالج ناوختا مونو گاڑی سے ٹی،“ میچ کرے۔

میچ ناخوانگ تو اُمیمہ نا اُسٹ ٹی خوف کس تالان مس۔ او دالملاقاتے تصور کر سا لڑاکہ۔ دانی اونا چو قصور کس الودا اونا زندنا اولیکو دہن انکا ملاقات اس۔ ملاقات نا

پک منگ تو باوہ، ایلیم، راج نا خوف زیات مرسا کرے ولے دا خوف اُمیمہ کن مستقبل نا خوف نا نسبت اٹ بچ کس الو۔ او د ملاقات تو اسہ محبت کرو کو سے نا استخوانی کس پورا کنگ نا اس۔ ہر اپاک و خیال وصل کس اس۔

وخت تیر مرسا کرے شام مس۔ شام آن خفتن، خفتن آن گد تہاری او خاموشی توں خوف ہم و دھنگ اس کہ اُمیمہ نا خنک تر مشر او تنگان انا۔ ایڑے سمیع صُحب اسکان ملاقات نا خوشی ٹی خاچتو اگہ خاچنگ کن گیگ کریکہ تو اُمیمہ نا سانگ نا غم اودے التو کہ۔ اُمیمہ ہمو تینا مست نا وختا اُراغان کالج کن پشتما او خوفزدہ انگا اُسٹ چک خلوک انگا نظر لڑو کا قدم تے اٹ تینے شکور نا دکان نا خیر آ سر کرے تو سمیع مالو آن مونو رنگ نا گاڑی سے ٹی تو لوک اونا انتظارے کنگ اس۔ اُمیمہ خلیس آن گاڑی نا خیر نا سیٹ آ تو اس او سمیع بغیر پیٹے او گپان سر ہلک۔

شکور ہموڑے دکان نا بغل آ تینا چا دا نے سلنگ ٹی اس کہ اُمیمہ ے درست کرے کہ دا تو نواز نا ایڑے۔ ہر اہڑ دے دکان نا موننا سلیمکہ ولے اینو خیر آن انا۔ او ہر وخت تینا ہمسن توں انا کہ اینو مار کسے توں او ہم گاڑی سے ٹی۔ شک ار فے تاکہ گڑ اس تو ارے او ہر انا مستانی نا ہلنگ ہم ضروری ے۔ دا ڈول صُحب نا چا ہضم مفک۔ زوز و دکان ٹی تینا پتر نگا او کھاتہ والا رجسٹر آن نواز نا نمبرے کشافون کرے تے او دکان آ بڑنگا تے۔

نواز تینے دکان آ سر کرے تو نواز ے دکان آن کشا او خیر آ درے او مچ آ منظرے اوڑ کن بیان کرے۔ نواز نا خنک بلوچی غیرت نا وجہ غان خیسن خیسن زراب آن بار مسرا و خا ر آن تس تس ے شروع کرے۔ شکور ے حکم تس ”نی موڑ سائیکلے تینا اسٹارٹ کیس ای بس بسٹ۔“



نواز م کرسا اُر کن اِنا او اِکان لوڈا نگا پٹلے مُختافے اوبس شکور تون موٹر سائیکل  
آ سوار مس او شکورے پارے ”ہر اکسراٹ اِنا نو ہمو کارا ہی مر“۔

شکور سمجھا کہ نواز اُر اغا تینا باوہے سئی کنگ کن اناس۔ موٹر سائیکلے جاگہ  
غان بال ترسا ہندن دریکہ کہ دُہنکے شیر ساہدار نارنڈاٹ کا نہہ۔ اُمیمہ اوسمیع گاڑی ٹی  
تو لوک شار آن پشن اِنوکا کسرے ارفیسر۔ اومجت نافضا ٹی، عشق نا آبادانگا جہان نا  
ویران انگا تغتے ٹی، اندھی فلم ناگانا تے بنساتینا تینا خیالاتے ٹی گم روان اسر۔

شار آن پشن تمگ تو اُمیمہ نا اُسے زر کس تسلی بس۔ خوف کم مس تو ہر یلے

”ہر اکنڈا کاسہ؟“۔

سمیع نیام ناشیشہ ٹی اُمیمہ نا خشک ترا نگا خفتے ہر سا جواب تس ”تالاب ناماسا“  
ہمو جوانو جاگہ سے مجلس کن۔ اوکنا اُسٹ نا ارمانے ہم۔ اودا وختا ایہُن ہم کس بفلک“۔

جوان ٹکرس محبت نا کسر آ سفر کرسا آخرا وختینا آخریکو منزل آسر مسر۔ سمیع گاڑی  
ے تالاب ناما سا پنگنا درختا تا سیجا ٹی سلیفے۔ گاڑی آن دڑینگا پشن آنظر کس شانا تو بغیر  
کس پھدین انگا تہو تالاب ناخ انگا دیتے آن پٹو او چرگا تا تو ار آن پین بچ الو۔ او خوش  
مرسا گاڑی ناخیر نادرگے فلمی اسٹال اٹ ملا اُمیمہ ہیر وُن تا اندازاٹ اسہ وارا سہ نئے  
کشا ولد ادوے سمیع نادو ٹی تس اوگاڑی آن پشن تما۔ اُمیمہ نادوے دو ٹی کننگان سمیع ے  
ہندن محسوس کہ جنت رینگا، نازورکا اُشکلنا اورک ہرافتے دوخلنگ آن خلیس کس تما تا کہ  
دوخلنگ آن دیر مفس۔

ہڑتو ماک منہ گام خلسا بسر تالاب نا کنارہ غا پھدین انگا مشتے آ تو سر۔ سمیع بھاز  
اصرار کرے کہ گاڑی نا پایدان تے ہتیو ہمو فتنے آ تول ولے اُمیمہ منتو۔

ہڑتو ماک تو لوک مہر، محبت، ارمان، افسوس، بد نصیبی، قسمت، تقدیر، سماج نا  
سر حال لاتے آگپ کنگ اسر۔ چپس کنگرہ، پیپی کش کریرہ ہرافتے سمیع تین تواریس۔  
داڑن، بیدس اُمیمہ کن تینا اسہ نشانی کس، ہم یٹس ہرادے او اننگ نا وختاودے تسکہ۔

ایڑے نواز او شکور کسرنا کنارہ غاتے آشکاری آن بار نظر شاغنگ اسر گاڑی  
ئے پٹنگ اسر۔ داڑے پاک انگا محبت نا مجلس شروع اس۔ ہتخندہ غاک اسر، مخنگ کس،  
خنک اسر۔ اسہ پین دنیا کس اس ہرانا قیمت ئے فقط محبت والا ک پہہ مریرہ۔

شکور یکدم موٹر سائیکل ئے کسر آن چپ کر ساسلیفے او اشارہ کر سنا نواز ئے  
پارے ”ایدے“ ہے مون انگا گاڑی ٹی ایڑنا سوار مس۔“

ایڑنا پین آن نواز نا در پین لار کرے او خین آخن تو شکور نا کو پہ غاٹسا پہہ  
کریرہ ”ان کر اکرا او فاما سا او موڑے سل۔ ہو موٹر سائیکل آن دڑینگس۔“  
”مرے“ پارسا شکور گاڑی نا کنڈ اسر ہلک۔

سمیع اُمیمہ تون تو لوک ارمانی آخن تو او نا ارمانی آہتاتے بنگ اس۔ اُمیمہ تینا  
مستقبل نا ارغ نا ذکرے کنگ اس کہ دا کہ شکور او نواز موٹر سائیکل آچھاش کریر۔  
لا حاصل انگا محبوبہ نا گپاتے ٹی سمیع ہندا خہ ڈب ہلکوس کہ موٹر سائیکل نا تو ار  
ہچ او نا خفتے آتمنو۔ اُمیمہ ہم تینا غم تا شور ٹی موٹر نا تو ارے بنو۔

شکور موٹر سائیکل ئے کرار کرے او نا خیال اس کہ نواز دڑینگک جو ان سمیع ئے  
منہ شامات اولخت خلیک او اُمیمہ ئے ار فک ولے داڑے بلوچی آ غیرت نا جنون لار ٹی  
اس۔ نواز مخ آ تفوکا بیٹ آن پٹلے کشا ہنداڑ تو سمیع او اُمیمہ موٹر سائیکل نا تو ار آپڑینگا  
اُسٹ آتون او ار چک خلکر، او چک نا خلنگک تون سمیع نا پیشانی آٹا کہ مس گولی نا۔ مسافہ

خوک کس تو گولی سیدھا نیام سر آ تالگا، دا اسکان ابکہ ئی ئی اُمیمہ ناباغان چہانٹ پیش  
 تمٹوس کہ اراٹمیکو گولی اونا سیدہ غاٹا کہ کرے او ہڑ تو ماک دیر نا کنڈا ریڈ کریر۔ شکور نا  
 ہوش پرینگا کہ دا انت قیامت کس مس۔ خدا کو کنا شیطانی ے دا گنوک ہڑ تو ماتے کہسے۔  
 نواز نا اُست پھدین متوس کہ موٹر آن دڑینگا او تالاب آ لگا او ارا گولی پین  
 سمیع نا کاٹم ٹی خلک او اسہ پین گولی کس اُمیمہ ناسیدہ غا نشانہ کرے ولے گولی نشان غان  
 چپ برابر اُمیمہ ناخ نیام ٹی لگا۔

شکور لڑز و کانٹے اٹ، حید انگا رخسار تو موٹر سائیکل ے اراٹمیکو گیر ٹی شاغا او  
 یلہ مسر ہڑ تو ماک اسہ کنڈے کن۔

پھدین انگا تھوٹخ انگا دیتے ئی خیسین خیسین بسن انگا دتک او ارمٹگ اسر۔  
 اُمیمہ نا ناز رکالخ سم ناطقت آن نیام آن اراٹ مٹس او دتک جو آن بار روان اسر۔  
 سمیع نابوز مشتے ئی ڈب انا سس او چرپ انگا پڑوہ غاک تہ دتے ئی چڑ اسر۔ ہڑ تو ماتانت تا  
 ماسا چساک ثابت تخوک اسر او پیسی نابوتل ہموڑے مٹس تموک اس۔

دے کاٹم آر سیفیس، تالاب نا خیسین انگا دیر با سنگ اس کہ ہنداڑ تو کسری  
 کس سائیکل ے تینا خالی انگا سُل ے پرکنگ کن بس تو تالاب نارنگ ے ختگ تون  
 ابکہ مس اونٹے آن تاڈ غار کشکا۔ تالاب نارہی آ ارا معصومونا زکولاش مشتے آ تموک خنہ  
 تو ختے آن خوینک آک تالیہ مسر۔ دم کس بے سدھ ہموڑے گوڈا تے ڈغار ٹی خلک تو س  
 ولد اسائیکل ے ار فے او شار نا کنڈا پیش تما۔ بازار آ سر متگ تون تینا سنگت کس حوال  
 تس تو احوال دا بند غان ایلو آ، ایلو آن ایلو آ سر مر سا کرے او نیمہ شار سئی مس۔ بھازاک  
 تالاب کن رم کریر او بھازاک احوال تنگ کن سکتا تے کن سر ہلکر۔

آخر حوال تھانہ غا سمرس۔ ایس ایچ او نے خبر رسیدگا کہ ارالاش تالاب نے ناسا تمنا نو۔ اسہ مارنے اسہ مسٹر نے۔

ایس ایچ او صاحب ارمان کرسا حکم تس کہ ”گاڑی نے تیار کبہ کے نانن والاتے خبر کبہ کہ کچکا تے بیدار کیر۔ ای داقا تلاتے دہن الپہرہ چاہہ امر و مریرا و اتھس مریر ناپرا من انگا شارنا بلہ غاتے ار فیر داک“۔

حکم نامطابق کچک آتون ار اپین سپاہی سرکاری آمنی بس ٹی سوار مسر۔ ایس ایچ او تو اسہ پین انسپکٹرس اونا گاڑی ٹی سوار مس۔ دافنے آن بیدس ار اپین گاڑی بیک اپ نا خاطر ان پیش تمار ہرافنے ٹی اسہ کیمرہ مین ٹس ہم اس۔ گاڑیک تالاب ناما ساڈ کریر تو چنا او بھلاک کل تالاب نا ذی آگڑ دسلوک تالاب اولاش تانظارے کنگ اسر۔ پولیس نا گاڑی تے آن خوف کرسا کل یکدم خیر آکشار تینے۔

ایس ایچ او تون او ار انسپکٹر او کیمرہ مین ہم لاشا تا کنڈ انار۔ ایس ایچ او نا نظر اسہ وار سمیع آتما ہرانا بوز مشتے ٹی ڈم ہلکوس۔ ایلو نظر ایس ایچ او نا اُمیمہ نا معصوماختے آتما تو خنک تا گڑ داک آن ڈک دیدہ غاتے آن پیش تمار۔ چہرہ پوشکن پوشکن خنک خیسن خیسن خوسنکی اڑسار تینے۔ منہ گام مونا رنے ولدا خوتی اٹ ہرا و دوتے زور آن مون ٹی خلک۔ لگی کرے تینے کہ اُمیمہ اے ارفو تینا سینہ ٹی خلیو افریاد کیو ہو غیو و لے ہنداڑ تو سمیع آ ولدا نظر تے تما و سمیع نا خنگ تون غیرت نا طوفان سینہ ٹی بش مس کہ داسٹر تو کنا عزت کنا پن بلوچی غیرتے مش تا کرے۔ داما تو تالاب ناما سا بسونے ملاقات کنگ کن۔

جوان دم ٹس سوچ خلنگان گڈ تما شائی تے آ مون کرسا حکم تس کہ ”بہودا ہر تو ما

کچکا تے ارفو، ابو ہندا وڑ کھڈ کبو“۔

چنا او بھلا او پولیس کل پریشان مسر کہ ایس ایچ اوئے انت مس۔ انسپکٹر  
جوڑتے سر فے گڑ اس پانگ کن ولے یکدم ایس ایچ او او دے چپ کنگ ناپارے۔  
اگہ چپ کریفر و س تے تو انت پاروس تے کہ دامسٹر کنا مسٹرے او نامرو کا دشتار اس۔  
ولد اترندی اٹ حکم تس بند غاتے کہ بیوار فوئہ چندتا گاڑی ٹی سوار مس او سر ہلک  
قبرستان کن۔ زینہ غاک خوف او بیوسی آن باتے تفریو ہڑتو مالاشاتے ارفیروڑسے اٹ  
قبرستان آسر کریر۔ اراقبرختار ہڑتو مالاشاتے ہندن وتر، ہموپچا تون ہموپ آتو ن ڈم تسراو  
سمیع والا نشانی ہم اوڑتو ن او اڑم ہلک۔ لاشاتے کھڈ کنگ آن گڈ کل سر ہلکر اراتے کن۔  
ایس ایچ او تینا ٹیم تون او اراقبرستان آ گاڑی تے ٹی سوار مچا منظرے سیل  
کرے۔ تینا مسٹر نالاشے کھڈ کنگا خنا ولے غیرت او عزت ناپن نادو آن اسہ خونیک نس  
ہم خنتے آن خیرات کتو۔

ولد اینگان مست انسپکٹر او سپاہی تے حکم تس کہ ”نم اینو تھانہ غاودا سرکاری  
کچکاتے ہم سئی سلامت ہنداوڑ مرکز آسر کیرے۔ ای کاوہ اراکن ولد اٹھانہ غابریوہ“۔

## کاریمی

شکیلہ نام عمر پیست و شش سال یایست و ہفت اس۔ اودے ہم سئی معلوم الو۔ او  
 تینے آن پنچ اُسّر۔ چار ایڑ اسہ ایلیم اس۔ ریاض کل آن بھلا اس۔ جمیلہ اوکان چنکا اوکان  
 گڈ شکیلہ اوڑ ان چنکا فرح اوکل آن چنکا ماریہ اس۔ ریاض اوزائیفہ تہ جمار ہنگارہ۔ اُسّر ہ  
 کل اسہ اُرائی ولے گڑوک جتا بیٹ مسّرہ۔ او تین تو بھاز گپ او مجلس کتورہ۔ دافتے کن  
 مہمان بروس تو ریاض نازائیفہ خوش آمد کن بتو کہ اگہ دافتے کن بروس تو ریاض نازائیفہ  
 روادار الو کہ جمیلہ یا او نایڑ کس مہمانتے آبرے اوفتون تولہ۔ ارا کوئی ریاض او او نازائیفہ نا  
 اُسّر۔ ایلو مسٹ انگا کوٹیک ایڑتے آبتخوک اُسّرہ۔ جمیلہ نالمہ اینو آن شش سال مست  
 کینسر نا دو آن فوت کریس۔ او نا باوہ عبدالرحیم اوکان چار سال گڈ اُسٹ نا اٹیک آن  
 کہسک۔ جمیلہ نا سانگے باوہ تہ جمیلہ نا مانا مار شکور تو کریس ولے باوہ نا تہ کہنگ آن گڈ  
 جمیلہ تینا مامائے اُرا غابٹینگا او مامائے تینا پارے

”ماما جان! لمہ نا کہنگان گڈ ننا آسر باوہ جان اس۔ داسان ایڑتا آسر اوّل  
 خدا جانے ولدانی اُس۔ ریاض آن نن ہمودے اُسٹ ایکیم کرین کہ تینا زائیفہ نا باغانا  
 خوش حالا اُراے کوئی تے اٹ بٹھا۔ تُو نا پنچ ہزار نندا و تینا زائیفہ غان انداری تحک ولدماچا

تو ننایمہ غا نظر شاپک۔ شکیلہ تو خدا نا ابدال کسے۔ دے اون اُرانا کاریم تون مشغولے۔  
 فرح او ماریہ نادا اسکان سا نگ متنے۔ ای تینا ایڑتے ریاض او اونا کافر آ زایفہ ناذمہ ٹی  
 النگ کپڑہ۔ کنے دافتا خیالے کروئی ے داسا۔ او فٹالمہ پاس یا باوہ پاس کل ای اُٹ۔ ماما  
 جان نی کنا او شکور نا سا نگے پرغ۔ ای دا اُرائے داسا داحال اٹ النگ کپڑہ۔

ماما ریاض نا بے غیرتی او اونا زایفہ نا ظلم آن واقف اس۔ اودے خیال بس کہ  
 جمیلہ نا برام آن گد اول تو او شکیلہ ے اُرانا کاریمتے اٹ کہسک۔ فرح او ماریہ نا قیامت  
 اسکان سا نگے کرفرور۔ کنا ایڑ تو خدا نا امانت اس انا ولے دامعصوما تا زندے ای خوار او  
 در پدر کنگ خواپرہ۔ جمیلہ نا خنتے ٹی اودے تینا کہو کہ ایڑ نا صورت نظر بسکہ او تینا ایڑ نا مسنتا  
 زندے دا خا خراٹ بنگ کن او اٹل تیار الو۔ آخر اہندا مس کہ ماما تا شکور او جمیلہ نا رشتہ  
 ے شکور نا لمتہ نا منظوری اٹ ختم کرے۔

سا نگ جمیلہ نا فرمائش اٹ ختم تو مس ولے دا فرمائش مجبوری نا فیصلہ کس اس۔  
 ایہن تو داد نیائی دہنو مسٹر داسکان ودی متنے کہ تینا اُسٹ نا سا نگے تینا دواٹ پرغہ۔  
 مالاو جمیلہ نا خنتے ٹی او نا لمتہ او باوہ نا لاشاک سُرارہ۔ داسا اونتون او اونا خوشی تا  
 لاش ہم سُرنگہ شروع کرے۔ اودے سانس کہ داسا او نا قیامت اسکان سا نگ مفک۔ او  
 تینا جندنا اُرائے تینا دو تے اٹ دڑ فے۔ اٹھ خوش اس او تینا سا نگ آن۔ اخہ انتظاری کس  
 تینا برام کن۔ امر و امر و جوڑہ موغفیسس تین کن ولے داسا او نا زند بغیر برام آن اسہ  
 جنوزان کسے نا زند مس۔

دا غم تون او اوار او اودے خوشی ہم اس کہ اودا سا مختارے فرح او ماریہ نا سا نگ  
 او براے تینا موجودگی ٹی کرفک۔ او فٹا ہروڑٹ خیالے تھک۔ او فٹا ہموکل مراد اتے پورا

کیک ہر امر اداک اوفتاسینہ ٹی زارنگر کہسکر۔ دا خوشی تون اوار اودے اسہ پین امید کس ہم اس ہراونا بارنا جوڑتے خوشی ناسرخنی کس خوشکا کہ کہ فرح اوماریہ نابرام آن گڈ بلکہ اونا رشتہ ولد امرے ولے دامید نانیام اٹ ہر وار شکیلہ اوار تما کہ۔ اونا خیسنا جوڑتے یکدم بریفیکہ اودا خوشی عے خاک کریکہ۔ جمیلہ عے تینا کنڈ ان یقین اس کہ شکیلہ ناسانگ دا دنیا ٹی تو مفک۔ اودا نا ابدال بس اُرانا کاریمتے کن ودی مٹسے۔ پچا تا سلنگ اوفتا استری کننگ بیر متے شاغنگ اوفتا مچ کننگ اُرانا روفنگ رزانے سلنگ۔ اونا برام بس ہندا کاریم تون مٹسے۔ ہراڑن اوبھاز خوشے۔ شکیلہ واقعی ہندن اس اودے خنگ آن دا گمان بسکہ کہ اودے دادنیانا اسہ کاریم تون کاریم اف بغیر اُرانا کاریمتے آن۔

شکیلہ چٹلی آن داوڑا لوکہ۔ چٹلی ٹی اویلو مسنتے آن بارگوازی کریکہ۔ اسکول آ انا کہ قرآن خوانا کہ۔ تینا دوتا تے برام تسکہ۔ اوفتا جنے ہم ساڑی مسکہ۔ دیرہ خلککہ۔ کس نابرام مروس تو تینے سینگار کریکہ پوسکنو پچ کریکہ۔ ایلو مسنتے آن بار شکیلہ ہم ہروڑٹ دنیا داری کریکہ ولے دادنیاداری اوڑتو بھاز وخت وفا کتو۔ اونا عمر پانزدہ سال اس کہ اونا چپکو خف کاریے الا۔ ڈاکٹر اتے نشان تنگان گڈ معلوم مس کہ اونا خف نا پردہ نا ماساؤ کس ردانے ہرانا وجہ غان تو اونا خفتا پردہ اسکان سرمفک۔ دا نا علاج مننگ کریکہ ولے عبدالرحیم تون داخس پیسہ الو اخس کہ ڈاکٹر اتا طلب اس۔ شکیلہ نا داخف نا بند مننگان اونا زندگی مچا بدل مس۔ اسکول نا اننگے الا چنکا اوڑا مسخر اخلکہ پاریرہ کھرو کھرو بیٹے خواننگ کن۔ کھرو بیٹے خواننگ کن۔“

اسہ خف نا کھری آن اونا زیبا انگاپن شکیلہ غان کھرو مٹس۔ قرآن نا خواننگ ہم اوڑان ہندا سوبان سلیمس۔ اگہ کسے شکیلہ تون ہیبت کروئی تما کہ تو او شکیلہ نا



راستیکو خف ناما سا ہیئت کر یکہ یا دواٹ جوڑتا اشارہ اٹ اودے پُہہ کر یکہ۔ اُرا والا ک تو اونا چے ہلکسر تینا ہر پیتے اودے آسانی اٹ پُہہ کریرہ۔ شکلیہ تون ایہن گپ انت کروئی اس بس گڑا سے کن پاریرہ تہ۔ اُراٹی کسے گڑا اس ضرورت مروسس تو شکلیہ اے پار یکہ۔ مہمان نُس بروسس تو شکلیہ اے چا وِشنگر ہتنگ نا حکم ملا کہ۔ نِت بیغنگ نا وخت مروسس تو فرح جوڑتے تینا بھلن بھلن کرار کرار سرفیکہ اودے پار یکہ ”نُتے بنج“۔ ایلو دنیا داری نا گپاک اوڑتو ن متورہ۔ اگہ مستائی نُس الوئی مروسس تو گڑا اودے سئی کریرہ او مستائی نا بدلہ ٹی تینا کاریم نُس کشفیرہ۔ شکلیہ ہم داسا ہیل کریس ہندا کاریم تون۔ اونا زندگی نا مقصد جوڑ مٹس کہ اُرا نا کاریمتے اٹ زندے تیر کروئی اے۔ اُرا والا ک ہم شکلیہ غان بے خبر مسوسر۔ داسہ خف نا کھری نُس الو بلکہ اسہ بھلو عیب نُس اس کہ اوکل آن جتا اس۔ کل وڑان مراٹر۔ اُرا والا تاخن ٹی شکلیہ اسہ مشین نُس اس۔ ہرا بس کاریم نا کنگ چا نُسکہ۔

شکلیہ نا جند ہم دنیا اود دنیا داری نا فکر آن پاک اس۔ اونا تینا دنیا نُس اس۔ سالاتا سال اودے دنیا او تینا خیال بتو کہ۔ آخریکو وار اودے تینا خیال ہمو وختا بس کہ ماریہ اوڑان مستائی ہلک کہ نا چٹکی نا سنگت گنگو نا ساگ مٹسے (گنگو اوقا ہمسایہ اس۔ پن تا ماجد اس و لے گنگی نا وجہ غان کل گنگو پاریرہ تہ)۔ ماریہ نا مستائی ہلنگ آن گڈ شکلیہ زن درست بیرم ٹی خویک شولا۔ تینا چٹکی نادے تے کن ہوغا کہ کہ عجوز نُس اس اونا اسکول نا خواننگ۔ مسن تو گلی ٹی ششوک نا گوازی۔ دوتکا تا برام۔ اُرا والا تا مہر دعوت آتے آ انگ۔ داسا تو اودے زمانہ نُس مٹسے او تینا جوڑتے آ سرخی خلتنے۔ اونا یاد اہلک کہ کس اوڑکن پوسکنو بلوچی جوڑس چچ ہلے۔ تینا عید آتا وخت جمیلہ سادہ و جوڑس چچ میشن آ

موغک اوڑکن۔ فرح اوماریہ کن ہر سال ارا ارا جوڑہ دواٹ موغنگارہ۔ تینا بے وی آ  
 خڑبیک خڑبیک ہوغسہ اوسوچ خلککہ کہ ”اے خدا اسہ خف نا کھری داخو بھلوعنت نُسے کہ  
 زندگی نا کل رزگاک کارہ۔ اسہ وخت نُس اس اودے اچہ فخر نُس کہ اوسٹر نُسے۔ اونا جتا وچکو  
 سینگار میز نُسے۔ پیست سی جوڑا پچ اوتا رنگ رنگ نا سینڈال ارے تہ۔ مسہ چار پرس  
 ارے تہ۔ ہرا وخت اونا برام مس تو سیالاک اوڑکن پین پچ ہتیرہ اونا جتا ورا نُس مریک  
 ہرا دے اوتینا پسندنا وڑٹ جوڑکیک۔ اودے چنا مریک تینا چناتے نازا و محبت اٹ بھلن  
 یکیک اوفتے آ فلمی ستارہ غاتا پین تے تھک ولے اینو مسٹر نا منگان اودے بد بسکہ  
 اودے نفرت اس کہ اوانتے مسٹر نُسے۔ گنگو اسہ گنگ نُسے نہ دوئی اٹ ہیئت نُس کنگیک  
 ناخفتے آن گڑ اس بنگ یکیک ولے اوزینہ نُسے تو ہندا خاطر ان اونا خامیک خامی افس۔  
 اینو اونا سانگ مٹن۔ ای مسٹر نُسے اٹ تو کنا اسہ خف نا کھری کنکن داغ نُسے۔

چکی ٹی اوفقا ارا غا ہر بروکا مہمان اونا لہے پاریکہ کہ شکیلہ ئے ای تینا نثار  
 جوڑکیوہ۔ تا تہ رام جان پاریکہ نہ شکیلہ نا مسٹرے اوکنا نثار مریک۔ ولد اونا کھری آن گڈ  
 اسٹ ہم داہیتے کتو۔ اسٹ اودے تینا مسٹر پا تو۔ اونا کل ہمسن تا سانگ او برا مک مسر  
 ولے اوڑکن کس رسال بتو۔ گنگو نا سانگ نا شام شکیلہ صاف اسکان ہوغا۔ تینا زند آن گلہ  
 کرے تینا نصیب آن خفا مس۔ مسٹری ذات آن تینا مونے پرفے۔ مطلبی سیالاتے آن  
 ہر بندغ آن ناراض مس بس ہندا آخر کیو وارا اس اوکان گڈ اودے تینا خیال بچ بتو۔ اونا  
 کاریمک بھاز مسٹر۔

شکیلہ کن اسہ دھنو کاریم نُس الو ہرا مشکل مروس ولے اسہ سوال نُس اودے  
 وخت وخت بھازنگ کریکہ کہ اونا وڑانگا مستننا زندگی ہرا وڑٹ انجام آکانک۔ ماک کھر

مری گنگ مری کھور مریرا وقتا سانگ او برام دے نادے کس تو مریک۔ اونا وڑا نگا مسنتا  
ہم مریک یا نہ؟۔ دا واحد انگ سوال اس ہرانا ورندی اودے اکثر بے صبر کریکہ او اونا  
کاریمتے ٹی خلل شاغا کہ۔

ہندن کہ شکلیہ تینا ذات آن بے خبر اس ہندا وڑ فرح او ماریہ ئے ہم تینا ایڑنا  
خیال بتو کہ۔ اونا احساس اگہ کسے اس تو بس جمیلہ ئے ولے او ہم اکثر گیرام کریکہ کہ اونا  
مُسہ ایڑو۔ اونا نیم تعمیر مرو کہ امانتے ٹی بس فرح او ماریہ ناسانگ او برام نا خشتاک تخوک  
اُس۔ شکلیہ کن اونا مہر ہندا خس اس کہ ہر ادے اودے شکلیہ نا نصیب آ اونا مقدر آ ارمان  
بروس تو ہمودے او اونا کاریمتے تینٹ کریکہ۔ شکلیہ نا پڑوہ غاتے رندا کہ پٹاکہ۔ داکان  
زیات آ سودائی او خوشی شکلیہ نا بخت ٹی ہم الو۔

دیگر نماز آن گڈنا پاس اس کہ ماما تا جمیلہ کس تا ارا غا بس۔ جمیلہ اور ریاض ئے  
توار کرے او جتا کوئی سے ٹی تینا تو سر تو ماما دیرنا گلا سے ڈغار اتخسا کرارو کینو گٹ کسے اٹ  
پارے ”ریاض! ملا جان محمد ئے درست کیسے؟“۔

ریاض راستیکو دوئے قبلہ نا کنڈا مریفسا پارے ”پرچون والا“۔

ماما ”ہو“ ہمو جان محمد درو کنا دکان آ بس پارے تینا مارکن عبدالرحیم نامسٹر کن  
رسال انگ خوانہ۔ ای پاریت تا کہ اسہ واری اوتون گپ کیو ولدانم انبو تو جوانے۔ بس  
ولد اکل ذمہ داری تے کنے تس کہ نن نے تینا کو الخواہ کینہ۔ ریاض جان مارے تو نی ہم  
خناس قرآن نا حافظ کسے۔ باوہ نا تینا دکان ٹی کاریم کیک۔ چپ اخلاقی و مار کسے۔ ارا  
والاک تہ ہم ماشاء اللہ جوانو او۔ چپولمہ کسے تہ۔ دہنوتا تہ دا وخت ٹی خوش نصیب انگا  
نشارتے ملک“۔

ریاض ے تو مالو آن ذمہ داری ارفنگ ناشوق الو او خدا خدا کر یکہ کہ ایڑتا  
زوزو ورام مرے کنا جان چٹے۔ اُسٹ ٹی او تینا ایڑتے کن مہر کر یکہ ولے زانیفہ نادو آن  
مجبور اس بے مہری کن۔ ماما نا ہیٹ گٹا تو اشتانی اشتانی پارے ”بس ماما ہو کرتہ انت کسے نا  
انتظارے“۔

ماما کاٹھے جمیلہ کن اڑسا ”گودی نی انت پاسہ؟“۔

جمیلہ کڑمبوسوچ کسے ٹی غرق اس کہ اگہ اینودارشتہ غان انکار کرین ولد ادا  
چوری تے کن کس رسال بروے یانہ۔ انکار۔ انکار نا امہن انت ضرورتے جو انورشتہ  
کسے ماشاء اللہ۔

ماما ولد اجمیلہ نا چہرہ ناخوتی ٹی ہر سا پارے ”جمیلہ! گڑا انت پاسہ؟“۔

جمیلہ یکدم تینا سوچ آن حقیقی آدنیائی حاضر مس ”بس“ بس جو انے ماما۔ جو انو  
رشتہ کسے۔ ننا کنڈان بھلانی اُس داسا امرنی جو ان سمجھس“۔

ماما کاٹھے ہو ٹی سرفے چادرے تینا راستیکو دواٹ مٹ کرے اوبش مس ”بس  
گڑا ای داسا کا وہ پھگہ اوڑتون گپ کیوہ ولدانے خبر کروٹ۔ اللہ حافظ“۔

فرح او حافظ نا سانگ آن مسہ تو گڈ ماما او حاجی میراب خان بسر حاجی نا مارنا  
رشتہ کن۔ مارنا پن امداد اس۔ رنگٹ خیسُن اس۔ عمر ہندن بیست و ہشت سال اس۔ این  
جی اوز ٹی کاریم کر یکہ او جو انو خا ہوت کسے آن تعلق تا اس۔

داجار جمیلہ تون مشورہ متو۔ ریاض نا کنڈان ہو مس او مہمانتے ہموکا رخصت  
کرے۔ ماما ہم جمیلہ غان ہر فتو اودے مالو آن اجازت او کو الخوائی رسیگا کس۔

ماریہ نا سانگ آ بھلو خرچ کریر۔ ماریہ کن تچ، سینگار نا گڑا، اُرانا راشن، اراتیلا

بورہ۔ چا نابوچ، پیست ڈبہ پال، اراٹینک شربت، مسہ جام شیریں، ارا والاتے کن مسہ چک، برنج، پیاز، ٹماٹر، اوروکا، نامہ مسایہ اوسیالاتے کن پنجا ڈبہ مٹھائی ناتسر۔

ماریہ ناسانگ آن گڈ فرح او حافظ نابرام مس۔ برام بھاز سادگی اٹ مس۔ سادگی ناوجہ غان بھاز کم مخلوق برام آبسر۔ فرح نابرامے پنچ تو متوس کہ ماریہ نابرام مس۔ ماریہ نابرام شارنا جوان انگا بھلا برامتے اٹ او ارکننگا۔ بھلو وخت اسکان ذالولاتا مجلس آک ماریہ نابرام ناسر حال آمسر۔ ہر جاگہ اندا گپ نس کہ چوری ناصیب جوان پیش تمہ۔

ماریہ نابرام نارامٹیکو دے نس کہ اونا کوئی ناتہہ ٹی شکیلہ پترینگا۔ او پترینگا توں خنا کہ اسہ ڈبل بیڈ نس ہراڑا زیبا وخر نو پوش نس شانگو کے۔ اراسکو بالشت تنخو۔ اسہ مرغو وخر نو شوکیس نس دیوال تو خلو کے۔ شوکیس ناتہہ ٹی وڈ وڈ نارزان، ترماس، پرچ، گلدان، گلاس، جگ، ڈونگا، پیالہ او کوپاک درزن نا حساب اٹ تنخو۔ ایلو کنڈا سینگار میز تنخو کے۔ ہراڑا بھلو آدینک نس خلو کے۔ آدینک نامونا میز نا ذی آرنگ رنگ نانا زور کو بوتل او ڈبہ تنخو ہرا فتنے ٹی ذیل نارنگ، سرمہ، سرخی، مزواک، چمبیلی، شیڈ، سینگار بکس، تیل، کریم، لوشن، سینٹ، پوڈراو عطراک تنخو اسر۔ آدینک ناخوکی ناوجہ غان ہر گڑا اٹ خنگا کہ ہراڑن سینگار میز پین زیبا نظر بسکہ۔ سینگار میز ناماسا اسہ زیبا و دو درگئی و الماری نس تنخو کے ہرانا اسہ خانہ ٹی نہہہ وہ جوڑا تچ درنجو کو دا پچا تے ٹی ہفت رنگ جالز، ہفت رنگا کوڑو شیرنگو موسم، کوہ طور موسم، شوکیس دوچ، دو رنگا چاوڑ، بادام دوچ او ار اسر۔ ایلو خانہ ٹی گداک تل پتل سوارک اسر ہرا فتنے ٹی ویل، بخمل، پھل، شیفون، چادر گڈ، مرینہ او پین بھاز قسم ناگدا او ار اسر۔ دافتنے آن بیدس ارا ٹی اسہ زیبا و مونو رنگ نا ٹی وی نس تنخو

اس۔ ڈغار آتر کی ناخملی و غالی کس شاغوک اس ہراڑ اتر نو بلو پھل کشوک اس۔ مچہ اُرا نا  
گڑاک ختر نارنگ ٹی میچنگ اُسر ہراڑن اُرا ہندن خننگ کہ کہ آسمان نا دلکشو منظر نئے۔ او  
دا منظر تئج نئے ٹی حور نئے رسینگا نے۔ شکیلہ دا کل گڑا تے تینا ملاس انگا خنتے اٹ خوڑت  
خوڑت ہرے اسکان ہر سا کرے ولدا پلنگ نا ماسا بچکا کرے تینے او کڑمبوسوچ نئے ٹی  
ڈب ہلک۔ اونا سوچ ٹی پیر اونا ویران انگا دنیا اس ہراڑ اونا نظر شاغنگ کتو کہ او حقیقت ٹی  
مارینہ نا آباد انگا دنیا اس ہراڑن اونا خنک زکس ہم مرتورہ۔ مارینہ نا خوشی تے خنگان گڈ  
وہرے اسکان تینا نصیب آ لعنت راہی کرے۔ تینا بد بختی تے تینا خیالاتے اٹ قتل  
کرے۔ اونا اُست خواکس کہ زور آن چیمانٹ کس خلعے ہونعے ولے اچانک اودے خیال  
بس کہ اونا ماسا اونا چنکا ایڑ برامی آ جوڑہ ٹی تو لو کے ہرانا چہرہ غاتسم چاپ خلنگہ۔ ہرانا  
خنک اونا کوئی آن بار رنگ برنگی و۔ تینا ایڑ نا خوشی تا مبارک انگا دے آوامر ہونعے۔ ہندا  
خیال اودے زکس آرام بشخا۔ دا ارامیکو وارکس کہ شکیلہ تے تینا خیال بس۔ ولدا شام تو  
تینا اُرا ٹی ہوسوالاک اودے نن درست کنگز، ہوغفیر، بیسمرک کریر کہ اونا وڑا انگا مسن تا  
انجام ہراوڑ مرو۔ اونا خن ٹی مارینہ نا نامی آ دوک بٹورہ۔ زیباز بیانا زور کا دوک انا نام اٹ  
ڈیزن کروک اوایلو کنڈ اونا ڈا ڈا انگا دوک ہرازان تا سلنگ آن خل مسوسر۔ مارینہ نا سرمائی  
آ خنک مون مون کجل کروک اٹھ خوبصورت خننگارہ۔

داڑے اونا صحرائی آ خنک ہرا فتنے نئے سرمہ نصیب مسنے نئے شیفک اس۔  
ہندن بارن بارن دیوال نئے آ خلوکو۔ مارینہ ناخملی آ جوڑک انا آں بار خین خین  
ہندن خننگارہ دہن کہ پمبہ غاتے آ انا رارس شولنگا نو واینگان اونا جوڑک ہندن بور بور  
تل ہلکوسر دہنکے کسے ہل کے۔ نن درست شکیلہ نا خنتے ٹی مارینہ نا دروشم چکر کر سا کرے

اودے اونا کھری نابدبختی نا احساس تسکے زور زور آن اوڑا مخاکہ۔ شکلیہ ہمو سوالے وار دما تینا ذہن ٹی کھوسی تسکے کہ کنا وڑانگا مسن تا آخر انجام امر مریک؟۔ ننا نصیب داتہاری اوتہار مئی آن پیش تمک یا نہ۔ ہندا سوال اوڑتون ہرے اسکان کچاری کرے ولدا اودم درے اوتنگان انا۔

صُحب تو وختی اونا ختک ملنگار۔ دیدہ غاک تا تر بسوسر۔ استونا کل سوالاک اونا یاد آن انا سر۔ اگہ گڑاس یاد اس تو بس اُرا ناکار میک۔

دانیام ٹی ہفت سال گدرینگا۔ بھاز آرنگاک بدل مسر۔ انسانک بدل مسر۔ سوچاک بدل مسر۔ وخت بدلینگا۔ زمانہ پوسکن مس ولے شکلیہ نازندگی ہمو وڑسلوک اس۔ اگہ گڑاسے نافرقت بسوس تو اودا اس کہ اونا کار میک کم مسوسر ولے بخت ہمو بخت اس تہار انگا، کھور انگا، کھرانگا۔

ماریہ اوفرحتینا اُراتے ٹی آسودئی نازندگدری فیرہ۔ سال ٹی ارا وار بئرہ عید آتا وختا بس۔ عموماً مسنک چنا ختنگ کن تینا لمہ نا اُرا غا بریرہ، توتا توتا ڈکیرہ ولے اوتولمہ غان چوری اُسر۔ ہندا خاطر ان وخت کس جمیلہ کن گلو کریرہ گڑا جمیلہ انا کہ ارامسہ ہفتہ اڈ کریکہ اوشکلیہ نانتینائی نانیمونے کرسا بسک۔ حالانکہ شکلیہ تو ہمودے آن تیناے ہرادے آن اونا خف کھر مس۔

صُحب نا وختی جمیلہ بش مس نماز خوانا شکلیہ ے ہم بش کرے۔ چاکنگر۔ شکلیہ جاروے ارے اُراتا رونگ ے بنا کرے۔ جمیلہ ہموڈے چھٹائی آنا شاد تو لوک سوچ کسے ٹی ڈب ہلکوس۔ رونگان فارغ متنگ آن گڈ شکلیہ تندو گٹ کسے ٹی ہر یفے ”انت مسنے نے۔ دہن مون نادڑانے؟“۔

جیلہ پرفو کامون ے تینا شکیلہ کن اڑسا ”کھرو! نی کھراُس تو دانا مطلب دا  
اف کہ دنیا کل کھرے۔ مچہ کرار اہیت کر خیرات مہ تو ارنالگی آسر مس۔“

شکیلہ جیلہ ناجوڑ تے خوانسا اودوتا اشارہ غان پُہہ مس کہ جیلہ انت پارے۔  
مچہ چچی آن پد جیلہ جوڑ تے بھلن کر سا ”استونا خیر نافع کس خنٹ ہموڑ ان  
پریشان اٹ۔“

شکیلہ نامغزٹی داہیت تولو بٹش مس انا تینا کاریم تون آختہ مس۔ جیلہ ہرے  
اسکان ہموڑے بُت آن بار دے مونا تولو ک سوچ خلککے۔

پیشیم نا اذ انک شروع اُسر کہ ریاض اُرائی پترینگا او جیلہ نا کوئی ٹی بالشت آ  
توس۔ دا اینوا لیکو وارا اس کہ ریاض پیشن آن بنگ تون تینا کوئی ٹی انتو۔ جیلہ ہموڑے  
تولو ک پُٹنک پٹاکہ۔ شکیلہ نا خنتے آگد شاغوک لیٹوک اس۔ ریاض ے خنگ تون شکیلہ  
زوزو بٹش مس گدے کاٹھا شاغا او پشتما۔ ریاض او جیلہ چپ تولو ک اُسر کہ شکیلہ گلاس کس  
دیریس بس۔ ریاض گلاسے دو آن تہ ہلک دیتے ہندن کش کرے دُہنکے روچہ نی آ بندغ  
مرے۔ ریاض رنگ ٹی سوز او بندغ کس اس ولے اینو چہرہ تامون خُسن اڑس تینے۔  
جیلہ سوال کس کنگ کن گیگ کرے کہ ریاض نا با آن لڑز کو خوفزدہ او تو اُرس پیش تما  
”ماریہ۔۔ ماریہ! چنانا خنگ آفوت کرینے۔“

دالفظاتے او اُخس کرار و فاصلہ اٹ پارے ہموخس تیز و وقفہ غاتے ٹی تیراک  
جیلہ ناسینہ ٹی لگا۔ جیلہ نا خنتے آن خوینکا ک ہندن روان مسرکس پانہہ اودے دا حادثہ نا  
مالو آن خبر کس او خوینکا تے خوک بیٹینگا سس ہر خبر نا بنگ تون پیش تمار۔ لمہ او باوہ نامرک  
آ ہو غنگان گڈ جیلہ ناگٹ ٹی تو ارسلتو سس کہ او فریاد کس خلے نالہ خلسا تینا تو اراٹ خلق  
والا تے سئی کے کہ او نا ہزار مراد ایڑ سلتنے۔ داخہ طاقت ہم اونا دو تے ٹی الوکہ تینا زان تے



ٹپہ پین آخا تو شکیلہ نے پُہہ کے کہ اونا ہمو ایڑ فوت کرینے ہراڑن او اُسٹ ٹی وخت  
وخت حسد کر یکہ بلکہ اونا اُسٹ خوش مرے۔

شکیلہ نے جمیلہ ناخستے آن اونا رنگ آن معلوم مس کہ گڑ اس مٹنے او اُسٹ ٹی  
تینے پٹہ کہ انتے ریاض ناجوڑتے خوانتوٹ۔

خیر دم نئے آن گڈ شکیلہ نے ہم معلوم مس اونا خنک ہم پالیسر۔ اسہ وار تو او تینے  
آ ترند مس تینا کست نازی آفسوس کرے ولد ایڑ کن اونا چناتے کن ہرے اسکان ہوغا  
ماتم کرے۔

ماریہ نامرک نے اراتو مسوس۔ اونا مسہ چنا سُر اسہ مسٹرئس ہرانا عمر پنج سال  
اس۔ اسہ مائس ہر اُسہ سال ناس اس۔ ایلو چٹ چنکا مارتے ہرا اراتو ناس اس۔ ہرانا  
بنگ تون اونا لمہ انا۔ امداد او امدادنا پیرانگا لمہ کن داچنا تاسنبھانگ بھلو ویل کس مٹس۔  
چناتے بھلن کنگ ناخواری نا احساس امدادے ماریہ نا انگ آن گڈ خبر مس۔ اودے اونن  
چناتا غم ٹی ناشاد او پریشان وخت گدریفیکہ۔

اسہ دے لمہ ناتہ بھازانگا اصرار آن گڈ امداد برام کن رازی مس۔ داوا حدانگا  
حل کس کہ چناتے لمہ سے نامہرا و شفقت نصیب مسکہ۔ اوقتا پرورش ہم جوانی اٹ مسکہ او  
امداد او لمہ تا ہم داویل آن آزاد مسرہ۔

چاست نا وخت اس کہ ریاض ناما ماؤ امدادنا لمہ ریاض نا اُرائی پترینگار۔ جمیلہ او  
شکیلہ بخیر کریرتہ۔ شکیلہ دیر او چا نا بند و بست ٹی اختہ مس۔ جمیلہ ریاض نا تو ارکنگ کن انا ہرا  
تینا کوئی ٹی خاچوک اس۔

چاک مونا تخوک اسر کہ امدادنا لمہ جمیلہ نے مخاطب کر سا پارے ”مسٹر! ماریہ نا

مرکب زن کن نم کن کل اکن بھلو ڈک نئے۔ مُستناک پارینو کہ چناے خدا لمہ غان چوری کپ۔ دا چنا تا ترشغو کہ چہرہ غاک، سوال کرو کا خنک کنے آن ہنگ مفسہ۔“ اونا گپ کتوس کہ جمیلہ نا ہو غنگ نا توار بش مس۔ جوان دم کس خوشی مس دا خموشی ٹی جمیلہ واما دانا لمہ چپ چپ ہرے اسکان ہو غار۔ ریاض اوما چا کنگرہ۔ شکیلہ چادان ناما ساتیار تو لوک اس کہ اسٹ ناپیالہ خالی مرے ای زوزو پریکوتہ۔

ماما امدانا لمہ نا خنٹیسی اسہ نظر کس ہر او چادرے کٹ ٹی تخسا پارے ”ریاض جان! دا پیرا نگا ایڑ اوما داتون چناک بھلن تو مفسہ۔ چنا تے لمہ کسے نا ضرورتے ہرا بس او فتا خیالے کے اوفتے بھلن کے۔ ای او ایڑ ہڑ تو ماک مشورہ کرین کہ دادور ٹی بیگانہ کس نا چنا تے بھلن کپک۔ پینے انگان دا جوانے کہ نن نئے آر سال برین۔ ماریہ نما ایڑ اس۔ ماریہ نا چناک اخس نئے آن خو کو پین کس آن افس۔۔۔۔۔“ ماما ہیئت کر سائس کہ جمیلہ خیال نئے ٹی ڈرینگلہ ”ہو دا، ہو خوشی تواف ہرانا تھے اوما لو خنا کہ ماریہ اوفر ح نابرام آن گڈ بلکہ اونا برام مرے ولے دا خوشی داوڑٹ بریک کنے سما لو“۔ اوتینا خیالان پشتما تو ماما نا پیناک ہم کٹاسر۔ ماما جمیلہ نا کنڈا ہر سا پارے ”نی انت پاسہ گودی؟“۔

جمیلہ ابکہ مس اُسٹ ٹی منمنہ کہ ای انت پاؤ ہرا شرم اٹ پاؤ۔

تاتہ چانا ناپیالہ نئے تخسا پارے ”ایلم کنے تو جمیلہ بھاز دوستے۔ اللہ اودے صحت ایتر دا ارائے کله اوسنجالا۔ ایڑ تے بھلن کرے۔ ساگی کرے برامی کرے۔ تاتہ نا پیتا تے آن ریاض تین کن شرمندہ مس۔ تینا نابودی نا احساس اودے مالو آن اس ولے اینو نا پیناک مچہ کبین تمار اوڑا۔ تاتہ نا پیناک شروع اُسُر ”ای خوا ہو کہ جمیلہ برے کنناشار

مرے تینا ایڑنا چناتے خوندی کے ولے چُنا تون اوارنن ہم داسہ چُنا مسون۔ داپیری ننے  
اسہ مون نا کتونن ہم محتاج اُن خدمت خوانا اودا کل گڑا تے دادورٹی بغیر شکیلہ کونو کاری  
نِے آن کس کنگ کپک۔ بس نم تاریخ نُس پک کبودا سا گڑا امداد او شکیلہ نا کاعے خوانفن،  
ولدا ای تینا نشارے دیو۔

تاتہ ناداہتا ک جیلہ نا اُسے دهنوز اب نُس لگفیر ہرانا کھنگ قیامت اسکان نا  
ممکن اس۔ دم ہموئس کہ اسہ وارولدا اونا زندہ مروکار مانک فوت کریر۔ اودے یکدم خیال  
بس کہ داکھرو واقعی اونا خوشی تانیام اٹ خاخر نُس لگے۔ ہراوڑا سوچا سس ہمووڑمس۔ اونا  
اُسٹ لارٹی نُس کہ اونا نظر شکیلہ نا چہرہ غامتا۔ شکیلہ نا معصوماختہ خنگ تون اونا اُسٹ ولدا  
شال نا موسم آن بار پھدین مس او تین تو پارے ”شرم کر جیلہ فی تینا ایڑنا خوشی تے آن  
لارکنگ اُس۔ تینا کھرا نگا ایڑتون کست کیسہ شرم کر شرم۔“

امداد او شکیلہ نا برا مے ہفت تو گدرنگس۔ اُراوالاک خوشی نازندس گدریفیرہ  
چناک لمہ اوبلہ نا محبت ٹی پھل آن بارر داسر۔ امداد نا خیسنا رنگ ولدا بٹس۔ اوڑکن کل  
گڑاک ہمووڑا سُر بس ماریہ نا پین بدلیزگا سس شکیلہ مٹس۔ شکیلہ نازندگی تہاری آن  
چراغان مٹس۔ اوکل گڑاک اودے رینگا سر ہرافتے او ملاساختے اٹ ہرا کہ۔ ہمو  
رزا نک، ہموچپاک، ہموخڑنا ہر گڑا اوکل آن بھلا خوشی اوڑکن اونا خف نا جوڑمنتگ نا اس ہرا  
نا آپریشنے امداد کر فیس۔

صُحب تو چناتے تیار کنگ آن گد، جندتا سینگا ریزنا ماسا تو سکے۔ سرخی کر یکہ  
سر مہ خلککے، مونے تینا میک اپ کر یکہ پُڑہ غاتے تینا زندا کہ میچنگ والا تچ او گد کر یکہ۔  
شکیلہ نا چٹکی ولدا بٹس۔ داسا او ولدا دعوتاتے آنا کہ برامتے آساڑی مسکہ۔

شام تو خاچا کہ تو کل آن مست ہمو سوا لے یاد کر یکہ کہ کنا وڑا نکا مسنتا انجام  
 انت مروے۔ ہرانا ورنڈی ٹی تینے پار یکہ ”شکیلہ گودی داراج ٹی کاریکی آ مسنتا انجام خوشی  
 او آبادی نئے“۔ ولد اودے اچانک خیال بس کہ گنگو تو مارٹس اس اونا برام امر مس؟ او ہندا  
 سوال ٹی آختہ اس کہ یکدم اودے جواب رسینگا کہ گنگو ہم تو کاریم کر یکہ پیسہ کٹاکہ۔ ہندا  
 خاطر ان تو اودے دہن زیبا و زائیفہ کس تسر۔ گنگو آن گڈ اودے جمیلہ نایا د بس اونا تنہائی نا  
 یاد اونا خواری تایا د اونا قربانی تایا د اوتین تو پارے جمیلہ نایا د کس ولد المہ مس اومن تالمہ  
 خاک تو آخر اہندن مریرہ تنیا۔

راستیکو دو آن چٹیکو دو آ سریفے تینے ہشتدہ کس کرے اوسیر و تق کسے نایتے  
 کرے کہ زندگی ناکل جواباک دو بسر۔

## احساس

”بس بت آمبار چپ تولوک کس گڑ اس ہیت کر۔“

”انت ہیت کیو؟ گڑ اس مرے ہیت کنگ کن۔“

”نے تون موٹو قیامت اسکان ہیت اف۔“

”سئی پاسا، دازندگی ہیت کس الالنے کنکن۔“

”ہیت بھازے۔۔۔ اگہ کس نا اُست خوائی کنگ کن۔“

”نا اُست خوائک تو ہیت کر نے دے پاریز کرینے؟“

”مہربانی، کنے کس پاریز کتانے۔۔۔ ہروارای انتے ہیت کیو۔“

”ہروار۔۔۔ ای تو نے اسہ وار ہم ہیت آختنوٹ۔ ہو بحث ضرور کرنیس۔“

”اوہو۔۔۔ ای بحث کیوہ یانی؟“

”الہ داسا کنے پارلیس کہ ای ہیت کپرہ۔ گڑا بحث امر کیوہ گنگی اٹ۔“

”بس بس۔ بھاز چالاک مفہ۔ ایلومسن تو گھنٹہ غاتا گھنٹہ مجلس کیسہ۔ کناواری آدوشہ گند

کشک نے۔“

”ایلو مسک۔۔ دیرو دامسک؟۔ اوکل ناسیالا کو ہرا کک نے آبریرہ۔ ہیت کٹوٹ او فتون  
تونی بد دیسہ کہ کنا سیالاتے عزت قٹوس“۔

”جوان۔۔ او فتنے عزت تنگ کیسہ۔ کئے آخا“۔

”نے وائی ہرا دے گڑ اس پاریٹ کہ نی بے عزت مٹس“۔

”ہندا تو بے عزتی ئے کہ نی کن تون اچڑہ پاپیسہ۔ ہموز دے آن ننا برام مٹسے نی اسہ دے  
کس کن توجوانی اٹ ہیت کس ہم کٹوس“۔

”ہیت ای ہروخت کرینٹ۔ بس ہرا پیتاک نے پسندواو کئے اٹ مفسہ“۔

”الہ راست پاسہ۔ کنا پسندناوارانا دوئی بارک۔ داخہ بد بریک نے کنا پسندان گڑا انتے  
برام کرلیس“۔

”انتے نابا شرط تخاس کہ برام آن پدای ناپسندنا ہیت کیو؟“۔

”خبردار کنا ابانا پین ئے ہلکوس۔ او ایٹھن ہم نی تینا مرضی اٹ ہرا کہ گڑ اس کیسہ نے کہ تو  
شرط ضروری ئے“۔

”تینا مرضی تینا مرضی اٹ گڑ اسے ناکنگ کن الو سر تو دادے ہتو کہ“۔

”انت۔۔۔ انت پارلیس؟ نامرضی انت کس گڑا“۔

”کنا مرضی ئے اٹے۔ کنا مرضی نابھاز فکرے نے“۔

”آخاپا۔ زینہ سے اُس تو تینا پیتے پورا کر“۔

”زینہ! داراج اٹ زینہ وڈا البولانا تینا مٹ چو فرق کس اف“۔

”بس بس۔ بھاز فلسفہ خلیپہ۔ کئے نافلسفہ تو دلچسپی اف۔ تینا پیتے کر صاف صاف“۔

”سئی پاسا۔ نے کنا ہرا گڑا تون دلچسپی مٹسے“۔

”ہو۔ بلکل۔ ای ناز ایفہ اف اٹ دشمن اٹ“۔

”جوان مس خواستو تو بٹس۔“

”بھاز چالا کی کہہ۔۔۔ پتے تینا کر۔“

”ہُش پتے۔۔۔ ہیت ناوختاک انار۔“

”دانگر کئے بھاز تنگ کہہ۔ تینا ہیت ے پاجوانی اٹ۔“

”ہرا پتے؟“

”داخا سادہ کہہ تینے۔ اول انت پارلیس۔ نامرضی اٹ متنے۔ نامرضی اٹ انت متنے؟“

”کنا مرضی اٹ اسہ گڑ اس ہم متنے۔ فی انت ناہر یغیسہ۔“

”کل ناپا۔ ہرا گڑ اک نامرضی اٹ متنوا ای ہم ہر یونا مرضی تے۔“

”بس گم کتہ۔۔ داسا خاج۔“

”کنے نادو آن ہرا دے تغ نصیب مُسنے کہ اینو خا چوٹ۔“

”انتے۔ ای نے خلیفیٹ۔“

”نے ٹی اوخہ وس اف کنے خلیفس۔ ناجند خلیسہ۔“

”ہو سئی پاسہ۔ ای خلیوہ۔ تینا مستقبل کن۔ تینا خوشی تے کن۔“

”خوشی تے کنا زار کر نیس واخلیسہ تینا خوشی تے کن واہ۔“

”ای کس نا خوشی تے زار کتھ۔ کنے ملامت کہہ۔“

”نے ملامت کہر تو دیرے ملامت کیو؟“

”تینا جندے۔“

”مہربانی، ملامت فی اس۔ کنا زندگی خوشی آن پر اس ناہنگان ای غم تا گرفت اٹی بٹ۔“

”کناہنگان آخا گودی کناہنگان۔ کنے کنا خوشی تے آن کشار ناغم تا دنیا ٹی پیر۔“

”جوان‘ اگہ نا اُسٹ خواہتو کہ گڑا دا ہیئت ے پاروس تینا اُرا والا تے۔ کنا ہم شوق متنے نے تو برا م نا“۔

”نا شوق الو کہ انکار کرو س گڑا۔ او وختا بھاز سینگار اٹ بٹس“۔

”ای انکار کرو سٹ۔۔ نی کنگ کتوسہ؟“۔

”ای کنگ کریٹہ ولے کنے تینا او نما اُرا والا تا خوشی تے برج اتخوئی اس“۔

”کنے ہم تینا اُرا والا تا اُسٹا تے پرغوئی الو“۔

”جوان نے کم از کم تینا اُرا والا تا خوشی نا احساس تو ارے نے“۔

”کنے کل نا خوشی تا احساس ارے۔ بس کنا خوشی تا کسے اف“۔

”گڑا ان گلہ کر اُرا والا تون تینا“۔

”ای انتے گلہ کیو۔ کنے کس آن گلہ کروئی اف“۔

”جوان نے گڑا کنے آن ہم کپہ“۔

”نے آن وا ای ہر ادے گلہ کریٹ؟“۔

”آلہ داسا پارلیس انتے ہیئت کپسہ“۔

”مرے کپرہ گلہ۔ کپہ ہیئت۔۔ ناپیتا تا کنے جنگ نا شوق ہم اف“۔

”شوق تونے ہے وختان جوان انکا گڑا تا متنے“۔

”بس بس۔۔ بھاز بکواس کپہ“۔

”جوان‘ مچہ مُست پارلیس کہ ہیئت کپسہ انت دوئی نا باریسنے۔ داسا ای بکواس کیوہ“۔

”ہو دا پیتا تے آن بے ہیئت آن جوان اُس“۔

”مرے۔۔ ای بے ہیئت جوان اُٹ“۔

”جی ہو ہندن جوان اُس“۔



## اَنَا

شام نایانزدہ بجے نُس کہ عامرنا موبائل آرنگ نُس بس۔ عامر راستیکو دواٹ الوکا  
 نیگے تینا خیر آن اڑسا اوچپیکو دواٹ ہلک۔ راستیکو دواٹ جیب آن موبائل نُس کشا او  
 موبائلے خف آتخسازوڑواسہ دمہاٹ پارے

”السلام علیکم ماما! اللہ خیر کے ماما انت مس داوختا؟“۔ اونا توارٹی اسہ سُبکو خوف  
 نُس اواراس۔

ماما تا ترندولہجہ سے اٹ ”انت نُس مروے؟ پین گڑاس ہم بچانے متنگ کن  
 کل دنیاے پریشان کرنیس۔ تینا لمہ نُس ننے کله رسوا کرلیں ولد اسوال کیسہ انت نُس  
 مس؟ ہراڑ کس؟“۔

مامانا داہیتا تے آن عامر نارنگ دیئی نارنگی آلاٹھاتے آن بار وار نُس پوشمن مسکہ  
 وار نُس خیسن۔ داسمندری آ علاقہ ٹی ہم اونا گٹ بلوچستان نا ڈغار آن بار بار نُس۔  
 تفینک عکیدر یسا پارے۔

”بس ٹیکسی کن انتظار کر ساٹ“۔

مامانا غصہ زرخس ہم شیف تھتو ولدا ہمو خرینا لہجہ اٹ پارے ”بس ٹھیکے کوئٹہ نا  
ایز پورٹ آن سیدھا نوشکی والا اڈہ غابریس۔ دانگ اینگ دوست یار اتے آ آپیس اوہرا  
گاڑی تیار اس بس سوار مرلیں“۔ داپیتاے آن گڈ ماما فونے کاٹ کرے۔

عامرے موبائل ناتوار آن محسوس مس کہ کال کاٹ مسنے ولے ماما نتر ندانگا لہجہ  
اخرینا پیتاے آن ہندا خہا کہ مس کہ موبائلے خف آن شیف کتو۔

دئی ناداز بیانا گاشام، نسیمی تہورنگی آ بند غاک، مون او چرپ انگا روڈ اتے آ  
زیبا انگا گاڑی تا قطارک داحہ دکش انگا منظر آن گڈ ہم عامرنا مون تر شاغوک اس۔ او  
اسہ سوچ کسے ٹی غرق اس۔ ماما پیتاک ذہن ٹی تا چکر کریرہ او تین تون سوچ خلسا اس کہ  
انت مروے؟۔ ہیئت اس تو دلیری اٹ کریٹ ولے داسانت مروے؟۔ نوشکی آ امر  
نت نتخوٹ۔ ہرا شرم اٹ اراٹی پترینٹک؟۔ نوشکی ناپن تون یکدم ہوش تا ولدا حاضر مس۔  
ذہن نادیناغان جب کس خلک او تینا بیگے گر کر ساٹیکسی اسٹینڈ آ بس سلیس۔ ٹیکسی بس، سوار  
مس او عربی زبان ٹی ٹیکسی ڈرائیورے پُہہ کرے کہ ایز پورٹ آ انوئی۔

داوختا صاحب نا ہفت بچہ او گڑ اس منٹ اس او کوئٹہ نا ایز پورٹ آن پشتما۔  
کوئٹہ ناخ انکا تہوا ونا داغ ٹی لگو کا خاخرے کم کنگ ٹی اختہ مس۔ عامہفت سال آن  
گڈ تینا وطن آبس۔ ہمو وطن آہرا وطن کن او اکثر دئی نا تہہ ٹی جاپانی آ کمبلاتے ٹی  
چپ چپ ہوغا کہ۔ داڈ غار کن دا بند غا تا خنگ کن او ہروخت رب آن دعا کریکہ او  
تین تون سوچا کہ کہ ہرادے بلوچستان آ اناٹ تو ارادے ضرور کوئٹہ ٹی اڈ کروٹ۔  
سنگت آ تون ملوٹ۔ کوئٹہ نا بریانی کنگ کن ماسٹر بریانی والا ہوٹل آ انوٹ۔ لیاقت  
بازار آن شانپنگ کروٹ۔

اینو عامر ہمو وطن نا خاک آ سلوک اس۔ ہمو تینا کو بیٹہ نازمین آ ولے اودے  
 زرئس ہم خوشی الو۔ اودے اسہ گڑانا خیال بتو۔ نہ اونا بریا نیک اودے یاد بئر نہ اودے  
 شاپنگ نا خیال بس۔ اونا ہوش صرف ماما، لمہ، اوسیال آتون گٹ اس۔  
 کو بیٹہ نا ایر پورٹ نا پارنگ آن سوزکی والا سے تون گپ مس۔ سوزکی والا  
 بیگے سوزکی نا خیر آتھا او ہڑ تو ماک سر ہلکر ہزار گنجی کن۔

عامر نازہن اوڑان وار دم ہندا سوالے کر یکہ ھیا! کنا جرم دا خدر بھلو سے، ای  
 داخہ بھلو گناہ کس کرینٹ کہ کنا مونا کس بتو؟۔ ای ہفت سال آن گڈ بسٹ ولے اسٹ  
 کنے مارتو، اسٹ ے کنا خیال بتو؟۔ اسٹ نا واک اٹ متو کہ کنا مونا برے؟۔ اوتینا  
 اسے تینا بند غاتے آن خراب کنگ آ راضی کر سا اس کہ اچانک ہمو سوال کرو کا ذہن آن  
 اودے ورندی ملا کہ ہراڑے ارے ماما کلمے منع کرینے کہ کنا مونا انپیرے۔ او ہندا  
 خیال آن گڈ اونا گلہ غاک ختم مسر اوکل سیال اتے سلامت، با عزت ذہن نا عدالت آن  
 بری کرے۔

سوزکی ہزار گنجی ناروڈ آ اس کہ عامر ناھتے آ ”نوشکی۔۔ نوشکی۔۔ نوشکی والا۔۔  
 نوشکی“ نا توار سر مس۔ دا توارئس تو اسہ نرینہ سے نا، ہرا تیز خشکو توارئس اس ولے عامر ناھتے  
 دا توار ہندن لگا دہنکہ اسہ پری نئے نا نازر کا جوڑتے آن نوشکی نا پن بنگلہ۔ دانا وجہ کنا  
 خیال ٹی نوشکی نا پن ناہننی او عامر نازہیری اس، اگہ ای غلط افٹ۔ عامر سوزکی آن  
 ڈرینگا تو مٹی والا بیگے تا مٹی نا چھت آتھے او عامر تون مخاطب مرسا پارے ”ایلم مرانپیس۔  
 بس دہ منٹ اٹی پیش تمّ نہ“۔ عامر مٹی والا نا مون ٹی مایوسی اٹ ہرا او اوست ٹی تین تو  
 معصوماندا زئسے ٹی پارے ”ہرا نگ انوٹ ایلم“ کنا ماما نا دھکی مالو آن ملانے“۔

سوز و کی والا نا کرایہ ادا کر سا اوڑ ان موبائل تلے تا خواہس او ماما نا فون نمبر ے خلک۔  
 ”السلام علیکم ماما! ای عامر گپ کنگ اٹ انت حالے؟“۔ او نا آواز خلیس نا  
 نشان دئی ے کریک۔

ماما نا غصہ ذر کم مٹس۔ لہجہ استونا نسبت کرار او پھدین اس۔  
 ”وعلیکم السلام! سر مٹس؟“۔

”جی ماما، بس دہ منٹ آن گڈ سر ہلینہ نوشکی کن“۔ داجار خوف د مخس کم اس  
 او نا تو اراٹی۔

”جوان! ای خان ے اڈہ غارابی کیوہ بریک نے کن۔ اوتا تہ نا ہم بنگہ رضیہ  
 ے ہم ہتیک۔ ای تو پاریٹ تہ پگہ بیو لے دا خا صبر اراکان ہیسکہ۔ بس جوان ایلو گپاک  
 ہنداڑے مروڑ۔“

عامر نا رنگ ولدا اڑ سسائس تینے۔ رنگ کاٹ مس امبل نا موبائل تلے  
 منتواری ے تا ادا کرے او سوچ ٹی ڈب ہلک کہ تا تہ بریک رضیہ ہم؟۔ ای ہراخن تو تا تہ  
 ے خنٹ؟۔ انت جواب ایٹوٹ تا تہ ے کہ ای انتے رضیہ ے برام کپہرہ۔ رضیہ ے  
 انت پاروٹ کہ او انتے کنے دوست اف؟۔“

لمہ ے تو او آسانی اٹ پاریس کہ او رضیہ ے اینو اسکان خشتے۔ امر و صورت  
 ئے تا، امر و بالاد ئے تا، امر و سوچ ئے نا گودی ے گڑا امر او برام کے۔ اودا گڑا غا ہم  
 حیران اس کہ رضیہ امر راضی مٹنے دا چٹکی نا سانگ آ۔ او ہم تو کنے خشتے۔ اودے انت  
 سمائے ای امر و مار ئے اٹ۔ ای نشہ کیوہ یا آخہ؟۔ ای انت کاریم کیوہ؟۔ اودے بس ہندا  
 معلومے کہ او نا چٹکی نا دشتمار دی ٹی ے؟۔ امر اسہ مسٹرئس دہن راضی منگ کیک؟۔ او  
 ہندا سوال آتو نا آختہ اس کہ مٹی والا نا تو اربس

”ایلم! چٹکو مسئلہ اس مس نہا ہذا البول سواری تابنگ آن متوس داسا اوولدا  
نن تون بٹگو، ای نے آن بٹخنداری خواہوہ اسہ خواست کس کیوہ کہ نم مٹی ناڈنڈاغا سوارمبو  
بس اسہ گھنٹہ کس ولدا سواریک کم مریرہ۔“

عامر خوانندہ ومارس اس اودے ذالبولانا احترام نا علم اس۔ بغیر سوچ آن مٹی  
والائے جواب تس ”مرے کنا ایلم فرق کس اف۔“

سواریک سوار مسر مٹی نا اٹمیکو سیٹ آمسہ ذالبول اسرا یلوکل سواریک زریہ  
اسرہ۔ عامر ڈنڈاغا سوار مس اوڈتو تون اواری کلینڈر تو لوک اس۔ عامر نامون سواری تے آ  
اس اوسواری تامون عامر کن۔ اوہرا تم لے بڑز کریکا تو ذالبولاتے آ اونا نظر تہما کہ۔ شرم نا  
دو آن ولدا لے شیف کریکہ۔ عامر تینے چٹی کنڈا سرفے اوڈرا نیور نا کرسی آتے تینا  
خلک۔ چٹی کو پے مٹی نا باڈی آ زور تس تو سکون کس خنا۔ اوخواہسکہ کہ دم کس خنتے تر کے  
ولے کوٹہ ناروڈ آک مہمان نوازی کنگ کتور۔

مٹی جوان ٹکرس انا تو عامر چورائٹ ناغل آن تگ مس لے تینا بڑز کرے۔ او  
لے نا بڑز کنگ تون اونا نظر مون مقابل انگا مسٹر نا خنتے آتہما۔ اونا نظر نا تمگ تون اونا نظر  
ہموڑے ہندن برف مس دہنکہ وخت کس چلتن نا خلک برف تفر۔ عامر نا شرم ہموڑے  
وفات کرے شرم نافن کنگ کن اودے خاک ملتو تو خنتا خا خراٹ لاشے تاہشا۔ او شرم  
آن جانے تینا چٹے۔

اخص تیزی اٹ مٹی انا کہ ہموخہ تیزی اٹ عامر نا خنک اونا اُست اونا  
روح اسہ جاگہ مسٹر نا خنتے ٹی ڈینگسا اسر۔ داؤک انگا بادامی آ خنک سرمی شیفک  
اٹ فی کشوک کونا غاک تاہندن مون اسر دہنکہ سمندر نا ساحل آمون انگا درو شم تے

اٹ پر یک تو لوک مریر۔ خن تا کڑمی ہندا خس نس کہ عامرنا کل غمک، دُھکاک،  
پریشانیک اولیکو نظر آ ڈب ہلکر۔ عامرنا طب ہمون تازہ اوسرور مس دُھنکے کس  
پوسکن حج آن برے۔

دے پانہہ داہمو عامرے ہرا ڈھکاتا بارے دیئی آن بڈ کرسا بٹس۔ دے  
پانہہ داہمو مارے ہرا دم نس مُست پیرانگا ناشاد آ بندغ آتا ڈول خننگا کہ واداسا پوسکن  
ودی مروکا چنغان بارے ہرغم آن پاک۔

عامر خننا دنیا ئی آ بھازی کرسا اس۔ خیالاتا محل تفنگ ئی اس۔ اونا چہرہ غا  
عجبو رنگ نس اس۔ اونا نظر دا اسکان ہمو خننے آ نک خلوک اس۔ او خننے آن ہندن  
لگا کہ کہ اینودا برف دیر مفک۔ مسٹرے ہم محسوس مس کہ دامارنا خنک اونا خننا رندے زو  
الپسہ بس خدا دا سفرے زو انجام آسر کے ناتو دا خنک اودے، اونا روے قبضہ کیرہ۔  
داڑے عامر دعا کر یکہ کہ اللہ دا سفرے کنابد حال انگا زندگی ناوڑ بیچ انجام آتپیس۔ دا  
سفر ہراوڑ اتنگہ بس ہندن انسا کے۔ داسوار یک کل ہنداوڑ تو لوک تینا جاگہ غافوت کیر۔  
بس اونا اوسٹرنا خنک ہندن حیات سلیر۔ اودامتی ڈرائیورنا یادداشت کاہنہ نوشکی آ بیچ  
برک کپ۔ ای ہنداوڑ دا خننا زیارتے کرسا کیواو زیارت اٹ قیامت مرے۔  
محشر مرے سوال جوابا ک مریر۔ انسانا تا فیصلہ مرے۔ او آخر کل انسانک جنت آکار۔  
اودا وختا ہندا خدر خوش نس کہ اوکس اکن خراب سوچ خلنگ خوا تو کا۔ انسانک جنتی مریر۔  
باغ تا چکرے خلیر۔ شراب کش کیر۔ حوراک مریر محبتا ک مریر۔ عشق مرے، وفا  
مرے ہرگز امرے بس اونا مٹی سلپ۔ اونا مٹی ہنداوڑ انسا کے او اونا خنک ہندا خننے سیل  
کرسا کار۔

کلینڈر کرایہ غاتے جمع کر ساس۔ عامرنا اُسے خواہس کہ داختا دیدارے  
 کرفو کامنی والا نامنی بھاٹ ہلیو؛ داکل سواری تا کرایہ غاتے تینا جیب آن ادا کیو۔  
 اودے ہمو ہر بندغ تون محبت اس ہرا کہ داختا سفر ٹی اوار اس۔ ولے داناک پارہ کہ  
 محبت نا اراٹمیکو پن عزتے۔ اودے فوراً خوف اس ارفے کہ داسوار یک انت سوچور۔  
 ہنداڑ تون داخیالے اوہمو وختا گوبا، تینا کرایہ غاتے تس او ولد داختا کنڈا تینا مخمور آنظر اٹ  
 گام کر سانا۔ اوداختا محبت اٹ داوڑ گرنگ ہلکوس کہ اودے ہیج خیال بتو داسوار یک  
 اونا نظر نا باروٹ انت سوچ خلور؟۔ دا ایلو ارا ذالبول نا ذہن ٹی انت برو؟۔ دا  
 ذالبولاک مسٹر تون سوار ودا مسٹر نا انت مریرہ؟۔ داسوالاک اوڑ ان ہندن مراشر دُہنکہ  
 نوشکی آن مٹی۔

مسٹر کو عامر ناختا ہڑز آن تینا ہوشے چپ کنگ نا کوشش کریکہ؛ وار اس ماسا  
 تولوک آذالبول تون گپ کریکہ وار اس تینا پر سے ملا کہ پٹاکہ؛ وار اس پیشن نا تیزی اٹ  
 گدرینگو کا منظر اتے ہرا کہ۔

داڑے عامر نا محبت جنون آسر مٹس اوخواہسکہ کہ داسٹر نا نقاب اسہ وار اونا  
 چہرہ غان تمہ اودا زیبا نگاختا گودی نا صورتے مکمل خنے۔ ہراناختک اودے دیوانہ کریر  
 اونا چہرہ نس امر و مرو؟۔ او تینا ذہن نا مطابق اونا صورت نا تعمیرے شروع کرے کہ دا  
 غزالی آختا شیف آیقینا ہمونازر کا اُشکنا بامس مرو کہ ہرانا تراشنگ آفرشتہ غاک سال  
 آتے خلکنو۔ بامس ناشیف آہمو خیشن انگا جوڑک مرور ہرا صد سال انا راتا تلاب ٹی  
 سلاگنو۔ دہوشفا نو کلاک مرور کہ زم زم نا چشمہ غاک ہندا فتنے آسال دوا زندہ تو برورہ۔  
 دہونازر کو خف مرور ہرا فتنے کس خلنگ نا بیتے کہ تو کا فر قرار تنگہ۔

مسٹرنا صورت نامحل تعمیرمس تو داسا اوستقبل ناتینا بنیادے تنخاکہ اودامسٹرے ضرور حاصل کرو۔ اوسلوکا زندگی ے اونا دیدار اونا خفتا خدمت اٹ گدریفو۔

منی نابھاز آسوار یک کسری تینا تینا منزل تے آڈینگا سر ہرانا عامرے درک ہم لکتوس۔ ہر اتم نوشکی ناڈہ غامنی سلیس تو بندغ آتا شور آن او ہکدم سٹہ اوکل آن مست دڑینگا تینا بیگے ارفے اواسہ کنڈسے آسلیس۔

اوما لو آن نیت کر یس کہ دامسٹرنا ارا نا معلوما تے کرو لد امانا ارا غانو۔ ہنداڑتون خان ہم بس اومنی ناماسا سلیس۔ نظر تا عامر آتما تو عامر ناماسا بس سلام خوشامد مس بیگے تا گاڑی ٹی تنخا۔ سر ہلنگان مست عامر خان ے کرار وگٹ سے اٹ پارے دمسٹرا وڈا بلولاک ہرانگ انا روافقارند ٹی کاس۔

خان بشخندہ کرسا جواب تس ”یارو! دا کاریم تو نوشکی ناورناتائے فی دہئی والا سے اس فی ہم؟“۔

مچہ انتظار آن گڈ پیہنو رنگ ناگاڑی نس بس۔ ہمو مسٹرا و ہڑتوما ڈا بلولاک سوار مسر۔ گاڑی سر ہلک تو خان اوفقارندائی سر ہلک۔ گاڑی اڈہ غان خوک غریب آبادی پترینگا او اراسے نامونا سلیس۔ ہر مسٹ انگا نیار یک دڑینگا راکاڑی سر ہلک۔ نیار ی تا ارا ٹی پترینگان گڈ خان مخنک نس خلصا عامرے پارے ”گرٹا کان داسا مجنون صاحب؟“۔ عامر اونا جواب ٹی بشخندہ کس کرے اودواٹ اشارہ کرے ”کان“۔

خان او عامر ماما ارا نا گیٹ آسر مسر تو گاڑی ناہارن نا تو ارا چنک زوزو درگہ ے ملار۔ عامر او خان پترینگا رتوما مامی او عامر نا لمہ ارا ٹی تو لوک اسر۔

عامر زرس خوڑتی اٹ ارا تو تنیا مامی نا خنتے ٹی خوشی نا روشن آچرا خاک



لگا رہ۔ ماما اولمہ ناخنک تو بیرہ سوال آن پراسر۔ او جواباتا انتظار ٹی خشک مسوسر۔  
دیر او چاغان گڈ مامائے اچانک گڑ اس یاد بس موبائلے ار فے رنگ  
اس کرے۔

”ہلو! ہراڑ کُمرے؟۔ جوان۔ مرے۔ بدتر جوان۔ ٹھیک۔“

فونے کاٹ کننگان گڈ عامرنا لمہ تون مخاطب مرسا پارے ”پارے بسُنن“  
داسا جڑی نافاتحہ آنانن، داکان فارغ مرین ولد اہمونگ برینہ۔ سیدھا ہمونگ بروسن  
ولد ایشیم اودگیر آانگ متوکہ۔ او ہمسایہ کس تاہم تدمسُنے اوفتون۔“  
عامرنا لمہ ورنڈی تس ”سئی پانک ولد ارا کا شام تونا کہ۔“ اسہ بھلودر دس لمہ نا  
تواری اس۔

عامرنا سمجھ ٹی بتوکہ دنا گپ متنگہ۔

”دنا پانگ اس ماما؟۔“

”تاتن نا، رضیہ نا، اوہم بتگو۔ نے تو تینٹ گپ کیرہ۔“ ماما نا لہجہ ولد سخت  
متنگ اس۔

عامر سوچ خلک کہ داسا چپ تولوئی اف۔ مچہ آواز ٹی ترندی شاغسا  
پارے ”جوانے بریر گپ کیر، انت گپ کرو؟۔ ای تینا پیتے مالو پارینٹ کہ کنے دا  
رشتہ قبول اف۔“

لمہ غان عامرنا دا بہادری برداشت متو۔ ”داخہ سال نے انکار الوداسا چانک دا  
انت عیب کس خناس کنا ایڑ نا مسٹر ٹی؟۔ دا عشق او عاشقی تے اِلے۔ داکان جوانو مسٹر نے  
ملپک او ای ہم تینا اُرا ٹی پین کسے اپروٹ۔ نے راج ٹی سیالاتا مونار سوا کپہ نے مخوئی

کپہ، نادان خرہ غاتے آن ای اُسٹ دیر مسٹ۔ کنا اُسٹے ٹپ کس ردانے تو بس نادان گندہ ٹی تے آن،‘ عامر نامہ ہند اُخس پارے اونا تو ارنابنگ آ اُسٹ لڑزا کا ہنداڑ تو گٹ تا بدل مس اوخنے آن تاخو ینکا ک ڈک ڈک آ تمسّا کریر۔‘

عامر نا اُسٹ لڑنگ ے شروع کرے او حیران اس داخو ینکا تا جواب ٹی انت ہیٹ کیو۔ تنیا او آخا دنیا نا اسہ مار کس ہم لَمہ ناخو ینکا تا جواب ٹی بچ پانگ کپک۔

ماماغان ایڑ ناخو ینکا ک برداشت متور، عامر آ تر ندس ”دُہن چپ اُس بت کس جوڑ کر لیس تینے، گڑ اس پانہہ جواب ایت آخردا گمراہی نا سوب انتے؟“۔

”انت پاو، دیر تون پاو؟۔ نم تون گپ کیو تو ہو غنگہ شروع کیرے یا نصیحت کنگہ۔ آخری ہیٹ دادے ای دہنو مسٹر نئے تون برام کپہ ہر ادے ای اسہ وار ہم خنٹ۔“ دا ہیٹ تون عامر کاٹھے شیف کرے۔

”مرے داسا بریرہ خن تا، دمرادے تینا ہم پورا کہ۔ کنا خنگ، ماما نا خنگ دا ہندو خنگ اسر نا خنگ بھاز ضروری مس،“ لمہ نا تو اڑی دا اسکان ہو غنگ او اراس۔

عامرے اچانک خیال بس کہ داسا ہنگ او خنگ ناوخت ہم اِنانے اودے دا مسئلہ ے حل کروئی ے او انوئی ے تینا خنٹا پٹنگ کن، پیرا ہو خنے آن اونا زندگی روشنائی بروے نہ تو آخا۔

”کنے پین گپ کروئی اف۔ کنا فیصلہ دادے کہ ای رضیہ تون برام کپہ،“ عامر تینا فیصلہ ے بنے اوبش مس ایلو کوئی ٹی پترینگا۔

پیشیم نا اذان تا تو اراس مامی کوئی ٹی بس ”عامر! برتا تو نا خوا نک نے۔“ عامر نا اُسٹ ٹی دھر کن آ تا جنگ شروع مس، پیشانی آن حید اتا بنگ روان

مس او ابگہ مس کہ انت گپ کروٹ تا تو تون؟۔ انت پاروٹ تا؟۔

ولے تین تون نیت کرے کہ اے خفتے کن، تاتہ نا، رضیہ نا، لمہ نا، ماما نکل نا اُستاتا

خون لازمی ہے۔

عامر ”مامی رضیہ ہم بٹسنے؟“۔

”ہو، اودالان ٹی ہے“۔

عامر کوٹی ٹی پترینگ تون تا تو نا دو تے ہلک، تا تو عامر نا کاٹم آن دروت کس

ہلک۔ ہموں تا تو ک دروت ہلنگ نا وختا تینے قربان او ندر کیرہ ولے اینو عامر او قربانی  
ہے خفتو، شاید تا تو نا مہر آک ختم مسوسر۔

عامر لے بڑا کرے تو تاتہ اچانک نیم تر ندو تو ارس خلک ”اللہ! ای تینا ایڑنا

مارے درست کٹٹ۔ نن اسہ مٹی ٹی بسن ایلم جان“۔ تاتہ مامائے پارے۔

عامر نا خنک چیدہ غان بار پیش تمنا رکہ دا ہمو نیاڑی ہے ہرانا کوٹہ غان نوشکی

اسکان بوز ہلک اس؟۔ مطلب دا کہ اے مسٹر رضیہ اس؟۔ اے خفتا گودی رضیہ ہے؟۔

عامر نا ذہن سوالاتا زندان ٹی قید مس او تینا قسمت او تینا زندگی آ لعنت کنگہ

شروع کرے۔

تاتہ تینا پیتا تے اٹ دیتخہ مہر او ار کرے ”نے دہی نادر داخہ بدل کرے کہ ای

نے بچ درست کٹوٹ، معاف کیس ایڑنا چنا دا خنک انا نو سلیسو پیری نا دو آن“۔

ماما نا مون دا اسکان کورک اس، زیات برداشت متوتا تو عامر نا کنڈا ہر سا

پارے ”عامر جان! دا سا تاتہ ہے تینا پائہہ ہمو پیتا تے ہر افواجک ہے نن تون خلکس“،

ماما نا پیتا تے اٹ طنز شامل اس۔ عامر ہم بھاز سوچ خلنو او تینا اُست نا پیتا تے شروع

کر سا پارے ”تا تو! کنا اُست دارشتہ غاراضی اف۔ وجہ اے ای مالو ہم پارینٹ اگہ نم خوارے کہ ای نما خاطر ان برام کیو تو ای کیوہ ولے پھگہ کن ای نامسٹرے خوش تخنگ کٹوٹ تو کنے آن کس سوال کپیرے۔“ عامر دا پیتا تے ہندو انداز اسے اٹ پارے دُہنکہ اسکول نا چناس تینا سبقتے ماسٹر نا مونا بنفے۔ داخس پاننگان گڈ او ہندن چپ تو س کہ زندگی ناکل بوجھ او نا کو پے غاتے آن تما۔ داسا او آزاد مس ہرانگ اُست تا خواؤس بال کروس۔

تاتا نا اُستاعا مرنا پیتا ک بھلو بوجھ کس تخار۔ اونا خنتے ٹی تینا مسٹر نا مستقبل تہارمہ خنگا کہ۔ اونیم پائنا خنتے اٹ عامر نا لمہ نا کنڈا ہر سا پارے ”اگہ دا کنا مسٹرے خوش تخنگ کپک تو ای اونا مزلمہ غاتے ارفنگ کپرہ۔ ایڑ جان بس ہرائی خیر“۔ تاتہ نا گپان گڈ کل چُپ بت آن بار تو لوک اسر کہ مامی اورضیہ چائے تے ایسر کو ٹی پتیرنگار۔ رضیہ نا نظر عامر آتما تو سوچ کسے ٹی گرفتار مس کہ داہمو مارے ہرا کنا خننا رندے ایتو کہ کسے داوڑ ہرا کہ کہ ای اونا خنتے دُزانت، نریفہ اُٹ۔ داسا کنے تینے آن جتا کنگ نا فیصلہ کن بٹنے، اونا مغز کاریم الا او پین سوچ خلنگ کتو۔

عامر نا ذی آغمتا گروک آک شور کر سا اسر۔ طوفان مالو آن اونا سینہ ٹی پتیرنگا س اونا کل ارماتے، ہمہ محل آتے، ہمے ہر تعمیر کرو کا تختا بنیادے گوہاس۔ عامر سوچا کہ او دارشتہ کن اگہ ہو کے داڑان اونا استخوانی ہم پورا مریک اُرا والا ک ہم خوش مریرہ ولے ہرا زبان اٹ او ہرا شرم اٹ داسا او داپتے کروس۔ استوا سکان دارشتہ نا پین آن اودے نفرت اس۔ او تین تو ن بھلو قسم کنگس کہ ای دارشتہ اے قبول کپرہ داسا امر ہو کے؟۔

اگہ اینو ہو کرے تو پھگہ اور رضیہ تو انت پارو؟۔ رضیہ اونا باروٹ انت سوچ  
خلوئے؟۔

آخا، دارشتہ مفک۔ کنے دارشتہ ئے کروئی اف، نہ تو کنے آ کنا زبان، کنا کروکا  
قولاک، کنا ہموضد، کنا غیرت کل ملنڈ خلور۔ کنا محبت کٹفک کا نہہ کٹفے، ہر کس خفا مر یک  
کا نہہ خفا مرے ای کس نا خوشی تا ذمہ ئے ارفقت۔ کنا انا بایدے کٹفپ، دُنئے دنیا  
والاک کنا زبان ناشغان ئے کنے ہر وخت اتور۔ اوتینا اور رضیہ نا ارا والاتے آ ہم ترند  
متنگ اس کہ اودا کان مست راضیہ ئے اوڑان انت ئے ڈکار؟۔ انت ئے اودے اسہ  
نظر اس ہم رضیہ ناہنگ کن التور؟۔ انت ئے اودے رضیہ نا جنسا راس ہم نشان تتور؟۔ او  
تین تون پڑاکا اوچاکش کر یکہ۔

## بھلا باوہ

منان پھدین انگا بیرم ٹی ہندن تنگان اس دُہنکہ غریب ناچنا سیر پھڈلمہ نابغل  
ٹی خاچوک مرے اراجہان ناڈکھ او ویلاتے آن نا واقف بے چکار۔  
اودے ہندن محسوس مس کہ کس اودے اونا پن اٹ ٹوہنگہ۔

”منان۔۔ منان۔۔ بشہ منان بشہ بیوس بشہ۔۔۔ اومنان۔۔“ دم نئے آن  
گڈ دا توار ہندن کرا کرار اونا خفتے آن مُر مرسا کرے دُہنکہ ریل گاڑی ٹی سوار تینا عزیزو  
بندغ نُس کرا کرار ریل نا توار تون مُر مرسا مر سا خفتے آن گم مرے۔

منان نا خفتے آن توار تو مُر مس ولے اونا ذہن ٹی دا اسکان اونا پن نا ژونگہ  
اس۔ او ہندا ژونگہ نا سوب آن اونا خنک پاچ مُسر۔ اودان مدان اسہ نظر نُس مچا کوٹی ٹی  
اڑسا۔ کوٹی نیم تہارمہ خالی خالی خاموشی ٹی ڈب ہلکوس۔ او ولد خفتے ترکننگ اس کہ  
ہو غنگ نئے نا توار اونا خفتے آسر مس۔ ہو غو کا گٹ ذالبول نئے نا اس۔ یکدم اودے خیال  
بس کہ ہروخت ناوڑ ہراڑے ارے لمہ او باوہ نا جھگڑا مُسنے اودا سا جھگڑہ ئے ایسر کننگ کن  
لمہ ہو غنگہ۔ دا اوڑکن پوسکنو ہیئت نُس الو کہ او پریشان مرے کہ انتے اونا لمہ ہو غنگہ۔ دُہنو

بھازا دے دا اُرائی گدرینگا سس۔ اونا ذہن ٹی بس کہ یقیناً دا ولدا امورضیہ والا قصہ مروے۔ داخہ سوچاتے آن پد تیغ ہم اونا خنتے آن رخصت کرے ہراٹن اونیت کرے کہ بایدے داسا بش مریومون سلو ولدا مچہ بازار آکا و۔ آخر یکیشبے نادے ئے پوک تو کروئی اف۔ اوا بیہن ہم داعمر ٹی اسہ وار کہ خنک ملنگا رولدا اراٹے تیغ بریک۔

کوئی آن پیش تمنگ تون منان خنا کہ اُرا نا برا ہمدہ ذالبولاتے آن پڑے۔ اوکل ذالبولاک خویئکی آخنتے تو اونا کنڈ اٹنگ و۔ ارا گام مونا ارفسا اونا نظر تا بوت سسے آ تما ہراٹے میت سس خیسو کمل سسے ٹی کورک تخوک اس۔ میت نا چارمہ کنڈ ذالبولاک تو لوک خویئک ہو غنگ اسر۔ دانا گمان نا منظر آن منان نا بدن ٹی لڑزہ سس تما۔ خنک تا بغیر دیر آن سلنگا رولدا اموخو ییکا تے تینا دل دست آتیٹ خنتے آن خوشکسا کلک آتے آ سر کرے ہراٹن اونا مومن ہم سلنگ۔ منان دیوال تون لچوک سوچ سسے ٹی غرق اس۔ یقیناً دا سوچ اونا چوری متنگ نا اس کہ درگہ نا تیز تو ارس مس او منان نا باوہ تون چارپین نرینہ کوئی ٹی پترینگا رومیت نا کنڈ اسر ہلکر۔ ہنداٹ تو منان نا باوہ میت نا مونا کملے ارفے ولدا بیہن آپاک انگا کفنے مکر سا منان ئے دونا اشارہ اٹ تو ار کرے۔ منان نا اُسٹ ٹی خوف سس پترینگا۔ نک تا ہندن کبین مسر کہ کس پائہہ اونا کوپہ غاتے آ داسی آن اُرا نا وزن تخنگا۔ نیم پیرا نگا باوہ تون ارا ایڑا واسہ ایلیم نا ذمہ داری اونا بجا درنجوک خنگا کہ۔ بھازوس کرے مونی قدم ارفنگ کن ولے نئے اُسٹ کاریم کرے نئے نک تا۔ دا بز دی آن او تین تون سوچ خلک کہ ای اینو امولمہ ناٹنگ آن خلیوہ ہرانا تو آ ای بال اٹ اوڑکن اناٹہ۔ امولمہ ہرا کنا پنے ہلککہ تو کنے ہندن محسوس مسکہ کنے خدا تو ار کنتلہ۔ اخہز ہیری اسٹ ای لمہ نا خنگ کن ہرا تم او منہ دے کن تینا ایڑنا ارا غانا۔ اینودا

امولمہ نے ہراناہنگ ناطاقت نئے اُسٹ ٹی ارے نئے داپنوکا بدن ٹی۔ چٹی ہم امر و  
 گڑا سے۔ اسے چٹی آن اینو جھو بھلو فرق کس بسنے۔ یا خدا کئے طاقت ایت ای تینا لمہ نا  
 چپ انگا صورتے خنیو ولے خدا انت کروں۔ داتو اونا محبت اود لیری نا امتحان اس۔  
 باوہ انتظار اودے توار ولے منان دیوال آبت آن بار لچوک نئے مونی انگ کن راضی  
 اس نئے شیف تمنگ کن۔ آخر باوا تا گٹے توفینک اٹ پالفسا ”بد بخت بر“ برلمہ نا  
 تینا آخر یکو دیدارے کر۔ ولد ادیرہ تہ بر“ پارے۔

باوہ نا توار دُہنو دُڈسے آن پُر اس کہ ”دیرہ تہ“ ناوختے منان نانک کاریے  
 الاراوسیدھا ڈغار ٹی لگا۔ دیوال آبیجکے دوتے کاٹم ٹی خلک او بور بور ہو غنگہ شروع  
 کرے۔ اونا دارمانی آہو غنگ آن ماس نا ذالبولاک ہم اوڑتوں اوار مسر۔

باوہ نے تہ معلوم مس کہ دابد بخت خلک۔ تینا لمہ نا لاشان خلک۔ تینا مہر کروکا  
 لمہ غان ہڑزیک۔ وخت ہم تیر مر سا اس۔ نرینہ غاک تیار سلوک اسر تو باوہ نا تہ اشارہ غا  
 مونی بھر اومیتے ارفیر کو پے غاتے آتخار۔ میت نا رننگ تون ذالبولاتا ہو غنگ نا سوز ہم  
 بڑا مس۔ اراٹی چیمناٹ اوفریا دنا میلہ کس لگا۔ زانتے آخلنگ شروع مس۔ پڑہ غاتا  
 کوہنگ نا بنا مس۔ زنجکاتے ہرنگ نا دود جاری مس۔ منہ ذالبول آتا نیام اٹ بددعانا  
 سلسلہ شروع مس۔ منان ناپن اٹ اونا ایڑتا نا زیو ند ااوچنکا ایلیم نعمان ناپن اٹ چوری  
 متنگ نا نا لہ خلنگا۔ دامنظر جوان ہرے اسکان چکا او آخر کرا کرا اراٹی ہندن خاموشی مس  
 دہنکہ شعر کسے نا آخر ٹی گلوکار با جانا بٹن تے ہلاکے۔

نرینہ غاک قبرستان آن فارغ مسر تو بھازاک تینا اراتے کن مون کریر او  
 بھازاک بسر منان کس تا ارا نا ماسا تنبو خلنگ نا کاریے شروع کریر۔ منٹ گڑو کس بیٹ



کریر۔ منٹ فاتحہ غے بروکاتے کن دیرا وچا ناشون ٹی لگار۔ منان نا ایلیم او ایڑک ہم اسکول آن بسر او اڑتون او اراسہ کوٹی ٹی تموک ہو غنگ شروع کریر۔ ہو غنگ ہو غنگ اٹ دم دریرا تو دم کس چپ کریرہ او ولد المہ کن خطیک شولارہ۔ ہندن کر سا کر سا ارامسہ دے گدرینگا۔ چناک ہم منہ دے کن اسکول آن چھٹی کریر۔ منان ہم تینا اسکول نا پر نیل آن تین کن چھٹی ہلک۔ باوہ تہ تو مالو آن ریٹارڈ اس۔

چار میکو دے کس کہ منان وختی صُحب تون بش مس نماز خوانا و قرآن آن تلاوت کرے۔ ہمودے آن کہ لمہ تافوت کرے منان ہم امودے آن دین آ سخت مس۔ پنچ وخت نا نمازے ادا کریکہ، قرآن نا تلاوت کریکہ اولمہ کن دے ٹی ارامسہ یلین ہم خوانا کہ۔ داڑان بیدس مزاج اٹ ہم بدل مَس نئے کس تون تو سکہ نئے کس تون کاریم توریکہ۔ تلاوت آن گڈ چناتے بش کریکہ غسل تسکہ پچ پیفیکہ او نیاری تننگان گڈ او فنتے اسکول کن راہی کریکہ۔

منان نا چند سرکاری اسکول نئے ٹی انگش نا استاد اس ولے تینا ایلیم او ایڑتے او پراہوٹ اسکول نئے آ خوانفیکہ۔ او نا باوہ اودے اٹ وارمع کرے کہ سرکاری و اسکول نئے ٹی داخلہ تے تا کرف ولے او نا پانگ کس کہ ”اینو چار رُپی نالا لُچ ٹی دا پیسہ غاتا بچت کن ای تینا ایڑتا او ایلیم نا فیو چرے خراب کنگ کپہ۔ کنے سرکاری اسکولا تا پوزیشن نا معلوے“۔ داکان گڈ منان نا باوہ ہم ضد کتو۔

چناتے راہی کننگان پدا و نا چند اسکول کن روان مسکہ۔ لمہ نا کہننگان گڈ منان اسکول ٹی تینا کلاساتے مالو ہلکے او تینے دو ازودہ ونیم مجہ اسکان فارغ کر سا ارا غا سر کریکہ۔ اُرائی بنگ تون نماز خوانا کہ ولدا چناتے کن او نیم پیرانگا باوہ کن سوارا تیار

کر یکہ۔ چناک اسکول آن بسرہ توکل اور ارغ کنگرہ۔ اسہ ہنداوخت نس کہ منان ناباوه  
 ارامسہ ہیئت منان تون کر یکہ اوچناتے ہم محبت نانظر اٹ ہراکہ۔  
 منان ناباوه ایہن صحت مندو بندغ نس اس۔ عمر اٹ ہم بھاز بھلن الو۔ او  
 تینے تینٹ مالو پنشن کرے تاکہ زندگی نا آخری دے تے ٹی زرس آرام کے۔ سکون نا  
 وخت گذر یفے۔

ارغان گڈ چناک ہم خاچارہ۔ داخاچنگ ناسلسلہ ہم لمہ ناکہنگان پدشروع  
 مس۔ اوکان مست توچناک اوّل تو ارغاتے آ صدخرہ کریرہ۔ اسٹ پاریکہ ”اوسبزی  
 کرینوای کنہرہ“۔ ایلو خوائے نسے کن ضد کر یکہ۔ اسٹ اسکول ناچچاتے بدلیفنگ کن  
 تیار متوکہ۔ ہندن تماشہ دیگر اسکان چکا کہ۔ لمہ دے نس اوفاضدا تے پوار کر یکہ اودے  
 نس ترند مسکہ ٹپاکہ تہ۔ ولے داسا دے پانہہ دااموچنا کوچپ چپ اسکول آن بسرہ  
 تینٹ پچ بدلیفرہ۔ ارغ کنگرہ اوخاچارہ۔ لمہ ناکہنگان اُرانا کل بندغاک بدل مسوسر بس  
 باوہ تہ ہم وڑ اس۔ اگہ باوہ نازندگی ٹی گڑ اس بدل نس تو اودا اس کہ داسا کس الو ہراوڑا  
 ترندروس اوڑان گلہ کروس یا اودے ملامت کروس۔

دیگر آن ساعت نس گذرینگا کہ تو منان بش مسکہ چناتے بش کر یکہ چاہ تسکہ  
 ولدا تینٹ اُرائی شام نانماز اسکان او فتنے خوانفیکہ۔

شام نانماز آن گڈ چناک اُرائی تین تون گوازی کریرہ یا وخت نس منان تین  
 تون پشن دریکہ تہ۔

خفتن نانماز آن گڈ ارغ کنگرہ۔ ولدا چناتا خاچنگان پدمنان تینا کوٹی ٹی  
 ہرے اسکان کتاب خوانا کہ او وخت وخت لمہ نایا دٹی تین تو ہوغاکہ۔

داسلسلہ ارامسہ تو اسکان چکا۔ اسہ دے منان ناباوه منان نا کوٹی ٹی بس۔

منان کتاب کسے نا خوانگ ٹی آختہ اس۔ منان تون مقابل تولنگان گڈ کینو لہجہ سے ٹی پارے ”منان جان“۔

منان کتابے بند کرسا ”جی باوہ“۔ دا تقریباً اولیکو وار کس منان تینا باوہ ے ”جی باوہ“ پارے۔ مست تو بس ”ہا باوہ“ انت کسے باوہ یا ہو“ کرسا جواب تسکے۔ دا کل لمہ نا انگ نا اثر اس۔ اونا جتائی کس کہ منان تینا باوہ تون داخہ اخلاق ٹی گپ کریک نہ تو اونا اخلاق فقط اسکول نا کمرہ اسکان اس ولے داسا دا ادب اُرا نا کو ٹی تے آہم سر مس۔

منان نا باوہ دا گڑا غدا داخہ غور کتو او تینا پیٹے شروع کرسا پارے

”چنا! نالمہ نا انگ نا کی تو صاف ظاہر متگہ۔ دا پُر انگ اُرا ہمہ خالی خالی ختنگ۔ چناتے آن او فتا چنائی سلیس۔ نے آن نا زندگی سلیگ ٹی ے۔ کنا زندگی تو ایہُن آخر کرینے“ کنا پیٹے ارف کنا مار داسا برام کر“۔

منان نا ختنگ لمہ نا ذکر آ نیم پالیس سر کہ جواب ترسا پارے ”برام“ برام نا داسا انت ضرورت۔ وخت ایہُن گدرینگ۔ چناک ہم لمہ ے گیرام کنگو۔ منہ تو ٹی کل گڑاک پرفیکٹ مریرہ“۔

باوہ لے انکار ٹی سرفسا ورنڈی تس ”کنا مار! لمہ غاک دُہن زوہرا کہ گیرام مریرہ۔ وختی گیرام کنگ آسانے ولے دا دُہن و ذات کسے اگہ صُحب تون یاد بتو تو شام تو یاد بریک اگہ شام تو بتو تو صُحب نا وختی یاد بریک۔ تاکہ اولاد زندہ ے لمہ نئے اُستان مریک نئے دماغ آن۔ نا برام نا وخت ہندا دے۔ اگہ فی داسا برام کیسہ تو نا زندہ ہم جاگہ غا بریک۔ اُرا نا کاریمتے آن نا جان چنگ۔ چنا تا غم آن فارغ مریرہ۔ کنا ہم خدمت مریک۔ فی زینہ انگا بندغ دا گڑا تے پین اٹ وخت اسکان کروس۔ اسہ کنڈا نا اسکول

ایلو پارہ غادا اُرا دا چنک، ای ناجند۔ داخہ بندغ ناخیال نا تخنگ نرینہ ناوس آن پیشن  
 ے۔ دا کر ماتا تے خدا ذالبو لے عطا کرینے، نئے آخا۔

منان ے محسوس مس کہ باوہ نا پتاک تو راستو۔ کنے آن داخہ کاریم ہم تو  
 مفک۔ بس برام دانا و لیکو او آخری انگا حل ے۔

کاتھے سرفسا پارے ”مرے باوہ جان“ امر کہ ناحکم۔

باوہ ناتا جوڑتے آپتکو بخشندہ کس بس اوبش متنگ تون پارے ”داسانی آرام  
 کر پکھ داڑا ہیئت کینہ۔“

منان کتابے میز آتھا و کاتھے سرچہ غا تخسائے مرینے اوسوچ کسے ٹی ڈب ہلک۔  
 پھگہ نادے حسب معمول گد ریگا۔ خفتن نا نماز آن گڈ منان نا باوہ منان نا  
 کوٹی ٹی پتزیگا تو منان قرآن خوانسا اس۔ باوہ تابااشت ے ہجکہ کرسا تینے سوچ کسے ٹی  
 اختہ کرے۔ جوان دم کسے آن گڈ منان قرآن ے زیارت کرسا الماری نازی آتھا و باوہ  
 تون مخاطب مرسا پارے ”جی باوہ جان“۔

باوہ تاسوروشک ے بالشتان ار فے مخے سیدھا کرسا ”مار! ای استون درست  
 نا برام نا باروٹ سوچ خلکٹ۔ کل سیال اوبیگا نہ غاتے یاد کریٹ۔ ہمسایہ غاتے ذہن ٹی  
 بیسٹ ولدالمہ نایا دلس کہ اگہ اینا و ساڑی مروس تو تینا اونا پسند نا نثار کس تینکن گچین کریکہ  
 ولے بدبختی دادے کہ اواف۔ کنا چنا برام ہمو و ختا مریک کہ مارا و مسٹر تینے دوست کیرا و فتا  
 رضا مرے گڑا برام مزہ کیک زندزیا مریک ولے بیوسی دادے کہ نئے ہند نو مسٹر کس ہروئی  
 ے ہرانا زانیفہ متنگ تون اوار اوار دا چناتالمہ ہم مرے اوکنا ہم خدمتے کے ای ہم تو  
 محتاجی نا کنڈا انگ اٹ۔“

منان ناباؤہ ارمانی وگپ کر سا اس او منان ناکاٹم شیف او ادب اٹ تو لوک غور کنگ اس۔ او تین تو اُسٹ ٹی پاریکہ ”باؤہ امر و گچیو سنجیدہ وگپ کنگتہ“ دا کان مست کئے انٹے او نا پیتاک دوست الو؟۔ او نا اولمہ نا وخت کس بحث مرو س تو کئے انٹے لمہ ناہر ہیئت جوان او باؤہ ناہر کرو کا گپ غلط لگا کہ۔ منان ناخفک باؤہ نا گپا تا کنڈا اسر ولے ذہن تا تینا سوالا تے ٹی مشغول اس۔ اچانک باؤہ تا منان ے پٹٹ مخاطب کر سا پارے ”منان جان! داسانت پاسہ نی گڑا؟“۔

منان حیران مس کہ انت پاؤ۔ باؤہ انت پارے آخر ٹی۔ او دے پچو استجو تو فقط جواب ٹی بائے کر اسر سفا ”بس“ امر کن نی جوان سمجھس باؤہ۔

باؤہ تا تا اُسٹ ٹی خوشی نا لہر کس بش مس کہ منان کئے اختیار تس۔ ہندا خوشی نا جذبات آتے ٹی یکدم پارے ”مار! کناخن ٹی اسہ مسٹر کس ارے۔ ہر ادا اراکن اسہ گودی کس ثابت مرو۔ جنتا ہم چوری کسے تو دا بے لمہ ٹی نا ڈر دا آن واقفے۔ ہراٹن او دا چناتا خیالے جوانی اٹ تنحو۔ اراٹمیکو ہیئت دادے کہ ارے ہم بیگانہ کسے تو بیگانگی نا وجہ غان نا عزتے ہم کرو۔ مسٹیکو گپ دا کہ ناوڑ نا مسٹر کسے۔ خدمت گاڑا لائح، چالاک صورت ٹی ماشاء اللہ پری کسے۔ اوکل آن بھلا گپ دادے کہ نی ہم خناس تا چنک ہم مالو آن درستی واوڑ تون“۔

منان حیرانگی نا انداز ٹ ہر لیفے ”دیرے باؤہ؟“۔

باؤہ تہ زو وورندی تس ”ننا ہمسایہ۔۔۔ رضیہ“۔

منان خنتے نیم تر کر سا ”رضیہ“۔

باؤہ تہ کاٹھے سرفسا ”ہو انٹے نے اعتراض کس ارے۔ دوست اف نے؟“۔

منان خامشی اٹ ”نہ دُہنو ہیئت کس اف باؤہ ولے او کئے آن اتج ٹی بھلن

ے اولمہ ہم تو او دے لائک کتو کہ۔ او نا ذی آنم تون فائٹ کریکہ“۔

باوہ تابالشتے مُر کرسا ہندو انداز نُسے ٹی تو س دُہنکے اسٹ نُس بخت نُسے ٹی سر سہی ہلنگ ناکوشش کے۔

”مار عمر نامسئلہ ہر امسلہ ے۔ اگہ او بھلن ے تو ہندا وڑنگا مسنگ چناتے خوندی کیرہ۔ چنکا مسنگ تینا شوق او سینگار آن خلاس مفسہ او اُر اے امر سنجلاور۔ ایکان نامرضی ہراوڑنی پاس۔ سلیس نالمہ ناہیت تو اونیک بخت ایہُن شک کریکہ۔ انتے کہ رضیہ ننا اراغا بسکہ ای اُسٹ ہشسا او چوری ے وخت نُس پیسہ تٹہ یالمہ ے نا پاریٹہ کہ تینا متکنا پچاتے آن اسہ ارا جوڑا بیت تہ۔ بس ہندا گپاتے آ او چڑا کہ غصہ کریکہ او فضول شک کریکہ۔“

منان ے باوہ نا پیتاتے ٹی اسہ دہنو ہیئت نُس ہم ملتیو ہرانا سوب او انکار کرو س۔ چناتا بیوسی او باوہ نا خنتے کن او دارشتہ کن ہو کر سا پارے ”او کے باوہ! کنے اعتراض اف“۔

باوہ ہینیو بشندہ نُس کرسا دعالت ”اللہ خوش کینہ کنامار“۔ ابش مس تینا کوئی کن سر ہلک۔ باوہ نادا خوشی آن منان ہم خوش مس او خوشی خوشی تینا بیرم ٹی تنگان انا۔ منان و رضیہ نا برام شش دے مٹس۔ اُرانا رنگ ولد اُسٹ نا ڈول متنگ اس۔ چنکا ہم شرارتے شروع کریسر۔ ہراڑن منان او باوہ تاہڑ تو ماک بھاز خوش اسر۔ اسہ اے وخت نُس کہ چناتا گندہ کی آ منان ترند مسکہ او فٹے ٹپا کہ او اسہ اینو نا وخت۔ رضیہ نا بننگان منان نا باوہ اخس خوش اس او خوشی نئے تول متنگ کریکہ نئے بیان۔ رضیہ صُحب شام او نا خذ متے کریکہ۔ منان او چناتا اسکول آ انگان گڈالہ او نشار ہرے اسکان مجلس کریہ۔ او را چا کنگرہ۔ گڑو نُس بیٹ کریہ۔ جوان تین تو مشغول اسر۔ شام تو ن خفتن نا

نماز آن گد رضیہ منان ناما سلسکھ اوڑتون ہنیو گپ کریکھ۔ پڑھ غاتے چرپ کریکھ او اوڑان انگلش ہیل کنگ ناکوشش ہم کریکھ۔ ہراوڑ کہ رضیہ ہروڑٹ او نافرمانشائے پورا کریکھ ہموڑ منان ہم او نافرمانشائے ناستخوانیئے پورا کنگ ناکوشش کریکھ اودے خوش تناکھ۔ وخت تیرمرسا اس۔ اراوالاک کل خوشی ناکسر آ بسوسر۔ ہے اول نابنچندہ غاک ہے اول ناترندیک ولد اراٹنی خنگارہ۔

برام آن جوان مسہ چار تو گدرینگاس کہ منان ناذہن ٹی ناگمان آن شیطانی و خیال کس پیڑنگا۔ اودا خیالان او سخت پریشان اس۔ خیال نابنگ تون ”اعوذ باللہ من الشیطان الرجیم“ خوانا کہ۔ زوڑوتینا ہوشے چپ کریکھ ولے داگندہ انگا سوچ اسہ دم کس ہم او ناذہن آن مرمتو کہ۔

صحب تون وختی اسکول اکن سر ہلکھ تو کسری اودے ہندا خیال بسکھ کہ او ناذہن رضیہ او ناذہن تون ”چی، چی، چی“ اعوذ باللہ“ ہندا خس او ناذہن ٹی بسکھ تو او خوفان جوڑتے تینا گٹ ہلکھ او اللہ غان معافی خواہ سکھ۔

اراٹنی وخت کس رضیہ بواوہ تو تینا اسہ جاگہ ٹوک تو لنگاخنوس تو ولد اہندا سوچ او نانا پاک انگاملی ٹی بسکھ۔

ہندا سوچ ناوجہ غان ہر گڑا اودے پریشان کریکھ۔ ہر منظر اوڑکن سوال کس مسکھ۔ اگہ او بواوہ تینا دالان ٹی رضیہ تون خنوس تو یکدم او ناذہن ٹی اودے بچیفیکہ کہ ”نا نیم پیرانگا بواوہ نانت کاریم کہ اودا دالان ٹی سلو کہ۔ مجلس یک محک؟“۔ یا وخت کس شامی تا بواوہ خواست کس کرو س کہ نشر کننا لے مچہ چرپ کردا چورنٹ ناغل کسے تباہ کرینے تو ہمو وختا او ناذہن سوال کس کریکھ کہ ”بواوہ نا لُخ ناغل رضیہ نابننگان پدانے شروع

مس؟۔ اگہ اونا لُح ہلنگ خوانک تو اوکنے پائہہ ذالبول انت چانک دا کاریے۔ اور ضیہ نا نازور کا دوتے ٹی ارا کا داخہ طاقت ارے کہ اونا خشت انگا لُحے چرپ کنگ کے؟۔

داڑتون اور اودے لُمہ مسکین ناہمو جھگڑہ غاک یاد بسرہ کہ او اکثر باوہ غا ترند مسکہ پاریکہ ”شرم ہفک نے داعمر نابندغ اودا کاریم تون۔ ای او لُحے نانتے پرغوہ اگہ ولد ادا اُرا غا بس۔“

دا کل ہیناک داسوالاک اودے پین ناشاد اوسر گڑ دان کریرہ۔ اوّل تو او تینے آ خار کریکہ تینا ذہن تینا دماغے بد پاریکہ ولے او مجبور کس امر کرو س دا خیال اونا مغز آن ہچ مرتوکہ۔ شک اور ٹون تدا اس۔

ہندا شک نا وجہ غان اور ضیہ غان مُر مساس۔ باوہ تون ہم بھاز کم ہیئت کریکہ۔ داسا او چڑانتیا توسکہ کتاب کس خوانا کا یا تینا دماغ ٹی ودی مروکا بے باک انگا سوالا تا جوابے تسکہ۔

دیک تیر مساس۔ تنک تیر کننگارہ۔ غٹ ارا والا گل او بال اسر بغیر منان آن۔ اودا اسکان تینا ذات تون جنگ اس۔ تینا سوال تون پیڑنگا س۔ حیران اس کہ دا شک نا بیماری اراکان اونا ذہن ٹی بس ولے دا نا جواب اور ٹون ہم الو۔ وار وار اودے ہندن محسوس مسکہ کہ دا شک کس اف حقیقت نسے۔ اسٹ کس ارے کہ اودے آگاہ کنگہ اودے اونا زانیفہ او باوہ نا نا جائز انگا رشتہ نا پانگے ولے دا حقیقت ہم ہموخت اسکان راست متنگ کتو کہ تا نکہ اونا دو ٹی پختہ و ثبوت کس بفروس۔

اسدے منان اسکول آن بنگ تون خنا کہ رضیہ بوپ آلیٹو کے او باوہ اونا ماسا تو لوک اودے تینا دوتے اٹ سوف گُنفگہ۔ منان دا منظر آن ابکہ سلیس۔ اُسٹ تیر لُزنگ



ئے شروع کرے اوگڑ اس پانگ ناگیک کریکہ کہ اوڑان مست باوہ تابشخندہ کرسا پارے  
 ”کنامار! برکہ مستائی کنائے۔ انشاء اللہ منہ توٹی نی باوہ کس مریسہ اوای بھلا باوہ۔“

منان ہمووڑا بکے سلوک ہر یفے ”امر؟“۔

باوہ گوئڈ وخنک کس خلک ”اڑے بدو! رضیہ حاملہ ے۔ اودانے سئی ہم کتنے۔ او تو  
 اینو صُحب تون طبیعت تہ خراب مس ولدا ہسپتال آدریٹ تہ گڑا ہموکان کنے معلوم مس۔“

منان داپتے بننگان داخدر خوش مس کہ اونا ذہن آن اے گندہ انگا سوالاک  
 ہموکان یکدم نرار۔ خوشی آن بس زانیفہ ناما سا تو س خفے خفے ٹی تا خلک۔ ہڑ تو ماک بشخندہ  
 کریرا وافتا بشخندہ غا ہر سا پیرا نگا ہم بشخندہ کس کرے۔

صُحب تون منان ختی بش مس اُرانا کاریمتے ٹی آختہ کرے تینے۔ رضیہ ے تو او  
 اموشام منع کریس کہ خبردار اُرانا کاریم کس کریس۔ داسانا کاریم ہندادے کہ کنابے بی نا  
 خیالے کر بس۔

منان کاریمتے ٹی آختہ اس کہ باوہ تہ جوڑتے کوش ترسا ہر یفے ”مار! آلہ نی اینو  
 اسکول آاپیسہ؟“۔

منان ”آخا باوہ جان تانکہ رضیہ جوڑ متنے ای انپارہ۔“

باوہ تہ ”کنامار! ای ناپتے پُہہ مریوہ۔ نامحبت اودے داحال آانگ کن راضی  
 اف ولے نی چھٹی ہلپہ اسکول آن۔ اُرانا ہرا داخو بھلو کاریمو کہ ناساڑی متنگ ضروری  
 ے۔ اوای تو ایہن ہنداڑے موجود اٹ۔ صُحب نا کاریمتے ای کیوہ ولدا پشیم اسکان نی  
 بریسہ۔ اوکاریم ہم انت مروے اسہ گڑو کس کروئی ے اور رضیہ نادوائی تے تروئی ے بس۔  
 ناباوہ داسکان اوخس ہم پیراف۔“ اوتینا ہندا گپ آخنک کس خلک۔

منان سوچ خلک کہ باوہ مست تینے محتاج پاریکہ واداسا ورناس۔ داکل بھلا  
باوہ متنگ ناخوشیکو۔ اوہندا خوشی ناخیال اٹ اوخوشی خوشی اسکول اکن سرہلک۔

اسکول ٹی حاضر متنگ آن بیدس ہم اوغیر حاضر اس۔ اونا ہوش رضیہ تون اس  
تینا بروکا چنا تون اس۔ او تینا تصور تاتے ٹی ہزار ہا محلاتے تعمیر کریس۔ تینا مستقبل کن تینا  
چنانا مستقبل کن سد آپلانگ تاتے کریس۔

اسکول آن ہنگان گڈ اوچنا تاو رضیہ نا خدمت ٹی آختہ مسکہ۔ باوہ تولد اورنا  
مُس اودے داسا کس نا ضرورت الو۔

منان شام تو رضیہ نا سڑجہ غے تو لوک ہرے اسکان اوڑ تون مجلس کریکہ اودے  
خفیکہ۔ وارٹس پھڈ آن تہ دروت ٹس ہلککہ وارٹس پیشانی آن تہ۔ اوخوشی نا جذبہ غاتے ٹی  
اوڑ ان سوال کریکہ کہ ”نی انت ٹس خواہ بوائے ٹس یا گرل ٹس؟“۔ اور رضیہ شرمینکسا پوسکنو  
ادائے ٹی جواب تسکہ ”انت ٹس خدا جان تس“۔

دا جواب آن منان بتر خوش مسکہ اوہرے اسکان او نا خنتے ٹی محبت نا نگائے  
شاما کہ ہر اکہ۔ منان نا ذہن ٹی داسا فقط رضیہ و اونا چنا جاگہ کریسر ایلوکل سوالاک اونا  
گندہ انگا مغز نا قبرستان ٹی دفن مسوسر۔

صُحب نایا نزہہ بچہ ٹس منان اسکول ٹی کلاس ہلنگ ٹی اس کہ آفس بوائے کلاس  
نادر گہ غا تستہ بس او اشتافی اسہ دمہ ٹی پارے ”سر“ سر پرنسپل صاحب پارے نمہ باوہ  
خوانک۔ پارینے ہسپتال آبریس۔

منان زوزو پرنسپل صاحب آن ولد اجازت ہلک او ہسپتال آسر کرے تینے۔  
نرس آن رضیہ ناہر لیفے تو نرس مبارک بادی ترسا پارے ”روم نمبر تری“۔

منان روم نمبر تری ناتہ ٹی پترینگا تو خنا کہ رضیہ بیڈا لیٹوک ہشتندہ کنتگہ۔ اودا ہشتندہ او لیکو وار رضیہ ناجوڑتے آبس داجٹ پوسکنو ہشتندہ کس اس۔ اسہ عجیبو ہشتندہ کس اس محبت آن پر شفقت آن پر۔ رضیہ نانت آما سا بیڈے باوہ تو لوکے اودوئی تاملہ نا شربت کسے ہر ادے اور رضیہ کن شاغانے۔ رضیہ ناراستیکو دونا ماسا اسہ ناز و کو پیہو گوانزہ کسے۔ رضیہ منان ناخستے ٹی ہر ساتینا مخموراخستے اٹ گوانزہ کن اشارہ کرے۔ منان کرا کرا ننتے ارفسا گوانزہ نا ماسا انا تو اونا جوڑک تینٹ بے اختیار کوش ہلکر۔ گوانزہ ٹی کاٹھے پتریفے تو اسہ سکو تنکو جنت نا پری کس تخوک اس۔ خنک تر جوڑک خشک خشک۔ منان نا بدن خوشی آن سیم سیم مس اونا اُست خوا کس کہ تینا چنائے ارفیواوتینا سینہ ٹی ڈکیو ولے اودے خلّیس ارفے کہ دانا زور کا چناہ دُہن مف کنا دوتے ٹی دیر مرو۔

رضیہ ناکند محبت نا نگاہ اٹ ہر سا ہر یفے ”مار کسے یا گرل کسے“۔

ہندا سوال آ رضیہ کس خنک کس جوان دم کس خنکان گڈ پارے ”نے انت لکک“۔

منان خستے اڑسا ”ہج درست مفک“۔

باوہ کسے تہ اُست آرام تو منان ناکند اہر سا پارے ”مار کسے بدو“۔

مارنا بنکان منان نا محبت دو بالامس خنک تا خوشی آن گروشکی مسر۔

رضیہ منان ناکند اخستے خلّسا سوچ کرے ”دیر آ انا نے“ نے آیا کسے آ؟“۔

منان چناغا ولد انظر کس شاغا۔ وندی تنگ کن گیک کرے کہ داکازس ڈرپ

دوئی پترینگا۔ نرس تینا کاریم ٹی اخستے کس کہ رضیہ ولد اہر یفے ”آلہ پاتوس دیر آ انا نے؟“۔

منان ناہتیاں مست نرس بغیر اجازت آن تینا جوابے کس حالانکہ سوال اوڑان

الو ”رضیہ بی بی! مارنا ماشاء اللہ چٹ تینا بھلا باوہ غانا نے“۔

نرس ناورندی آن پیرہ اونشار بشندہ کریرولے منان نارنگ زرئس پین وڑمس۔  
 منان نارنگ ئے دن بے رنگ خنسابا وہ ناتارنگ ہم مچہ بدل مس اوز و زورس ناپیتے غلط  
 ثابت کنگ کن پارے ”چنادا اسکان اسہ دے نائے۔ دُہن زُوامر معلوم مریک کہ دیرا  
 انانے دقاوڑ وکسے۔“

داجوابان اونا جندے سکون کس تو ملاولے منان نارنگ ہمووڑ پوشکن آن پوشکن اس۔  
 رضیہ وچنائے اُراغا ہتنگان گد منان ہم تین کہ منہ دے ناچھٹی ہلک۔ سیال  
 اوقریبا تاہنگ شروع مس۔ ہرا بندغا ک مبارک بادی کن بسرہ۔ چاشنگر کنگان گد ہر  
 اسٹ ہندا اسہ پیتے کریک ”چناچٹ تینا پیرہ غا انانے۔ ہموخنک ہمو بائس ہمو جوڑک او  
 ہمو پیشانی۔“

دایتناک منان ناسینہ ٹی لگفوکا خاخرے پین زیات کریرہ۔ او ہندا خاخرنا زراب  
 آن ذہن ٹی ہسے شک ولدازندہ مٹس۔ لمہ ناتہ پیناک ولد او ناخفتے ٹی چڑینگ آن بار  
 توار کریرہ۔ باوہ ناورنامنگ۔ رضیہ ناخذمتے کنگ۔ اونا دو تے اٹ تینے چرپ کرفنگ۔  
 اونا سرچہ غا تو لوک اودے یخنی کفنگ۔ داکل منظر آک اونا دماغ ٹی چکر کریرہ۔

منان تون اوار باوہ ناتارنگ ہم بدل مٹس۔ تین تو پریشان اس کہ داخلو قے  
 خدا خلے انتے داوڑ پانک ولے دائی مخلوق نانت قصور۔

چنانا ششہ نادے اس۔ منان وختی گلوٹی آچہرہ تون اُراوالا تے آن اجازت  
 ہلسا پیش تمّا کہ کاو خیرات کن ہیٹ کس ہتیوہ۔

اینو نو سال آن گد ہم دا اسکان رضیہ چناک او بھلا باوہ کل انتظار وولے نئے  
 منان بس نئے اونا ہیٹ۔

## خان جانو

اونا جنڈاک مون آن نیام سرا سکان مون اسر ولے چورنٹ ناکل پٹاک بور  
 اسرہ۔ داگڑا نادمہ وارہمو کارخانہ اس ہرائی ٹوپاک جوڑ مسرہ۔ ٹوپاتے ٹی مون آن تنکو  
 گتہ کس خلوک اس ہراڑان خنک ہم سیجا مسرہ او مون نا پڑہ غاک ہم ولے خیران کاٹم نا پڑہ  
 غاک پاش خنکارہ ہرافتے آدے تمنا کہ تو پڑہ غاک رنگ بدلیفیرہ او چیرسکو گندس ہم  
 کریرہ۔ ایلوگڑا دا کہ سانس تیٹ پانک دے آچرینگ نا بھازا فاندہ غاکو تو دے آ  
 چرینگ اونا مجبوری اس۔ خلق والا کہ ہندن خان جانوئے رسوا کریر کہ او الا چرئسے۔

خان جانو نا بھلو پیشانی کس اس۔ ہرانا احساس تنیا یختے ٹی مسکہ کہ او پڑہ  
 غاتے تینا انڈین و تیل کسے ٹی چرپ کریکہ او خیری رندا کہ۔ داتیلے او دے اونا انڈین  
 سنگت کس سعودی ٹی تئس۔ ہرانا بھلا فاندہ دا اس کہ داتیل اٹ چرپ کننگان پڑہ  
 غاک تمٹورہ او واقعی ہندن اس۔ خان جانو نا پیشانی نیام آ اسہ چٹکو گولو چیک کس جوڑ  
 مس۔ دانشانے ای ہمو وختا خنٹ کہ او سعودی آن پوسکن بس۔

دانا وجہے ای اوڑان ہریفیٹ تو او پارے کہ سعودی ٹی او شیعہ تا امام بارگاہ ٹی  
 نماز خوانا کہ تو پیشانی نا کیرغان ترلع کس تنخا کہ او ہرانا ذی آسجدہ کریکہ۔

ای ہریفیٹ ”شیعہ تا امام بارگاہ تے ٹی نماز خوانگ نا سوب انت اس؟“۔

تو او پارے ”نماز آن گڈ ای اوفت ملا تون دینی وُ بحث کریٹھ او اوفتے سنی جوڑ کریٹھ۔“

ولے منہ دے آن گڈ حیدر کہ سعودی آن بس تو خان جانو نازی آدروغ کُس تالان کرے کہ داپڈ و خان جانو، برنج کنگ کن چڑھ شیعہ تا امام بارگاہ غانا کہ ولدا شیعاک اڑسارتہ او تین تو نماز خوانغیرہ تہ۔ خلق والا ک کل حیدرنا ہیئت آیقین کریو ولے کنے حیدرنا دا گپ آیقین بتو۔

خان جانو ناچٹکو چٹکوخن اسرولے اونا دا چٹکا خنتے ای تنیا ہمو وختا خنٹا ہرا تم او نرینہ کسے تون گپ کرو سس۔ ذالبول او مستنا وختا اونا خنک پخت ناخنتے آن بار بھلن مسرہ۔ دانا وجہے او کنے پاریس کہ مسنتے بھلاخن والا ماک دوست بریرہ۔

دا جتا و ہیئت کسے کہ اونا عمرسی وُنہہ سال اس۔ پنچ چنانا باوہ اس ولے دا تو دنیا والا تے کن اس۔ تنیا اُسٹ ٹی تو خان جانو ورنو مار کُس اس۔ ہرانا ثبوت اونا پزورانگا دوک اوڈ ڈانگا پنچہ غاک اسر۔

خلق ٹی کل آن بھلا طاقورا نگا مارا واس۔ اسٹ نا مجال الو کہ خوش آمدنا وختا اوڑتو ن بغل کشی کرو سس۔ بھازاک تو دوے تہ ہم ہلتورہ۔ بیرہ باٹ خوش آمد کریہ تہ۔ کنے یادے اسہ دے ای او پیروک ناوڑ ناڈ پوک آ تو لک اسن۔ خان جانو بس تو ای تنیا شہادت نا اورے تسوٹ تہ سلام کریٹ تہ۔ کنا اورے ہلک تو بشخندہ کرسہ پارے ”ارٹ کیوتہ“۔

اونا دا بشخندہ غرور آن پراس۔

پیروک نوٹھکے آن بسس۔ خان جانو نا عادت آن بے سما اس۔ پنچہ تے تنیا

مریفے سلام کن تو خان جانو دوئے تازو رآن چکا سینہ ئے تہ تینا سینہ ٹی خلک اودو تے  
 شاعا خ ٹی تہ۔ چپکیو دونا چار اورے راستیکیو دونا ہرش بند (کلائی) آتخا اوشستے تینا ہرش  
 بند ناشیف آلاک کس جوڑ کرے او پیروک ئے دہنو جگہ کس تس کہ پیروک ناباغان ہلکہ نا  
 تو اربس تو خان جانو خوف آن یلہ کرے تہ۔ یلہ متنگ تون پیروک بد نے تینا تو ننگ کوتاو  
 سیدہا مسن ڈغار ٹی لگا۔ خان جانو بابائے چوٹ کرے کئے آہر اوچوڑ آختے اٹ اشارہ کس  
 کرے ہرانا مطلب اس ”امر خناس۔۔ داہم تما“۔

اسہ دے ای او خان جانو عمر شاہ غا انا سن کاریم کسے اٹ۔ دیگر آن مچہ پد اس  
 کہ سن بٹن تو خنہ کہ خلق نا ہجرہ نامونا چار پنچ نرینہ تو لوکو۔ خان جانو کنا کو پہ غا پنچہ ئے تینا  
 مسہ چار وار زوزو خلسا پارے ”اڈکیس، اڈکیس، جتیک بٹو۔ موٹر سائیکل نا اسٹینڈے خل  
 کان دینی و بحث کس کین، چاک ہم تیار تخو کو، چاکس ہم کنینہ“۔

ای موٹر سائیکل ئے سلیفیٹ۔ خان جانو مون اٹ ای پداٹ انا ن تبلیغی  
 جماعت والا تاماسا۔ تبلیغیک خان جانو نامونا لبش مسر۔ خان جانو زور آن ہکل کر سا  
 پارے ”السلام علیکم“۔

راستیکیو کنڈان اسہ نرینہ کس خان جانو نا دوئے ہلک۔ خان جانو ”انت  
 حالے خوجہ؟“۔

تبلیغی ”الحمد للہ الحمد للہ“۔

خان جانو دوئے تالیہ کوتاو ہشتندہ کرسا دوئے تا پیری کس تس تو امبل درد آن خیرے ہستا  
 تینے۔ او ہندن دوئے تہ پیری تر سا ہریفے ”ہر ادے دا امیر صاحب نما؟“۔

خان جانو ہندو لوجہ سے اٹ ہریفے کہ امیر صاحب بھلو جرم کس کرینے کہ دا  
 خلق آہسنے۔

خان جانو ناما سا اسہ ملا تب نابند غ کس سلوک اس۔ بالادٹی پٹک اس ولے  
 ماشاء اللہ کل تبلیغی تے آن پزور اس۔ نرموگٹ کسے اٹ پارے  
 ”ای اٹ امیر صاحب۔“

خان جانو ولد اشخندہ کرے۔ داہمویشخندہ اس کہ او اکثر خنب ناوختا کر یکہ تہ۔  
 دا ابل نادوے یلہ کرے تو ہنداڑتون امیر صاحب تینا دوے مریفے سلام کن۔ بس ہندا  
 کس کہ خان جانو دوے تاسخت آن ہلک تینکن چکا۔ اوہڑ تو مادوے شاغا امیر صاحب ناخ  
 ٹی۔ ای خان جانو ناخیر آن سلوک اٹ۔ خان جانو امیر صاحبے بڑا کرے تو امیر  
 صاحب نانک ڈغار آن چست مسر۔ کل تبلیغیک کنتو اوار تماشہ سئل کر سا اسر۔ دم  
 کس متو کہ امیر صاحب ناخنک چدو آن بار پشتمار۔ پڑور آکلکاک تاٹماڑ آن بار خین  
 خین مسر۔ ای امیر صاحب نامعصوما چہرہ غاظر شاغاٹ توکنے ہندن لگا کہ امیر صاحب  
 نا حساب کتاب ہندا دنیاٹی منگلہ۔

ہندا سوچ ٹی اٹ کہ دڑام تو ارس مس۔ ہراٹ تو امیر صاحب زمین آتمانے  
 اوگڑ اس پانگ خوانک ولے ہیت تابفک۔

ہنداڑتون خان جانو خنک کس خلک او ایلو تبلیغی تے آخسا پارے ”امیر صاحبے پارے کہ  
 شام ناماز آن گڈ سلوکا خوش آمد مریک‘ کان عمران۔“

ای او خان جانو شام ناماز آہسن تو سماس کہ تبلیغیک اراخلق اپار میر آغا محمد  
 نا خلق آاناو۔

خان جانو نا اشنکو باس کس اس۔ نئے بھاز بھلن نئے بھاز چنک۔ ہراڑکن او  
 بھاز فخر اٹ پاریکہ ”ایرانی تازیبا انگاور ناتا بامسک ہنداوڑو۔“

جوڑک تانشہ ناو آن مون مون ہشنگا سر۔ وار کس سگریٹ چکا کہ وار کس ناس



کر یکہ۔ ہر اتم ناس کر یکہ تو ناسک با آن تہ بروارہ۔ تف کنگ نا وختاز نو آتہ شولنگارہ۔ دا  
 گڑا تے آن او بھاز خوش مسکہ اونا زات پار یکہ ”عمران جان، ابدالاک ہنداوڑ مریرہ“۔  
 رنگ اٹ پیہنو بندغ نس اس۔ نادرست آ بندغاک خان صاحب پاریرہ تہ  
 اصل اٹ تو بلوچ نس اس۔ خان جانو او دے انت نسے کن پاریرہ دا گڑا نا کئے ہج خبر تمگوگر  
 دا پن اونا شخصیت تو ٹہا کہ۔ ”خان“ اس تو او خنزگا کہ او ”جانو“ تو اونا عشقی آمراج نا  
 گواہی ے تسکہ۔

خان جانو امر کنا سنگت مس دا گڑا کنا یاد آبتگ اف ولے ای امر خان جانو نا  
 جوان انگ سنگت مسٹ دا نا وجہ دا اس کہ خان جانو نا ای اسٹ انگ سنگت اسٹ کہ اونا  
 کروکا پیتا تانیا مٹ سوال کتوٹ۔ اوہرا گڑاے ہراوڑ بیان کر یکہ ای ہمووڑ مناٹ۔ دُہنکہ بہ  
 گفتار اونا کہ صدام حسین اوڑ کن مسہ وار پیغام راہی کرے کہ خان جانو فی بر عراق نا وزیر  
 اعظم مر۔ اگہ دانگ بفسیہ تو ہموکان کئے مشورہ تر سا کر کہ تینا وطن نا نظام ٹی انت تبدیلی  
 ہتیو کہ کنا ملک ٹی امن برے ولے خان جانو نا جواب اسٹ اس کہ ای تینا بلوچستان ے  
 انگ کپرہ نا ملک کن۔

ہر ابند غاتے آن اونا راض اس او فک دہن انگا گیا تانیا مٹ خان جانو آن  
 ہر بیفیر اکہ ”خان جانو! نما انا نمبرے صدام حسین دیر آن ہلک؟“۔

”نم ہرا زبان ٹی اوڑ توں ہیئت کریرے عربی یا براہوئی؟“۔ ”نم امر صدام  
 حسین نا تو ارے درست کریرے؟“۔ ولے کئے خان جانو نا لائی نا جوان سما اس کہ خان  
 جانو ے عربی مچہ بریک۔ او صدام توں ہم او عربی ٹی ہیئت کیک۔ ارٹمیکو دا کہ صدام حسین  
 کن خان جانو نا نمبر نا ہلنگ ہرا مشکلو کاریم نس اس۔ خان جانو نا نمبرے تو دنیا نا کل

بادشاہک تین تو تھاسر۔ ہر کسے مصیبت کس بسکہ او خان جانوئے حوال کر یکہ۔ داپتے او کئے اسہ دے کل آن اندری پارے۔

ہندا سوب اس کہ خان جانوئے ای بھاز دوست اسٹ او کنکہ بھاز مہر کر یکہ اکثر کئے پار یکہ ”عمران جان! نی بھاز لاٹھو مارے اُس۔ کنا زندگی تو دا جاہلا تانیا مٹ گدرینگا ولے نی تینا زندے داڑے خراب کپیس۔“

کنا او خان جانو نا مجلس خفتن نا نماز آن گڈ مسکہ۔ نن کل جماعت توں نماز خوانانہ ولے او جتا خوانا کہ۔ ہندا خاطر آن خلق نا بھاز اکما شاہک اوڑان بدریرہ ولے او نا پانگ دا اس کہ داملا نا وضو نا کنگ سئی اف۔ داخ نا مسح کیک ولے عرباک کپسہ۔ داملا نا تجوید ہم غلطے ”ع او ح“، ”ک او ق“ نا فرقے کشنگ کیک۔“

دا گڑا تے خان جانو سعودی آن ہیل کریٹس۔ او مسہ سال سعودی ٹی مس بقول او نا ”سعودی نا شیخ عبداللہ اودے بٹنگا س کہ نن شکاری تاہلنگ نا طریقہ بیل ایت ولے خلق والا جاہلاک چڑا دا پاریرہ کہ خان جانو سعودی ٹی بجکت مسنے۔ مسہ سال بچا توں مسنے۔ ہر اگپ کنا نظر ٹی صفا اودروغ کس اس۔“

خلق نا ملا اولیکو دے خان جانو آ بھاز چڑا ”نے شرم بقک جماعت آن جتا نماز خوانسہ۔“ ہرانا جواب ٹی خان جانو پارے تہ کہ ”نی جاہل کسے اُس۔ ای نا خیران نماز خوانپرہ۔“ ہمودے ملا او خان جانو نا نیام اٹ بحث ہرے اسکان چکا تینے۔ نماز یک کل ملا نا کنڈان اسر ولے ای خان جانو نا حق ٹی اسٹ۔ آخر خان جانو غصہ ٹی بس تو ملائے پارے ”ای نے آن اسہ سوال کس ہر یفوہ نی جواب ایت۔ اگہ سئی جواب تئس تو ای نا خیران نماز خوانوٹ نہ تو خبر دار آئندہ کئے پار لیس جماعت تو خوان؟۔“

ملانا ہم بلیڈ پریش بھار بڑا اس ہمو وختا کل نامونا چلیج قبول کر سا پارے ”پاتینا سوالے؟“۔

خان جانو اسے نظر کس نمازی تاکنڈا ہرا ولد ملا تون مخاطب مرسا ہر یفے ”پا جواب ایت“ حضرت موسیٰ علیہ السلام طور آ سجدہ کر یکہ تو اونا سجدہ امر و سجدہ کس اس؟۔ ہندا وڑ دھنک نہ کینہ یا پین وڑ؟۔ اوتنیا پیشانی ءے ڈغار آتخا کہ یا پورا چہرہ ءے؟۔ مسن سجدہ کر یکہ یا پین وڑ؟۔ دوتے دلستا تخا کہ یا دوتے یلہ کر یکہ۔ شاباش زوپا؟۔ ملانا رنگ یکدم اڑساتینے او حیران مس کہ دا امر و سوال کسے دا جاہل نامارکنے آن کرے۔ جوان ہرے اسکان سوچ خلک۔

نماز یک کل ملانا با آہر ارہ کہ مولوی صاحب جواب ٹی انت پارو۔ آخر مولوی صاحبے جواب بچو تو خان جانو آتر ندس ”دا انت ہر فنگ اُس؟“۔

خان جانو فوراً خنتے خیسن کر سا پارے ”ای پا توٹ دا جاہل کسے“۔ او ہندا گپ تو مسیت آن پیش تما۔ اوکان گڈ نہ ملا خان جانو تون گپ کرے نہ خان جانو اونا خیران نماز خوانا۔ ای اسے دے ہندا نا ورنڈی اوڑن ہر فیٹ تو کسے پارے ”دانا جواب عربی ٹی ءے بس۔ براہوٹی ٹی اف۔ ای نے عربی ٹی پاریٹ تہ تو نی پُہہ مفیسہ تہ“۔

ای تین تو پاریٹ واقعی خان جانو سئی پانک کسے تو عربی بفک۔ ہر خفتن نا نماز آن گڈ ای اراغان چانک کسے ٹی چا ارفیٹہ ولدہ ای او خان جانو ریکاتے آانا نہ ہموڑے تو سنہ اے ہرے اسکان چاکش کرینہ او مجلس کرینہ۔ گڑا ہنداریکا تیا خان جانو کسے تاریخی وقصہ کر یکہ تاکہ کنا چانداری وڈھہ۔

مشن او پاریکہ کہ اولیکو جنگ عظیم ٹی ارا کروڑ بلوچ خلنگار۔ او ہندا جنگ ٹی اونا پیرہ داد محمد پنج انگریز ہم کہسے۔ ہر افتا جون تے درزی ناڈغار ٹی کھڈ کرے۔

اٹمیکو جنگ عظیم ٹی اونا باوہ جورج بش نا باوہ ے مسہ تو او فتائی ٹی ڈکا۔ ہمو  
وختاک اسر کہ خان جانو انگش ہیل کرے ولدا جورج بش نا باوہ ے تینا خلق نا بجکت  
جوڑ کرے او ہر ہچ آپست رپی حق تھار اوڑ کن۔ ارا سال آن گڈ بش نا باوہ ریک ٹی  
کہسک تولا شے تہ ہموڑے کھڈ کریر۔

داسا او انتظارے مسٹمیکو جنگ عظیم کن۔ اودا جار اونا تیاری دادے کہ اُبا مہ  
ضرور درزی آہیک۔ اودرزی ٹی چناتے کن انگریزی و اسکول نس ملک ہرانا ہیڈ ماسٹر  
اُبا مہ مریک۔

خان جانو ہندا وڑ ہر شام کنکہ چانداری و گپ کریکہ۔ دے آن او بنگ  
کتوکہ۔ بھاز آختہ مسکہ۔ او تینا آختہ ٹی تاکنے پاریس کہ صُحب نا نماز آن گڈ شام نا نماز  
اسکان او خلق والا تاکاریمتے ٹی آختہ مریک۔

دے نس اسماعیل تینا ٹریکٹر نا جوڑکننگ کن بٹنگ تہ۔ دے نس سیٹ سعد اللہ کوٹی  
سے نا قنگ کن دیک تہ۔ دے نس سردار اک فیصلہ غاتے آدیرہ تہ۔ اونا کاریم بس ہندا خلقی  
تا خدمت نا کتنگہ۔ اودا سامنہ وخت مست اسکول نا کورس ٹی پوسکن انگش نا کتاب بٹنے تو  
دیگر تو کانک ماسٹرے انگش خوانفک تاکہ ماسٹر چناتے جوان خوانفنگ کے۔

خلق کن ٹیوب ویل سے نا آرڈر ہم بٹنے تو کل ذمہ داری خان جانو ے  
تنگانے۔ او واقعی اوڑ ان بیدس دہنو بندغ ہم اف کہ دا کاریمے کنگ کیر۔

اسہ دے امی اوڑن ہر فیٹ کہ خان جانو فی ہر کاریمے اللہ نارضا او بند غاتا  
خوشی کن کیسہ گڑا تینا زندا زندگی کن تینا چناتے کن ارا کہ پیسہ ہتیسہ۔ امر کٹسہ۔ تو او کنے  
پارے کہ سعودی نا کاریمتے آن اودا خہ پیسہ کٹانے کہ کوئٹہ نیشنل بینک ٹی اونا پین نا اسہ

اکاونٹ کس ارے ہراٹی اونا ہفتا دکھ رہی جمع و۔ اودا گڑانا ذکرے بیرہ اوکھو کرے ایلو فتا باورکتو کہ۔ ولے خلق ٹی دا گپ مشہور اس کہ خان جانو بغیر کس خشت تڑینگ آن اسہ کاریم کس ہم پتیک۔ ہندا اونا روزگارے او ہندا ونا کٹ ولے کئے خلق والائے آیقین الو۔ کئے معلوم اس دا خلقیک خان جانو تون کست کیرہ۔

خلق ٹی ہرا ہرا بند غاک خان جانو آن غصہ اسر ای ہموکل بند غاتے آن غصہ اسٹ۔ داکل جا ہلاک ہر مجلس ٹی ہندا پاریرہ کہ خان جانو در غمر و بند غاے بیکارے نہ تینا عزتے چانک نہ ایلو فتا، منافق ہے۔ ہراڑے ارا ایلیم جنگ لگرتو فیصلہ غاسا تمک دافتے جنگ تروکا خان جانو اس۔ باوہ مارنا نیام ٹی جھگڑا کس مرے تو آخرا ہندا ہیبت مونا بریک کہ دا خان جانو ناوجہ غان مسنے۔

ولے ہندا خلق ٹی منہ ہندو بند غ اسر ہرا خان جانو نا عزتے کریرہ۔ ہرا فتا دا پانگ اس کہ امرارے مصیبت ٹی کاریم ایتک۔ ولے گدرینگو کاچنکا عید اس کہ ہراڑن گڈ خان جانو ہمو فتے آن ہم غصہ مس۔ ہرا ناوجہ دا اس کہ ای او خان جانو رحمت اللہ نا بیٹھک ٹی تو لوک اسن کہ پیشن آن تو ارس بس ”بابونا باوہ! برچا تدر“۔

چا کنزگان گڈ ہرا تم نن بش مسن تو خان جانو غصہ ٹی کن تو پارے ”یار! دا رحمت اللہ کنے انت کس سمجھانے کہ تینا زایفہ ئے کئے آن ستر کر فینے۔ زایفہ تہ تہہ ٹی بنگ کتو کہ کہ خان جانو عید مبارکی کیو یا عمران ئے۔ اینودا اڑمکیو وار کس کہ اونا زایفہ درگہ غان اڑینگا۔ بس خلاص کنا اور حونا اینو آن پد کٹا“۔

ای پاریٹ سئی پاسہ۔ اوکان گڈ ای او سوچان کہ کان شوکت نا اراغا۔ عید مبارکی ہم کینتہ او برام ناتہ مبارکی ئے ہم ایتنتہ۔

اسہ وار انان ماما اللہ بخش نادکان آن پنجا رُپئی والا ٹانی کس ہلکن۔ شوکت نا مبارکی آچا چلم آن گڈ ماما ہر یفے ”آلہ نشار ارادے؟“۔  
شوکت جواب تس ”انانے تینا لہ نا اُراغا عید مبارکی کن“۔

ہراوخت ن پشیمان تو ای خنٹ کہ شوکت نا اُرا نا لکھ ناما سا شوکت ناز ایفہ چلے دیر کنگہ۔ ای اودے مالو خنوسٹ تو درست کریٹہ تہ۔ خان جانوے سئی کریٹ تو شوکت نے جوان کنا مونا کریگ تس ”اوشو کونا مار کن تو دروغ تڑے۔ ای مگہ بدنیت کسے اٹ؟“۔ ای پاریت ”آخانی آفیس او بدنیت کسے“۔ بھلو بد حالی کسے اٹ ماما مزاجے ٹھیک کریٹ۔

عطاء اللہ غان دا وجہ غان غصہ کرے کہ دامالدارانگا بندغ عید نادے ہم ن کن مونو چا کرے۔ چٹ لنگڑ و نابود ز ایفہ کسے تہ۔ کنے سما اس کہ خان جانو اُست نا صافو بندغ کسے۔ بس منہ دے غصہ کیک ولدا خوش مریک ولے خلق والا دا جاہلاک تین تو پاریرہ کہ خان جانو بے حیا و پھڈنا خلکو بندغ کسے۔ ارادے غصہ کیک ولدا بریک پدی خوش مریک۔

دانیام ٹی بھلو وخت کس گد رینگا کنا او خان جانو نا ملاقات متو تو اسہ دے ای سوچاٹ کہ اُراغے تاکا و ہر یفو ہرا نگے؟۔ اُراغاتے اناٹ تو ز ایفہ تہ پارے ”دہ دے مریک خان جانو ارامستری مسہ کاری اوارا پین سنگت تین تو درے کہ بیدی نے اُرا کس تقویٰ نے“۔

ہمودے آن پد بیس دے پین گد رینگا کہ ای و خان جانو تینے ختنون۔ کنے ہنداخہ سہامس کہ او بیسے ولدا انانے۔

اسہ دے جاوید کس تس بس کنا ماسا پارے ”نی داڑے تو لوک اُس ایڑے نا سنگت خان جانوے ز ایفہ او مسنک تا پٹ کریر“۔

کنے یقین ہو، یقین دا گڑاغا آخا کہ خان جانوئے پٹنگو بلکہ دا گڑاغا کہ خان جانوئے کس پٹ کنگ کپک انتے کہ او انڈین تیل خلیک ہر ادے سعودی آن پیسنے۔ خیر ای رم کرسہ ایڑے اناٹ تو خناٹ کہ واقعی خان جانو پٹ مٹس۔ خلق والا کہ تماشہ ہر ارہ۔ کل خوش اسر کہ خان جانو اولیکو وارلٹ کنگنے۔ ای ہندا خس کریٹ خلاس کریٹ تہ او خان جانوئے پیسٹ تینا بیٹھک آ۔

ولدا بیگہ تون واپس دریٹ سر کریٹ تہ۔ نثارے سمجھایفیٹ کہ خدارا داسا جنگ کپیرے کہ مچا خلق ٹی رسوا مٹرے۔

خفتن ناماز آن گڈ چانک ے ارفیٹ ای او خان جانو انان ریکا تے آ ولدہ ہموڑے او کن تو خواستوبس کہ او بیدی ٹی پین برامس کرینے۔ ہمو خلق ٹی تینکہ تینا پوسکنا زایفہ کن اُراس ہم تھینے او ارا لکھڑ پئی لب ہم تنے۔

کنے بھلو صدمہ نس لگا کہ خان جانو امر داوڑ کنگ کیک ولے ای سوچاٹ کہ داسا غصہ کنگ نانت فائدہ۔ کنے اوڑ تو سلوئی اس۔ اسٹ ای تو اسٹ او ناسگت۔ پھگہ کن ہندامس کہ خان جانوئے او نازایفہ اومسک اُراغان مڑار۔ ای تینا موٹر سائیکل آ اودے بیدی آسر کریٹ۔ کسری پہہ کریٹ تہ کہ منہ دے ہنداڑے چڑکا نثار تو اڈ کہ ولدا خلق آبر۔ او وخت اسکان چناتا ناغصہ ہم بھدین مریک۔

بیدی آسر مٹن تو کوئی نم ناگند کریک۔ اُراک پالن اسرہ داسکان۔ دم نسے آن گڈ نثار نثار بس ”جانو جان! برچا تے در“۔

تو ار آن سما مسکہ کہ نثار نامہ ہفتہ یا ہتر دہ سال مرو۔ چا تے کننگان گڈ ای سر ہلٹ اُرا کن تو خان جانو قول کرے کہ شام تو مجلس کن تینے سر کیک۔ ای اُرا غابٹ تو ننا

اُراغامنہ ذالبول بسوسر۔ ہر افقا تو ارکنے اسکان صاف سر مسکہ۔ ای ہمو کوئی نا پشن آکھٹ  
آ تو لوک اسٹ۔

ذالبول نئے ناتوار بس کہ ”ایڑ بیوس! بیدی والا در محمد ارا لکھ نا جو نہ ٹی پانزدہ  
سال نامسٹرے چل سال نا پیرانگا تو برام تہ۔ چنانا تینا زندے برباد کرے۔“

ایلو ذالبول ناتوار بس ”ابوے زارای بنگٹ کہ مسٹریٹ خان جانو آ عاشق  
مُس۔ خان جانوئے ہموڑے تینا خلق ٹی خشت تڑنگ آ خناس۔ ہموکا ہڑ تو ماک  
ہمشور مسوسر گڑ اولد ابرام تہ مس۔“

شام تو خان جانو بس۔ نن ریکا تے آ مجلس کنگ ٹی اسن۔ ای دا گڑانا ذکرے  
کتوٹ کہ اینو ذالبولاک انت پانگ اسر کہ دہن مف اُسٹ تہ خراب مرو۔

نن مجلس کنگ اسن کہ خان جانو تینا پڑ ورا نگاراسنیکو پنجاٹ کنا چکیو کلک آدہنو  
شامات نس ہی کشا کہ کنا خنک تیلی میلی مسر او چند تہ ہموکان بش مس انا۔ ای رند ٹی تہ بھاز  
توار کریٹ ولے اڈکتو غصہ کرے انا۔ کنا سمجھ ٹی بتو کہ کنا سنگت کنے آن دا ہیبت آغصہ  
کرے کہ ای بیرہ دا پاریٹ ”خان جانو! نی اینو نثار نا دیدارے ہم کر یفتوس۔“

اودے آن گڈ ای خان جانو نا کنڈ انتوٹ۔ خان جانو کنا کنڈا بتو۔ نن چٹ  
تینے آن مرک او زند مسن۔ دانیام ٹی تقریباً نو دہ تو گدری نگار کہ اسہ دے بیدی آن حوال  
نس بس خان جانوئے دوشہ کس کنگنے۔ ہرانا زار آن افوت کرینے۔ ای تین تو سوچاٹ کہ  
ہراڑے ارے دوشہ ناخ خان جانو نا دوتے اٹ برابر تینے۔



## دروت

ای د ارادے آن ہنداسوچ ٹی اسٹ کہ داقصہ ئے اراکان شروع کیو۔ عابدہ اور یحانہ ناسنگتی آن یار یحان او عابدہ نامحبت آن۔ ولدرا خیال بس کہ قصہ مرے تو آغاز آن مرے۔

عابدہ سردار جہانگیر خان نا آخر کیو مسٹر اس۔ ہرانا عمر شانزده و ہفده سال نانیا م ٹی اس۔ عابدہ ناپین مسہ ایڈ اسٹر ہر افٹے ٹی ارٹ برامی او اسٹ ساگی اس۔ دافٹے آن بیدس او نار ابرامی وایلم اسٹر۔ بھلانا پین سردار امان اللہ او چنکا ناپین سردار شفیع اللہ اس۔ سردار جہانگیر خان تینا قوم نا بھلا سردار اس۔ ہرانا سوبان او فتا بیٹھک ٹی دے اون بند غاتا ہجوم ساڑی اس۔ قوم نا فیصلہ غاک، شارنا مسئلہ غاک کل ہندا بیٹھک ٹی حل مسرہ۔ دا آختہ ٹی نا وجہ غان سردار تینا اراوالا تے زیات وخت تنگ کتو کہ۔ ہند نو دے مسکہ کہ او ارا ٹی تینا چنکا مسٹر عابدہ ئے ارا ارامسہ مسہ دے خنٹو کہ۔

عابدہ اور یحانہ تینا خلق نا سرکاری آ اسکول نا تھمیکو صف ٹی خوانارہ۔ او فتا سنگتی ہم ہندا اسکول آن بنا مس۔ مسن تا مخلص دادے کہ او اسٹ ایلو تون ارا گھنٹہ نا تہہ ٹی ہندن سنگت مریرہ کس پانہہ او تین تو سالاتے آن او ار مسٹو او ایلو کنڈا مارک ارا سال آن او ار مریرہ واہم اسٹ ایلو آن اجنبی تا ڈول ہڑز کیرہ۔ خیر ہیت منگ کس عابدہ اور یحانہ ناسنگتی نا۔

اسکول ناسنگتی آن گد عابدہ اور یحانہ نا انگ بنگ اسٹ ایلو نا اراتے اسکان سرمس۔ ہفتہ ٹی ارامسہ وار عابدہ ریحانہ کس تے آنا کہ او ہندا وڑٹ عابدہ نابنگ نا قرضے او فتا ارا غا انگان ریحانہ ادا کریکہ۔ ادا کثر تینا مجلس ٹی اسکول نا کاریم خلق ٹی مروکا سانگ وبرا م تینا پوسکنا پیچ او ہندی ڈرامہ غانا ہیبت او گپا تے کریہ۔

عابدہ اور یحانہ اسے عمر نا اسر ولے ہڑتو ماتا سوچ او فکر رنگ اوز یبائی ٹی بھلو فرق کس اس۔ ہرانا بھلا وجہ او فتا مالی حالت اس۔

عابدہ نا گونڈ او پینگو پڑہ اسر۔ خنک تہ ہندن ڈک او پر وکواسر کہ خنوکاے ہندا خیال بسکہ کہ او چنکی آن اینو اسکان سیر تق متنے اودا پر وکا خننا دیدہ غاک ہندن صاف اسر کس پانہہ چڑہ پال اٹ سلک تا۔ عابدہ بھاز شوقی و مسٹر کس اس۔ ہندا خاطران اکثر خننے سرمہ کریکہ۔ اودہنوز یبائی سے اٹ شیفک ے کشاک کہ جھیل کسے نا کنارہ غاتے آن مونو رنگ نا قدرتی و خزانہ پیش تمہ۔ باس نا تا ہڈ نیام آن دینخہ چیت او مون آن زر کس اشکن اس۔ کلاک تا پمسی آباشت آن بار اسر۔ جوڑک تا ہروخت رنگ بدلیفیرہ دے کس کبین خیسو سرخی خلک کہ دے کس خیسن دے کس بور او دے کس مونو۔ بالاداٹ نئے بھاز بڑا اس نئے کہ پلک خنگا کہ۔ کچ فقط انڈیا والاتے آن کریکہ۔ چاخوئی او مرغنو کوس ہر افتا ذی آپنکا خوار تے اٹ جتا جتا وڈا زن کشوک اس۔ تنکو نئے آلچو کوشلوار بینا کہ۔ وزن تا اونا عمر نا حساب اٹ چٹ برابر اس اودا وزن اوڑانمہ ہم کریکہ۔ اودے خنکان صاف درست مسکہ کہ اوشوقی و فیشنی و مسٹر کسے۔ دوتے ٹی اولو بنگری خننے ٹی مرغنو کاٹنا بینا کہ۔ اودا کل گڑا تا شوق اودے ڈرامہ غاتے آن اریسس۔ اسے پیسہ ٹی و سردار کسے ناچنکا مسٹر نا حساب اٹ عابدہ ٹی چچو کی کس الو۔

ریحانہ اسہ غریب او اُراسے نا بھلا مسٹر اس۔ ہر اتینا اُرا والا تا اِراٹمیکو لِمہ ہم  
 اس۔ لاغر آ جسم، خشک بارنا خنک، مون انگا جوڑک، بلوچی آپچاک، دا اونا رنگ اودروشم  
 اس۔ بھاز انگا مُت نا بیغنگ او گڑو نا کننگان ریحانہ نابدن ٹی دتر آن زیادہ بے جوڑ  
 مٹس۔ اکثر اودے ہُننگان بلڈ پریشرو دھا کہ۔

دا کل فرق آ تیان بیدس عابدہ ریحانہ ئے بھاز دوست تنخاکہ۔ اوڑکن بے کچ  
 مہر کریکہ۔ اکثر تینا گڑاتے آن اوڑکن تحفہ پیسکہ۔ ہرافتے ریحانہ اونا بھاز انگا اصرار او  
 زاری نا وجہ غان مجبوراً قبول کریکہ۔

عابدہ ہر اتم ریحانہ کُس تے آ بسا کہ تو ریحانہ ئے اونا اُرا نا کاریم تے ٹی کمک  
 ہم تسکہ نہ تو کاریم کننگ نا اودے شوق اس نہ عادت ولے داڑے اودے کروئی تمّا کہ نہ  
 تو کوئی ٹی تنیا تولنگان او نیمسرک مسکہ۔ ہندا خاطران ریحانہ ئے کمک تنگ کن اوفقا  
 بورچی ٹی انا کہ اوڑتون مجلس ہم کریکہ او کاریم ہم۔

عابدہ اخس کہ فیشن آ تیز اس ہموخس خواننگا ہم۔ او اِراٹمیکو جوانی اونا دا اس کہ او  
 زمانہ نا حساب اٹ اِنوکا مسنتے آن اس ہرانا بھلا وجہ ڈرامہ اوٹی وی تاہنگ اس۔ عابدہ  
 ڈرامہ غاتے آن بھاز اگڑاتے ہیل کریس، ہرافتے ٹی اسہ گڑا محبت اس۔ اودے عشق او  
 محبت نا باروٹ بھاز معلومات اس۔

عابدہ او ریحان نا اولیکو جوان انگا ملاقات ہمودے مس کہ ریحانہ عابدہ ئے  
 زورٹ شام نا ارغ کن اڑسا او ارغان گڈ ہر اتم او اُرا کن سرہلک تو ریحانہ تینا بھلا ایلیم  
 ریحان ئے پارے کہ عابدہ ئے اونا اُرا اسکان سرکر۔ ریحان دا کان مست عابدہ ئے تنیا  
 اُرا ٹی بھاز وارخناس او اودے درست ہم کریکہ کہ اوسردار جہانگیر خان ناچنکا مسٹر ئے

ولے ریحان نے دھنومو قع کس نصیب متوسس کہ او عابدہ نے خوتی اٹ ہرے یا اوڑتون گپ کس کے۔

ریحان عابدہ تون او ناسرکننگ کن پیش تمہ تو عابدہ غان منہ گام مونی ارنے۔  
تہاری او خاموشی نا وجہ غان عابدہ ٹی ہر اتم خوف کس تمہ تو ریحان نے آواز ترسا پارے  
”نی کنے سرکیسہ یا جندن نا جاگہ کس کا سہ؟“ ہرانا بتنگ تون ریحان نے مخنگ ہلک او  
سلیس۔ ولد اہڑتو ماک اسہ جاگہ قدم ارفسا سر ہلکر۔

ریحان رنگ اوصورت ٹی ایکان مچے ریحانہ نا وڑ اس فقط او نابدن ٹی بے کم او  
دتر بھاز اس۔ ریحان نا عمر پیست سال مسکہ۔ تنگ اوریش او بروت الاکہ۔ جندا ک تا  
بھلو پینکو اسر۔ ریحان نا چچی او کاٹم ناشیفی آن عابدہ نے سماتما کہ ریحان اوڑن شک  
کنتگہ تو جندتہ اوڑتون ہیئت نا آغازے کرسا پارے ”امرے نما کالج؟“۔

ریحان اسہ وار خوفزدہ مس ولد اہمت کرسا جواب تس ”جوانے“۔

ریحان نادا گوئڈا نگا جواب عابدہ نے وڑتو ہرانا جواب ٹی او ولد اہر لیفے

”امر جوانے؟۔ نی مچہ پاخواننگ امرے؟ ٹیچراک امر و؟“۔

ریحان داوار مچہ بیداری اٹ ورندی تس ”خواننگ جوانے“ ٹیچراک ہم جوانو ولے کالج ٹی  
محنت تینا جندنا مریک اسکول آن باراف۔

ریحان نادا اراٹمیکو جواب عابدہ نے جوان لگا ولے اودے محسوس مس کہ

ریحان دا اسکان اوڑن شک کنتگہ۔ ہرانا وجہ دا اس کہ گپ کنگ نا وختا عابدہ او نا چہرہ نا  
کند اہر اکہ اور ریحان جواب تنگ نا وختا تینانت آمونا۔

عابدہ اودے سئی کنگ خواہسکہ کہ او ہم یک ونیم سال آن گڈ کالج آکانک

ولے ہنداڑتون ریحان ہڈکرے او عابدہ نے پارے ”اُرانما بس“۔

ہراڑان عابدہ ناہیت اونا اُسٹ ٹی سلیس اور یحان ٹے تینکس پارسا اُرانا گیٹ  
 آن پترینگا۔ عابدہ اور یحان کس تا اُرانا نیام ٹی فقط مُسہ چار چکو اُشکنوگی نافرقت اس۔  
 عابدہ نا اُرانی پترینگان گڈ ریحان تین تو سوچ خلساتینا اُران کن سر ہلک۔ او  
 سوچ خلسا اس کہ اوداخہ در شک انت نُسے آن کریک۔ اودیر آن شرمینگا کہ۔ عابدہ ہرانہہ  
 جماعت نامسٹر نُسے او ہموڑان شک کریک۔ تینے آزر کس ترند مننگان گڈ او فیصلہ کرے کہ  
 اینو آن پداوکس آن شک کپرو۔

عابدہ ہرا تم کاٹھے سڑجہ غاتخا تو یکدم اونا خنتے ٹی ریحان نانیم تہارا نگا چہرہ بس ہرا  
 ناجوڑتے آنا زور کو بشندہ کس اس۔ ہرا نا خنتے ٹی حیانادریاک وھنگ اسر۔ عابدہ ریحان نا  
 تصور ٹی تین تو بشندہ کرے او بھاز خوش مس کہ دادور ٹی دنو مار ہم ارے ہرا مسنتے آن شک  
 کیرہ۔ عابدہ نُسے ہم ہموماک بھاز دوست اسر ہرا مسنتے آن شک او شرم کروسر۔

پیشیم تو اسکول آن بننگان پد عابدہ زکس اُرانی آرام کرے ولدا ارا کتاب  
 دوٹی ار فے اولمہ غان اجازت ہلسا ریحانہ ناکنڈا سر ہلک۔ ایہن ہم اوتینا اُرانی بغیر  
 بیزار او بور مننگان پین انت کس کریک۔ باوہ او ایلمک قومی آ مجلس، خلقی آ مسئلہ غاتے ٹی  
 اختہ اسر۔ لمہ او نشارک اُرانا کاریمتے آن فارغ متورہ۔

ریحانہ کس تا اُرانا ننگان گڈ عابدہ اور یحانہ نا مجلس ٹی داسہ ریحان ہم شریک  
 مس۔ اسکول او کالج ناصفت او خرابی، ریاضیات، الجبر نا پربلمک او کمپٹری نا فارمولہ غاتا  
 ذی آ مجلس او بحث مسا کہ۔ داڑن بیدس دنیا ئی آگپاک ہم مسرہ۔

شام نا اذان اسکان عابدہ او فتون ہڈ کریک او ولدا ریحان اودے اُرانا تا سر  
 کریک۔ داہڑ تو ما اُرانا نیام نا سفر ٹی بھازاہیت او گپاک مسرہ۔ دے کس سنجیدہ وگپ

مسکے اودے ئس شغل اوسخرہ ناپیتاک چلین گارہ۔ او ہڑتو ماک تین تو مجلس کرساد ہنو چٹکو  
قدم ارفیرہ کہ دامسہ چارگی ناسفر نیم نیم گھٹھ خلکک۔

اسہ دے گپ گپ ٹی عابدہ ریحان آن ہرنے کہ مارتے ہراوڑ نامسٹر  
دوستے؟۔ ہرانا جواب ٹی ریحان تینا پسندے کل ماتا پسند پارسا جواب تس ”ماتے ہمو  
مسک دوستو ہرانے بھاز شک کیراونے بھاز فری مریر یعنی مچہ کین توررتینے۔ اوایلو ہمو  
مسک ہراخواندہ مریر۔ اگہ بھاز آخا تو کم ئس کم کالج پاس مریر تاکہ دنیا اوزمانہ ماحولے  
سرپند مریر۔ میسج ئس لکھنگ کیر اسپتال ئسے آانگ کیر۔

داکان بیدس ماتے ہمو مسک دوستو ہرا بھاز سینگار کپس، تنک تنک سرخی خلیر،  
پڑہ غاک تایلہ مریر دوتے ٹی تہ ارامسہ بنگڑی کیر کاٹناک ہندو مریر دہنکے ناو (دایستے اونا  
عابدہ ہشندہ ئس کرے) ”چچاک تہ اگہ بلوچی اسر تو صرف خیسن یاگوکی رنگ نامریر نہ تو  
انڈیا والاتے آن مریر۔ گد ئس کاٹم آ کیر او اگہ تینا پاوتو کئے کل آن زیادہ ہمو مسٹر دوست  
بریک ہراسا جک خلاسک۔“

ریحان نادا جواب آن عابدہ بھاز خوش مس، اتنے کہ ہراگڑ اتا ریحان پارے  
اوفتے ٹی زیات گڑاک عابدہ ٹی اسرہ۔ او ولد ریحان ناو دے ناپیتان گڈ عابدہ سا جک  
خلاسنک ہم شروع کرے۔

عابدہ ناسوال آن گڈ ریحان جوانو موقع او وخت ئسے نا تلاش ٹی اس تاکہ او ہم  
سوال ئس کے۔ اسہ دے اونا بخت کاریم کرے کہ او ولد عابدہ ئے سرکنگ کن پیش تما تو  
کسری تینا اُست ناسوالے کرے ”عابدہ! مسنتے ہراوڑ ناما دوستو؟“۔

ہرانا ورنڈی ٹی عابدہ مسنتا پسند ناپیتا تے کرسا جواب تس کہ ”مسنتے ہمو ماک

دوستو ہر اک بھاز شک کیر۔ ہر امستنا عزت او احترامے کیر۔ ہر ا جوانو زیبا و ہیبت کیر او  
خنگان زیادہ سائل کیر بس۔“

اسہ دے ولدا ریحان ہندا سفرنا ثواب اٹ تینا مستنا سوالے زرخس بدل  
کر ساہرنے ”عابدہ! نی تینا پانے ہراوڑنا مار دوستے؟“

عابدہ داسوالے بنگان گڈ زرخس سوچ خلک او ولدا تینا اُست آن جواب ترسا  
پارے ”کنے ہمو مار پسندے ہرا کنے آن مچہ بڑز مرے او کنے آن اسہ ارا سال بھلن  
مرے۔ ہرانا پنگو بھلو پڑہ مریر۔ ہرانا تنکوریش او بروت مریر۔ ہرا زیات مون یا آسمانی  
رنگ ناچ بینے۔ ہرا بیرہ چوٹ نت ٹی کے کنے چپل او بوٹ آن سخت بد بریک۔ ہو اسہ  
پین گڑاس ہرا کنکے بھاز بھاز مہر کے۔“

عابدہ نا ورنندی آن گڈ ریحان نا جوڑک کوش کنگراو آخر ہندا خوشی نا وجہ غان تین  
کن منہ دے ٹی ارا جوڑاچ موعفہ اسہ مونو جوڑکس او اسہ خرنو۔  
منہ دے آن گڈ ہرا تم ریحان ہندا پچا تے تینا لختی کرے او عابدہ نا مونابس تو  
عابدہ بھاز گلان مس اودے ہندن لگا اونا تنق تا شہزادہ رسیفہ۔ اور ریحان ہرا دے عابدہ  
ے ساجک خلا سگا خنوس تو تینا دھڑکن تے وس ٹی کنگ کتو کہ۔

اوقتا ہڑدے نا مجلس کسرنا ہیبت آک اسٹ ایلو کن مہرنا انداز اوقتا سینہ ٹی عشق  
نا خاخرے کن پاٹ تحسا کرے او آخر مسہ تو ہم متوس کہ پاٹ آتا موٹل ختم مس او خاخر  
خیسن خیسن لگا۔

اسہ دے عابدہ ے اُرا غاتا سرکننگ نا وختا ریحان اسہ لفافہ کس عابدہ ے تس تو  
عابدہ تینا مخموراختے اونا ختے ٹی خلسا ہرا تم لفافہ ے ریحان نادو آن ہلک تو ریحان نا سینہ غا  
اونا نظرنا اسہ دہنوا ترکس تخنگا کہ ریحان عاشق آن اونا دیوانہ جوڑمس۔

عابدہ تینا کو ٹی پترینگ توں رُو رُو لائے لگے او اُسٹ نادک دک توں لفافہ  
 ے اشتافی اشتافی ملا ہراٹن گلاب ناخوشبو توں اسہ چکو خط کس پیش تماہراٹی لکھوک اس  
 ”عابدہ! نے سمائے نی کہ کنے آن رخصت کیسہ تو کنے آن اُسٹ‘ تع‘ قرار  
 سکون واکل رخصت کیرہ۔ کنے سماف‘ امرائے‘ ہراوخت کنے نے تو محبت مس ولے اگر  
 نی سوب کس خواہ تو ای نے ہزار وجہ تنگ کیوہ۔ مختصر گپ دادے کنے نے تو محبت مسنے او  
 داسا کنے نا جواب نا انتظارے۔“

ریحان نا خطے خواننگان گڈ عابدہ نارنگ خوشی آن گلاب آن بارمس او اُسٹ نا  
 تہ دھڑکن تے ٹی زلزلہ کس تما۔ عابدہ ے معلوم اس کہ ریحان اوڑ توں محبت کیک ولے او  
 ہندا دے کن انتظاری اس کہ ریحان تینا محبت نا اظہارے کے۔ پھگہ کن اسکول نا چا  
 وخت ٹی عابدہ ہندا سوچ خلسا اس کہ اور ریحان نا خط نا جوابے امرایہ تہ۔

عابدہ ڈرامہ ہر وکامسٹر چالاخ انگامسٹر خوانندہ غا گودی اسہ جواب کسے کن مچا  
 نیم دے کس سوچ خلک۔ آخر دیگر نا وخت مس تو چکو کا غڈ کسے نا کرا آرا لفظ لکھا او کا غڈے  
 کو راقلم نا تہہ ٹی تس اور ریحانہ کس تا ارا کن سرہلک۔

شام نا نماز آن گڈ ہرا تم ریحان مونے شیف جوڑتے آ ایلفی خلسا عابدہ ے  
 سرکننگ کن پیش تما تو مچا کسرٹی نئے ریحان عابدہ توں گپ کس کرے نئے عابدہ اوڑ توں۔  
 ریحان نا اُسٹ لڑا کہ کہ ہراڑے ہرے عابدہ خفا مسنے۔ ای دیکھ تینا اظہار آ اشتافی  
 کریٹ یا اودے کنا د حرکت دوست بتو؟۔ ریحان تین تو تینا سوال آ توں آختہ کس او  
 عابدہ تینا نشہ کی آخن تاکک اٹ اودے ہرا کہ او تین تو اُسٹ ٹی مخا کہ کہ الے مچہ  
 پریشان مرے۔



عابدہ نے سرکننگان گڈ ریحان واپس منگ کس تو عابدہ قلمے اوڑکن مرینے۔  
 ہرانا رننگان ریحان پین پریشان او حیران مس کہ دا قلم انتے؟۔ اودے خط نا جواب  
 درکار اس ولے اودے قلم کس رسیدگا۔ ہرے اسکان ریحان قلم نا فکر ٹی مشغول اس۔ اُرا  
 غاسر منگ تو قلمے خوڑتی اٹ ہر اتو قلم نا تہہ ٹی کاغذ کس تحوک اس۔ قلمے بوز آن ملا سیاہی  
 والا پاپے کشا تو کاغذ ہم پیش تما۔  
 کاغذے ملا تو او ٹی لکھوک اس ”نا عابدہ“۔

ہرانا خواننگان پدر ریحان بچپ خلنگہ شروع کرے۔ کاغذے بک ہلک۔ خوشی  
 آن اُرائی رم کرے او آخر اے اُرے غا عابدہ نا خیالاتے نمب کر ساخاچہ۔  
 ہڑ تو مایمہ غاتا اظہار و اقرار آن گڈ محبت نا خاخرنگ بدلیفسا عشق نا خاخر کس  
 مس۔ ہڑ تو مایمہ اٹ ملاقات آتا سلسلہ شروع مس او ہڑ دے ہڑ دے نا ملنگ او مہر  
 آتیاں خاخر پین زورارنے۔ دے پدے آن اوفتا اُسٹ ایلو کن محبت ودھسا کرے۔  
 بیقراری او انتظار یک شروع مس۔

ارامسہ ٹوٹی عابدہ او ریحان نا عشق اسہ دہنو سنجیدہ و مقام کسے آسر مس کہ او  
 اُسٹ ایلو کن جان تنگ نا دعویٰ تے ہم کریرہ۔ اوفتے خننگان ہندن لگا کہ کہ او تین تو  
 اسہ زمانہ سے آن محبت ٹی گرفتار و۔

ہڑ تو مایمہ اٹ دا فیصلہ نا کنگ بھاز زور مس کہ دے دیر کن بھاز مہر کیک دے  
 دیر توں بھاز محبت کیک۔ اوفتا مجلس یاد زہیر مہر نا مقام آن پیش تمسایتینا مستقبل نا گپا تے  
 آسر مس۔

اودا ساتین تو تینا سا نگ برام او بروکا زندنا پیتا تے کریرہ۔ ہرائی عابدہ مسخرہ  
 کر سا پاریکہ ”کنے نے تفسہ“ نی کنے آن مہ سال بھلن اُس۔

او عابدہ ناجواب ٹی ریحان ہم مسخرہ کر سا پاریکہ ”کنے ہم جوان لکسا اف تینے  
آن چنکو سے تون بران کنگ۔ ای تین کن پین کس ہر یوہ۔“

ولدا ونا دا گپان عابدہ غصہ کر یکہ اور ریحان او دے نواری فیکہ ہرا اسہ مخلصو محبت  
نسے نامنظر جوڑ مسکہ۔ دے کس تینا مستقبل نا چناتا ذی آجنگ لگا رہ۔ عابدہ پاریکہ او برام  
آن پد مار کس خوانک ہرانا پنے او ”فواد خان“ تحک و لے اونا گپان ریحان اعتراض  
کر یکہ کہ نہ او مسٹر کس خوانک ہرانا پین ”میسہ“ تحک او دے دا پین بھاز دوستے۔

وار کس او تین تو زندگی نا خوبصورتی نا پچاتے کریرہ کہ او برام آن پد کہنگ  
اسکان تینا محبت ٹی کمی ہتہرور۔ یخاتے ٹی او ار چکر کن انور۔ ہندن فیوچر نا گپاتے  
کر سا کر سا اسٹ ایلوئے خنب کریرہ او محبت نا ثبوتے تترہ۔ اکثر محبت نا دو آن مجبور مر سا  
ریحان اونا پیشانی آن بک کس ہلکمہ۔ عابدہ شرمیگسا خنتے تینا تر کر یکہ ولدا مذاق  
کر سا او دے چیڑ فیکہ کہ نا بک ہم دروت آن بار محسوس مر یک، پچ رو مینس تپسہ۔

عشق ہم عجبو گڑا سے اخرہ مُردیک انسانے حقیقت آن۔ محبت کر فک، خاخرے  
لگفک، اُستاتے اُسٹ کیک، مہرے ودھفک، بیقراری تے بھاز کیک، اراجا نے اسہ روح  
نا غلام کیک، مستقبل نا روشنوتق نشان ایٹک، خوشحالو زند کسے نا تصور اتے ذہن ٹی ودی  
کیک او ہر اتم انسان دا گڑا تے مکمل قبول کیک تو داسا حقیقت نا تصویر کس اونا خنتا مونا  
تحک اوکل ارامانتے آمش شاغک۔

اوچٹ ہندا وڑا سہ دے ریحان نامونا جنسا کس بس کہ فی ہرا وعدہ غاتے کنگ  
اُس، ہر اتق تے خنگ اُس، ہر امنزلا تے خن ٹی تنخانس او نا سفر آ وخت کس نظر شاغانس یا  
نہ؟۔ نے معلوم اف نے عابدہ تون زندگد ریفنگ کن او نا باوہ غان او نا ارا والا تے آن  
اجازت الوئی تمک او اجازت ہلنگ کن نے نا تینا باوہ او ارا والا تے راہی کروئی تمک۔

نانت خیالے ناباوه دا گڑاغان راضی مریک کہ او اسہ دکاندار نُسے نامارکن  
سردارنا مسٹرنا خوانگ کن کا نہہ؟۔ نی وختس او فتا اُراتا ماس آن گدرینگ تونے نظر برو  
کہ او فتا ویلی تے ٹی گاڑی تے جاگہ اف اونے اسہ موٹر سائیکل اس ہم اف۔

وخت نُس عابدہ نازی آنظر شا اونا چچا تے ہر اونا کانٹے ہر اونا بنگڑی تے ہر  
اونا سینڈلاتے ہر ولدایتیے آن سوال کر کہ نی دا گڑا تے اودے تنگ کروس؟۔

او فتا اُراغا نظر شا او فتا بھلا اُراے ہر۔ اُراتے ٹی تخو کا سامان تے ہر اگہ او فتنے  
ہر پیسہ یا ہنگ کپسہ تو بیرہ عابدہ ناکمرہ ے ہر۔ اُرا ٹی اونا جتا وٹی وی نُسے۔ اونا چچا تے  
آن پُراسہ الماری نُسے۔ اونا خوبصورت انگ پلنگ اونا میز اونا ایلوسا مانک نی دا کلے اُرکن  
ہنگ کروس؟۔ خیر، ناہیت تُو پدنا سے نی دا سوچے غل سردار تینا مسٹرے نے ایتوے؟۔

ریحان ہر اتم داہیتا تے تین تو کرے تو اونا خنک خٹوینکان پُرمُسر۔ حقیقت اٹھ  
حقیقت مرے ولے اُسٹ تو مچک او پین کسر نشان ایتک۔ او واقعی اُسٹ اودے دلا سے  
ترسا پُہہ کرے کہ ”ای منیوہ ہرا گڑاک عابدہ تون اریرنی او فتنے تنگ کپسہ ولے ہرا  
گڑا نا عابدہ ے ضرورتے۔ او گڑاے دنیا نا اسہ بند غ نُس ہم اودے تنگ کپک بیدس  
نے آن ہرانا پنپے ”خوشی“۔

اُسٹ نا پُہہ کننگان گڈ ریحان گڈ ز رُس آرام بس تو او تین تو سوچ خلک کہ دا  
گڑا نا ذکرے عابدہ تون ضرور کروئی ے۔

ارادے آن گڈ ریحان او عابدہ ناملاقات مس تو ریحان نا چہرہ ڈڑوک اس۔  
سوب نا ورنڈی ٹی ریحان عابدہ ے تینا نیز ورا نگا تو اراٹ پارے ”عابدہ! دامسہ دے نا  
ے ای سخت پریشان اٹ۔ کنا کا ٹمپک کہ دا سوالاک مالوانٹے کنا ذہن ٹی بتور“۔

عابدہ اونا پیتے کاٹ کر ساہری لے ”اُراسوالاک؟“۔

ریحان تینا مستقبل نا کے اونا موننا تھسہ پارے ”نن دا غریباک فی سردار نئے

نامسٹر۔ نارشتہ امر مروے؟“۔

ہرانا جواب ٹی عابدہ بشندہ کرے او تینا کاٹے اونا کو پے غا تھسا اودے پارے  
 ”دا گڑا تے کن ہچ تینے پریشان کپے۔ ای او نی اُسٹ اُن ننا اُسٹاک اسٹوننا روح اسٹے  
 نئے کس جتا کنگ کپک۔ ایہن ہم کنے فی درکار اُس نامجت درکارے پین گڑا نا کنے  
 ضرورت ہم اف“۔

عابدہ نادا پیتا تے بنگ آن گڈ ریحان بھاز خوش مس کہ دا تو ہمو پیتا کو ہراتے کنا  
 اُسٹ مالو کنے پارے۔

”گڑا نا اوارا امر مروے؟“ ریحان ہری لے۔

”اوارا“ اوارا نا انت نئے۔ فی تینا باوہ نئے کنا باوہ غا راہی کر او برے کنکے  
 رسال ہتہ“ عابدہ جواب تس۔

ریحان زرکس سوچ خلک ولدا پارے ”دہن مف نا باوہ کنا باوہ نئے بے عزت  
 کرو حیثیت ناشغان ایتو“۔

”خدا کپ جان! کنے معلومے کنا باوہ دہنو بند غ کس اف“۔ عابدہ اونا کو پے غا  
 بوزے تھسا پارے۔

”کنے سمائے ولے دیچہ انتے کنے دا طریقہ جوان لکپک۔ ای دہن کیوہ تینا ماما  
 تون ہیٹ کیوہ اودے پاوہ نا ایلیم تون اسہ وار ہیٹ کے ہرن اوانت پارہ۔ ولدا پیتے نا با  
 اسکان سرکینہ“ ریحان عابدہ نا پڑہ غاتے ٹی اور تے اڑسا پارے۔

عابدہ نئے ریحان نادا مشورہ بھاز وڑھا او سوچ کر سا جواب تس ”فی دہن کر تینا

مامائے کنائلم آ خاننا بھلا سالم آ راہی کر۔ باوہ اونا بھاز عزتے کیک اونا ہر پیتے ارقک۔  
 مسہ دے آن گڈ ننا بیٹھک ٹی اسہ قومی و مسئلہ سے نا فیصلہ مر یک او ٹی ننا بھلا سالم ہم  
 بر یک۔ فی تینا مامائے وڑ کسے اٹ رازی کر او برے او ہموڑے اسہ وار ننا سالم تون گپ  
 کے اوکان پدای ہم اودے پاوہ۔ اونن ضرور او ارمرون۔‘

عابدہ نادا گپ سفر ننا بھلو مشکل کس آسان کرے۔ ریحان نے اونا منزل نظر بنگ  
 اس۔‘ مرے ای ضرور مامائے راہی کیوہ‘ عابدہ نا پڑہ غاتے آن بک کس ہلسا پارے۔

ریحان ارادے اسکان تینا مامائے منت اوزاری کرے۔ آخر کامیاب مس تو  
 مامائے تینا تیار کرے کہ او پچھک سردار ننا بیٹھک آ کا نہہ او سردار ننا بھلا سالم صلاح الدین  
 تون اونا رشتہ ناباروٹ ہیت کے۔

صُحْب نا نہہ بچہ نا وخت اس کہ سردار جہانگیر خان نا بیٹھک نا حویلی نا مونا دہ  
 دوا نزدہ گاڑی بسر او بیٹھک بند غاتے آن پر مس۔ ریحان مچی ٹی صلاح الدین نے خنا تو  
 رم کر سا مامائے تینا سئی کرے کہ صلاح الدین بسنے‘ کان۔

ماماتہ اودے تسلی تہ کہ مچہ حوصلہ کر۔ اسہ وار صلاح الدین اوکان فارغ مرے  
 مہمانک بش مریر تو ہمو وختا اوڑ تون گپ کیوہ۔

سردار صاحب نا مہمانک نیمروچ اسکان ہموڑے اُسر۔ ہموڑے ارغ کنگراو  
 ارغ آن گڈ ولدا مجلس چکا او آخر بیگہ غان دتخس مست مہمانک بیٹھک آن پیشینار۔ اوفقا  
 بٹمنگ تون ریحان ولدا رم کرے او مامائے تین تون او اریس۔

ہڑتو ماک داڑے بسر تو ریحان تینے زکس پدی کشا او مر آ سلپس۔

ماماتہ سردار ننا سالم صلاح الدین نے توار کرے اودے خوش آمد کرے ولدا تینا  
 گپا تے کنگ آن مست اسہ وار مہمان تاہر لپے۔ ہرانا جواب ٹی صلاح الدین پارے

”دابرقات اولبیدی ناسردار آک اسر ہرانا او پر دل قوم نابدی داری نافصلہ  
ئے کنگ کن بسوسر“۔

ماما فیصلہ نا ہریفے تو سردار نا سالم مونجا مرسا پارے ”الحمد للہ فیصلہ مس“  
سردار اک پاریر کہ اونا مارنا کہسفوک سردار جہانگیر خان نا بھلامار امان اللہ مسنے۔ ہرانا  
خون نابدلہ ٹی بندغ نس خوارہ۔ آخر ہندا فیصلہ مس کہ سردار نا چنکا مسٹر عابدہ خون ٹی  
تننگا۔ ہرا دے مارنا باوہ برام کرو“۔

صلاح الدین نا پتاتے بننگان گڈ ریجان نامانا ہوش پرینگا۔ دتر تہہ ٹی  
برف مس او چپ چپ بغیر ہیت نئے آن اراکن سرہلک۔

شروع ٹی ریجان نا بھاز ہر فنگان باوجود ہم او ہیت نس کتو ولداریجان بھاز  
ضد کرے تو ماما تا مجبور مرسا او دے سئی کرے کہ عابدہ خون ٹی تننگا نے۔ ماما نا دا پیتے  
بننگان گڈ ریجان گنو کا تے آن بار اراغان پیشتمنا اومون نا پٹ کن مون کرے۔

ہفتہ سے آن گڈ بندغا ک بسر او عابدہ ئے دریر۔ مارنا باوہ تون نکاح تہ مس۔  
نکاح نا وختا عابدہ نا خنتے آن اسہ خویک نس ہم تمنو او ہندن نس کہ اسہ لاش نئے بس۔

شام تو قلعہ ٹی عابدہ نا نظر ہر اتم اونا ارغ آتما تو اونا خن ٹی اونا باوہ نا صورت  
بس۔ اونا ارغ نا عمر پنچہ پانچ و شش سال نا نیام ٹی اس ہرا بھلو خیسو ریش نس الاس۔

عابدہ داسکان ابکہ نس کہ ہنداڑ تون مڑدک او دے بڑا کرے او تینا زان آ  
تولفے۔ عابدہ ئے لگا کہ او او دے دروت نس ہلیک دلا سہ ایتک او مسٹر پارسا الک تہ ولے  
امبل اونا کاٹم نا جاگہ غا اونا نازور کا لھے تینا ناسی آ بوزے تنخا او دروت نا جاگہ غابگ نس  
ہلک تا ہراڑن عابدہ نایا دافورا ریجان نا سہ بک بس او ہنداڑ تون او نا خنتا برف دیر مس او  
خوینکا ک تا چشمہ غان باریلہ مسر۔

## اُسٹ مفک

”حاجی صاحب! ای تینا زانیفہ ناکل گندھی تے آن واقف اُٹ۔ کئے تینا بے وقوفی نا احساس ہم ارے کہ ای ہرا وڑٹ دا اُرا ٹی تماشہ کریٹ، جنگ لگاٹ، اُرا والاتے آن غصہ مٹھ ضد کریٹ او آخر لمہ نس تے مجبور کریٹ کہ اوکنکہ زینت آ رسال دریر۔ زینت نابنگ آن گڈ کن تو او ار مچا اُرا خوش اس۔ ہر اُسٹ صفت کریکہ تا۔ کل خوش او گلو و بال اسر۔ زینت اُرا والاتے کن مہر کریکہ او اُرا والا ک اوڑ کن مہر کریہ۔ دے اونن مخنگ، شغل او مسخرہ اس۔ ایڑک او نا ہندا خیا لے کریہ کہ اِرا تو اسکان او دے اسہ گلاس نسے نار فنگ کن ہم التور۔ حالانکہ لمہ وخت وخت اشارہ ٹی پاریکہ ”داخہ محبت جوان اف“ ولے نننے انت سما اس۔ کنا جند تو دا گڑا غا پچ یقین کتوٹ کہ انسانے بھاز انگا مہراو محبت خراب کیک او تو کنا خنک ہمو وختا ملنگار ہرا تم زینت نارنگ بدلیزنگ اولمہ ناہیت راست مس۔ کنا یاد آشیک سپر ناہمو قول بس کہ ”بھاز پڑی سنگ مرمرے ہم کڑک کیک“۔ برام آن چارٹو گدریتکو کہ گودیے اچانک چناک ہلکر۔ مون پر فنگ او اُرا والاتے آن گلہ شروع مس۔ اسہ دے لمہ غان گلہ کریکہ تو اسہ دے پاریکہ نا بھلا ایڑ کن تو ٹھپک۔ اسہ

دے ہو غوکا کہنا اُرا والا کُن تو بیگانہ غاتے آن بارسلوک کیرہ۔ لمہ غان ہریفیٹ تو او  
 زینتے قصور وار پارے۔ ایڑتے آن ہریفیٹ تو او قسم کنگرہ کہ نن چڑا پاتن۔ بس  
 حاجی صاحب ہمودے کس کہ اونا دا اُرا والا تون دشمنی شروع مس اے اینو اسکان۔ دا  
 نفرتے ختم کنگ کُن ولدا ای اودے اونا لمہ نا اُرا غا راہی کریٹ کہ منہ دے کاہہ ہمینگ  
 جل مرے ہوش تا چپ مرے طب تا بدل مرے او اُرا والا ک ہم منہ دے کُن سکون اٹ  
 تمرولے سکون کس نا نصیب ٹی الو۔ اُرا غا بنگ تون ولدا ہمے خاخرے لگے۔ کلے تینے  
 آن غصہ کرفے۔ دا خیر نا خیراتی آہمسایہ تون سنگت مس۔ داکم نسل نا زینہ غاتے کس  
 خوش آمد کپک اوہمو فتا ذالبول آتو ن سیالی کس شروع کرے۔ کنا باز ارا نا انگان کنا بنگ  
 اسکان اوہندا مئے تا اُرا ٹی تو لوک چلم کشاکہ۔ واہم ای اودے پا تو ٹ کہ بلکہ چندے تہ  
 احساس مرے۔ ننا اولیکو چنا نا وختا کُن تو جنگ لگا، تینے حیرتی کرے ولدا دپچہ انت وٹس  
 کرے امر وگولی کنگ امر و دوائی ہلک کہ چنا دنیا ٹی بنگان مست کہسک۔ ای برداشت  
 کریٹ اسہ ہیبت کس کتوٹ او کُن تو پختہ و ثبوت ہم الو۔

حاجی صاحب نایا دا ننا برام تو برو اینوش سال مرک ننا برام ے۔ نی یقین  
 کیس او اسہ وار ہم تینا دوتے اٹ کنگہ گڑ وٹس کتو۔ کنا کنگ بینگ پچا تا سلنگ استری  
 کنگ کل ایڑتے آئی ے۔ جندہ تینا اُرا ٹی تینا تینکے میگی بسک، ما کرونی کیک کنیک اودا  
 چناتے ہم داسہ ہندا گڑا تے ہیل تھنے۔ اے موٹو تا معدہ غاک باریسرولے حرام مرے  
 جندہ سبزی کس کے اوفتے کہ یاسو کس بے۔ داڑے لمہ کس تا گڑ و آن ہم باخو کس کنگ  
 کین الپک تا۔ کنے تین تو اُرا غ تفک چناتے داڑے الپک عجوبہ و عجیبو سوچ کسے تہ۔ دا  
 اُراک کنا برام آن مست تیار اسرولے رنگ اکن کُن تو پیسہ الو۔ ای ہم اشتافی الوٹ کہ ننا



حویلی اسٹے۔ داباوہ نا اُراک دامون پہ مون کنانت فرق نس کیک۔ ہر اتم خدا تس جوڑ  
کیوہ تاو لے گودی ے باوہ نا کوئی تے ٹی سال نس متو کہ شاغہ العله نس زو کر اراتے رنگ  
کرف، زو کر سامان ہل تیار کرتا۔ ای دے مچ داڑے نال مہ تو اڈ کنگ کپرہ۔ بس ماما مجبور  
مٹ داکان ایکان پیسہ وام کریٹ اراتے رنگ کرفیٹ اونا پسند نا الماری ہلکٹ  
خلفیٹ۔ میز تیار کرفیٹ۔ پلنگ نس کراچی آن اسپیشل بنگفیٹ۔ کیچن کن تا دراز جوڑ  
کرفیٹ۔ ڈبل ڈور فرج، مائیکرو ویو، سموسہ والا مشین، دیرنخ کرو کو کولر نس، دیر باسفو کو  
چادان نس دافے آن بیدس پین صد آ گڑا تے ہلکٹ ہیٹ کہ برے تو لے اُرا ٹی تینا  
خوش مرے۔ جنگ او جھگڑا تے بس کے۔ ولے ہراڑے حاجی صاحب ذالبول نا  
ضرورت او فرمائشاک دہن زو پورا مریرہ۔ اُراتا جتا کننگان باوجود او دے جتاک التور۔  
ہمو اونا جنگاک شروع مسر دے نس پیسہ نازی آ، دے نس چناتا ذی آ۔ اسہ دے اچانک  
ضد ٹی تس کہ کنا چناتے گورنمنٹ اسکول آن کش پرائیویٹ اسکول نسے ٹی داخل کرف۔

سال نا نیام آ چناتے کشاٹ اناٹ پرائیویٹ اسکول نا پرنسپل ے منت او  
زاری کریٹ ہمودے داخل کرفیٹ تا۔ ولدا اسکول کن یونیفورم، کتاباک، بوٹاک، انگ  
بتگ کن منی نس، داکل پیسہ افس انت و؟۔ دافے اسہ جوانو مقصد نسے کن کرفوس تو ای  
پاریٹہ خیر نسے جوانو گڑا اسے ولے اوداکل گڑا تے بیرہ مخلوق نا نشان تنگ کن کریکہ کہ کنا  
چناک پیسہ نی و اسکول نسے آکارا۔ کنا چناک پینٹ شرٹ کیرہ۔ ای غریب انگا بندغ  
داندہ فضولی خرچی اراکان کنگ کریٹہ ولے اونا خاطر آن اونا خنتے کن کریٹ۔ دافے آن  
گڈ اونا داحکم ے مناٹ او چناتے کن کمپیوٹر نس، ہم ہلکٹ کہ مرے کمپیوٹر نا دورے کار  
گڑا اس ہیل کیر ولے ارادے۔ صُحب شام لمہ او چناک کمپیوٹر نا مونا تو لوک حسین اسیر نا

شیر تے ہفتو ریرہ یا شغولی و وڈیوکلپ سیل کیرہ۔ داکل گڑا تے کنگ آن علاوہ ہم ای ناشادافٹ۔ بس وار وار اُست کنا خراب مریک کہ اواسہ وار سوچ خلوس کہ داسی ہزار تنخواہ بلو کا کنا ارغ دا گڑا تے امر ہیک اراکان ہیک؟۔ سیال کس اراغا برے تو خوش آمد کپک تا۔ اونا دو آن نن شرمندہ و درغ بر مرینہ کہ گودی ے اٹل کرینے یا بھازانگا کاریمتے آن دمدرینے خاچو کے۔

اسہ حویلی ٹی چار سال آن بھاز مریک کہ اولمہ ناما سا اسہ منٹ کن ہم تولتے۔ لمہ مجبوری آن وخت وخت تینا نو اسہ غاتا خاطر ان بریک تولوک ولے داخر ماہٹنگے ہیئت کس کہ اوڑتون۔ لمہ ہر وخت پانک کہ لمہ ے تے سئی کرو لے کئے دا گڑا وڑپک۔ خدونا ہیئت کسے چنکا ایڑنا سا نگ مس۔ اے اُراتے ٹی جاگہ الوتو ای زینت ے زاری کریٹ کہ زینہ غاتے داڑے تینا اُرائی تولفن ایڑے جاگہ کئے۔ اسٹ آتس کہ اگہ اسہ زینہ کس کنا اُرائی تینا خازگی آن تے تنخا تو مچا اُرائے خاخر ایٹوہ۔ خدا خلوک کیک ہم ہندا وڑ۔ آلہ مستر خدو کن تو جنگ لکنگ آن پدو ناتینا رغ تے تڑے۔ خیرات خدا کن بچا۔

حاجی صاحب شش سال ہم تو اسہ عمر کسے۔ فی باور کرای داسا لاتے ٹی اسہ وار اونا دوئی آن جوانو ہنیو ہیئت کس ہٹوٹ۔ بس ہمو اونا رٹنگاک ہمو اونا زینہ ٹی آ کیمرنگاک۔ داکل ہیتا تے اسہ کنڈا کر۔ ایڑ زینب نامرک نا وخت اس کل سیال او ہمسایہ غاک اونا لاش ناما سا سلوک ارمان آن خویک شولارہ۔ ہر انسان پریشان اس۔ مچا اُرا غمگین اس ولے او تینا کوئی بند بے غم او بے حیاتا وڈل تمباخ پالینیکہ چلم کشاک۔ بچ اسہ گڑانا پرواہ الوتہ۔ ہر اتم چندنا تے لمہ فاتحہ غابس تو داسا شرمندی آن یا خلیس آن بس ذالو لاتون ارمان کن تو س۔ منہ تُو مست ناگپ کسے سنگت کسے آن گاڑی کس قسطاٹ

ہلکٹ کہ سواری کس مرے جوانے۔ نی یقین کیس گاڑی ناخنک تون گودی ے اونا  
سیالاک یاد ابسر۔ اوہم تنیا مرنا سیالاک۔ ناگمان ناز ہیری کس بش مس سیالاتے کن۔  
اچانک اُسٹ ٹی مہرودھا۔ ولدا ای ڈرائیور اوشیجہ۔ دے کس احمد وال دے کس خاران  
دے کس گرگینہ دے کس مستونگ۔ سیالاک کٹارہ تو بیمار یک رسفیرہ۔ اوہم اندنو بیماری  
اسرہ ہر افتا علاج بغیر کوٹہ غان متوکہ۔ اسہ دے پیشیم تون لمہ بس کہ کنے ایڑ آ کنادر  
بنگٹ طبعیت تہ خراب مسنے۔ ای لمہ ناسر کننگان گڈ ارا غابٹ تون ظالم ناخنک خیسن  
خیسن دتر تقیر۔ ہمہ الو کہ کنے گٹو کہ۔ زور پہ زور تماشا کس شروع کرے نی اننتہ تینا لمہ  
ے گاڑی ٹی دریس۔ ای دا اسکان ہیت کس کن گیگ کریٹ ہندا ٹی ارے ڈکی ے او  
گاڑی ناہر چار انا گٹا آتے پنچر کرے۔ بس ہمودے کس کہ سنگت آن معافی خواہٹ او  
گاڑی ے واپس کریٹ۔ دا گڑا تے آن بیدس برامتے آ انگ نادہنو اُسٹ کس ارے تا  
کہ انت پاوے۔ سیال کسے نابرام مرے یا ہمسایہ کسے نا او تینے ہر حال ٹی سرکیک۔ او تینا  
پن نا خاطر ان تینے اہمیت تر فنگ نا خاطر ان تینا عزتے بڑ کننگ نا خاطر ان چڑا کینو کینو  
تحفہ ہلیک دیک۔ او ہر اُسٹ نابرامے تین کن لازم اسہ پوسکنو جوڑ کس چچ نامو غفک۔ کس  
پانہہ اونا برامے یا کل دنیا بیرہ اونا سیل کن بریک۔ ولدا جن اتون اونا انگ تو چٹ  
اجباری ے۔ جن ہچ جن کس حساب مفک ہرا ٹی زہنت جان اوار مف۔ ولدا تعجب نا گڑا  
دادے کہ زکس ہم خیال بفک تا ای داوڑ جن تون کاوہ تو کنا ارا کنا چناک کنا ارغ دافٹے  
معلوم ارے یا نہ۔ بس چنا آن بار ہر انگ سر ہلک کانک۔ ایکہ ہوشیار ے ہم چانک کنا  
غیر موجودگی ٹی تا تہ او مسک تا کنا چنا تا خیا لے تخرہ۔ دا تو چنا تا بخت کس کہ اوقفا وختا چناک  
الار تہ نہ تو او فٹے ہم تینا پھڈ ٹی کہ سفیکہ۔ اگہ ای وخت کس چنا تے آ زکس تر ندر یو تو

کنے آ بھلو غریس ملک کہ نے تینا چناتے آن بد بریک۔ نے ناچنک دوست افس۔ او جندتا اکثر تینا غصہ پھدین کنگ کن ناحق اونا ہیئت چناتے بیش آن بارٹک۔

حاجی صاحب پیرانگاک برامتے آن پدورنا جوڑ مریرہ ای تینا ورنائی ٹی پیر مسٹ۔ خاص ہندانا دو آن۔ کاٹم نا پڑہ غاک ہندن تمنگو دھنک پاکستان ناپیہ۔ نہ دے نا آرام ارے نئے نن ناسکون۔ اُسٹ تہہ ٹی پوچکو آن بارمٹے۔ بس خیرات ہندا دوئی کن کے داخہ غمتے آن باوجود چوٹ متو۔ پیرا ہندانا ثواب اٹ زندہ تورینن تینے نہ دا تو جہان نئے مخنگ اٹ ارفیکہ۔ الہم، حاجی جان گپ دادے کہ داکل بیتا تاکنگ نامقصد دالوکہ فی زینت ناستم یا کننا بیوسی آن واقف مر۔ ہیئت نامقصد دادے کہ ای داشش سال ٹی شش ہزار قسم ناغم خنٹا اوسہاٹ ولے زینت اے شامات کس تینا جاگہ غاسہ واراوڑا خنتے ہم کشتوٹ۔ اسہ واراوڑتون ترندی اٹ ہیئت ہم کٹوٹ۔ نئے اونا جندآن گلہ کریٹ نئے اونا اراوالا تون اونا شکایت کس کریٹ۔ داسانی بسٹس کنے آ کہ اودے طلاق ایت۔ انتے کہ اوچارٹو ناے غصہ کرینے انا نے تینا لمہ نا اراغا۔ دہن بچ منگ کپک حاجی صاحب، ظاہر داپیتاے حاجی صاحبے پارے اودیرتا گلا سے ارنے بوز آتھا۔

”خوار زادہ! ناپیتاے بنگان گڈ داصاف معلوم مریک کہ اونا عادتاتے خراب کروکانی اُس۔ داخہ ڈیل دے ذالبولے تْسے۔ دادے بایدے فی چار سال مست طلاق ایتوس ولے خیر داسا ہم ہرے متے۔ دادے طلاق ایت چناتے تینا اڑس ولد ادا کنا وعدہ نئے کہ نے ای منہ توٹی برام کس ایتوہ“ حاجی صاحب سوختہ مرسا ظاہرے پارے۔

حاجی ناپیتاے آ ظاہر بشخدہ کرسا جواب تس ”حاجی جان! کنے آن داگڑا مفک۔ ای اودے طلاق تنگ کپرہ“۔

حاجی حیرانی اٹ ظاہر آہننگان گد ”کنا کاٹم تو نے آتمپک۔ اونا ہر گندہ ٹی اونا ہر  
مکاری اونا ہر زور کی آن نی واقف اُس گڑا انتے اودے طلاق تقیسہ۔ آخر وجہ انتے؟“۔

”حاجی جان گپ صاف انگا دادے کہ داشوم کنے بچ اُسٹ مفک۔ ای برام  
آن مست دادے اخہ دوست تحاطہ کنے دا اسکان ہموخس دوستے۔ واکل ظلم، ستم، جنگ او  
بے رخی تے آن بیدس کنا اُسٹ بچ منپک کہ ای اودے گڑاس پادیا اوڑا ترند مریو“  
ظاہر سنجیدہ مرسا حاجی صاحب ناخنتے ٹی ہر ساورندی تس۔

اوناد اہیت تون حاجی صاحب غصہ ٹی بش مس او ظاہر نا کنڈا خاراٹ اشارہ  
کر سا پارے ”جادو کرینے نے۔ تاویت کر فینے نے۔ عمر بچ ہندن خوار مروس۔ خیرای نا  
لمہ نا پانگا بٹسٹ نے سمجھا بیٹ و لے نے نابربادی دوستے تو نے بربادی مبارک“ حاجی  
دایتے کر سا سر ہلک۔ ہنداڑ تون ظاہر ہم بش مس۔ خنتے ٹی بیوسی ہتسا پارے

”پین ذالبول کسے تون زندگدریفنگ آن کنے ہنداڑ تو برباد متنگ قبولے۔  
ہیت صافے ای کمزور و زینہ کسے اٹ ای اودے انگ کپرہ۔ اخہ بد اخلاق او بد مزاج  
مرے آخر کنا محبت کنا پسندے“۔

ظاہر ناورندی ناہنگ تو حاجی صاحب بوٹاتے نت ٹی کرے او بغیر خدا حافظ  
پار سا غصہ ٹی پیش تما۔

## مشاعرہ

شع ادبی کاروان نا پوسکنا کا بینہ ئے مُسہ تُو متنگ ٹی اس ولے چیرِ مین فدا  
 خاموش ئے چیرِ مین متنگ نا خوشیک دا اسکان نصیب متوسر۔ اودے اون ہندا فکر ٹی اس  
 کہ دهنانت گام کس ارفیو کہ ننا تنظیم ایلو ادبی تنظیم تے آن مونی مرے۔ مشاعرہ تو کل  
 تنظیمک اڈتنگ و۔ کتاب ہم کل تنظیمک چھاپ کنگ و۔ سوشل میڈیا ٹی ہم کل تنظیمک  
 تینا پنے بھلن کنگ نا کوشش ٹی اختہ و۔ سوال دادے کہ ای دهنانت گڑ اس کیو کہ کل تنظیم  
 تا ہوش ننا تنظیم نا کنڈ امرے۔ ہر مجلس او مشاعرہ غاتے ٹی شع ادبی کاروان نا ذکر مرے۔  
 ہر بندغ کنا چیرِ مینی او کنا سوچ نا دادلیتہ۔

فدا خاموش ئے دا خیال دم کسے کن تینا التیو کہ۔ او ہر وخت تنظیم نا سوچ او فکر ٹی  
 مین اس۔ او تینا دا تنظیم کن اسہ جتا و گڑ اس کنگ خواہسکہ۔

اسہ دے شام تو سرجہ غا کاٹے تچا تو ولدا ہندا فکر ٹی ڈب ہلک او آخرن نا نیمہ غا  
 تینا مقصد آسر سہب مس۔ ختے ملا بشندہ کرے اودا مُسہ تو آن گڈ اولیکو وار اس کہ فدا  
 خاموش خاچنگ نا نیت اٹ ولدا خاچا۔ اودے ہمو گڑ املا ہرا اونا تنظیمے ایلو تنظیم تے آن جتا

کر یکہ۔ ہر اسوشل میڈیا ٹی او نا تنظیم نا پنا خاخرئس بش کر یکہ۔ ہر ا تنظیم آتے مجبور کر یکہ کہ او نا تنظیم نا ذکرے کیر او اودے شاباشی ایتر۔

صاف نا بش منگ تون او ارفدا خاموش تینا تنظیم نا کل باسکا تے میسج ئس کرے ”السلام علیکم! شمع ادبی کاروان بروکا یک شمعے نادے آصُحْب نادہ بجہ غاتینا علمی آ بندر آ چنکو پروگرام ئس اڈ تئسنے۔ ہرائی اسہ خاصو سر حال ئسے آ گپ مرو او مشاعرہ ہم مرو۔ نئے آن خواستے شیخ بلیرے۔ منتوار۔ منجانب شمع ادبی کاروان“۔

دامیسج نار اہی کنزگان گڈ فدا خاموش کابینہ نا عہدہ دار آتے بقاعدہ اُسٹ اُسٹ آفون کرے او کلے پُہہ کرے کہ ”بروکا یک شمعے آ کابینہ نا کل عہدہ دار آتے ”مسن تا ادب نا ذی آ گپ کروئی ئے“۔ ہرائی دا پاروئی کہ ”براہوئی ادب ٹی ذالبولاتا کمی نا سوب انئے“ او دا نا حل کن نئے انت کروئی ئے؟“۔

چیسر مین صاحب نادا کال آن گڈ کابینہ نا عہدہ دار آک تینا تیاری تون اختہ مسر۔ اُسٹ ئس تینے آن سینئر وشاعر ئسے کن رم کرے کہ گڑ اس اوڑان ہر یفو۔ اُسٹ ئس کتاب خوانگا مجبور مس کہ گڑ اس گپ ہندا کان چمولی کیو۔ اُسٹ ئس گوگل نا مدد تے ہلسا تینا تقریر نا بنائے کرے۔

ہرا خواجہ غاک کہ مشاعرہ والا ک اسر او تینا غزل او نظم آتوں اختہ مسر۔ اُسٹ خیال ئسے ٹی پاسینگا۔ اُسٹ نا قافیہ غاک کٹارو لے غزل نیمہ سلوک اس۔ اُسٹ نا غزل نا راوانی برابر متوکہ۔ اُسٹ سوچ خلصا ئس کہ او ہرا بحر ئے ہراڑے کس کاریم کتئے تاکہ ای ہموڑا لکھو۔

چیسر مین صاحب تینا میسج ٹی کلے اختہ تو کریس ولے او نا چند ہم سخت پریشان اس

کہ ای انت لکھو۔ اخہ اودے ایلو سنگتاتے آن مچہ جوان لکھوئی اس آخر تنظیم ناچیر مین ے۔  
 قدوس غمگین ے ہر اتم او نا سنگت نواز راہی انا کہ پروگرام نا حوال کیوتہ امر  
 بریک یا نہ۔ انتے کہ قدوس غمگین فداخاموش آن غصہ اس ہرانا خبر پین کسے الو بیدس نواز  
 راہی آن۔ او غصہ ئی ناسوب بقول قدوس غمگین نادا اس کہ فداخاموش تینا پیسہ اویا سیست نا  
 وجہ غان چیر مین مسنے۔ تنظیم والا تے چا بسکوٹ کُنْفک او ولد اتینا من مانی ے کیک۔ اگہ  
 فداخاموش سیست کپروس تو اینو چیر مین قدوس غمگین مسکہ ولے بدبختی دادے کہ تنظیم  
 والا کہ فداخاموش نا مرید اکو۔

تنظیم والا کہ قدوس ے او نالانگی او پختہ انگا شاعری نا وجہ غان وائس چیر مین  
 گچین کریر ولے اوصاف صاف انکار کرے کہ اودے عہدہ درکارا ف حالانکہ اودے  
 فقط چیر مینی درکارا س۔

ہند وجہ غان ہر اتم اودے نواز راہی پروگرام نا ہر لیفے تو قدوس فوراً جواب تس  
 کہ ”پروگرام آ ضرور کانہ، پروگرام تنظیم نا ے فدا نا باوہ نا ف۔“ اونا دا فیصلہ غان نواز  
 راہی بھاز خوش مس انتے کن اگہ او انتو کہ تو نواز بغیر تینا سنگت آن ہرا کہ انا کہ۔

مُسہ دے اسکان پروگرام نا تیاری چلی نکسا کرے۔ ہر فرد تین تو او تینا نوشتہ تون اختہ اس۔  
 یک شمعے نا صُحب تو چیر مین صاحب تینے جوان سینگار کرے او وختان گھنٹہ کس مُست تین  
 تو ارا بند غار فے او شمع ادبی کاروان نا بندر آ سر کرے تینے۔ دفتر نامون آچٹائی کس تالان  
 کریر ولد اخو کہ نا ہوٹل والا ے آرڈر تسر کہ یا زہدہ بچہ نا وختا برلیس بند غاتے حساب کیس  
 او ہموخہ پیالہ چانا ہتیس تحس۔

چیر مین ناچٹائی آ تولنگ تون ورناتا بنگ ہم شروع مس۔ بھاز تینا بس۔ بھاز



گروپ اٹ بس۔ موسم ہم بخناس ہرانا وجہ غان بھازاک تینے چادر تے ٹی کوراسر۔  
بھازنا ختنے آچھوڑاک لچوک اسر کہ ہرے آسا کر لیسر۔ بھازاک جوان صاف چرپ او  
کوٹ اسر بسر۔

داوختا دہ بچہ و پانزدہ منٹ اس کہ چٹائی ماشاء اللہ ورناتے آن پُرمس او  
بند غاک ہم ہندا اسر ہرافتے بروئی اس او ہرا بسوسر۔ فدا خاموش تینا موبائل حکمت  
رسوائے تس کہ مچا پروگرامے ریکارڈنگ کیس او فوٹو ہم ہلیس ہرافتے ولد اسوشل میڈیا غا  
شیر کروں۔

چیرمین صاحب پروگرام نابنائے تیٹ کرے ہراژن قدوس غمگین او اونا  
سنگت نواز راہیئے بھاز غصہ بس کہ ہرا بند غنا حقے بایدے ہمو کرو س تا۔

چیرمین صاحب نا اولیکو اشارہ تنظیم نادینی آشاعر سلیم قربان ناکنڈامس ہرا اللہ  
پاک ناکلام آن گڑ اس خوانا او پروگرام نابنائے کرے۔ اوکان گڈ چیرمین صاحب تینا  
پیتا تے شروع کرے ”کنا خوجہ غاک“ کنا وطن نا ورناک، ننا راج نا ڈر دخوراک، ننا مستقبل  
نا چر غاک! ای اُسٹ ناحب اٹ نماشکر گزاراٹ کہ نم کنا اسہ مسیح آتینے شمع ادبی کاروان  
نا بندر آسر کریرے۔ نماکل نابنگ دا گڑا نا ثبوتے کہ نم دا زبان دا قوم او دا تنظیم کن اتخس  
قربانی تنگڑے۔ دہن کہ نمے سامرو ننا راج نا کل تنظیم آک براہوئی زبان او براہوئی  
ادب کن خدمت کنگ او بھاز جوانی اٹ کنگ و۔ کنا دہن پانک کہ نن تینا زبان او ادب  
کن ہندو کاریم کس کین ہرا اینو اسکان متنے۔ ہندو خدمت کین ہرا ننا ادب نا بالادے  
بڑاکے۔ ای دانا ذی آ بھاز سوچاٹ او کنا مونا بھازا کاریمک بسر۔ ہرافتا کنگ کن  
خواریک بھازو و لے مشکل افس۔ ننا ادبی تنظیمک بھاز آکاریمیتا بنائے کرینو او بھاز جاگہ

سر سُبھ مسٹو ولے اسہ اہمو سر حال نُسے ہراڑا اینو اسکان کس گپ کتنے۔ ہرانا ذی آگپ  
کننگ کن ای نمے دا چیر گججے بٹینگانٹ۔ کن تو داڑے ماشاء اللہ بیست ورنانا کچ تو لوکو  
ولے وخت ناکی ناوجہ غان نن مجبور اُن۔ ہندا خاطر ان ای خواست کیوہ کہ فقط ہمو  
ورناک داسر حال آگپ کیر ہرافتے ای تیاری کن پار یسٹ۔ ہرا کہ کا بینہ ناعہدہ دارا کو۔  
اوقاپیتا تے آن گڈکل آن صلہ مشورہ مرو۔ تو اینو ناٹا پکے دادے کہ ”براہوئی ادب  
ٹی ذالبولات کئی ناسوب اتے؟“۔

فداخاموش نادا گپا تے آن قدوس غمگین ناباسنا دماغ بہتر لار کرے۔ اوتینا ماسا  
تو لوک آسنگت نواز راہی تون مخاطب مرسا کرار کرار پارے ”دا انت وگپ کس مس۔ دا  
خیرات ہمو بندغاتے گپ کننگ کن گچین کرینے ہرامش کس تپسہ۔ او اگر دافنے مالوٹا پک  
ناسی کپروس تو اینو دا کل نابا حٹ مسکہ۔“

فداخاموش تینا گپا تے مونی درسا پارے ”داسا ای داسر حال نا آغازے تینا  
ورنا غا شاعر طاہر بیوس آن کیوہ کہ اودا سر حال آتینا فکر نادرشانی ئے کے۔“

طاہر بیوس بیوسا تے آن بارمون شیف یک زانی تو لوک اس۔ تینا پن نابنگ  
تون مونے بڑا کرے او خواجہ غا تون مخاطب مرسا پارے ”بھاز مہربانی فدا جان۔ بھاز  
گچینو سر حال کس او بھاز بہترینو سوچ کس ننا چیر مین صاحب مونامیٹسے۔ براہوئی ذالبولاتا  
کچ براہوئی ادب ٹی نت ٹی بے نا کچے۔ ہرانا ادب اوزبان کن اسہ بھلوتا وان نُسے۔ دانا  
سوب کنا خیال پانک کہ ننادب ٹی شاعری نابدنامی ئے۔ ننا راج ٹی شاعری ئے بھاز  
خرا بوگڑا اس سمجھرہ۔ شاعری ئے خاندانی آبندغاتا شعبہ پاپسہ او کنے دانا خبر ہم ارے کہ  
ادب فقط شاعری نا پن اف ولے دا گڑاے ای سرپند مریوہ نم سرپند مریرے دا شمار

والاک تو مفسہ۔ نن مارُن ہم داراج ٹی دُزاتے آن بارڈھکُوئی شاعری کینہ تو مسنک ہم  
 مونابرور۔ بھازانگا مسنک ادب ٹی کاریم کنگ خوارہ ولے بدنامی اورسوائی ناخوف آن  
 کس توں ذکرے تا کپسہ۔ اودانا بھلا وجہ نا جاہل انگا بندغا کو۔ داڑکن نننے کل آن مست  
 تینا راج نا بندغا تا سوچ او اوفقا فکرے بدل کروئی تمگ۔ نننے ادب نا عزت کن اودے  
 جوانی اٹ استعمال کروئی تمگ۔ انشاء اللہ اودے مر مفرو کہ ننا مشاعرہ غاتے ٹی ننا  
 گودیک ہم ساڑی مرو راوتینا قوم اوزبان کن خدمت کرور۔ منتوار۔

طاہر بیوس نا پیتاک شاعر اتے آ جوانو اثر کس تخار ہرانا جواب ٹی کل دوتے  
 ٹیفیسہ اودے دادتسر۔

چیرمین صاحب پروگرامے مونی درسا پارے ”بھاز ہینو بھاز گچینو گپ کرے  
 کنا ایلیم۔ طاہر بیوس بھلوروشنائی کس داسر حال آشاغا اواسہ پختہ و پنت کس نننے تس۔ داسا  
 ای تینا چنکا غا ایلیم شکورشا کر آن خواست کیوہ کہ اوتینا گپاتے کہ۔“

شکورشا کر اسہ نظر کس کل سنگتا تے آشاغا ولد اوتینا نزور انگا گٹ اٹ تینا پیتا تا بنا  
 نئے کر سا پارے ”طاہر بیوس بھاز جوانو گپ کرے اواسہ بھلونشا ند ہی کس تس کہ ننا راج نا  
 کماشاتا، ننا بھلاتا سوچ تا نکہ بدل مف ننا گودیک تینا جاگہ غانا ورناک ہم جوانی اٹ  
 ادب کن کاریم کنگ کپور۔ ای داپا کہ طاہر ہراویل نا پارے اوکان مست اسہ پین ویل  
 کس ارے ہرا ’تعلیمے‘ اُرا والاتا، کماشاتا ترندی تو نیون کس ہم پانتنگ۔ ہندنو اُرا والا  
 اریر ہرا تینا چناتا دوتے ٹی کتاب نا خننگا خوش مریرہ کہ اوفقا مسٹر گڑاس خوانک گڑاس  
 لکھلک ولے بھلا بد بختی ننا تعلیم نائے۔ ننھے سمائے ادب بغیر تعلیم آن مننگ کپک۔ نشر تو  
 خاص تعلیم نئے۔ سلیس شاعری اگہ شاعری خدا نا داد پانتنگ تو اونا لکھنگ اونا فن تو تعلیم

آن بغیر مفک۔ نناماسازیات مسک شش جماعت پاسو۔ او ہرا کہ کالج خوانرہ او فتنے  
 آن بھازاک ادب تون رشتہ تنگ خوابہ۔ ہرامسک ادب ٹی کاریم کنگ خوارہ او اسہ  
 اراسال آن گڈ برای مریرہ ولدا ادب تینا جاگہ غا او فتنے کاٹم مشک اورندنگ ناوار  
 ملک۔ ننا تعلق اسہ پسماندہ و ملک نئے آن ارے۔ ہراننا ذالہولاک داخہ پیسہ ٹی و کہ تینا  
 چناتا بھلن کنگ کن اُرا نا کاریمتے کن مزور تخر او جنداک تہ زنداوتینا شوق تون زندگی کیر۔  
 کناپیتا تا مقصد دادے کہ تانکہ داڑے مسنتا تعلیم ہفتاد فیصد آن بڑز متنے نئے براہوئی  
 ادب کن گودی رسینگر و۔ منتوار۔

شکور شا کرنا گپاک بھاز گچینو اسر ولے او نا کمزور انگا آواز ختور کاتے آجوانی  
 اٹ سر متو۔ خیر تاڑی اوڑ کن کل خلکرو لے پیتا تے تا ہمو بنگر ہرا او نا ماسا تو لوک اسر۔  
 چیئر مین صاحب شکور شا کرنا منتواری ے ادا کنزگان گڈ نجیب ارمان ے  
 مخاطب کرے کہ نی تینا پیتا تے کر۔

نجیب ارمان مسنتے آن بھاز خلاف اس ہراننا وجہ کنے معلوم اف یا تو او ایلو قوم آتا  
 مسنتے آن بھاز متاثر اس یا پین وجہ کس اس اللہ چاہہ۔

نجیب، شکور نا پیتا تے بنگان گڈ جذباتی مرسا پارے ”ہر اپیتا تے دا ایلیم کرے دا  
 کل غلطو۔ ای بیچ او نا سوچ تون اتفاق کپرہ۔ تعلیم ضروری و گڑ اسے ولے خوانگ اونہ  
 خوانگ ننا جندنا دوٹی ے۔ داڑے ہر شارنا ہر خلق ٹی اسکول ارے۔ ہر شارٹی مسنتے کن  
 ارامسہ ہائی اسکول ارے۔ اسہ کالج کس ارے۔ پیشیم نا وختا گلی تے آن مسک پڑ کاتے  
 اٹ بستہ بد و کارہ۔ دا کل تعلیم حاصل کنگ افس گڑ انت کنگو۔ بیگہ تو سینفرتے آن کلاس  
 بلیرہ یوشن خوانرہ ولے اصل گپ دادے کہ ننا مسنتا سوچ بھاز گوٹڈے اوفقا مستقبل نا

خیالاک فقط برام اسکانو۔ اوفتا ہوش او اور فقط چھینٹی آپچاتے تونے۔ ایلو قوم تامسنگ  
 خوانگ ناوختا تینا مونانارگٹ کس تخرہ کہ اوڈاکٹر مرور، بینک منجر مرور یا بھلوادیب مرور  
 ولے ننا گودیک خوارہ کہ بس دہ جماعت پاس کین تاکہ کس ننے باجی پائہ۔ او ہر ادے  
 کس اوفتے باجی پارے تو بس اوفتے سندرسینگ۔ او ہرا گودیک کہ کالج خوانرہ اوفتا  
 مقصد ہندامریک کہ خلقی و سکول کسے ٹی ٹیچر لگن پانزدہ بیست ہزار تنخواہ بلین اورائی  
 تولن۔ نی دہن انگا گودی تے آن ادب خواسہ۔ دانا ممکنو ہیئت کسے۔ ای تو پاوہ داگڑانا  
 ذی آچ تینا وختے پوک کپن۔ منتوار۔

نجیب ارمان ناپتاک حقیقت و ہیئت اسر ولے اسٹ تو اوٹاپک ے ایسر  
 کرے اور ٹمیکو اونا لہجہ ٹی سوختی بھاز اس ہندا خاطر ان اوڑکن کر اور وٹاری لگا۔  
 چیئر مین صاحب ے نجیب ناپتاک زر کس ہم جوان لکتور۔ اودا تنظیم ے  
 براہوئی ادب ٹی پی کنگ خوا اسکہ۔ او خوا اسکہ کس داٹاپک آپوزیوگپ کے۔ ہندا خاطر  
 آن تین تو اُسٹ ٹی پارے ”دانا گپا تے نیٹ آشاغوی اف۔“

ولد ارمانی مرسا سلیم رازی ے اجازت کس کہ او تینا گپ آتے کے۔

سلیم رازی بھاز سنجیدہ و لائخو مار کس اس۔ تینا پتتا تابنا ے کیو ادبی و لہجہ سے ٹی  
 کرے ”ای شکور شا کر او خواجہ نجیب ارمان نا بھازانگا پتتا تے تو اتفاق کیوہ او بھاز آگپا تے  
 تو کپہ۔ داگپے منوئی تمک کہ تعلیم ارے ولے مسک تعلیم خواپسہ داگپ سئی اف۔ اصل  
 اٹ ہیئت دادے کہ ہرانے یا ناراج نامسنے رسینگ دا تعلیم ہراوڑ نا تعلیم کسے؟۔

تعلیم لفظ تو تعلیمے مکمل بیان کنگ کپک۔ دہنکہ لفظ ’ارغ‘ ے۔ ارغ تو ہر  
 بندغ کنیک ولے بھازاک ارغ نا کنگان بیمار مریرہ او بھازاک صحت مند۔ او

بھازاک فقط تینا معدہ غاتے ریفرہ کہ اور غ کنگر۔ ن ناراج ٹی دامسنتا تعلیم همومعدہ نا ریفنگ والا مثالے۔ دافتنے فقط سبق رسینگک تعلیم اخہ، ۹۷٪ ن ناراج ٹی مسنتا تعلیم خلقی آ سکولاتے آن شروع مریک ہرا اسکولاتا نغے جوان خبرے۔ دافتا بنیاد داؤر تھنگک تو نم پاہو داہراڑے خوانورا وادیب مرور۔ ای منیوہ بھازانگامک ہم خلقی آ سکولاتے آن خوانا نو او خوانگو ولے اوفتنے ہرا تم مونی تعلیم حاصل کروئی تمک تو او شار آ کارہ۔ ہوٹل تے ٹی رہائش کیرہ یا ہاسٹل آتے آ کارہ خوانرہ۔ شاعری کن تینے آن سینئر شاعر آ تا ماسا کارہ اوسخ بلیرہ۔ ہیبت دادے کہ حال بد حال تین کن کسر کس پڑہ ولے مسنک ہرا نگ کار؟۔ شکور صاحب پارے تعلیم اف۔ تعلیم ارے کنا ایلم سہولت اف۔ داموٹوتے انت کس رسینگک هموفتنے خوانرہ هموفتنے ہیل کیرہ۔ نجیب جان ے پاوہ کہ دامسنتا تینا اراتا چلیفنگ کن باجی گری کیرہ۔ اینواسکان فی کنے پاہرا مسٹر اسکول ناپیہہ غاتے اٹ تین کن اراس تھینے۔ گاڑی کس ہلکنے یا تینا پین مراد کس استخوانی کس پورا کرینے۔ ننا گپاک سر حالان پیش تمنگو۔ ای سر حال نامطابق دا پانگ خواوہ کہ ننا ذالبولاتاکمی ناسوب ننا ادب ناہرے آ ودی مننگ نائے۔ براہوئی ادب نادا اسکان ہجو عمر کس اف۔ اودا ہم اسہ بھلوگڑ اسے کہ داکم انگا عمر ٹی ننا گودی تا کچ بے ناکچ تو ارے۔ دادنیٹا انت گڑ اس مرے وخت اومخت خوانک۔ اینون تینا تنظیم آنظر شاغن تو نغے معلوم مریک کہ دانابنا ٹی نن حسابی چار پانچ سنگت اسن ولے داستکتا تا مخت او ایلو فتنے ٹی شوق ودی کنگک ناصلاحیت کس کہ نن اینو مسہ صدور نا ان یا اوکان بھاز۔ ننا گودی تا تعداد ہم ز کس وڈھو۔ او ہم ادب ٹی حصہ الور ولے اوڑ کن نغے اوننا همو گودیک ہرا مالو آن ادب ٹی و او فتنے خواری کشوئی تمک۔ اوقتا ذہن تے جوڑ کروئی تمک۔ منتوار۔

سلیم رازی نادا گپاتے آن چیئر مین ہندا خدر خوش مس کہ اونا تاڑی ناتوار کل  
تاڑی تے ٹی جتاوتر نداس۔

سلیم آن گڈ چیئر مین صاحب خوشی خوشی صلاح مستانہ ے تینا پیتا تے کنگ نا  
اجازت تس۔

صلاح مستانہ داسکان تینا پیتا تے کتوس کہ قدوس غمگین ے مخنگ ہلک اوکرار  
کرار نواز راہی ناخفی پارے ”خدانادیکودا ہم ہیئت کیک“ اوہندا گپا ہڑتوماک تین تو مخار۔  
صلاح مستانہ بھاز ادب دوستو مارئس اس ولے تعلیم اٹ خلوک اس۔ ہندا  
خاطر آن قدوس ے بد بسکہ کہ اونا وڑنگا تے ہم سنتا کہ عہدہ ایترہ او اونا وڑنگا قابل آ  
ورناتے پد پٹینو۔

صلاح مستانہ تینا گپا تا بنائے بھلو کنفیڈنس ے ٹی کرے ”ای شکر گزار اٹ  
چیئر مین صاحب نا کہ اوکنے موقع تس۔ کل ایلمک جوانو ہیئت کریر۔ ای بس ہندا پانگ  
خواوہ کہ دنیا ٹی ہر کاریم اڑزانے اگہ انسان ٹی کنگ ناشوق مرے اوکنے یقینے نا ایلمک دا  
گڑا کن محنت کرو او بھاز زونا ادب ٹی مسک ہم ساڑی مرور۔ مہربانی۔“

صلاح نا پیتا تے آن گڈ ولد اقدوس ے مخنگ ہلک اونواز ناخفی پارے ”داننا  
جنرل سیکریٹری صاحب اس“ ہراڑا ہڑتوماک بشندہ کریر۔

چیئر مین صاحب پروگرامے مونی درسا صدرے اجازت تس کہ او تینا  
گپاتے کہ۔ صدر بھاز انگا خفتورنگان دمدریس اودا سلسلہ ے زوز و کلفنگ خوائسکہ  
کہ مشاعرہ شروع مرے۔ ایلو تو لوکا سنتا کہ ہم ہندا دعائے کنگ اسر کہ دا پیتا کہ زو  
کٹر نا جان چٹہ۔

صدر تینا گپا تے شروع کر سا پارے ”براہوئی ادب ٹی مسنتا اخہ موجودگی ے  
 دا کله سمائے اودا ناسوب انتے داڑے کل جوانی اٹ ہیئت اوگپ کریر ولے دانا حل  
 انتے دانا ذی آی گڑ اس پانگ خواوہ۔ دا اسہ آسانو چٹکو کاریم نس اف اون ہم اشتافی  
 افن۔ دا کاریم اسہ انقلاب نس ہراڑکن نن بھلو کوشش کروئی تمگ۔ نن مسنتا  
 اسکولاتے آانوئی تمگ نن مسنتے کن اسہ لائبریری نس ملوئی تمگ کہ او کتاب خوانز تا کہ  
 اوفتے ٹی شوق ودی مرے۔ نن بھاز آ کاریمتے کروئی تمگ ہراڑکن نن کل اوار مشورہ  
 کروں۔ منتوار۔“

صدر ناہتا ک بھاز کم او پختہ او اسر ہراڑن حقنور کا ک بھاز خوش مسر۔ صدر  
 صاحب آن پد فوراً نعیم تہا نا واری مس ہرا کہ قدوس غمگین ناسنگت اس ہرا دے کا بینہ نا  
 وختا قدوس تینا جا گہ غاسلیفے او اُس چیرمین کرے۔  
 نعیم تہا بھاز قابلو مارُس اس ہرا نا کل کریڈٹ قدوس غمگین اونوا زرا ہی کن انا کہ  
 کہ اوداڑتون بھاز محنت کریر۔

نعیم تہا تینا گپا تا شروع ٹی مسنتا براہوئی ادب ٹی کمی ناسوب آ اوفتا اُرا  
 والا تے قصور وار کرے ”ننا مسن تا ادب ٹی کمی ناسوب اوفتا اُرا والا کو۔ اوفتا لمہ غا کو اوفتا  
 باوہ غا کو اوفتا ہمو ایلکو ہرا شار نا قصہ غاتے برہ او ولد تینا اُرا والا تے آ سختی کیرہ۔  
 اوفتے موئی انگ کن الپسہ۔ ای ہندو مسٹر خناٹ ہرا دہنو جوانو شاعری کیرہ کہ انت  
 پاوولے اُرا والا تا خلیس آن اسہ گڑ اس تینا پچٹ منسوب کپسہ۔ داڑکن نن کل آن  
 مست تینا اُرا والا تا خن ٹی ادب نا مقامے بڑا کروئی تمک اوکان گڈ اللہ کرے تو دا  
 کاریم موئی انو۔“





فدا خاموش ہیت کرسا اس کہ قدوس غمگین اچانک سوختہ او جذباتی مس او چانا  
پیالہ ءے شیف تخسا تو ار کرے ”چیرمین صاحب! سوال کسے؟“۔

چیرمین صاحب چپ کرے او اوڑتون مخاطب مس ”جی کنا ایلم! انت  
سوال کسے؟“

”ناپتاک بھاز جوانو ماشاء اللہ۔ ولے کنا کاٹم داڑا تمپک کہ فی ہرا گودی تا پتے  
کننگ اُس۔ او ہرا مسکو ہرا ذالو لا کو کہ نامشا عہ غاتے آبرو؟“۔

چیرمین یکدم ورنندی تس ”تینا راج نا گودی تا تینا زبان نامستنا پین ہرا“۔  
چیرمین نا جواب قدوس غمگین ءے بدتر غمگین کرے۔ سینہ تا ہٹل والا نا  
چاتے آن بار لا کرے ولے دوی ءے پدین تخسا پارے ”گڑا داپا۔۔۔۔۔ تینا زایفہ  
ءے برو کا یک شمعے آہتیسہ یا نہ۔ ای بنگٹ باجی کسے مطلب خواندہ کسے۔ ادب آن  
واقف مرو“۔

قدوس نادا گپ آفدا نامون پوشکن پوشکن مس او غصہ غان دم کسے کن خاموش  
مس۔ ورناک ہم حیرانو پریشان مسر کہ قدوس انت گپ کس کرے۔

”نہ شرم بفک بے غیرت دہنو ہیت کیسہ“ فدا ترندمر سا پارے۔  
”شرم انتے؟۔ دا تو جوانو گڑا سے۔ نا سر حال ہم تو ہندادے۔ نا او نا مقصد ہم  
تو ہندادے“ قدوس جواب تس۔

”چپ کر بے غیرت۔ دا ہتونی کیسہ تہ“ فدا غرانا پڑاٹ پارے۔  
”بے غیرت ای اف اٹ نم اُرے۔ ای تو سوچاٹ نم ہیت کرو کا ک دا سلسلہ  
نا بنائے تینا خواندہ غا ایڑا وزایفہ غاتے آن کرورے۔ او فتنے شمع ادبی کاروان نا دیبہ

جوڑ کر ورے“ قدوس عہدہ دار اتے آہر سا پارے۔

”چپ! داسہ کڑاس پاریس تو بوزے ناپرغوہ“ فداہکل ترسا پارے۔

”بس! باوہ نا بھاز بوز پرغانے“ قدوس جواب تس۔

”ای پاریٹ چپ۔۔۔ چپ۔“

”کپرہ چپ۔“

قدوس ناکپرہ چپ ناپانگ تون فدا بش مس او مون کرے قدوس کن۔

قدوس فوراً چانا گلاسے مٹ کرے اوسیدھا فدا کن چغل تس۔ گلاس ہم سیدھا تینا ہدف آ

لگا یعنی فدا نا چٹیکوخن نابڑزا و پیشانی ناشیفہ ٹھکا کرے او فدا ناخن ناماسان دتک یلہ مسر۔

دترے محسوس کنگ تون فدا تینے ڈول کرے او قدوس نازچک ٹی ہلک او ہڑتوماک اسٹ

ایلو آ فیٹ کاریئے شروع کریں۔ ورناک کل بش مسر خلاص کنگ کن ولے ہڑتوماک

ہندن جذباتی اسرکہ اسٹ ایلو آ ایلفی آن بارلچوک اسر۔ فدا قدوس آ زور مس تون نواز راہی

قدوس کن بدرسا فدا ئے خیر آن خنب کرے او ادب نا چٹائی آفتبال آن بارٹپ تس۔ نواز

راہی نابش منگ نا جواب ٹی بلال بڑگ فدا نا حق ٹی بش مس او نواز نازی آ لغت کاری

ئے شروع کرے ولدا نواز کن بدرسا عطاء گلشن بلال نازچک ٹی ہلک اوخن مون ئے تا

بوکسنگ ئے شروع کرے۔ ہنداڑ تون جنگ گرم مس۔ خلاص کروکاک وں کریرولے کس

ناوس ہلتو۔ ہرا تم جوان پٹی او دتر چر مسر تود مد ریرا وورنا تا قابوٹی ہسر۔

جنگ نا خلاص مننگان گڈ منہ بندغ چیرمین صاحب ئے ارفیر ہسپتال کن رم

کریر۔ منٹ ہموڑے ہوٹل آن دیرا یسر نواز او قدوس ناکاٹمتے آشاغار ہرا فتا با مس نادر اڈ

کتوکہ۔

پانزدہ پیسٹ منٹ آن پدماحول پھدین مس تو ہر کس ہر کس مس۔ قدوس، نواز  
 اوعطا جتا سر ہلکر۔ ایلو مسکین آ شاعر اک تینا تازہ انگا شاعری تے جیب تے ٹی، ہمووڑ  
 ارفیر اور مان کر سا اُراتے کن مون کریر۔

ارادے آن گڈ ہر اتم ایلو تنظیم والا کسئی مسر تو مخنک مسخرہ اوچیفنگ نا کاریم  
 نئے بنے کریرا و آخر ہفتہ سے ٹی شمع ادبی کاروان نا شمع کہسک۔ او تنظیم ٹکر ٹکر مس۔

## ارٹمیکو

پروفیسر نصرت اللہ پوسکنا سال نا اولیکو کلا سے اٹینڈ کنگ کن کلاس ٹی پترینگا تو  
پترینگا توں او نا نظر اولیکو صف ٹی تولو کا اسٹوڈنٹ ماریہ غا تما۔ نظر نا تمنگ تو ماریہ تینا  
اُشکنا پمئی آبدن توں مچا مچ پروفیسر نا اُست ٹی جاگہ ٹی مس۔

ماریہ نے اُست ٹی جاگہ تنگان گڈ پروفیسر نا اُست او دماغ ہڑتو ماک ماریہ نا  
مہمان نوازی ٹی اختہ مسٹر۔ داسا نے اُست پروفیسرے کمک تنگ کن راضی اس نئے  
دماغ۔ خیر پروفیسر مسکین اسہ وڑسے اٹ کلا سے پورا کرے او مجبوراً کلاس آن پیش تما۔  
ولے ماریہ نے پروفیسر نا اُست داخدر وڑا اس کہ ہچ پیش تمنگ نا ہیبت کتو کہ۔

دانیام ٹی پانزدہ دے گدرینگا اودا پانزدہ دے ٹی پروفیسر نا حالت بیمار انگا عاشق  
نا اس۔ نئے کس توں ہوش ٹی گپ کنگ کر یکہ نئے کسے جوانی اٹ بنگ کر یکہ۔ صُحب  
مروس یا شام اُرا مروس یا کالج، تنیا مروس یا مجلس سے ٹی او ناوش ماریہ توں اس۔

او اس او ماریہ نا غلئی آ صورت اس۔ ہرا او نا کمزور انگا ختا مونا ہندن تخوک اس  
کہ کس پروفیسر نا پیشانی آ میخ سے نا کمک اٹ لڑونج کرینے تہ۔

پروفیسر کن کالج نا اننگ عذاب کس جوڑ مس او خاص ہموکلاس نا اٹینڈ کنگ  
ہرائی ماریہ خوانا کہ۔ ماریہ نامونا خوانفنگان پروفیسر ہندن پٹڑہ او خوف زدہ مسکہ دہن کہ  
اسکول ناچنا کس تینا اُستاد نامون آسبق خواننگ نا وختا مر یک۔

ماریہ نا پنی آ زندان ٹی تولوک اسہ دے پروفیسر تینا مرض نا علاج نا دریافت  
کے کنگ کس۔ اوسوچ خلنگ کس کہ دا بیماری آن پشن تمنگ نا کسرانتے۔ ای داڑان  
آزاد ہمر مر یو۔ ہرانا جواب کن او بھاز کڑمی اٹ سوچ خلک او آخر او نا فیصلہ ٹی اودے  
فقط اسہ ورنندی کس رسیگا کہ او ماریہ برام کے۔

پروفیسر تینا سماج تینا راج او تینا کم عقل انگا سیالاتے آن جوان واقف اس۔  
اودے بھاز جوانی اٹ معلوم اس کہ دا شمار نا امر و بند غو، امر و ذہن نا خواجہ و، او امر و سوچ نا  
گودی و۔

داراج ٹی اولیکو برام کن انسانے داخس ہم وار تفسہ کہ او جوانی اٹ بالغ مرے  
او ارٹمیکو برام کن بیدس جنگ کسے آن اسہ انقلاب کسے آن اجازت رسینگلک۔ اگہ کسے  
ارٹمیکو برام کروئی کسے تو اودے اسہ وار تینا اُرا والا تون ولداتینا زانیفہ ناسیال تون اسہ ارا  
طویل و جنگ لازم کروئی کسے۔ نہ تو اجازت نامہ ناہلنگ بھاز زورے۔

داڑے پروفیسر او ماریہ ناقصہ ٹی پروفیسر مالو آن برامی اس او ماشاء اللہ اراچنا  
تے اسر۔ اسٹ 'تسلیم' ایلو 'تحریم'۔ پروفیسر نا زانیفہ خوانندہ و نیٹری کس اس۔ ہر پروفیسر  
کن بھلو فائدہ کس اس کہ او زندگی دینا داری، مزاج، طب، خاموشی دا کل نا معنی او مفہوم  
آتے آن باخبر اس۔ پروفیسر او باجی صفیہ (باجی اودے چنا او ذالہولاک او نا تعلیم نا وجہ  
غان پاریرہ) اسٹ ایلو تون محبت بے شک کم کرو سرولے اسٹ ایلو نا احترام ٹی چوکی کس

تختورہ۔ اوہندا سوب اس کہ پروفیسر اوصفیہ تینا زندگی آن بھاز خوش اسر۔ ہر اتم ناراضگی یا غلط فہمی کس ودی مروسس تو ہڑ تو ماک اوار تو سرہ او حل کریرہ تہ۔ نئے کہ ایلو فتنے آن بار چار چار پنچ پنچ دے اسٹ ایلو آن ناراض مسٹرہ اسٹ ایلو آن مون تے پر فیہ۔ کاریم آ انگ ناوختا اگہ ارغ نا جراباک خٹکیر و سر تو زانیفہ نادوک دتخس ہم خل کتورہ کہ جرابا تے پٹہ انتے کہ ارغ آن غصہ ئے۔ او اگہ زانیفہ ئے پیسہ کس درکار مروس تو مجال کس ارغ تینا بٹوہ ئے ملوس اوڑ کن پیسہ کشوس انتے کہ مبل ناراضے۔

پروفیسر اوباجی صفیہ نامحبت کل ہمسایہ غاتے آپاش اس۔ ہر مجلس ٹی اوفقا مثال تنزگا کہ خدا ہر ارغ اوزانیفہ ئے نصرت اللہ اوصفیہ غان بارکے۔  
ہمسایہ غاتے ٹی اگہ کس دا خوش حال آز زندگی ناسوبے پروفیسر آن ہر یفیکہ تو پروفیسر صاحب فوراً تینا انداز ٹی دا انگریزی فقرہ ئے ٹوکاکہ

"We respect each other stuff"

بھازاک پروفیسر نادا جملہ نامعنی ئے پُہ مسرہ او اودے دادتسرہ او بھازاک بغیر پُہ منگان تینا برو بانکاتے کوش تسرہ او کاٹے سرفیرہ۔  
ایلوفتا پُہ منگ ناخیر اس داسا تو پروفیسر نا چند پُہ منگ الو کہ امرکیو۔ اٹمیکو برام کن اگہ صفیہ پین آ خاصوب کس تو خوانک۔ او بغیر ماریہ غان دا اُسٹ ہم بھاز مشکلے باش مرے۔

پروفیسر صفیہ ئے منہ وخت کن سیڈ کرے او ماریہ نارندے ہلک۔ اوڑتون کلاس ٹی گپ کتنگ شروع کرے۔ دوران لیکچر اوڑ اہننگ اوڑتون ہشتندہ کنگ ناگوازی نابنا ئے ہم کرے۔ کلاس آن بیدس کالج ٹی اوڑان ڈھکوائی او ناخیا لے ہم تنخاکہ۔

کالج نارجر جی آں اونا باوہ ناپن تون اونا اُنا عنوانے ہم دُوئی کرے۔  
 ولد اونا سیال اوعزیر آتا باروٹ ہم معلومات کرے او آخر تو اِارٹ ٹی اودے معلوم مس کہ  
 ماریہ ناباوہ ناپن دلمر ادے۔ باوہ تا کو بیٹہ ن افغان کس برام کرینے۔ ہرانا وجہ غان اوفتے دا  
 زبیا غانا زور کا ماریہ رسینگا۔ اودا برام کن پروفیسر اونا باوہ ناعقل مندی آتین تو اودے داد  
 ہم تس او اونا شکریہ ے ہم ادا کرے کہ اودہ نیو نیو کاریم کس کرینے۔ او جنتا ہندا اگر انا کاہل  
 مس کہ اراجتا قوم نانیام ٹی سانگ بندی مرے تو رزلٹ بھاز مفید مریک۔ دہنکے ماریہ نا  
 رنگت اونا لٹہ غا انا سس اود تر ناہینی اونا باوہ غا ہراٹن پروفیسر اونا عاشق جوڑ مس۔ ماریہ  
 نا اراپین ایڑو۔ اسٹ اوڑن بھلاے ہرا برامی ے ایلو اوڑان چنکو سے۔ داڑن بیدس  
 ارا ایلم و۔ اوہڑ تو ماک برامی و۔ اودا پروفیسر نا بخت اس یا صفیہ نا بد بختی کہ ماریہ ساگی الو۔  
 ماریہ نا خا ہوت نامعلومات آن گڈ پروفیسر صاحب صفیہ کن مون کرے۔ منہ  
 دے اسکان حسب معمول زندنا دے تے گدریفے ولے ماریہ نا پردک انگا خنک اراکان  
 اودے آرام اکن الارہ۔

پروفیسر ے یقین اس کہ اونا استخوانی نا اظہارے صفیہ ناراض مفرو ولے دا گڑا  
 نا گارٹی الو کہ اودے برام کن اجازت رسینگک۔

خیر اسہ دے صفیہ نامزاجے جوان خوشگوار خنکان گڈ پروفیسر تینا مخلصی اٹ  
 ماریہ نا ذکرے صفیہ تون کرے ہراٹی مقصد نا ہیئت فقط ہندا سوال اس کہ ”ای برام کس  
 کنگ خواہوہ صفیہ۔ وجہ دادے ای تینا اُست نا کنڈان مجبور اٹ۔ داگپے نے تو داسو بان  
 کنگ اٹ کہ نی کنے اجازت ایت۔ نے تو دا آلریڈی سمارے کہ ای اخس نے تون  
 محبت کیوہ او کنا خنتے ٹی نے کن اخس رسپیٹ ارے تو داسوال بچ ودی مفک کہ ای برام



آن گد تینا محبت یا نانا دارشتہ ناتول ٹی کمی ہتوٹ۔ ای ایلو بند غاتے آن بارافٹ کہ ارٹمیکو  
برام کن اولیکوز ایفہ ئے تینے آن ضرور غصہ کر فیو ولد ابرام کن کاؤ۔

صفیہ اول تو پروفیسر نارٹمیکو برام نا خیال آسخت حیران مس کہ دادے انت مس  
اچانک دہنوار ادہ کس کرینے ولے دائی داخس ہم حیرانی نا ہیئت کس الواخس کہ او اس۔  
پروفیسر تو اودے صاف صاف پارے کہ او ماریہ غاُستے باہفینے اودا اُست ناہتنگ کن  
اودے ماریہ ئے ہتوئی تمک۔ صفیہ پروفیسر نا دالو ہیئت آسر گڑدان اس کہ دا امر و ہیئت  
کس اس او کرے۔ ”ای نا بھازا حترامے کیوہ ولے مجبور اُکنے دا برامے کروئی تمک۔“ دا تو  
ہموگپ مس کہ ای خواہوہ فی زندہ مرو لے دازا آتے گن۔

”عیش کر زربینہ عجب خوش نصیبو ذات کسے اُس۔ ہراوڑ کہ اُست نا خواہہ ہراوڑ  
دماغ نا پائہہ ہراوڑ مناسب سمجھس ہموڈول کیسہ۔ نئے جہان نے ملامت کیک اوئے نا  
خدا۔ اخہ آسانی اٹ اخہ کنفیڈنس اٹ پارلیس کہ کئے اُسٹ تون محبت مٹنے۔ ای برام کنگ  
خواہوہ او کئے اجازت ایت۔ او اگہ کس نے اجازت تف ہم نماتینا ارمانے پورو کیرے او  
زایفہ تو زایفہ ئے نمے کس توننگ کپک۔ او اگہ دا پیتا تے ای تینا اُرغ تون مطلب  
پروفیسر تون کریسٹ اودے پاروسٹ کہ کئے اُسٹ تون محبت مٹنے۔ ای اوڑ تون زندگی  
گدریفنگ خواہوہ تو کنا داراج ٹی انت حشر مسکہ دا گڑاغان کل واقف مرو۔ محبت نا  
اظہار تینا جاگہ غان ذالبولاک تو جوانی اٹ پین اُسٹ نا اختیار کرو کو ہمسفر کسے آن انکار  
ہم کنگ کپنہ۔“ صفیہ ہندا گپا تے ٹی تین تو ذالبولاک بے وسی آرا مان کنگ اس کہ بے توانا  
پروفیسر ولد ارسیفہ او اسہ بے تامو بشندہ کسے تون سوال کرے ”انت سوچاس اجازت  
ارے یا نہ؟“

صفیہ دم کسے کن ولد اسوچ کسے ٹی ڈب ہلک۔ ”انت جواب ایٹو دا بند غے۔“  
 اودے دا ہم خبر اس کہ اونا آخانا جواب ہم پروفیسر آچھ اثر کس تخیر و۔ تانکہ اوہو کتہہ نئے  
 پروفیسرے آرام برو نئے اودے۔ او خدا کپ پروفیسر ہندو نو قدم کس ارفو کہ اودے او اونا  
 چناتے بھلوتا وان کس رسیدگہ۔ خیر پروفیسر تو دہنو حرکت کس مشکلی کروں۔ دا زانیفہ اودا  
 چناک اودے اراکان اُسٹ مٹرہ ولے خوف تو اس۔ ایہن ہم دادور نا زینہ غاتے آ  
 انت باور۔ ”خیر پروفیسر صاحب نا محبت او مہر آکنے شک تواف کہ کم مرو۔ بس گڑا ایٹو تہ  
 اجازت۔ آلہ پین انت کیو۔۔۔ پین کسرارے مگہ۔ آخا۔۔۔ بس اجازتے تہ۔۔۔ ایکان  
 کنا او کنا چناتا نصیب او اونا وفا۔“ تین تو فیصلہ غان گڈ صفیہ کاٹم ے سرفے او جوڑتے  
 منّت اوزاری کرسا ”اجازتے نئے“ پارنے۔ او ہندا ارا لوز نا پاننگان اودے ہندن  
 محسوس کہ اونا ذی آ اُردڑنگا۔

صفیہ نالفظاتے بنگ تون پروفیسر اراغان ہندن نرا دہنکہ لمہ کس تینا شیطان آ  
 چناتے گلی ٹی گوازی نا اجازت ایہ تہ۔

پروفیسرے اجازت ترو کا صفیہ اصل اٹ دا صفیہ الوہرا اونا زانیفہ اس۔ ہرا فظ  
 اسہ ذالبول کس اس۔ ہرا دارا نا واحدانگا گودی اس۔ داہمو صفیہ اس ہرا خوانندہ و زالبول  
 کس اس۔ ہرا اسہ مہر کرو پروفیسر سے نا شریک حیات اس۔ ہرا دے محبت آن زیادہ تینا  
 عزّت او وقار نا ضرورت اس۔ ہرا ارغ نا مہر آن زیات اونا کنڈان کرو کا رسپیٹ نا  
 خواہشمند اس۔ ہرا دے محبت نا قیمت نا اندازہ معلوم اس۔ ہرا دے اُسٹ نا ضد نا سما  
 اس۔ ہرا دے علم اس کہ آبادانگا اراک اُسٹ ایلو نا مناسب انگا خواہشاتا تے پورا کننگ  
 آن آباد سلیرہ۔ ہرا دا پاریکہ کہ ارغ اوزانیفہ ے اُسٹ ایلو نا ذاتی زندگی تون تعلق تنگ

نا اجازت مف۔ ہر ادا سوچ نا گودی اس کہ زندنا فیصلہ غاک جذبات آن آخاد ماغ آن کتگرہ۔ دا خوانندہ صفیہ ہمو صفیہ اس ہر اداے پروفیسر درست کر یکہ۔ ہر اداے او نا سیالاک او نا ہمسایہ غاک درست کریرہ ولے اے صفیہ ہرا کہ راج نا ایلوز ایفہ غاتے آن بار فقط اسہ جذباتی و زالبول نس اس۔ ہرا پروفیسر نا ز ایفہ متگ تون او ار ارا چنا نا لمہ ہم اس۔ ہرا نا ہوش او آورہ تینے آن زیادہ تینا چنا تا مستقبل تون اس۔ دا صفیہ ئے فقط امو خوانندہ غا صفیہ چاہسکہ انتے کہ اودا صفیہ نا سینہ ٹی جاگہ ٹی اس او ہڑ تو ماک تین تو سنگت اشر او اکثر تین تو صلہ او مشورہ کریرہ۔

بے تعلیم آ صفیہ ہرا کہ فقط پروفیسر نا ز ایفہ اس۔ ہرا جذبات آ تا غلام اس۔ ہرا دور نا ایلو ذالبول تا وڑ تینا ارغ نا ارمیکو برام آ بھاز غصہ ٹی اس او خوانندہ غا صفیہ غا چڑا ”نی امر اودے اجازت تئس کہ اوکا نہہ برام کے۔ نے سمائے نا اپوک نا بنگان پدا اُرانا انت حال مر یک۔ نا انت حال مر یک۔ نا چناک امر مریرا۔ دامہرا و احترام کروکا ارغ نا امر مر یک؟“۔

ہرا نا بھازا سوال او خراب انگا مشورہ غاتے آن تنگ مر سا خوانندہ غا صفیہ اودے تینا علم سگ او برداشت نا طاقت اٹ ہموڑے تینا سینہ ٹی قید کرے او با غئے تا پٹی نس تھے او اپوک نا انتظار ٹی لگا۔

پروفیسرے مالو آن خبر اس کہ خوانندہ غا صفیہ اے جذباتی آ صفیہ نا ذی آ زوراک مر یک اودے وڑ نسے اٹ کنٹرول کیک۔ ہندا خاطر ان تو او خوانندہ غا صفیہ ئے برام کر یس او دا سا ہم اسہ خوانندہ نس برام کنگ اس۔ خیر دا خوانندہ تو او نا محسبے دا اگہ بے تعلیم نس مرو سس ہم اودے برام کر یکہ۔

پروفیسر نامعلومات نامطابق ماریہ ناباؤہ دلمراد ہڑ دے صُحب تو حاجی عصمت اللہ نادکان آ مجلس کن بریک۔ اسہ دے تینا قریبی آ سنگت یعقوب شاہ ءے ار فے او حاجی عصمت اللہ نادکان آانا۔ پروفیسر مسننا کالج نا پروفیسر کس حاجی عصمت اللہ او دے خنگ تو درست کرے۔ بخیر او دیر آن گڈ او فتنے ماندہ کرے۔ دم نُسے نا انتظار آن پد دلمراد دکان ٹی پترینگاہر نا خنگ تو ن پروفیسر ہندن خوش مس کس پے ماریہ نا جند دکان ٹی بس۔

پروفیسر اسہ ارا وار دلمراد ءے مالو نظر آن کشاس۔ ہندا خاطر ان درست کریتہ او بھاز مہر او محبت اٹ خوشامد کریتہ تاکہ دلمراد او نا اخلاق آن متاثر مرے۔

حاجی عصمت اللہ نا چاتے کنگ آن گڈ یعقوب شاہ دلمراد تو ن مخاطب مرسا پارے ”حاجی صاحب (حالانکہ دلمراد حج کتوس) نا اُسٹ خراب مف“نی کنے بے ادب او بد اخلاق سمجھپیس تو نے تو ن ہیئت کس کروئی ءے۔ ز کس کن تو پیش آبریسہ؟“۔

دلمراد حیران مس کہ دا بندغے ای تو تینا زندگی ٹی اولیکو وار خنگ اُٹ دادے وا کن تو انت ہیئت کس کروئی ءے۔ خیر ہیوس مس او یعقوب شاہ تو ن او ار دکان آن پیش تما۔

عصمت اللہ نادکان آن ارا دکان مونا اسہ دکان کسے نا شٹل شیف اس تو یعقوب شاہ ہمونا مونا چادرے تینا تالان کرے او ہڑ تو ماک تو سر۔ یعقوب شاہ گپے شروع کر سا پارے ”اے ایلیم کہ کن تو تو لوک اس او پروفیسر نصرت اللہ صاحب اس۔ مسننا کالج ٹی خوانفک۔ ہیئت دادے پروفیسر صاحب بھاز سیدھا او مخلصو زینہ کسے۔ انت گڑ اس مرے سیدھا بغیر کوش تنگ او ڈرامہ کنگ آن یک تہا۔ ہرانا سوبان بھاز اک اوڑان گلہ ہم کیرہ ولے دائی جہان ملا متے پروفیسراف (داپتا تے کنگ ناچو ضرورت کس الوولے یعقوب شاہ ناباؤے دے تفنگ کریکہ)۔ پروفیسر صاجے برام کس کروئی ءے۔

جندتہ ماشاء اللہ خوانندہ او مارئسے تو براہم ہم تعلیم یافتہ و مسٹرئس کنگ خوانک۔ پروفیسر مالو آن ہم برای ئے او ماشاء اللہ اراچکو چناؤ ہم ہرے تا۔ داڑن مست نم داسوال ئے کیرے کہ او ارٹمیکو براہمے انتے کنگ خوانک تو اونا سوب دادے کہ پروفیسر نا اولیکو زانیفہ ئے کینسر ئے۔ اومنہ تو نا مہمانے۔ پروفیسر تینا چناتا مستقبل کن سخت پریشانے او خدا نا کروکا تو ن چس مفک۔ داسا گپ دادے حاجی صاحب نے معلوم مسنے کہ نئے اسہ خوانندہ و مسٹرئس ارے ہر امو نی تعلیم حاصل کنگ ٹی ئے۔ ای ہموڑ کن پروفیسر صاحب نارسالے نئے آپسٹ۔ او کنے یقین ارے نم جو انو جواب کس ایتورے۔“

یعقوب شاہ نا داسیاسی آپتاتے آن گڈ دل مراد دم ئسے کن ابکہ مس کہ دا امر و رسال ئسے۔ داوڑ ہم رسال ہتیرہ بغیر خبر او بغیر اُرانا بنگان بازار ٹی۔ ولے دل مراد مسکین عا جز و بند غ کس اس۔ اوڑ کن یعقوب شاہ اسہ بیگانہ و مسافرئس اس۔ ہراڑے نئے او ترند متنگ کر یکہ نئے اوڑ ان گلہ کنگ کر یکہ۔

خیر دم کس سوچ خلنگان گڈ دل مراد ہند اخس پارے ”نم تینا نمبرے کنے ایتو ولد ای نئے خبر کیوہ۔“

داڑ ان بغیر دل مراد پین انت پاروس۔ جاگہ عا تو لوک نئے او انکار کنگ کر یکہ نئے ہو۔ نمبرے لکھفنگ آن گڈ یعقوب شاہ دل مراد آن موکل کرے او پروفیسر ئے دکان آن ارے او ارا کن سر ہلکر۔

کسری پروفیسر یعقوب شاہ غان احوال ہلک تو یعقوب شاہ اودے سئی کرے کہ ”ای نما نمبرے تسٹ تہ او اسہ ارادے ٹی نم تو رابطہ کیک۔ ولے اسہ پین گپ کس کنا با غان پیش تما ہمو نا خیا لے کیس۔“

پروفیسر خوفزدہ مرسا ہر لپے ”انت کسے نا؟“۔

”ہر اتم اوکنے آن نما اڑمیکو برام نا وجہ ہر لپے تو ای پار یٹ تے کہ نما۔۔۔

نما اولیکو ز ایفہ نے کینسر نا بیماری نے۔ اوبس منہ تو نا مہمان کسے“ یعقوب شاہ ہندا گپ نا کنگ تون تینے خیری کشاکہ دہن مف کنا دلبد آج کس لگو۔

یعقوب شاہ نا ہندا ہیئت تون پروفیسر نا خنک کلو ناخن تیان بار پیش تمارا وسوچ کسے ٹی آختہ مس ولے زو بشتمدہ کرسہ پارے ”اللہ اچڑا کپ نشارے نا ولے فی داپا امر سچانے دا گپ؟“۔

یعقوب شاہ پروفیسر نے بشتمدہ غا خنا تو اُسے تا تسلی مس او جندا تا ہم بشتمدہ کرسا پارے ”بس اچانک ذہن ٹی کنا بس“۔

ارادے بے صبری اٹ انتظار کنگان گڈ پروفیسر نے یعقوب شاہ نا بیوقوفی نا احساس مس کہ دا جاہل کنا نمبرے اودے تسنے او ناہلتنے۔

منہ دے پین دانیام ٹی گدرینگار ولے نئے دلرانا کال بس نئے پروفیسر نا استے آرام۔ آرام امر بروس کہ صُحب تون وختی او نا نظر ماریہ غا تما کہ ولدا مچا دے اون او نا ہوش اوڑ تون مسکہ۔

ایلو دوے خوانندہ غاصفیہ جذباتی آصفیہ تون جنگ اس (ہرا تینا نا نا پٹی نے سست کریس اودا سا جوانی اٹ گپ کنگ کریکہ)۔ او نا ہوش اوڑ تون اس کہ دہن مف دو تے تینا مالوا ویدینہ غان پیش تموے پروفیسرے برام اکن الپہر و۔

دلرانا کال بتو تو پروفیسرے مجبوراً ولدا عصمت اللہ نا دکان آ انوئی تہا او ہموکا نمبرے تاہلک او بغیر سوچ آن دلرانا نمبرے خلک۔

”ہیلو! السلام علیکم“ پروفیسر پارے۔

”وعلیکم السلام“ دلہراد جواب تس۔

”دلہراد صاحب ہیئت کتنگرے؟“ پروفیسر ہریفے۔

”جی باوہ! نم دیر“ دلہراد پارے۔

”ای پروفیسر نصرت اللہ۔ نم توں منہ دے مست حاجی عصمت اللہ نادکان ٹی

ملاقات مس“۔

”ہو ہو درست کریٹ۔ جوڑ خیرٹ مسٹرے“ دلہراد ہریفے۔

”الحمد للہ! نما انت حال مسنے؟“ پروفیسر ورنندی تس۔

”شکرے پارو ردگارنا“ دلہراد جواب تس۔

”نم پاریرے کال کیوہ ولدانما حوال متو تو سوچاٹ کنا چند حوال کیونے“

پروفیسر ارمانی وڈپارے۔

”جی باوہ! کنا ذہن ٹی کس نے حوال کنگ۔ اختی تے آن وارلتو“ دلہراد دروغ

تڑسا جواب تس۔

”بلکل اختہ نیک اریہ دنیا نا۔ گڑا نم تینا فیصلہ پاتورے“ پروفیسر زوزو

مقصدنا ہیئت کرے۔

”باوہ دارشتہ غاک دہن زودا ڈول اٹ اراکان مریرہ۔ نم اسہ دے ہوننا ارا

غانم تو گپ کین حال احوال مرے۔ اسٹ ایلوے درست کین۔ ای ولدا ارا والا تون

مشورہ کیو۔ گڑا نے جواب کس اتیون۔ نم ہمودے دکان آبسٹرے اوسیدہارشتہ

خواہسرے۔ دہن رشتہ اوسیا لیک اراکان مریرہ“ دلہراد پروفیسرے پُہہ کرسا پارے۔

”جی سئی پاریرے بس نن اشتانی اسن۔ خیر، گڑا ای دابروکا یک شیمے آنے آ  
 بریوہ، پروفیسر ولد اشتانی کرسا جواب تس اوتینا جنگ نا اطلاعتستہ۔  
 ”مرے باوہ اللہ نمے ہتہ“ دلمراد پدینولجہ سے اٹ جواب تس۔  
 ”گڑا فلحال اللہ حافظ“ پروفیسر پارے۔  
 ”اللہ نگہبان باوہ“ دلمراد ورندی تس۔

دلمراد نا کالے بند کننگان گڈ پروفیسرے احساس مس کہ او نارسال نادنگ نا  
 طریقہ سئی الو۔ خیر انت کس مس مس۔ داسا یک شیمے نا تیاری ئے کروئی ئے۔  
 ولد اتین تو فیصلہ کرے کہ داجارا وٹینٹ کانک نئے یعقوب شاہ ئے دیک نئے  
 پین کسے۔ پروفیسر نا بھلا خوبی دا اس اودے راج نا، راج والا تاہیت او گیا تانچ پرواہ الو۔  
 ہراوڑ اونا اُسٹ خواہسکہ، ہموڑ کریکہ او ہندا وجہ اس کہ او خواندہ کس اس اوتینا زندگی آن  
 خوش اس۔

یک شیمے نادے بیگہ نا پاس اس کہ پروفیسر صاحب دلمراد نا بیٹھک آتینے سر  
 کرے۔ دیر آن گڈ پروفیسر او دلمراد ہندن خاموش تو لوک اُسر کہ فاتحہ سے آہستہ۔ خاموشی  
 کہ مرغن مس تو پروفیسرے اُسٹ وارتنو فوراً مقصد نا پیتے شروع کرے او اسہ حساب اٹ  
 پروفیسر سئی اس۔ سٹی سیاست، ملک، بیروزگاری، حالات ناذی آگپ کننگان جوان اس  
 تینا مقصد ناہیت کنگلہ۔

”حاجی (حاجی آن بغیر او حیران کس پین ہر الفظ اٹ مخاطب کے) انت فیصلہ  
 کریرے؟“

حاجی بیٹھک نادرگہ غانظر کس شاناغ تو بغیر کس پروفیسر نامون آ بوٹاتے آن پین



”جواب کس تو ایتنہ اسہ وار کنا چناک نے خنگ خواہرہ نے تو گپ کنگ خواہرہ  
او بریگر اولد اگپ کینہ“ دلہراد جواب کس۔

دم کس انتظار آن گڈ اسہ شانزدہ سال نامار کس چا بیس تو او نارنداٹ ذالبول کس  
ہرانا بوز ہلوک کس بس او تہہ ٹی درگہ نابغل آتوس۔

پروفیسر ذالبول ناجسم او پیشانی نارنگ آن درست کرے کہ دا ہمو افغان ے  
ماریہ نالمہ ے ولے مارا کو آکا ٹم تہہ متھو کہ دادیر کسے انتے کہ او نامعلومات نامطابق ماریہ  
ے چکو ایلیم الو۔

خوشامد مس ولد اپروفیسر تینا اولیکو چا ناپیالہ ے کٹے تو ارٹمیکو پیالہ نا پرمنگ تو  
ماریہ نابا وہ گپے شروع کرے ”جوان کئے نما ہمو سنگت پارے کہ فی برامی اُس او ماشاء اللہ  
ار اچناؤ نا؟“۔

داحقیقت وگپ کس اس او پروفیسر ے معلوم اس یعقوب شاہ اوڑتون انت  
پاریس۔ ہرانا جوابے او بھاز سنجیدگی اٹ کس ”جی ہو تسلیم او تحریم کنا چنا کو“۔  
”گڈ انے ارٹمیکو برام نانانت ضرورت“ دلہراد ارٹمیکو سوالے کرے۔

پروفیسر پُہ مس کہ دا پیرانگا کنا باغان بنگ خوانک نہ تو اودے سوب  
معلوے۔

پروفیسر نا اسہ وار اُسٹ کشا صاف صاف پاو کہ کئے نما مسٹر تون محبت مٹسے پین  
وجاف۔ خیر اُسٹ نادا خیالے مَر کر ساتینا خنتے زر کس نمی کرے گٹے کمین کرے او جواب  
ترسا پارے ”حاجی صاحب گپ دادے کنا زامیفہ صفیہ کینسر نامریض ے۔ او منہ تونا  
مہمان ے۔ کنا ار اچناؤ او فز زندگی نا خاطر ان امی پین برام کسے نا خیال آتین توافق  
کریٹ نہ تونا گپ آن بار کئے انت ضرورت برام نا“۔

پروفیسر نادارمانی آدروغ دلمراد او اونا زائیفہ ناستا جوانو پوغ کس تخوا۔  
 ”اللہ بیو سے صحت ایتر۔ اونے برام کن اجازت ایٹک“ دلمراد ہر یفہ۔  
 ”اونا اجازت آن گڈ ای نمے آبٹسٹ۔ اودے تینا بیماری ناسمائے ولے داسما  
 اف کہ اوڑتون اٹ وخت ارے۔ ہندا خاطر ان اونا چند اینو کنا پچا تے استری کرے او  
 کنے نمے آراہی کرے۔“

دا ارمیکو تیرکس ہرا ولد اسیدھا حدف آگٹا۔  
 دلمراد اسے نظرکس تینا زائیفہ غاشاغا او ولد اہر فنگ ناگیگ ٹی کس کہ پروفیسر  
 ارمانی آلجہ تو ولد اشروع مس

”حاجی صاحب! ای نمے آبو جھ کس تھنگ خواپرہ۔ ای خواپرہ نم پریشان مبو۔ کنے  
 اسے خوانندہ و مسٹرکس برام کروئی۔ ہرا کنا چناتا خواننگ ناخیالے تھنگ کے بس۔ کنے  
 معلوم مس نما مسٹرکس کالج خواننگہ تو ای نمے آبٹسٹ۔ او برام آن گڈ اگر اللہ کرے تو او تینا تعلیم  
 ئے ہم برجا تھنگ کیک۔ کنا چند کالج نا پروفیسر اٹ، جوانو تنخواہ ئے کنا۔ کنا چندنا اُرائے۔  
 زندگی ناکل سہولت آک اللہ نافضل اٹ موجودو۔ بس نما رضہ مندی مرے ہراڑکن ای انتظار  
 کروٹ۔“ پروفیسر داہیتا تے کرے تو دلمراد تون ولے اونا گپ آک کل دلمراد نازائیفہ کن  
 اسر۔ ہرا درگہ ناماسا ہموڈٹ تو لوک پروفیسر ناہیتا تے غوراٹ بتگ اس۔ پروفیسر ئے  
 معلوم اس کہ ذالبولاک انت خوارہ او خاص کر اسے لٹہ کس تینا مسٹرکن انت خوانک۔

دلمراد ناسوالاک کٹار تو آخری گپے کر سا پارے ”نن نے منہ دے ٹی جواب  
 کس ایترہ۔“

پروفیسر فوراً رندی تر سالبش مس ”مرے اللہ خیر کے۔ کنے اجازتے کنا چنک  
 اُرائی تیناؤ۔“

دلرادنا اجازت اٹا اوز ایفہ ناتانیک دعائے ارفسا پرو فیسر پیش تہما۔

پروفیسر ناننگان گڈ۔ دلراد اوز ایفہ تابیٹھک ٹی تو لوک ہرے اسکان تینا صلہ اوشورہ ئے کریر۔ دلرادنا ز ایفہ ناتو دماغ ہمو پرو فیسرنا پیتا تے آن جوڑ مٹس۔ اونا کنڈان تو ہواس۔ اونا ہموکل خواست آک پورا مسر ہرافتے اسہ لمہ کس دادور ٹی تینا مسٹر کن خنگ اوخوانک۔

تعلیم یافتہ اوعز تی ومارس یا مچو بھلومارس ایہن ہم ناراج ٹی زینہ ناعمر آدے اعتراض کرینے۔ جوانو اراس پیسہ کی و آرخ کس۔ داڑے مسئلہ اگہ کس تو پرو فیسرنا اولیکو برام اس ہراڑکن پرو فیسر صاحب تینٹ پارے کہ اونا ز ایفہ منہ تونا مہمان ئے۔ ہم پارہ اگہ ارا نا ذالبول راضی مرے تو زینہ نانت مجال اوگپ کے او خاص کہ اگہ ذالبول افغان کس مرے۔

آخری صلہ بچاس ماریہ ناجندنا۔ ماریہ مالو آن خبر مٹس کہ اونا کالج نا پرو فیسر نصرت اللہ اوڑکن رشتہ انانے۔ ہرا تم لمہ تہ اودے سئی کرے کہ پرو فیسر اودے مونی خوانفنگان تو پک بلکہ اونا اُست ہندا خوانک کہ اونا ز ایفہ تینا تعلیم ئے پورا کے۔ ماریہ ئے جوان سما اس کہ دہنوزینہ داراج ٹی بھاز کم ارے ہرا دے خوانوک او خوانفوکا ز ایفہ نا قدر معلوم مرے۔ کل آن بھلا گڑا داس کہ پرو فیسر تینے آن اسٹ اس۔ نئے تینا دستارے نشاراٹ سلیفو کو باوہ کس اس، نئے نشار تو ن جنگ کرو کو لمہ کس، نئے حسداو کست کرو کو ایرٹس اس، نئے اوڑتو ن چچکی تو لوسی کرو کو ایلم کس۔

پروفیسرنا بخت نا استار پاش منگ تو گرو شک تنگہ شروع کرے۔

دلراد کس تاصلہ اوشورہ ہمواسہ نن ٹی مس ولے پرو فیسر ئے بے طب کنگ کن

مہ چار دے آن گڈ بنگارا او ہو کریر۔

پروفیسر نانیم جوانی ہنداہو نابنگ تون واپس بس ولد اپرو فیسر صاحب نے مہ  
 لکھ رپی لب تخنگا بقایہ خیسن او ارا ناسا مانک ہم اسر ہرافتے پروفیسر بھاز خوشی اٹ ادا  
 کرے او آخر توئے ٹی ماریہ نے تینا ارا غاسر کرے۔  
 واقعی نئے عشق کا فرمیک نئے عاشق بد بخت بس پروفیسر کونو بندغ نا  
 ضرورتے۔

ماریہ نابنگان پروفیسر اٹھ خوش اس دانا اندازے اسے عاشق نئے آن بیدس کس  
 کنگ کپک۔ صفیہ تینا سنجیدگی تینا تعلیم او تینا بھلامنگ نار تہ ناوڑاٹ ماریہ تون گپ او  
 مجلس کر یکہ ولے ہر اصفیہ نے او تینا سینہ ٹی قید کر یس ہرانا دوتے او تفسیس او تہ ٹی لار  
 کنگ نُس کہ داشوم ہراکانا زنداٹ بس او کنا ارغے نیمہ کرے۔ او نا مہرے نیمہ کرے  
 او نا شام ناہنین آ مجلس نے نیمہ کرے او کنے سمے داخر ما منہ وخت ٹی کنا اراے ہم نیام  
 آن نیمہ کیک۔ ولد اہندا حساب اٹ تینا جادواٹ اسے دے چٹ کنا ارغے قبضہ کرو  
 ولے خوانندہ غاصفیہ اودے سخت سخت تینا قابو ٹی کر یس کہ دہن مف داما ریہ تون بد  
 سلو کی کرو اودے اپو کی نا احساس ترفو۔

ایلو کنڈا ماریہ تینا دا پوسکنا زند آن بھاز خوش اس۔ پروفیسر او نا مزاج نا بندغ  
 نُس اس۔ نئے کڑا سے آن منع کر یکہ نئے اوڑا تر ند مسکہ او ایہن ہم ہر عاشق تینا محبوب  
 آ تر ند مسنے۔

صُحب تون ہڑتو ماک او ار کالج آ انا رہ ولد او ارا غابٹرہ او آرام کریرہ۔  
 اوکان گڈ پروفیسر دیتخہ وخت صفیہ او تینا چنا تون گڈ ریفیکہ۔ ماریہ تینا کالج نا کاریتے  
 کر یکہ ولد اشام تون نن نُس پروفیسر ماریہ نا ماسا گڈ ریفیکہ اونن نُس تینا چنا تا ماسا۔ اخس  
 محبت او مہر پروفیسر ماریہ کن کر یکہ اوکان زیات مہر ماریہ صفیہ کن کر یکہ۔ اودے لگا کہ کہ

صفیہ منہ تو نا مہمان نئے۔ ہر اتم صفیہ غاغوراث ہر اکا تو خٹک تا ٹھی مسرہ ولے او بیو سے انت سما اس دا کل پروفیسر نا چالا کیک اسر کہ دا جوڑا نگا صحت مند انگا صفیہ نے کینسر نا مریض نس کرے۔ او دا جوانو مریض نس اس نئے دوائی کنٹکک نئے آرام کر یکہ۔ صُحب بیکہ تینا چنا تون او اراغا بروکا مہمان تون مخا کہ مجلس کر یکہ۔

اُرا خوش و آباد اس۔ ہراسٹ تینا زند تون اختہ اس۔ دے ٹی ارامسہ وار کل او ار مسرہ او تین تو دنیا داری نا مجلس کریریہ مخارہ۔ بھلا گڑا دا اس کہ کل خوانندہ اسر۔ او فتنے معلوم اس انت ہیئت کروئی۔ ہر اندازاٹ کروئی۔ ہراڑے احتیاط کروئی۔ ہر اجاگہ غابشندہ نس کروئی۔ او ہر اجاگہ غاخٹک نس خلوئی۔ ہندا وجہ اس کہ کس کس آن گلہ دار الو ہرا گڑا غان پروفیسر بھاز خوش اس۔

بس وخت وخت سینہ ٹی قیدی آ صفیہ غان ماریہ نا خٹک او خوشیک برداشت متورہ تو او تہہ ٹی فریاد کر یکہ او تفو کا دو تے تینا زور آن خٹا کہ کہ کنے ملبوای ماریہ نا دتر تے کٹیو اودے دا اراغان مڑیو۔ او دیر نئے کنا ارغ تون وخت گدر یفک مخک ولے خوانندہ غا صفیہ صبر تسلی او دلا سہ اٹ اودے نواریفیکہ او چپ کر یفیکہ۔ او ہم منہ دے اسکان خاموش مسکہ ولے دا ہر اتم ماریہ پروفیسر تون خوش خٹک آخنوس۔ او فتنے او ارانگ بنگ آخنوس یا پروفیسر اراغا بروس اوڑکن گڑا اس ہتوس تو اوڑان برداشت متوکہ او ولدا تینا ترندی آ بسکہ او ماریہ بے بددعا تسکہ۔

پروفیسر نا ہڑ تو ماچناک ماریہ تون سنگت مسوسر اولمہ نا جاگہ غا اودے دیدی پاریریہ۔ او واقعی ماریہ ہم پروفیسر نا بھلا مسٹر او چنا تا بھلا ایڑ معلوم مسکہ۔ پروفیسر نا برامے سال نس مس یعنی کہ اودے ماریہ نا کنڈان اسہ مسٹر نس مس۔

ہرانا اپنے ماریہ تینا پسند اٹ ”موہب“ تھ۔ موہب نابنگان اُرانا اُرانا کل خوش اس۔

پروفیسر تو دے اون موہب ناپن آشعر خلک۔

موہب -- موہب -- کناختا شمعے

ہند اڑتون ماریہ پروفیسرے نظر کس ہرا کا تو پروفیسرنا شعر یکدم بدل مسکہ

موہب -- موہب -- نناختا شمعے

موہب -- موہب -- ننان تاشمعے

موہب نابنگان تسلیم او تحریم ہم بھاز گلان اسر کہ دیدیئے چناس مسنے۔

اسکول ناسبقاتے آن فارغ متنگ تون ہڑتو ماک موہب کن رم کریرہ۔

صفیہ ماریہ غان سینئر انگا اس تو چنائے غسل تنگ چرپ کنگ او تنگ نادا کل

کاریمتے او کریکہ۔ ہراڑان ماریہ بھاز خوش مسکہ او اونا عمر نازیاتی کن پین دعا کریکہ۔

صفیہ موہب کن بھاز مہر کریکہ۔ موہب ناباموس پروفیسر ناباموس انا اس ہراڑن او

بھاز خوش اس ولے عادت آن مجبور اے جذباتی آصفیہ پروفیسرنا مہر آتے ہرا تم موہب

کن بھاز خنا کہ تو صفیہئے پچیفیکہ کہ غسل تنگ ناوخت باے تہ دیر آن پُر کر یا چرپ کنگ

ناوختا لنے تہ گٹو کر یا داتو کا تے اٹ ہندن پیڑ تا کہ ساہ تہ کا نہہ او نابنگ ناوجہ غان نا ارغ

ناچناتے آن مرمر سنے۔ دے اون خازگی نابوزان گند کشک ولے داہمو خواندہ غاصفیہ نا

سگ کس کہ تینا خفتے ٹی پمہ تسکہ او ظالم انگا صفیہ ناہیتا تے نظر انداز کنگ نا کوشش کریکہ۔

اصل اٹ دا کل قیدی آصفیہ ناوہم اس۔ پروفیسر بے وس اخس مہر موہب کن

کریکہ ہموخس یا اوکان زیات تسلیم او تحریم کن کریکہ۔ اگہ مچہ بھاز موہبئے ٹیم تسکہ تو

داخس تو او معصوم ناحق اس کہ او اُرانا چکا اس ولے خدا چا نہہ یا ہموذ البول چا نہہ ہرانا

ارغ او نادی آبرام کس کرینے کہ اے صفیہئے انتے بد بسکہ۔

دارئس ماریہ غان گلہ دارئس تو دارئس موہب آن۔ ولے دا جوان ئس کہ او  
ہموڑے قیدئس او ناہیتا تے ہم پین کس بٹوکہ بغیرئس خوانندہ غاصفیہ غان۔  
اِرا سال گدر ییگار زندگی ہم ہموڑ گدر ییگا سا اس۔ موہب نامعصوم آبخندہ  
کل ے مشغول کریس۔ نماذہن ئی داہیت بروکہ صفیہ ے انتے چنامفک؟۔ پروفیسر تو  
اوڑکن ہم مہرکیک اوڑتون ہم وخت گدر یفک ولے ہیبت دادے کہ کنا جندے سماف کہ  
اصل وجہ انتے بلکہ او ہڑتو مارغ اوز ایفہ نانیام اٹ فیملی پلانگ ناپلانگ ئس اس یا پین  
سوب ئس ارے۔ واللہ عالم۔

پروفیسر نارٹمیکو برام نامسٹمیکو سال نا پورا مننگ تون ماریہ ے پین چنائس  
مس۔ ہرانا پنے داجار پروفیسر ”ابراز“ تخوا۔ ابراز ناہنگ تون قیدی صفیہ غاگروگ تمار  
او خوانندہ غاصفیہ غا ترند منگلہ شروع کرے ”دہن ہر سیل کر بد بخت اپوک نانا مقابلہ ئی اِرا  
چنائس او ہم اسہ مارا واسہ مسٹر۔ نا او اونا نیام ئی اگہ فرق ئس اس تو ہندا چنانا اس نے تو خدا  
خلک تینے چنانا بند کریس ولے داسا امرکیسہ۔ نا ارغ ناہرا گڑا تے نیمہ مروئی اس۔  
داسا اوکل ہموفا مریرہ ئی اناس داسا پیرمٹس ولے او ہموڑ پزورانگا ساہدار آم بارڈڈ  
آن ڈڈے۔ دہن ہر سیل کر مخنتا بھلا چرپی تے دا کل نا ارغ ناپییہ غاکو۔ نایا دافک  
ولے کنے جوان یادے ہرا تم اودا ارا غا بس تو بیمارانگا دغو آن بار بار س داسا ازبک آتا  
ڈگی آن بار مس۔ اگہ پین وخت صبر کریس تو ہندا ڈگی خر مہ ئس مریک او نے تون او ارنادا  
چناتے ہم خلا سک کئیک۔“

قیدی آصفیہ ناہیتا داجار خوانندہ غاصفیہ غا اثر کریر ہراٹن اونا مہراول آن  
بھاز کم مس۔ داسا او ماریہ ے پاریکہ تیٹ تینا چناتے غسل ایت چرپ کر ئی ہیل  
کرنیس۔ او ماریہ تون تول بش ے ہم کم کرے۔ بس او اس او نا چنک اسر۔ داسا او

پروفیسر کن ہم بھار مہر کتو کہ۔ اوفتے اوفتا حال آالاس۔ دامنه وختان اونا سنگتی قیدی آ صفیہ تون مٹس۔ ماریہ نارٹمیکو چنائس متو کہ قیدی آ صفیہ کن بخت کس مس اونا سنگتی خوانندہ غا صفیہ تون مس۔

سنگتی نادو آن داخوانندہ غا ذالبول کست کروک اوحسد کروک نیارٹی ناگپاتے آ تماس۔ دامٹہ سال اونا اسہ ہیئت کسے آیقین کتو ولے داسا اے انت پارس داباور کریکہ۔ پروفیسر اوماریہ ناہموزنگی کس ہمومہر آک اسر ہمومجت اس۔ چناک اسر مخنگ کس مجلس کس اوداژن تون اوار پروفیسر صفیہ اوتینا اے چناتے داسکان ہمووڑ مہر کریکہ ولے صفیہ نا اول نامجت سلتوسس اونا مزاج اٹ خرینی کس کس و لے واہم اواحطیاط کریکہ کہ پروفیسر محسوس مف۔ داپنت ہمے بے تعلیم آکست کروک صفیہ نا اس۔

پوسکن چلہ ہلکوسس، موسم بدل اس۔ تو موسم ناوجہ اوچناتا خدمت اوارانا کاریمتے آن ماریہ نابدن سست او کمزور مرسا اس۔ ہرا اونا ذی آبروکاٹل نا نشانی اس۔ شام نا تہونا تیزی تون ماریہ ناٹل ہم تیز مس او ہنداڑتوں باغن تادیک یلہ مسر۔ داٹی اونا قصور الو او مسکین دانازور کا بدن آٹل ے ہرا کا برداشت کنگ کریکہ۔ ہرا اونا صحت صفیہ نا صحت آن بار اس کہ ٹل ے تینا خوکا التو کہ۔

پروفیسر بے وس دا کا ماریہ نا خدمت ٹی آختہ کس ایکا ہوش تاچنا تون اس۔ صفیہ تینا اُرائی تو لوک کس کہ پروفیسر پتیریگا ”ماریہ نا طبعیت خرابے۔ فی اونا ماساز کس تول ای کا و ابازار آن میڈیسین کس ہتیو“۔

صفیہ سوچ خلک کہ قیدی آ صفیہ اودے اڑسک او الپک تا انگ کن ولے پروفیسر نا پیش تمنگ تو قیدی آ صفیہ نا تو اربس ”بشہ ان زر کس خدمتے تا کر“۔



”انت پاسا، نا طبیعت تو جوانے اینو۔“

”کنا طبیعت چٹ جوانے۔ نی بشہ امرکن ای پاوانی ہمووڑ کر۔“

صفیہ بے رضابش مس انا۔ ماریہ نا کاٹھے پلٹے، مچہ دلا سہ تس تہ ولے ماریہ بے سداو بے ہوش تہموک نالا کہ۔ دم نَسے آن گڈ پروفیسر بس اودوائی تے پیس۔

پھگہ کن پروفیسر ماریہ نئے ڈاکٹر آدرے ولے ڈاکٹر واہمو دوائی تے لکھاتس ہرافتہ پروفیسر مالوہلکوسس۔ خیر ڈاکٹر نا خلکو کہ سیلہ غان ماریہ نئے زرنس آرام بس۔

ارادے پین گدرینگار ولے ماریہ نا ہٹل کشتو۔ ہمواسہ وڑا تہموک نالا کہ۔ پروفیسر آن برداشت متوتوانا یعقوب شاہ نا گاڑی کن کہ شارنا بھلا ہسپتال آدیوتا ہموڑے داخل کر فیوتہ۔ داڑے تو طبیعت تہ پین خراب منگلہ۔

پروفیسر نا انگ تون قیدی آ صفیہ خوانندہ غا صفیہ تون پُس پُس کرے۔ ہراڑان پد صفیہ ہرے اسکان سوچ نَسے ٹی گم مس۔ ولداتین تو فیصلہ نَس کرے او ماریہ نا دوائی تے آن اسہ بوتل نَس ار فے اوتینا کرہ ٹی پترینگا۔ میزنا دراز آن زار آ تا ڈبہ نئے کشا او مَسہ چار گولی ار فے زوزو خورٹ کرے اودوائی والا بوتل ٹی اوار کرے۔ دازار آتے پروفیسر خدوارا نامشکا تیکن ایسوس۔

زار آتے اوار کنگ آن گڈ صفیہ ہڑ کرے۔ اودے جوان لکنگ الو ہرا حرکتے او کنگ نَس ولے تہہ ٹی صفیہ لار کنگ نَس او اسہ دم ٹی اوڑ تون ترندی اٹ مخاطب مس ”شرم بفق نے۔ ہمودے زار تنگ آن حلیہ ہرانا اُرانا خوشی تے زار تس۔ ہرانا مست نامہر کروکا محبت کروکا ارغے پلا۔ ہرانا چناتے کن جز مادر وایڑا وایلم پیس۔ ہرا پھگہ نادے آ ناچناتا حقے نیمہ کیک۔ اونے انت سمائے دا بے مرادے پین اٹ چنارو ہرا بھلن منگ تون نے اوناچناتے اُرانا مڑور۔“



## اینو ہم خدا خوشے؟

فاطمہ نابرام آن نیم توئسے ناکچ گدرینگاس۔ تیرمہ نا آخیراس۔ علی مردان نا زانیفہ، علی مردان اوچنکا مسٹر تا نیلہ دالان ٹی تولوک اسر۔

علی مردان نازانیفہ ماشاء اللہ صحت مند و ذالبول ئس اس۔ عمر ٹی ہم بھاز بھلوئس الو۔ اوفائمسہ چنا اسر۔ ارامسٹر او اسہ مارئس۔ اسٹ فاطمہ ئس ہرانا کہ منہ وخت مست برام مس۔ ایلو پنچ سالی آ مسٹر تا نیلہ اس۔ اوکل آن بھلا چنا تا طاہر خان اس ہر روز گارکن دیئی آ اناس۔

ہمودے دالان ٹی تولوک علی مردان نازانیفہ علی مردان آن غاو کر سا پارے ”فاطمہ نابا وہ! داسا طاہر جان نابرام ناتیری تے بنا کر، داجمہ غا طاہر فون کرے تو پاتا برے برام کے۔“

علی مردان چلم ناتمبا خاتے ہڑ تو ماتلف اٹ پلفسا ”خدا ناخو فے کر بختا و، فضیلہ نا عمر زور خلہ داشا نزده سال مرو دہن زو ایڑ مراد جان ہرا کہ راضی مرو تینا مسٹر نابرام کن۔“

علی مردان نازانیفہ بخاری ٹی پٹ تے تخی، چراغ آن دیتخہ گاسلیٹ پٹ تے آ چٹ تر سا پارے ”کنا عمر اٹ سال ئس کہ کنے نے تو رخصت کریر؟۔ مراد جان نا جندنا

عمر اُخس کس کہ ناباوه برام تس تا؟۔ نن تینا وختا د عمر ناپیتا تے کس آن بنٹن۔ داترا نہ داسا بنا  
مُسے۔ ای پین بحث کنگ کپرہ بس ان برام تا تاریخی اَل بر۔ مردان جان مسٹرے بس  
سیلہ ناکارم کن تورینے۔ مسہ سال مس سانکے۔

علی مردان جوان چلم نامسہ چار کش ہلنگان گڈ ورنندی ترسا پارے ”اودے  
اے نامار نادا اسکان سال ہم پورا متنے دبئی ٹی۔ مچہ کاریم کے پیسہ کس کٹے۔ لبے تینا جمع  
کے۔ ولدا برام ایتنہ تا۔ نی انتے اشتانی اُس؟“۔

علی مردان نازائیفہ اولیکو ارغے تین آخلسا ”بس بس داسا دا گپا تے ہش برام نا  
تیار یئے کر۔ کنے آن دے مچ دا اُرانا کاریمک مفسہ۔ مالو فاطمہ تین کن خیرات کریس  
تا کل کاریمتے کریکے۔ ای داسا تینا مچے اُرانا رو فنگ آن دول کنگ کپرہ۔ ان ہت تینا ایڑنا  
مسٹرے امونا خذمتے کے۔ اوطا ہرے ہم پاکہ بس پیست دے کن برے برام کے ولدا  
کاہہ۔ لب کن فاطمہ نال لب آن اُخس رینگا نو ہمو فتنے ایت تا بس پین ہیئت اف“۔

زائیفہ ناپیتا تے آن گڈ علی مردان بیوس مس او برام تا تیاری تے شروع کرے۔  
پوسکن چلہ بلکس کہ طاہر اوفضیلہ نا برام مس۔ او برام ناپست دے آن گڈ طاہر ولدا انا  
دبئی کن۔ اوزائیفہ نا محبت آن زیات پیسہ ناملا اس۔ ولدا دبئی ٹی اونا کل کاریمک نیمہ غا  
سلوک اسر ہندا خاطر ان برامے اوزائیفہ یئے بھلوا ہیئت کس تھو۔

فضیلہ نالہ صُحب تون تینا دکان آنا کہ اوشام نا نماز آن گڈ بسکہ۔  
تا تے دے کس فرہانہ نالہ تون مجلس اس۔ دے کس نور بی بی ناما سا چلم  
کشا کہ۔ دے کس کوٹی ٹی بند ایرانی کش کریکے اوتین کن تچ موغا کہ۔ طاہرے تُو کس  
مُس کہ دپُر اٹکا توٹی اواسہ وار ہم فضیلہ تون گپ کتو۔ فضیلہ کن ہر صُحب ہمو برام نا اٹمیکو  
صُحب اس۔ وختی بش مسکہ خاخرے لگفیکہ۔ الہ چاہ تسکہ ولدا بیروم تے مچ کریکے۔ ہیٹ

تے بیڑا کہ تاتہ کن شیر چا بیٹ کر یکہ خواہہ نس بسیکہ او شام نا چپٹی تے باسیفیکہ تاتہ ے نیاری تسکہ۔ نیاری آن گڈ انیلہ ے غسل تسکہ اودے پچ بینیفکہ تیل کر یکہ زندا کا تہ ولدہ خلق نا چنا تون سکول کن رادہ کر یکہ۔ دا کاریمتے آن گڈ داسا جندا تین کن مونو چائس کر یکہ۔ ارغ نس بچوس تو ہمودے کنگلکہ۔ چاتے آن خلاص کو کہ تاتہ ناتوار بسکہ۔

”پیشیم مس‘ گودی دا اسکان چاغان سیر کپک۔ بشہ دیر ہت دلاک خالی و۔ گلم نس دیر ناف“۔ فضیلہ پیالہ ے نیم الا کہ او بش مسکہ۔

تاتہ ناخرینا لہجہ اودا ہیتا تے آن اوزر نس ہم تینا مونے تاتہ نامونا تر شاتو کہ۔ داسہ دا ہیتاک دا کاریمک اوڑ کن پوسکن سلتوسر۔

ہرا تم ناوڑ آڈو تا پُر کنگ کن انا کہ تو دیر آن گڈ ہموڑے دم نس زندا کہ سوچ خلککہ او تین تو مایوس مر سا پار یکہ ”اے خدا جان! دا انت ظلم نس۔ ہرا گناہ تا بدلہ کنے آن ہلنگ اُس۔ لمہ جان کنے تینا ایلم نامار تون برام تس یا کنے او فتیا بہا کرے۔ اولب نا پیسہ اسرہ یا کنا مزدوری کن لمہ ے ملا؟۔

ہڑدے ڈبو تے دیر کننگان پداو ہندا ڈپک ے تو لوک سوچ خلککہ او تین تون ہوغا کہ۔ او ہندا اوڑ ہو غسا، خزینک شولسا تینا اُسے سبک کر یکہ۔ اُسے خرک کننگان گڈ گڑا داسا ریڑی ے زور او بد حالی اٹ گر کر سا اُرا غا سر کر یکہ او ولد اندن ریڑی گر بسکہ دیر کن او سوار تے کن دیر کر یکہ۔

دیر آن پدمنج نارو فنگ شروع مسکہ۔ اودا اسکان اُراتا مون نارو فینگ کٹو کہ کہ تاتہ ناتوار بسکہ ”طال چاک ہرا دوسٹر؟“۔ تاتہ نا چاتے زوزو دیر یکہ مون تا تنخا کہ۔ ولدہ تاتہ اموڑے دے مونو تو لوک گڑ خلا سا کہ او چغین کر یکہ۔

تاتہ خان ہورک مسکہ تو گڑوئے بیٹ کر یکہ۔ ولد اتندورے لگفیکہ، نئے بیغا کہ۔

سوارہ خان مست ساول رسیفیکہ او پڑونک نئے ٹی ارغاتے دکان آدریکہ۔

ساری چھٹی آانیلہ بسکہ تو اوڑکن اتاتہ کن اواریغ شاغا کہ۔ اوکہ ارغے

خلاص کریرہ گڑاپڑونکے ترشاغا کہ ولدہ جندتے دالان ٹی باخوئس کٹنگکہ۔ کٹنگ ناوخت

آدا ارغا کہ اونا گٹ آن ہندن انارہ دہنکہ تاتہ ناسیلہ پچاتے ٹی کاہہ۔

ارغان گڈ تاتہ تینا کوٹی ٹی آرام کر یکہ۔ اوفضیلہ دالان نامونا رزان تے سرف

خلککہ سلا کہ۔ رزانے آن گڈ مزور آتیاں بار جتا کوٹی نئے ٹی مچہ لیٹا کہ۔ نئے تینا

مریفیکہ دم کشا کہ۔ بدن تاصحب نا کاریمتے آن ٹکر ٹکر مسکہ۔ گڈے ختے آتینا شاغا کہ او

لمہ نا اراے یاد کر یکہ۔

او یاد کر یکہ کہ صُحب تون دے کاٹم آبسکہ گڑا اونا زاونخرہ غاتے اٹ بش مسکہ۔

نیاری کر یکہ۔ کاٹم مشاکہ پیچ بنا کہ ولد اراٹی تولوک تین کن جوڑہ موغا کہ یافراناز استا

ارغانا کہ مجلس کر یکہ۔ سوارہ نا ارغان گڈ خاچا کہ دیگر تون بش مسکہ۔ چا بغیر شیرچا او

بسکوٹ آن کنتو کہ۔ اویرگائی تے آاوفراناز انارہ ریکا تے آگوازی کریرہ۔ ایکان بسکہ لمہ

ئے مچہ ملک تسکہ یا تھو کہ اودے کس پاتو کا۔ اسہ گڑا سے ناغم الوہر گڑا تیار رینگا کہ۔ لمہ نا

ار اراٹس الوجنت نُس اس۔ اوہمودے تے یاد کر یکہ او تین توہو غا کہ۔

طاہرنا بے مہری تاوجہ خان طاہر بیچ اونا یاد آبتو کہ۔ اوطاہرنا لمہ ہم ہرا کہ اودے

داخمہ وار تسکہ کہ اوکسے جوانی اٹ یاد کہ۔

مچہ ہو غنگ آن گڈ ولد اٹش مسکہ تاتہ کن بورہ ناچا نُس کر یکہ تسکہ۔ دوانا پدی

چنکا ماما تینا مسٹر فرہانہ تون انا کہ ناوڑ آدرکن۔

دامنه وختان ناوڑنا دیر ہم آخر کر یس۔ ارسال آن خلق ٹی پھر کتوس۔ فرہانہ  
اکثر اودے پاریکہ ”خدا ننے آن دا خلق والاتے آن ناراض مسنے ہندا وجہ غان پھر کپک۔“  
ناوڑنا دیرے فضیلہ دھن کم خنا کہ تو دعا کر یکہ  
”خدا جان! دانا وڑے اسہ وار تو پُر کر۔“

اوکان خلاص کر یکہ ولدا اُراغا بسکہ تو ساہد ارتے دیراوبے کر یکہ۔ خاچنگ نا  
بیرومتے شاغا کہ۔ شام کن گڑوئس تیار کر یکہ۔ پینے باسفیکہ تو داسا تاتے بسکہ ارغ بسکہ  
اوطن تر سا پاریکہ ”اینو پگہ نامسک او تینی وارغ ئس بسنگ کپہ۔ اُراتے ٹی سرخی اوسینگار  
مسنو۔ کنگنوناچ کرینوبس۔ لمہ تے تاہم ارارے پچار اتیان وار مسنے کہ مسنتے گڑ اس  
رغاموسر۔ تاتہ نازارا نگا پیتا تے ہنگان گڈ فضیلہ اُسٹ ٹی پاریکہ ”خدا جان! داحالان ای  
اسہ گڑ اس ہم تیر و سٹ جوان اس۔“

شام آن دیتھ پدالہ تے دکان آن بسکہ تو گڑا کل اوار ارغ کنگرہ۔

اول اول ٹی شامی تالہ تے فضیلہ پاریکہ ”مسٹر! رزان تے داسا اے  
آرام کر صُحب تون ایہن وختی بش مریسہ ہمو وختا سل تا“ ولے تاتہ ناتوار یکدم راست  
مسکہ ”نما جند تو خاندانی کچٹ مسنرے ولے زن آخہ۔ داسا سلپ تا کہ صُحب اسکان پشیک  
رزان تے چڑ۔ ارارزان کا ئی سلہ تا ولدا خاچے۔ خاچنگان اوسیر کپک۔“

الہ بیوس مسکہ چپ کر یکہ۔ ارامسہ وار بے عزت منگ آن گڈالہ تا اُرا نا اسہ  
گڑا ٹی تینے اوار کتو۔

سال نا آخر اس کہ فضیلہ نادعا قبول مس۔ شام تون پھر شروع مس او پنچ دے  
اسکان پھر چکا۔ سال آتا خشک انگا پٹ آک دہ دوا نزودہ دے اسکان دیر پوشسا کریرا  
فضیلہ دے دعا تر سا کریر۔

ناوڑخن تے اسکان پراس۔ دیرنا کر مٹی ناوڑنا کرود آک ہچ خکتورہ۔ خلق والا گل اوبال اُس۔ سہادرک گوز اتیان دیر کنگرہ۔ چناک ریکا تے آ لغشتی کریرہ۔ ورناک ٹٹی ءے شروع کریر۔ پیرانگا گ دے ٹی مسہ چار وار ملکا تے آ انا رہ لھ بند کریرہ۔ بزغراک تینا خاہوت آتون سندھ آن بسر کہ داسال خیراٹ آباد مرک۔ فرہانہ وار دما تین تو پاریکہ ”آخر خدا جان نئے آن خوش مس“۔

فضیلہ وار دما ناوڑ آ انا کہ۔ ناوڑنا کر مٹی نا اندازہ خلککہ تو خوشی آن رم اٹ اُرا کن بسکہ۔ فرہانہ نا سمجھ آن پشن کس کہ فضیلہ انٹے ناوڑنا پر مٹنگ آن داخہ خوشے؟۔ دیر تو مالوہم ناوڑ ٹی کنگ ناخاس اسکہ اگہ وختس دیک کوسر تو خلق نا یوب ویلے ملارہ دیر ترہ۔ پھر آن پست دے گدرینگا س۔ فضیلہ تاتہ غان اجازت خواکس کہ اولمہ کن تینا بھازز ہیر کرینے ارادے کن انگ خوانک۔ تاتہ تا فوراً انکار کرے کہ فی اناس دا ارا دے اُرا نا کاریمتے دیر کیک؟۔

فضیلہ اُسٹ ٹی ورنڈی تس ”کنے آن مست دے کریکہ تا“۔

خیر ولد ا فضیلہ الہ ءے تینا پارے تو الہ تہ تیٹ درے سر کرے تہ۔ کسری تسلی ہم تس تہ کہ ای نیکن مُسہ دے آن گڈ بریوہ۔

مُسہ دے اسکان فضیلہ تینا لمہ تون مس۔ دامسہ دے ٹی او اسہ وار ہم تینا لمہ تون تاتہ نا ظالمی تابیانے کتو ولے فضیلہ نا لمہ کل گڑا تے آن واقف اس۔ اودے فرہانہ ہر گڑا غان سٹی کر یس۔ تاتہ نا تہ ظلمتے آن فضیلہ نا صُحب اویگہ نا کاریمتے آن ہر گڑا غان۔ مسہ دے آن گڈ فضیلہ نا الہ بس تو فضیلہ لمہ غان تینا رخصت کرے۔ چہرہ تہ پریشانی تے آن دڑینگا س۔ توار تا بیوسی آن الاج ٹی بسکہ خنک تا دیری مسوسر۔



”لمہ جان حقاً تے تینا بخشس۔“

دا او لیکو وار اُس کہ فضیلہ تینا لمہ پے پارے ”حقاً تے بخش“۔ لمہ تہ سوچا کہ بلکہ داسا تینے کنا مسٹر آخہ مہمان اُس سجھک۔ بخشندہ کرسہ پارے ”کنا کل حقاک بخشو کنا مسٹر اللہ نے خوش کے۔“

بچو تہو اُس چکا کہ شام نا اذان ہم خوک اس۔ کسری فضیلہ الہ تے تینا پارے ”ماما جان! اگہ وخت اُس ای ناخذ متے کنگ کتوٹ تو کئے بخشس۔“

ماما ناخنک خویز کان پُر مسر۔ تینے شرمندہ محسوس کرسا جواب تس ”کنا مسٹر! اخس فی کنا تینا تاتہ ناخذ متے کنگ اُس داخس تو فاطمہ ہم کتوسس نن کن۔“

ماما فاطمہ نا پن آن گڑ اس یاد بس تو حوال ترسہ پارے ”نا تاتہ بھار پریشانے۔ اسٹ اُس حوال سر کرینے کہ فاطمہ تون تاتہ او ارغ تا بھار ظلم کیرہ فاطمہ دے او نن بس ہو غک۔ نن نیت کرینن کہ پھگہ کانہ او نا کنڈا فی انیلہ نا او تینا خیا لے کیس نن اللہ کرے شام اسکان واپس برینہ۔“

فاطمہ سوچ کسے ٹی گرفتار مس او کرار کرار پارے ”مرے ماما۔“  
صُحب تون علی مردان او زانیفہ تے وختی سر بلکر۔ فضیلہ اُرانا کارم تون اختہ اس۔ انیلہ اسکول آنا سس۔ ہمودے مچادے فضیلہ ناخننے آن خویز کاک بروارہ۔

انیلہ اسکول آن بس تو او دے ارغ تس او خاچھے۔ پیشیم نا وخت اس کہ فضیلہ ڈبوتے ریڑی ٹی تنخا او نا وڑکن سر ہلک۔ انیلہ تُغان سما کرے فضیلہ کُل کوٹی تے ٹی پٹا ختو تو فرہانہ ناما سا انا ہریلے ”اڈی ہرا دے؟۔“

فرہانہ ”اڈی تے نا اول خنٹ نا وڑکن انا کہ۔“

انیلہ ”کنے ہم درناؤڑ آ“۔

فرہانہ انیلہ نامونے سلا گلاس کس دیرتس تا او دوو ٹی ہلسہ ہڑ تو ماک سر ہلکر  
ناؤڑ کن۔ فرہانہ او انیلہ ناؤڑ آ سر مسر تو فرہانہ چیمانٹ کس خلک ہو غسا انیلہ ے راہی  
کرے ”ان ابائے تو ار کہ پاتہ زوبا“۔

دم سے آن گد فرہانہ نابا وہ بس تو خنا کہ ڈبوک ریڑی ٹی خالی تخوکو۔ جوڑ اس  
مسٹری او چیل کرو دنا بوز اتمو کو او اسہ لاش کس ناؤڑ نانیما سکون او آرام ٹ وھنگہ۔  
فرہانہ نابا وہ اُسٹ ٹی تین تو پارے ”اے مولا آخر فضیلہ ے آرام نصیب  
مس“۔

دم سے آن گد خلقیک بسر فضیلہ نالاشے کشار۔

دے کیہلنگ ناوخت اس کہ انیلہ نالمہ باوہ ہم رسیفیر، مچی ے خنار تو ابکہ مسر۔  
فرہانہ نابا وہ سئی کرے تا تو انیلہ نابا وہ ناخیدا ک داخ ٹی ہندن بر وار دنکہ جون ناؤ ٹی داشی  
ارغ والا تا بر وارہ۔ تاتہ تہ بس او فضیلہ نالمہ ننا ما سا چپ تو س۔

خفتن آن مچہ مست اس کہ زینا غاک میتے دریر قبرستان آ۔ فضیلہ نالمہ اسہ  
گیرگانے ہو غوکا، خنک تا خیسنا زار چوبہ غان بار مسر او دے ہو غنگا خنا تو فرہانہ ناخنک ہم  
تینا ہمس کن وھنگہ شروع کریر۔ ہرخن پالن اس ولے تاتہ ناتہ خنک ہندن صاف اسر  
دھنکہ فضیلہ ناخن۔ او نامزور نا کہنگا ہم او ناخننے آن اسہ پڑی کس تمھو۔

فرہانہ نیازی تا ما سان بش مس کہ کا و فضیلہ کن یسین کس خوانو کہ ہنداڑتون پر  
ناثر برہ مس او فرہانہ دا قیامت ناند ارے ہر او خدا نا کرو کا پھر آنظر کس شا غساخننے آسمان  
ٹی خلک او تین تو پارے ”اینو ہم خدا خوشے؟“۔

## ذالبول اودون اسہ وڑو

باقی دا خاطر آن پریشان الو کہ نازیہ اوڑتون محبت کپک یا او نا محبت آن انکار یے۔ اودے فقط دا غم کنگلہ کہ نا محبت نا تول اُنتے متوزن اف۔ اُخس محبت او نازیہ تون یکک اُخس اوڑکن مہر یکک اُخس اودے مارک اودے یا دیکک نازیہ اُخس باقی کن کپک۔ دا نا سوب یے ہم اسہ دے باقی نازیہ غان ہر یفے ”آخر وجہ اُنتے نا محبت کنکن زیات متنگ اف؟۔ اُنت کنا محبت ٹی پختگی اف یا ای نا اُستے آزار کرینٹ ہرانا کئے احساس متئے؟“۔ ہرانا جواب ٹی نازیہ ہندا پارے کہ ”دہنو پچو گپ کس اف۔ دا کل نا وہم یے۔ ای نے تو بھاز محبت کیوہ نی کئے بھاز دوست اُس۔ بس کنا عادت ارے ای تینا ثبوت محبت کن ہر دے محبت نا اظہار کنگلے ضروری سمجھیرہ۔ اودا گڑانا اقرار نا انت درکار کہ دے کس نے سمائے ای نے تو محبت کیوہ نی کن تو محبت کیسہ“۔

نازیہ نا دا ورنڈی آن باقی یے ڈہنی سکون کس رسیگا کہ ولے دا سکون بھاز ہرے اسکان اوڑتون اڈکتو کہ ہرانا وجہ زرینہ اس۔

زرینہ باقی نا ہمسایہ اس۔ اوچکی نا سنگت ہم۔ زرینہ باقی نا سنگت عتیق تون محبت کریک۔ او تینا محبت نا کلو تے پیغاماتے باقی یے تسکہ سرکننگ کن۔

زرینہ او عتیق نامحبت ءے چار یا پنج تُو مٹس ولے دامحبت ہندا خہ در پختہ اس کہ سالاتا معلوم مسکہ۔

عتیق نا خلق زرینہ نا خلق آن جوان ٹکرس مراس۔ اوقتا اولیکو ملاقات دُون آ مس۔ ہرا ہڑ تو ما خلقا تا نیام ٹی اس۔ اوکل خلقیک تینا کنگ کن ہندا کہ دیر دریرہ۔ اوقتا محبت نا آغا ز ہندا دُون آن مس ولد باقی نا قاصدی نا سوبان اوقتا ملاقاتاک مرسا کریا و محبت ورنامرسا کرے۔ داسا او عشق نا آخریکو منزل آن زرس مراسر۔

زرینہ زہیری نا دوا آن ہفتہ ٹی اسہ ارا پیغام ضرور باقی تون راہی کریکہ اوباقی عتیق ناسنگی نا خنتے کن دا کاریے بھاز شوق اٹ کریکہ۔ باقی تین تو دمام سوچ خلککہ کہ زرینہ نامحبت امریکدم عتیق کن دہن زیات مس۔ شروع ٹی تو ارا مسہ ہفتہ لگا زرینہ ءے ولد عتیق ناسنگی نا تحفہ ءے قبول کرے۔ او اول اول ٹی محبت نا پیتاک محبت نا ٹیکیک، ملاقات نا خواستاک کل عتیق نا کنڈان بسرہ۔ او بھاز انگا زاری او اصرار آن پدرینہ اوفتے قبول کریکہ۔ ولے مسہ تُو ٹی دا منظر آک غٹ بدل مسر۔ داسا محبت نا سلام کس مرے یا ملاقات نا استخوانی کس کل زرینہ نا کنڈان کارہ۔

ایلو کنڈا او نامحبت اس ہرا دے ارا سال مسکہ ولے ہمواسہ رنگ ٹی اس۔ انت گڑ اس مرو س اوڑان پھل مسکہ گڑ اولدانا زینہ نا کنڈان جواب رینگا کہ۔ اودے نازینا دا بے رخی، کم مہری او سنجیدگی بھاز تنک او بیمسرک کریکہ او ہندا نا سوبان او چڑہ سوچاتے ٹی غرق سٹی چکر کریکہ۔

اسہ دے پیشیم نا پاسا زرینہ باقی نا ارا نا مونان گدرینگا او نیام نا کوٹی ٹی نگاہ شاعا تو خنا کہ باقی تینا تو لوک تینا دونلی آ تو فکے صاف کنتگہ۔ سیدھا کوٹی کن مون کرے او

درگہ ناما سا بس سلیس۔ زرینہ ناسیجا باقی آتما تو باقی خنتے تو فک آن ارفساہرا او میزبانی آ  
دودے ادا کر سا پارے ”برک تہہ ٹی“ دے آسلوک اُس۔

زرینہ زُو رُو اراتا مونا دا نگ اینگ چک خلک کہ کس بنگ تواف ولد اشتافی  
پڑزہ مر سا پارے ”باقی! نی دا تو فکے ہنداڑے اے اوبخہ ان عتیقے سئی کر کہ زرینہ  
خوانک نے او پاتہ تینے داسا ہر حال اٹ سر کر۔“

باقی تو فکے راستی پارہ غاتخسا ”انت مس داخہ پریشان اُس؟“۔

”پچڑہ متنے کنے۔ بس بشہ زُو ان نی اودے بنگ“ زرینہ اُرا نا مونا نگاہ کس  
اڑسہ پارے۔

باقی نا اُست دک دک شروع کرے او بے چین مر سا اسہ وار ولد ہر فے  
”آخر ہیبت انتے کنے پاو کنے آن ضرور ہر لیک“۔

زرینہ گداٹ خیدا تے پاک کر سا ”اینو صُحب تون نا اُرا غا مہمان بس۔ اوفقا  
انگان گد سمیرہ کنے پارے کہ او کنکہ رسال بسوسر۔ باقی نے تو معلومے کہ ای بغیر کس عتیق  
آن کس تون برام کپرہ۔ بس نی ان اودے سئی کر او پانہہ تہ کن تو ملے“۔ باقی زرینہ نا  
پیتا تے بنگ آن گد کرار کرار بش مس او خاموشی اٹ ایلو خلق اکن سر ہلک۔ زرینہ ارامسہ  
وارر ندٹی تا تو ار کرے کہ سائیکلے تینا ارف زُو سر مر یسہ ولے زرینہ نا پیتا تے آن باقی  
ے تینا محبت یاد بُسس۔ بس محبت نا سوچا تے ٹی گرفتار او تینا ذہن ٹی تین تو پڑا کہ

”داخہر محبت۔ داخہ محبت زرینہ عتیق تون کیک۔ امر آخر امر دُہن زُو اوفقا

محبت داخہ وڈھا کہ اینو تینا رشتہ نا پن آن زرینہ نا اُست او بدن ٹی خاخر کس لگا اودہنو  
زراب کس کہ دا پشیم نابسنہ تہو ٹی پوغ انگا ڈغارے اونت شپا دسلوک اس او اودے بچ

محسوس متو۔ او ایلو کنڈا کننا نازیہ ءے ہرا بس رسی وڑ پانک کہ ای نے تو محبت کیوہ ولے  
ثبوت اف۔ تانکہ ای اودے مار پرو کنے مار پک۔ تانکہ ای اودے ملنگ نا پراوتینیٹ  
پاپک او اگہ وخت نس برام نا پاوہ تہ تو پانک دا اسکان بھلو وخت نس ارے۔ عیش کے  
عتیق کہ زریںہ اوڑکن چٹ گنو کے۔ چٹ جنونی و عشق نس کیک اوڑتون۔

زریںہ نا پیغامے سرکننگان گڈ باقی ولدا ہمو رندا تے ارفسا ہمو سوچا تے خلصا  
تینے اراغا سر کرے او شٹ گن ناصفا ئی اختہ مس۔

دانیا م ٹی پانزدہ دے نا کچ گدرینگہ کہ اسہ دے دیگر نا نماز آن گڈ عتیق باقی نا  
رند ٹی بس او ہڑ تو ماک مجلس کر سا ریکا تے کن مون کریر۔ عتیق خوشی خوشی مستائی ہلنگ نا  
ڈول پارے

”یارو! کاریم مس۔“

باقی نا ذہن آن زریںہ والا ہیبت اناس۔ حیرانگی اٹ ہر لیفے ”ہرا کاریم؟“۔  
عتیق پارے ”کنا او زریںہ نا سانگ نا یارو“۔  
”امر؟“ باقی خنتے کشسا ہر لیفے

”یارو! دا اراہفتہ نا ئے اراوالا تے زاری کریٹہ ولے کس رازی متنگ کن تیار الو۔ ملخند و  
گڑ المہ ءے اللہ گمارہ پارے مرے کانا نے کن تو ولدا باوہ سک بسوسر زریںہ نا اراغا۔ ہندا  
جواب ملاس کہ نن مشورہ کین گڑا نھے جواب نس ایتہ۔“

باقی ”مطلب دا اسکان جواب تنو“۔

عتیق ”آخا“ ولے کئے سمائے جواب ہوئے۔

باقی گلوئی آمو نے بڑز کر سا ہر لیفے ”اوامروا؟“۔

”یارو! زرینہ تون دروشام تون کنا ملاقات مس۔ او پارے امی تینا لمہ ے  
 پارینٹ کہ امی ہنداڑے سانگ کیوہ نہ تو اچ کپرہ۔ داپیتا تے عتیق بھانخر اٹ پارے۔  
 باقی ے تینا خفتے آباور بتو۔ سوالی آختے اٹ ہرلیف ”زرینہ تینٹ تینا دوئی اٹ  
 داگڑا تے پارینے اوہم تینا لمہ تون؟“۔

عتیق بخندہ کرسا ”ہو یارو! ہندا دے تو عشق پارہ۔ اودا کل ہمونا اثر اکو“۔  
 داکان گڈ باقی ولدانا زیہ نا خیالاتے ٹی گم مس۔ عتیق اونا ماسا تو لوک ہرے  
 اسکان اوڑ تون گپ کرسا اس ہرانا جوابا تے ٹی اوبس کاٹے ہواٹ سرفیکہ یاد روغ نا بخندہ  
 نس کریکہ۔۔ ولد اشام نا اذان نا تو اورتون ہڑ تو ماک بش مسراوسر ہلکر مسیت کن۔  
 دادے آن گڈ جوان دہ دے پین گدرینگہ تو زرینہ او عتیق نا اُستاتا مراداک  
 پورامسر او اوقسا سانگ مس۔ دا خوشی نادے ہم باقی کن غم نسے آن کم الو۔ دا غم ہمو اونا نازیہ  
 اس ہرانا باروٹ او ہریل سوچ خلککہ کہ کنا اوڑ تون ہر اتم سانگ مرو۔ او ہندا ڈول اٹ  
 تینے پریشان کریکہ۔

باقی نا دا غم دا اسکان او ارمٹوس کہ عتیق او زرینہ نا برام مس۔ اودا برام باقی کن  
 تیار و قیامت نس۔ او تین تو پاریکہ ”باقی دا برام نے کن شغان نسے شغان۔ دزکل  
 خلقیک نے آخمنگو۔ خفتو خفتو انت پارہ نا باروٹ کہ نے آن پدمحبت کروکا والا تا برام مس  
 ولے نا محبوب دا اسکان نے تو تینا اُست اٹ ملاقات کس کپک“۔

تینا محبت نا انجام نا خیالاتا دو آن اوچٹ تینا مس۔ بس وخت وخت مرآتے  
 عتیق تون ملا کہ او ایلو مرغنادے تے ٹی تین تو سوچ خلککہ ناوڑے چکر کریکہ دُون آنا کہ  
 یاریکا تے آلیو کنگلکہ۔

ہفتہ اراہفتہ نازی آنازیہ تون ملاقات تہ مسکہ تو اُسے تازرئس سکون کس ملاکہ  
ولے ہر وار آن باردا اسکان برام ناسوال ناورندی ٹی نازیہ ہمو پیٹے کریکہ ”دا اسکان  
وخت ارے۔ انت اشتانی نئے“۔ اودا کان گڈ باقی پڑزہ انگا تواراٹ ہمو سوالے ولدا  
کریکہ ”اگہ نے کے کس رسال بس گڑا؟“۔

”نی خلیپہ کنکن کس بفک دہن زو“ نازیہ ہندا جوابے تسکہ اوچپ کریکہ۔  
باقی عے محبت ناغم دے پد دے آن دیرکنگ اس۔ اسہ دے شام تولیٹوک ابوبا  
اودے خیال بس کہ ای عتیق آن انتے مشورہ ہلپر؟۔ داباروٹ اودے زیات معلومات  
مرو۔ امرزو تینا محبت عے پختہ کرے اومنہ توٹی برام ہم کرے اواسہ ای اٹ کہ سالاک  
لگا رو لے محنت دا اسکان خامہ ئے۔ اویقیناً کنے کسرئس روغامو۔ داخیلان اونا مونجا انگا  
اُسے ہم زرئس خوش مس۔ اوخاچگان مست تین تونیت کرے کہ پھگہ صُحب تون وختی  
کاوہ عتیق نالملاقات آ۔

نیت ئے برقرار خسا صُحب تون وختی بش مس، غسل کرے، چاکنگ اوسائیکل آ  
سوار مس۔ دم نئے آن گڈ عتیق نار انا خیرا بریک خلک او عتیق ناپٹ ارامسہ وار ہکل  
کرے۔ عتیق توار آن درست کرے کہ باقی ئے۔ چپلاتے نت ئے ٹی کرے اوانا مونا  
تہ ”سلام یارو“۔

باقی ”وعلیکم السلام! امر فارغ اُس؟“۔  
عتیق چپکو دوے سائیکل نامرغ ٹی سخت کرسا ”ہو یارو خیرے داوختانہ کہ  
قربانی کن دیسہ کنے؟“ اوزور آن مخنگ کس خلک۔  
باقی اونا جواب ٹی چٹکو مخنگ کس خلسا ”نہ ایلیم، ملا رازق پانک کہ بھلا ساہدارنا  
قربانی مفک“۔ اودا جار ہڑتوماک اوار مخنگ کس خلکر۔



باقی سائیکل نامونے اڑسا او عتیق ءے پارے ”سوار مہ کان“۔

عتیق پین سوال کتو اوسوار مس۔ جوان ٹکڑ کس انگان گڈ باقی چتکو ریک نُسے نا  
ماسہ اڈ کرے۔ ہڑ تو ماک دڑینگار اور یک آتوسر۔

عتیق ءے محسوس مس کہ باقی ءے کاریم کس تہمانے نہ تو داخہ وختی اراکان بسکہ  
ہندڑتون یکدم ہرینے ”یارو! خیر توارے کہ صُحب تون وختی کنا کنڈا؟“۔  
باقی دم کس چپ کرے ولدا کرار وگٹ نُسے ٹی پارے ”ایلم! بھاز پریشان اُٹ“۔  
عتیق یکدم ”انت سے کن یارو اللہ خیر کے“۔

باقی بیوس انگا خفتے اٹ عتیق ناکنڈا ہر سا ”یار نازیہ نا وجہ غان“۔ عتیق گیگ  
کرے ہیت نُسے کن ولے باقی پیتے مونی درسا پارے ”کنا کاٹم بچ دا نا محبت آتمپک  
یار۔ دا بھلا وختان ای اوڑتون محبت کیوہ او ہم گنو کاتے آن بار ولے کنے ہندن لگک کہ  
اودے بچ محسوس مفک۔ اودے بچ احساس منگ اف۔ اودے کنا دیوانگی نا بچ سہا تمنگ  
اف۔ کنا مہراو محبت اودے بچ نظر بنگ اف۔ داسا ایلم نی کنے مشورہ کس ایت ای دہنو  
انت کاریم کس کیو۔ ای اودے انت ثبوت کس ایتو۔ ای اودے پین امر پاو کہ او کنا مچا  
دنیا ءے کنے او نا ضرورتے۔ بایدے او کنا مرے او کنا محبت نا قدرے کے۔ او ہم کن تو  
ہندو محبت کس کے کہ کنے لگے واقعی او کن تو محبت کیک“۔

عتیق ءے باقی او نازیہ نا عشق نا خبر مالو آن ہم اس اودے دا ہم سما اس کہ باقی  
نازیہ تو اٹھ محبت کیک۔ سنگت نا داوڑ دی آقصہ ءے اُسٹ نا ارامانے بنگان گڈ او نا اُسٹ  
ہم خراب مس او بغیر پین ہیت آن بش مس سائیکل ءے جب کرے اوسوار مس۔ باقی نا  
کنڈا ہر او خفتے اٹ اشارہ کر سا پارے سوار مہ۔

باقی حیران مس کہ دادے انت مس۔ ہر یفے ”آلہ آرانگ؟“۔  
 عتیق ”نی سوارمہ یارو، کانہ جاگہ کس۔“

باقی ہم پین ہیئت کتو سوار مس۔ عتیق اوکان پیڈل خلسا سیدھا انا دُون ناماسا  
 اوہموڑے اڈ کرے۔ سائیکل کے چاھے او باقی کے پارے ”برداڑے دون نا ذی آ“۔  
 باقی عتیق تون اوار دُون نا ذی آتوس او خوتی اٹ عتیق ناباغا ہنگ اس کہ انت  
 کس پاک۔ عتیق اسے نظر کس دُون آہر اولد باقی آن ہر یفے ”یارو! بلا ایرے چاسے؟“۔  
 باقی ہم بھاز سوچ خلنو انتے کہ دا ارا خلق ٹی بس اسے بلا ایرے پنی کس اس ”اے یار باش  
 بلا ایر“ باقی خلق کن اشارہ کر سا پارے۔

عتیق کاٹھے سرفسا ”ہو ہمو۔ یارو! نے سمائے ہر اتم ریک نا دُون دڑا تون چار ارا  
 ریک آن بیٹ کرین او پٹ کے بسن۔ مسہ چار ٹوشیکشکر نا ناوڑ ناماسہ تنبو خلکن ہموڑے  
 وخت گدر یفین کہ ہندا ناوڑ نا دیتے آ وخت گدر یفن ولد اپین جاگہ کس مون کینہ۔ اسہ دے  
 مسافر کس موٹر سائیکل کسے آ بس او تنبوتا ماسا اڈ کرے۔ بلا ایر اڑ ساتے او حوال کرے تہ تو  
 معلوم مس افغانستان کن انگلہ ولد اسر ہنگ آن مست ننے پارے کہ فلان جاگہ اسہ دُون  
 کس ارے نم ہموڑے انبو تینا تنبو تے خلنو دا ناوڑ نم تون بھاز وخت وفا کپرو۔ یارو اودون  
 ہندا دُون اس ہراڑے نن تو لوک اُن۔ بس ولد اباوہ کنے او بلا ایرے ہمو مسافر تون راہی  
 کرے کہ انبو ہمو دُونے ہر بو۔ نن ہرا وخت کہ دا دُون آ بسن تو دُون بارن بارن اس۔ تہہ  
 تہ بوچ آن پُر اس ذی آتار یک تماس۔ مسافر ننے دُون کے نشان تے او بلا ایرے پُہہ  
 کر سا پارے کہ دادے ختو دانے زندگی بر بس کرو۔ مجبوری نا وختاک اسرای او بلا ایر ولد  
 تنبو تے آ انان او اینگان تین تو مسہ چار ورن اپین بسن۔ دُون نا ختنگ کن چٹ، کلنگ

بالٹین، بیل او او فتنے تو اور تینا چا او چلم ناسامان تے بڈ کرین ہین۔ سوارہ نارغاتے ہم  
 وختی تین تو ار فینہ پیسنہ گڑ اولدا انگ ناضرورت تمیتو کہ۔ صُحب آن کاریم کرینہ اے دیگر  
 اسکان۔ کرسا کرسا آخر خدا ناکمک اٹ دُون تیار مس او دیر آن پرمس۔ او مولانا فضل اٹ  
 دیر ہم بورہ غان بار ہنین اس دہنکہ اینو ہمہ ہینے۔ بس ولدا ایکان بیٹ کرین او داڑے  
 بٹسن۔ دوانا ہر کس تین کن خشت تڑے او کوٹی تھے۔ وخت تیر مرسا اس او وخت تون ایلو  
 ریک او پٹ آتا مخلوق سئی مرسا کرے او ہنداڑے برسا کریر اراتفسہ کریر۔ یارو، ہمواسہ بارنا  
 دُون ناپالنگان اینو ارا خلق آبادو ہرا فتنے ٹی نم ہمارا رے۔“

باقی مچا قصہ بنگان گڈ پیشانی بے تینا کوس کرسا پارے ”ایلم! دا خلق نا  
 قصہ تو کنے ہم معلومے۔ ای ہرا گڑا نانے آن ہر بیفیٹ او نی سٹی پٹ اوریکا تے اٹ  
 لگاس ڈرینگاس۔“

عتیق جنک نس خلک اوخسا محسا پارے ”یارو کنے نا ہیئت یادے نی پریشان مفہ۔  
 نا ہیئت نا جواب نا پریشانی نا حل ہندا قصہ ٹی بے۔ گپ داوڑے کہ دُون ناختنگ آن گڈ  
 ہرا تم دُون تیار مس تون خوشی آن ہمودے ہرے آرا کن سر ہلکن۔ کسری ای او بلا ایرتین  
 تو مجلس کرسا اٹسن۔ مجلس دنیا داری نا گپاتے آن شروع مرسا مرسا ذالبولاتے سر مس تو  
 ہمودے بلا ایرکنے اسہ ہیئت نس پارے او نے سمائے ہمو ہیئت نا وجہ غان زرینہ کنامس۔“  
 ہندا ہیئت نس کہ باقی ناخنک یکدم ملنگار او خنتے ڈک ڈک کشسا ہر یفہ  
 ”ہرا ہیئت؟“

عتیق ولدا دُون آنظر نس شاعسا ”یارو! نے خبر مرے بلا ایر بھلودانا و بندغ نسے  
 او ذالبولاتا باروٹ ہر گڑاے چانک۔ ہمودے نن داکان سر ہلکن تو کسری ہیئت ہیئت ٹی  
 کنے پارے ”ماڑو نے سمائے زالبول او دُون اسہ وڑو۔“

ای اونا پیتے پُہہ متوٹ او ہریفٹ ”امر؟“۔

اوکنے پوکرسہ پارے ”ماڑو، اولیکو دے نن بُسَن دُون نا حالتے خناس امری کُس خازگ بوچان پُر۔ پِشن آن ریک اومشے ٹی ڈب۔ مرآن ویران ویران خننگا کہ واہم نئے آئس دوست اس۔ نئے اخہ وڑا کہ دا دُون۔ ایتنے کہ نازندگی نا بھلا مقصد ہندا دُون اس۔ نئے دُون ٹی نازندگی نظر بنگ اس۔ جہان نا کل گڑا تے ان نئے زیادہ عزیز دا دُون اس ولے دُونے نن زکُس ہم دوست الون۔ دُون نا دوستی، اونا محبت نن توہمو وختان زیات مرسا کرے ہر اتم نن اونا جسم ٹی پتیرنگان۔ اوڑتون تینا رشتہ کُس جوڑ کرین۔ تینا روح او بدن ے اُسٹ کرین۔ او تینا محبت نا ثبوتے او ٹی الاان۔ ہر اتم او ٹی دیر بس تو اونا صورت کلے بدلینگا، خناس امر صاف صاف خننگا کہ۔ شروع ٹی اودے نا بنگ اوڑ تو ولدانا خٹکی اوڑ تو ولے نن اوڑتون محبت اٹ پیش مرسا کرین اوڑکن مہر کرین اوہروڑٹ تینا محبت ے اوڑکن زیات تنخان تو آخرے خناس اونا محبت ہم نن کہ زیات مس اودا سا ہر س ہندا محبت نا وجہ غان اونا کلے تینا ماسا نا ڈغارا آباد کیک۔ تینے آن خٹک تنخک او قیامت اسکان ناخذ متے کیک“۔

باقی جوان غور ٹی ہر پیتے بنگ اس او پُہہ متنگ اس کہ عتیق انت پانگ خوانک عتیق نا ہیئت نا کنگ تون زوڑو دُونے اسہ نظر کُس ہر او ولد اخلاقا تا کنڈا نگا ہے شاغسا عتیق ے کینو لہجہ سے ٹی پارے ”اوایلم واقعی، دا دُون تو بھلو بند کُس آباد کرے تینا ماسا“۔

عتیق نور آتینا ہیئت ے مونوی درسہ پارے ”یارو! ای ہم تو ہندا گڑا نا پاوہ اچھا راست پانہہ ولد ای بلا ایر آن ہریفیٹ کہ ای نا پیتے جوان پُہہ متوٹ کہ ذالبول اود دُون اسہ وڑو۔ تو بلا ایر خننگ کُس خلک اوکنے پارے ہرا وخت ورنامُسس گڑا داپیتے پُہہ

مریسہ۔ اودانا سما واقعی کئے ہمو تم مس کہ کئے زریں تون محبت مس اوزرینہ ہم کئے ہندن  
بے چکار کر یکہ ہراوڑ نازیہ نے تو کنگلہ ولد ای بلا ایر آناٹ اوڑ تون تینا اوزرینہ نامحبت نا  
قصہ نے کریٹ اواد دے ہندا پاریٹ کہ زریں کن تو ملک ملاقات کیک ولے اونا محبت ٹی  
خلوص اف کہ کنا اُست جم مرے۔ ولد بلا ایر کئے پُہہ کرے ”ماڑ و ہرا تم عشق ہڑ تو مانیمہ  
غان پختہ مس تو اونا ارا منزل مریرہ یا او تینے حاصل کیرہ یا ہڑ تو ماک تینے ختم کیرہ ولے نا  
عشق اسہ نیمہ غان جنون ٹی اے او ایلو کنڈان خامہ اے۔ دانا او لیکو حل دادے کہ اونا  
کنڈان عشق نا خاخرے تیز کر زرا بے خیسُن کرتا کہ او گنوک مرے۔“ ای ہر بیٹ کہ او  
امر؟۔ ای امر کنگ کیوتہ؟۔ کئے پارے ”دانا مسہ طریقہ و۔“ او لیکو دادے تینا عشق اے  
ہندا خہ پختہ تخ، ہندا خہ زرا بے بھلن کر کہ دانا تریشک آک اوڑ اسر مریر اواد دے نامحبت نا  
احساس مرے ولے دا گڑا بھلو سچائی کس خوانک ہراڑے بھاز وخت ہم لنگ کیک۔  
ارٹیکو کسر دادے کہ او دے تاو بیت کر، اونے کن گنوک مریک۔ نا حاصل کنگ کن دنیائے  
اسٹ کیک ولے اوڑا خطرہ بھازے داملاک پیسہ کن تاو بیت تو کیرہ ولد اپیسہ کن تاو بیت  
کرو فک نا پن اے ہم ہندا پھاش کیرہ۔ مسٹیکو طریقہ ہمودے ہرا دے ای نے مالو  
پاریٹ پو کریٹ۔ ہرا کل آن آسان انگائے۔“ یار و کئے شروع ٹی دا طریقہ وڑ تو ولے  
کن تو پین کسر ہم الوولدا کننا نیت تو او دے حاصل کنگ نا اس ہندا خاطر آن ای بلا ایر نا  
ہمو بیت آ عمل کریٹ اوزرینہ تون شامی تا ملاقات کنگلہ شروع کریٹ۔ آخر او نامحبت  
تینٹ کنکن زیات مرسا کرے۔“ ہندا خس پانگ آن گڈ عتیق ارا وار براونکا تے تینا  
بڑزائی سرفے او باقی آن ہر یفے ”امر یار و پُہہ مٹس یا ورنائی ٹی پُہہ مریسہ؟“ او تینا  
بیت آ تینٹ بھلو خنگ کس خلک۔

باقی اوناخننگ تون اوارخننگ کس خلسا پارے ”بھلو کمینہ اُرے فی اونا بلا اے“۔  
 جوان خننگان گڈ باقی ولدا سوال کس کرے ”یار داشامی تا ملاقات امر مرو۔  
 کنا اُست تو داسان لڑزک“۔

عتیق سنجیدہ مرسا جواب تس ”یارو! داہیت توارے ولے اودے تینائی کنگ  
 کن داگڑاے کروئی تمک نے نہ تو پین جاگہ کس سا نگ تانس ولدا اندا دُون آبروس  
 ہوغوس۔ شروعی کم کم ملاقات کر سا کر۔ اوہر ملاقات آ اوڑ تون مجلس کر اونا زلفا تے تون  
 گوازی کر فقط محبت ناہیت کرو لدا منہ ملاقات آن گڈ اوتینٹ نے تو ملک ولدا ناشک ہم  
 کٹک اوشک نا کٹنگ آن گڈ انت غم“ ہندا خس پاننگان گڈ ولدا عتیق ناخننگ لگا اوبش  
 مرسا پارے ”یارو! داسا کان کہ ننے اُرا کن دکان آن سودا کس الوئی ے۔ ہو تا نکہ دا  
 کاریے کتنس کن تو ملاقات کپیس“۔

باقی کاٹھے سرفے اوہر تو ماک سائیکل آ سوار مرسا سر ہلکر۔ عتیق ے دڑنگ  
 آن گڈ باقی سوچا تا دنیاٹی اختہ ملاقات آ تا تیاری کر سا تینا خیالی آ دنیاٹی چکر خلسا اُرا کن  
 پیڈل خلسا سر ہلک۔

باقی نا اودے ہندا سوچ او فکر ٹی گدرینگا کہ دہنوٹھ کا نہ کس ہراڑے ملو کہ اونا زبہ  
 تون ملاقات کے۔ آخر بھازانگا سوچا تے آن اودے لگا کہ کل آن جوان انگا جاگہ اوقتا  
 بیٹھک ارے ہرا اراتا خیر آن تفو کے۔ ہرانا درگہ اراتے کن اس او خیر آن کسر کس ہراڑن  
 خلقیک گدرینگارہ۔

بیگہ تون باقی ختی دیر آ نازیہ نا انتظاری اس کہ حسب معمول نازیہ اوسلمہ دیر کن  
 بسر اوباقی نازیہ ے خنگ تون ملاقات ناخواست کرے ولے نازیہ انکار کرے۔ خیر منہ

دے نازاری او اصرار آن گد اسہ دے نازیہ ہو کرے۔ نازیہ باقی تون ملاقات آن انکاری الو۔ ملاقات تو او ہر وخت باقی تون دیر آ کرینے ولے دا اولیکو ملاقات اس ہرانا وخت اولیکو تیغ ناپاس تخنگا سس او ہم بیٹھک نُسے ٹی۔

دیگر نامناز آن گد باقی اُراغان چراغ نُس ارفے او درے بیٹھک ٹی تنخا۔ ولدا خفتن نامناز آن فارغ متنگ تون دلاغان اسہ ڈبو نُسے ٹی دیر او گلاس نُس ارفے او انا بیٹھک ٹی توس۔ جوان ہرے آن گد مچا خلق قبرستان آن بار خاموش مس۔ بس وقفہ وقفہ آ کچکا تاو کنگ ناتوار بسکہ یا بیش نُسے ناسرہ ناتوار۔ باقی بیٹھک نادرگا غاسلوک بیقراری اٹ نازیہ نا انتظاری اس۔ خیرا چانک بیٹھک نادیوال ناماس آن مون گدی نُس تیز وگام ارفسادرگہ ناماسا بس او بغیر سلام او پیتان سیدھا بیٹھک ٹی پترینگا۔ باقی نازیہ نا پترینگان گد بیٹھک نا خیر مونان چکر نُس خلک او بس بیٹھک نادرگہ تہہ آن کڑی کرے او چراغ نا وٹے ہم کم کرے تاکہ کھڑکی آن روشنی پیشن اپ؛ ولدا بیٹھک نامون نا ہڑتو ما کھڑکی تے پاچ کرے ہر افٹے آن بخو پھدینو تہو نُس بسکہ او اُستاتے بخ کریکہ۔ خیر نا کھڑکی تے بند کرے کہ دن مف خیر آن کس گدرینگو او کوکڑو کشو۔ داکان گد کرار کرار بس او نازیہ ناماسا توس او تولنگ تون اُست او بدن ٹی تالڑہ نُس شروع مس۔ نازیہ نادوکن دومرلیفے تو نازیہ نادو اوکان زیات لڑاکہ۔ جوان دم نُس دوک دوٹی او جسم آتالڑنگ شروع نُس کہ ہڑتو ماک اُسٹ ایلو آن پین خوک مرسا کریر او لڑنگ ہم کم مرسا کرے۔ ہڑتو ماک چپ چپ تو لوک بت آن بار اُسٹ ایلو نابدن نا خوشبو تے ٹی ڈب ہلکسر، گٹ آک خشک خشک باریسر، دوئی تے آن ہیئت نُس بتو کہ فقط جسمک ہیئت کنگ اسر باقی نازو ڈول مرسا مرسا نازیہ ناخ آسر مس او او نا پڑہ تا گند کشنگ اُست شروع کرے۔ نازیہ ہم باقی آن خوک

منگ اس۔ باقی دو تے مدان مدان نازیہ نامخادرے ولد نازیہ تینا دو تے اونا کو پہ غاتے آ  
تخا۔ جوان اسٹ ایلو آن خوک مسراو بغل ٹی کریر تینے۔ اسٹ ایلو نابدن نا خوشبو تے  
آن کرار کرار نشہ مسراو ہڑ تو ماک بیٹھک نابالشتے سڑجہ کریر او محبت نادنیائی پترینگار۔ نیم  
روشن انگا چراغ، مون نا کھڑکی تے آن بروکا پھدین گور پچی آتھوئن نیمہ نا خاموشی، اودا  
خاموشی ٹی اوقتا با تا چپ چپے نا تو ار ہندن لگا کہ کہ ہر اروح دنیا نا قید آن آزاد منگ کن  
زمزیر اتے ملنگو۔ داڑتون اور پچا تا شیر شیرہ نا تو ار آن ہندن محسوس مسکہ کہ محبت نا  
کتاب کسے نا پین آتے تھو تیز آن سرفنگہ۔ دا تو ار آن بیدس ہڑ تو ماک اسہ ار اور اسٹ  
ایلو نا پنے ہم ہندن بلکر کہ گپ تہاروشام کسے ٹی ار محبوب تینے پڑ۔ شام کڑم مرسا اس  
تو ار آک گم مرسا اسر کہ جوان دم کسے آن گڈ باقی نازیہ نابدن نا ذی آن تینا بد نے ہندن  
ار فے دھنکے روح بدن آن ارفنگہ۔ دم کسے آن پد نازیہ ہم جک مس او تینا پچا تے او  
گدے جوڑ کرے اوسبک واشکنوگٹ کسے ٹی پارے ”دیرس ایت“ باقی یکدم جک مس او  
نظر کس چہرہ غاتا ہر اولد ایش مس بخاری آن دیریس تس تا اواموڑے ماسا تا زونڑا اوچپکيو  
دوے تا دوٹی کرے۔ خاموشی نا وجہ غان دیک کہ نازیہ ناگٹ آن گدرینگارہ تو ”گرچ  
گرچ“ تو ار بسکہ۔ اسٹ ایلو آن خوک تو لوک دوک دوٹی اسرولے لڑزہ نا اچ ڈرک الو  
دے پانہہ داہمو بدنا کو ہراز لزلہ نا ڈول لڑزہ۔ ہڑ تو ماک تین تو لچوک تو لک اسر کہ نازیہ  
ئے خیال بس کئے داسا انوئی تمک دن مف سلمہ سا کروے کئے خنپر وے ولد ای انت  
پاروٹ۔ دوے تینا کرار کرار باقی نا دو تے آن کشا اوبش منگ تون باقی ئے اشتانی و  
لہجہ سے ٹی پارے ”درگہ ئے مل پیشن ہر کس اف گڑا ای کا وہ بھاز ہرے مس“۔

باقی ئے محسوس مس کہ واقعی ہرے تو مٹنے ہندا خاطر ان پین ہیئت کتو درگہ ئے



ملا بیٹھک ناخیرمون آن چکرئس خلک او ولد ا بس نازیہ ءے تو ار کر سا پارے ”برکس اف“۔ نازیہ درگہ غان خٹک مس تو نازیہ ءے درگہ ناما سا تورے او چٹیکو کلک آن تا سبکو بکئس ہلک، او خیر آ کشسا تینے نازیہ ءے کسرئس تس۔ نازیہ گداٹ بوک کرے تینے او تیز تیز گام کر سا سیدھا اراکن سر ہلک۔

نازیہ نا انگان گڈ باقی بیٹھک ٹی پترینگا او بیٹھک ناخیر نا کھڑکی تے ہم ملا او بالشتے سڑجہ کر ساتین تو سوچ خلنگ ءے شروع کرے کہ دا امر وڈول ناملا قات کس مس۔ اونا بچ مرمر اسکان سوچ ٹی الو کہ شام نا اولیکو ملاقات داوڑ مریک او ہم ہڑتو ما تارضا مندی اٹ۔ نازیہ ہم انکار کتو او اونا ہم برداشت آن پیشن کس کے تینے پدی تورے۔ عتیق نا پانگ اس کہ دا کاریم کن چار پنچ ملاقات ضروری وولے داڑے قصہ تو چٹ پین وڑ مس۔ خیر انت کس مس مس۔ داسا ہرن محبت وڈھک یا بلا ایرا و عتیق ہڑتو ما تاپتاک غلط ثابت مریرہ۔ نہ نہ بلا ایرا نہایت اگہ دروغ مرو س تو زری نہ امر گنو کاتے آن بار عتیق تون محبت کریکہ۔ خیر، داسا معلوم مریک۔ او تین تو سوچ خلسا خلسا ہموڑے بھدین انگا تھونا گرفت ٹی تنگان ان۔

نازیہ ءے ایڑے تینا بیرم ٹی خیالاک خاچنگ کن التور او ہم ہندا سوچا تے ٹی اختہ اس کہ او امر دا ملاقات ءے کرے۔ دا او نا محبت کس یا او دے باقی نا عشق آ ہندا خہ یقین اس کہ او انکار کنگ کتو۔ خیر دا گپ تو پکے کہ او کن تو بھاز محبت کیک او کنے ضروری تینائی کیک۔ او داسا ای باقی نا امانت اٹ بایدے او نا محبت نا قدرے کیو۔

صُحب تون وختی نیاری آن گڈ باقی ولد اسائیکل آ سوار عتیق نا کنڈ آ سر ہلک۔ عتیق ءے اراغان ار فے او سیدھا ناوڑ ناڈ پوک آ اڈ کرے۔ او استونا کل فسانہ ءے او نا مونا تالان کرے۔ عتیق بشخدہ کر سا گوڑینگسہ قصہ ءے بنگ ولد اخسا خسا پارے

”یارو! نی تو بھارتیزو عاشق کس پیش تہاس“۔

باقی شرمگسا، بختندہ کرے اوہرے لپے ”داسا امر مروت“۔

عتیق باے چوٹ کرسا ”بس یارو، نا کاریم مس۔ داسہ اُرا والاتے زاری او  
منت کس کر اور سال راہی کر، بھارت ہرے کپیس“۔

باقی ”دن زو؟“۔

عتیق ”ہو یارو، داستونا ملاقات نا برم آن مست نے اودے تینائی کروئی“۔  
باقی کاٹھے سرفسا ”ولے یار نازیہ منو؟“۔

عتیق مخمک کس خلک ”یارو! نی سادہ سے اُس نازیہ داسا تینٹ خدا خدا کرو کہ  
نا کنڈ ان رسال برے۔ اگہ یقین بنگ نے تو اینو ہر یف اوڑ ان انت پانک نے“۔  
باقی ناذہن ٹی فوراً سوال کس بس ”ولے یار، نا برم آن گڈ ہم تو داسکان برم نا  
حوال اف“۔

عتیق زر کس مونجا مرسا ”یارو! خدا نا کنڈا نے، کل گڑاک او نا دوٹی و دیرے  
برم ایتر دیرے تف ولے نی ہرے کپیس، اُخس کے زو مر یک اودے تینائی کر“۔  
دامجلس آن گڈ ولد باقی عتیق نے اُرا نا خوک دڑ فے او تینا مستقبل نا خیالاتے  
خلسا اُرا کن چکا۔

بیگہ تون ولد باقی دُون آن انتظاری اس کہ نازیہ او سلمہ ریڈ یک دوٹی بنگ اسر۔  
نازیہ دُون آ بس تو باقی خوک مرسا اوڑ ان ہر لپے ”ای رسال راہی کنگ خواوانی انت پاسہ“  
نازیہ رسال نا پن آن داخدر خوش مس کہ فوراً، بختندہ کرسا گوٹڈ و ورنندی کس تس  
”ہرے کپیس“۔

باقی تینا نفختے آباور بتو کہ دا امر۔ امی زمانہ سے آن اوڑن ہندا سوالے  
کریٹھ ولے اوہروخت ہندا پاریکہ دا اسکان بھلو وخت کس ارے ولے اینو پانگے کہ  
ہرے کپیس۔

باقی بلا ایرے اُسٹ ٹی دعাত্র سا خوشی خوشی اراکن روانہ مس۔

باوہ تے منت کنگ لمہ تے نواریفنگ اٹ او ایڑتا مدے ہلسا باقی تے مسہ تو  
لگا ولے آخرے ہندا مس کہ اراوالاک منارا ونازیہ کن رسال انار۔

ہندا جواب ملا کہ نن مشورہ کین نھے پانہ ولے نازیہ لمہ تے تینا صاف صاف  
پارے کہ اودارشتہ خان خوشے اوہنداڑے برام کنگ خوانک۔ تینا لمہ تے داوڑتینا زبان  
اٹ پانگ اوڑکن بے شرمی کس اس ولے بروک انگا بے شرمی نامون اٹ داچ کس الو۔

نازیہ او باقی ناسانگ آن گڈ پین ارا تو نا کچ گدرینگا او آخر او فتا برام مس او  
باقی نا اُسٹ نامر اداک پورا مسر۔ بھازانگا خوشی آن دے اونن بلا ایرا وعتیق دعائسکہ۔

برام ناچار تو آن گڈ باقی تے نازر کو مسٹر کس مس او ہڑتو ما اراوالاک خداغان  
عزت نادعا کر سا او ناشکرے ادا کریر کہ جوان مس دافترشتہ مس۔

مہر

”چاہ اُس کیونے کن؟“۔

”انت اُس؟“۔

”پاریٹ، چا اُس بیٹ کیونے کے“۔

”واہ جی واہ! ایہُن طبیعت نا امرے؟“۔

”انتے۔۔۔ کنے وا انت مُسنے؟“۔

”گر اُس تو مُسنے نے اینو۔ اُسٹ تولیٹ ے ہم اینو بند کتوس ایلو کن تو اوار جندنا ہم

تو لوک اُس اودا سانن نادو بچہ غا کنے ہر فنگ اُس کہ چا اُس ہتیو نے کن“۔

”دا وا انت ہیت کسے۔ کنے تق بتو ہندا خاطر ان خاچتوٹ۔ داسا سوچاٹ نی لکھلنگ

آن دم درنيس تو چا اُس کیونے کن، بس“۔

”اچھا۔ خیر اُسٹ خوش مس اینو نادا مہر آن“۔

”اینو۔۔۔ داکان بالومتنے“۔

”داکان مُست مگہ نی مہر کرنيس؟“۔

”ہو۔۔۔ ای نے کن مہر کتھ؟“۔

”کنا تو یاد بفق کہ نی کنکہ مہر کرینس۔ استوا سکان ترند مٹس کہ لیٹ ے بند کر۔ بس کر لکھنگہ تینا، تغ آن درینس نن“۔

”استو۔۔۔ استو کنا کا ٹم خل کر یکہ“۔

”ہو۔۔۔۔ نامطلب دامسہ تونا سے ناکا ٹم خل کر یکہ بس اینو کپک“۔

”بس بس۔ نی تو بیوس مہر نا ہم قابل افس“۔

”ای اخہ مہر نا قابل اٹ کئے سماے اونا دا بے موسی آمہر آ کنا کا ٹم اسٹل تمپک“۔

”اچھا۔ کنا مہر آک بے موسی و نی تینا پانی کنکہ وخت کس مہر کرینس؟“۔

”مہر۔ ای مہر کتھ۔ ای نے تو محبت کرینٹ و لے نے نظر بفق“۔

”بس بس۔ دافلمی آڈ ایلاگ آتے تینا تین تو ڈک۔ نے اسہ گڑا تو محبت اف بغیر کس دا شاعری آن۔ نن درست ہندانی اُس ہندا کا غذا کوئی تینا اُسٹ آ دوخ اسہ وارکن تو جوانی اٹ مجلس کرینس“۔

”نے تو ایہن کنا شاعری تون دشمنی کسے۔ پتے چرخ تر ستر سا کنا شاعری آسر کیسہ“۔

”امر کپرینہ نادا شاعری کنکن صفا واپوک کسے۔ نہ کنکن ٹیم کشسہ۔ نا جوانی اٹ کن تو گپ کس کیسہ نہ کنا پیتا تے بنسہ“۔

”دائی کنا انت قصور نا پیتا کہ ہند نو او کہ جوانی اٹ بنگ مفسہ“۔

”ہو۔۔۔ داسا کنا پیتا کہ ہم خراب مسر۔ برام آن مست انت پاریسہ نادینا، ہیٹ کس کرنا پیتا تے کن زہیر کرینٹ“۔

”برام آن مست فی ہم تو محبت نا ہیٹ کریسہ۔ داسہ ہمو پیتا کہ ہرانگو“۔

”داسا ہم کننا ہمو پیتا کوؤ لے نے وار مرے داشاعری آن کہ فی خفتوتہ۔“

”وار کئے وار ارے کہ نازی آشاعری کیوہ۔“

”مہربانی، مہربانی تینا داسرٹوک انگاشاعری تے کن تو منسوب کہ۔“

”ماشاء اللہ، ماشاء اللہ۔ منسوب۔ دلفظے ہراکان ہیل کر لیس۔“

”انتے تینا نی اسکول آ انالس۔ ہر گڑا نے بریک۔“

”کنے وانت کس بریک نامونا۔“

”بس بس۔ بھاز مسخر اخلپہ۔“

”کمالے۔ نے صفت کیر ہم فی سٹسہ۔“

”مہربانی، تینا صفتا تے شاعری کن ڈک۔ کنے ضرورت اف ناصفت آتا۔“

”آمرے فی کنے صفت کر، کنے سخت ضرورتے صفت نا۔“

”نے۔۔۔ نے ٹی گڑا سارے صفت نا۔“

”انتے آلہ داخنک، انت پاریسہ مالو کہ بادامی وخنک کننا۔ ایلو آلہ دا جوڑک۔ مست امر

چڑا صفت کریسہ جوڑتے کننا، چا کنوسٹ تو جوڑتے کننا سیل کریسہ۔“

”چا، گڑا چا کس ہتیو نے کن۔“

”انتے۔۔۔ جوڑتے کننا ہنگ خواسہ۔“

”بھاز چالا کی کہہ۔ گنیشہ تو پا ہتیوہ نے کن چا کس۔“

”داخہ محبت اٹ پاسہ ای امر نہ کنگ کیوہ۔“

”ای تو محبت کیوہ۔ بایدے فی ہم وخت کس تینا محبت ناشوت کس ایت۔“

”شبوت نے کن دا جان حاضر فی ثبوت خواسہ؟۔“

”نہ مہربانی۔ جان نامرے۔ ای پین گڑ اس خواہہ ایتہ؟“۔

”ضرور۔ نی چاتے ہت، ولد امر کے ناکم“۔

”نہ اسہ وار نی وعدہ کر“۔

”وعدہ؟ نے کننا زبان آیقین اف؟“۔

”آخا۔ دتخس ہم اف۔ نی اسہ وار وعدہ کر“۔

”کیوہ وعدہ اسہ وار چاتے ہت، نابھازانگا اصرار آن کنے نشہ ار فے چانا“۔

”چاتے اسہ منٹ ٹی ہتیوہ۔ بس اسہ وار نی وعدہ کر“۔

”وعدہ تو کیوہ۔ مگر نی کاریے تینا پا“۔

”کاریے پاریت، گڑ اپورا کیسہ“۔

”ضرور“۔

”پگا“۔

”پگا پگا“۔

”ہیت دادے ای تین کن پوسکنو جوڑا ئس پیچ ناتسٹ مشن دُوج کن۔ ہموڑ کن پیست

ہزار رُپی درکارے“۔

”پیست ہزار؟“۔

”ہو، پچا تاحق ئے“۔

”مون ناٹو وانی پیچ ئسے کن پانزدہ ہزار درلیس الہ“۔

”اوپین جوڑس ئس، داپین ئسے“۔

”نادا جوڑہ غاک کلپسہ۔ ای ہرٹو دا پچا تے کن پانزدہ پیست ہزار رُپی ہرا کا ایتو“۔

”ہر تُو؟ دامچا سال ٹی کنا اڑمیکو جوڑہ ے بس۔“

”انتے پین پیچ اف نے؟“

”ارے مگردا پوسکنوڈیزن کس بسنے، کل تین کن کر فینو۔ تنیا کنے اف۔“

”پوسکنوڈیزن۔ داڈیزنک تو ہر دہ دے نازی آبریرہ، دانا مطلب اف فی ہر وار تین کن موغف۔“

”بس۔ بھاز لیکچر تھ۔ داپا پیسہ بیتسہ یا آخا؟“

”پیست ہزار کن تواف۔“

”مطلب فی تفسیہ؟“

”آخا۔ کن تون دا خافضو لو پیسہ اف۔“

”سئی پاسہ۔ ای داسا فضول کس مسٹ۔“

”ای داوڑ پا توٹ۔ کن تو دا خس اف۔“

”ہو کناوارا نا پیسہ خاک کٹرہ، والینگان محبت نا دعویٰ کیسہ۔ واہ۔“

”دانگر کناوس ٹی داخہ بحث اف۔ درچاتے ہت۔“

”انت کس اتیو؟“

”چاتے ہت۔“

”نن نا دو نیم آای نے کن چاہہ تہیو۔ بشہ لائے بند کر، کنے تغ ہلکنے ای خاچوہ۔“



## ارمان

دھندے کس رفیق ہمزاز نازند آن تیر متو کہ کہ او نا کاٹم خٹل کپروس۔ داکاٹم نا  
 خٹل اوڑکن دنیا نا بھلا او آخرت نا عذابا تے آن اسے عذاب کس اس۔ داکاٹم نا دو آن نہ تو او  
 کس توں ہیئت کنگ کر یکہ نئے کس نا پتے برداشت کر یکہ۔ خلقی آہستال آتا دو انیک ہم  
 نوکاب نا دیر آن بار اسر نئے شربت کس مسرہ نئے چاکس بس مجبوری نا وختا گئے پالیفیرہ۔  
 رفیق نا کاٹم نا خٹل دے پدے آن ودھنگ اس ہراژن اُرانا اُر پریشان او  
 ناشاد تو لوک رب آن او نا آرام کن دعا کر یکہ۔ آخر اسے دے استاد شکور او نا حالت آرحم  
 کُسا ہمت کس کرے او او دے شار نا ہستال آسر کرے۔

رفیق نا چیک اپ آن گڈ معلوم مس کہ او دے میٹصتھاس (Metastasis) ے۔  
 میٹصتھاس کینسر نا چار میکرو سیٹج ے ہراڑی کینسر جسم نا اسے جاگہ غان ایلو جاگہ غا  
 کاتک۔ ڈاکٹر اتا مطابق رفیق زند نا آخر کیو پیوڑی آسلوک اس او بس منہ دے نا  
 مہمان اس۔

رفیق ہمزاز استاد شکور ہرا تم دا بیماری ناسی مسر تو ہڑ تو مارتا رنگ پوشکن پوشکن  
 مس اور رفیق نا خنتے آن خوی نکاک دانہ دانہ غاتمار۔

رفیق نے دُہن بیوس خنگ آ استاد شکور نا اُسٹ ہم چنک مس اوہم اوڑتون  
اوار ہو غنگ اوار مان نے شروع کرے۔

استاد شکور اصل اٹ سندھ نابرو کو بندغ کس اس۔ اونوشکی ٹی تینا سالم ابرار احمد تون  
رہینگا کہ۔ داکان مست اوتینا اسٹ انگا مسٹر تون سندھ ٹی اس ولد امسٹنابرام آن پد ہر اتم  
اوچٹ تینا مس تو ابرار اودے نوشکی آہینگا اوتین تو جاگہ تس۔

نوشکی آہینگا گڈ استاد شکور نے رفیق ہمز تینا دکان ٹی شریک کرے ہراڑن  
اوبھاز خوش اس کہ اللہ اودے محتاجی آن بچے۔

رفیق ہمز او استاد شکور نا درزی گری آ کاریم چا نوشکی ٹی مشہور اس۔  
ذالہولاک بیدس اوفتے آن تینا پچا تے کس آ دوچ کر یفتورہ ولے رفیق ہمز نا مسئلہ دا  
اس کہ او دکانے زیات وخت تنگ کتو کہ۔ او نا زیات وخت اونا شاعری تون  
گدرینگا کہ۔

رفیق ہمز نا شمار راج نا بھلا شاعر تون کنگا کہ۔ اونا دا وختا بیرہ شاعری نا  
ہفت کتاب مارکیٹ آ بسوسر۔ دافتے آن بیدس اونا مضمونک ادب نا ذی آ تحریر اک اونا  
زبان اوقوم نا خدمت ٹی لکھو کا نوشتہ غاک حساب آن پیشن اسر۔ علاقہ ٹی بغیر رفیق  
ہمز نا موجودگی آن نئے فیسٹیول کس مسکہ نئے مشاعرہ کس اڈ تنگا کہ نئے کس ادبی  
کچاری کس کریکہ۔ ہر شاعر ہر بندغ ہر تنظیم اونا شاعری نا دیوانہ اس۔ شیف بڑز رفیق  
ہمز نا پین اس۔ خوک اومرنا بندغاک اونا خنگ کن اونا مجلس کن گنوک اسر۔ ہر بندغ  
دعا کریکہ کہ رفیق ہمز کن تو دم کس تو کہ کن تو پیالہ کس چا گئے۔

رفیق ہسپتال نا بیڈ آ مڑدہ غاتے آن بارلیٹوک اُسٹ ٹی نالہ خنگ اس۔ اونا

خنتے ٹی بیدس نا امیدی آن پھڑالو۔ واسہ بھلو پراؤنس خلنگ خواہسکہ، اوزور زور آن ہو غنگ خواہسکہ ولے نئے اونا خنتے ٹی خویک شولنگ نا وس اس نئے اونا بدن ٹی طاقت۔ اوتینا ٹکرا اُسٹ ٹی تولوک تینا رب آن سوال کنگ اس کہ دہن اچانک امر اودے کیفسرنا مریض کس جوڑ کرے۔ انت گناہ کسے نابدلہ ٹی اودے لا علاج کریس۔ او امر تینا زانیفہ سلمہ اوتینا ہڑتو ماچناتے دادنیٹیا اِلک کاتک۔ اگہ اودے کہسنگ خواہسہ بیشک کہسف ولے اسہ سال کسے نا وخت تو ایتر اوتینا چناتے کن اوفتا زندگی کن گڑ اس کے۔ اگہ بھلو وخت کس تنگ کپسہ تو دامنہ دے ناپنڈاے انتے اودے تسنس۔

ارادے ہسپتال ٹی گد ریفسگان گڈ رفیق استاد شکورے منت اوزاری کرے کہ اودے ہسپتال آن ڈسچارج کے۔ موتے ایہن ڈاکٹر اک مکرر کریگڑا داسا داڑے فضول علاج کرفنگان انتے اوتینا پیسہ اوتینا دے تے ضائع کے۔ داہسپتال آن جوانے اوتینا اُرائی تینا چناتون زندنا آخر یکودے تے گدریلے۔

اُرا غابنگان گڈ تینا چناتے خنگ آن پدر فیک نا غم بدتر زیات مس۔ اوہر شام تینا چناتا بروکا زندنا سوچ ٹی آختہ اس۔ چناتا خاچنگ آن گڈ او بھلان تینا کمبل ٹی ہوغا کہ اوڈگو ڈکو خویک شولا کہ۔ اونا سوچ ہنداڑے مین ہلکوس کہ اونا مرگان پداونا زانیفہ او اونا چناتا انت حال مرو۔ او امر زندگی کرو۔ امر زندہ مرو۔ اونا زانیفہ امر اوفتے بھلن کرو اراکان پیسہ ہتو۔ اراکان داخر چہ غاتے پورا کرو۔ دے اوفتا بیماری آبرو۔ دے اوفتا غم ٹی شریک مرو۔

پھل انگا زانیفہ اوتینا معصوم آچناتا باروٹ سوچنگان گڈ رفیق تینے بددعاتنگہ شروع کرے۔ تینے آترند مس کہ تینا مچا زندگیے ہندن فضول ضائع کرے۔ تینا شوق

اوشہرت نارینداٹ تینا ہزار مرادانگا چناتے کن اسہ گڑاس کنگ کتو۔ بے مقصدانگا شاعری  
 نانشہ ٹی تینا چناتا زندے درپدر کرے۔ ایلو بند غاک تینا اُر والا تے کن خواری کشار پیسہ  
 مچ کریر، تین کن سواری ہلکر چکر خلکر، تینا چناتے جوانو پچ بنفیر جوانو کنگ تر اوفا استخوانی  
 تے پورا کریر اوفا مستقبل کن جائیداد جوڑ کریر، اوانت کس کرے؟

زند مچ او فتنے خوار کرے داسا کہنگان گڈ ہم او فتنے ہندا حال ٹی الگ  
 کاتک۔ انت کس رینگا اودے داشاعری ناکنگان؟۔ انت ملا اودے زبان ناخذمت  
 آن؟۔ انت کس تس اودے دا قوم ہراڑکن او کتاب لکھا؟ ہراڑکن او پروگرام اڈتس  
 ہراڑکن او تینا تھے خراب کرے؟۔ ہراڈو ہمو بند غاک ہرا فتنے او جوانو شاعر جوڑ کنگ  
 خواہسکہ، ہراڈو ہمو خواجہ غاک ہرا فتنے او ادب نا سبق تسکہ، زبان نا قدرے پُہہ کریکہ  
 ہراڈو ہمو تنظیم والا، ہراڈو ہمو اکیڈمی والا، ہراڈو نا خیر خواہ اسر ہراڈو نا بغیر تینا  
 پروگراما بنا تے کتورہ۔ اینو او زندگی نا آخری دے تے حساب کنگتہ تو انتے کس اونا  
 ہر فنگ کن بفک۔ انتے کس اونا مدد کن تینے زکس خوار کپک، انتے کس اودے اسہ رسمی و  
 صلہ کس خلپک کہ رفیق صاحب نے زرن ضرورت ارے تو حکم کر۔ انتے کس اوڑتون  
 دروغ کس تڑپک کہ خواجہ رفیق نن نا علایجے کرفنہ نے کہنگ کن الپنہ۔

او تین تو سوچ خلسا ارمان کر سا او تینا کروکاتے آپشوانی نا آڑسندہ کشنگ  
 اس۔ داشش ہفت کتا بے چھاپ کرفنگ آن جوان اس ای دا پیسہ غاتے تینا چناتے کن  
 ڈکوسٹ، دا فضول انگا پروگراما تے آنگ بنگان جوان اس ای منہ جوڑا پچ موغوسٹ تینا  
 اُر اکن گڑاس کروست، دو صدسہ صد میل مرنا فیسٹیولا تے آنگ آن جوان اس ای ہندا  
 کرایہ غاتے تینا اینو نادے کن یا تینا چناتا بروکا وخت کن ڈکوسٹ۔

کپ خدا ہمو واہ واہ تے، کپ خدا شاعری ناشوتے، کپ خدا ادا کتابا تے، دا شہر تے، دا مخلوق ناصفتے، دا پین نا کنگہ، دا کنا چنا تا دنیا تے برباد کریر۔  
 رفیق ہرن صاف اسکان تینا زندگی نا کار گردگی آنظر شاغا کہ او تینے بد دعاسکہ اودوے پٹا کہ۔

رفیق ہمز تینا لکھی آ زائفہ او تینا نازور کا چناتے دا ظالم انگا دنیا ٹی تینا انگ خواتو کا۔ او تینا چناتے کن گڑ اس کنگ خواہسکہ، تینا چنا تا فیو چر کن خوشحالی اوروشنی ہتنگ خواہسکہ ولے او بیوس نا وخت کٹا سس او فقط منہ دے نا مہمان اس او ہرانا غم اودے اونا بیماری آن زیات کنگ اس۔

استاد شکور دکان نا پچاتے تو اختہ اس۔ رفیق چنا تا غم ٹی دیر متنگ اس۔ زائفہ تا اونا صحت کن اللہ تو ن جنگ کس اود نیا تینا رنگ آتون مشغول اس۔

چار دے او چارن بے تغ او سوچ ٹی گد ریفنگان گد رفیق نا خوف پین زیات مس کہ داسا اوڑتون منہ دے پین پچانے۔ او کہنگان مست تینا چناتے آباد ہتنگ خواہسکہ۔ آخر بھازا نگا سوچ او فکر آن گد او تینا ذہن ٹی اسہ منصوبہ بندی کس کرے۔

شام تو استاد شکور دکان نا بند کننگان گد اونا ہر فنگ کن بس تو او شکورے قسم ترسا پارے ”کنا کہنگان مست کنگہ اسہ کاریم کس کر۔ استاد“۔

استاد شکور اودے منع کرے کہ دہنو ہیئت کپہ نی، نے پچڑامفک نی چٹ جوان مریشہ انشاء اللہ ولے رفیق تے سما اس کہ اونا وخت ختم متنگہ۔ استاد شکورے ولدا قسم تس کہ اونا اسہ کاریم کس سلو کے ہر ادے اوڑان بیدس کس کنگ کپک ہمودے پورا کرتا کہ ای آرام اٹ کہنگ کیو۔

استاد شکور آخر سنگت کن مجبور مس۔ قسم ہر فے تو رفیق تینا کاریے پارے  
 ”استاد دا اُرائی کہ کن رہینگہ دا اُرائنا چندا نا ئے“ کنا باوہ مسکین نا جوڑ کروکے۔  
 کنا زانیفہ کنا چنا تا خیال کنے زکس ہم آرام کن الپک۔ ہر سیکنڈ او فتا زندگی او بے بسی نا  
 خیال کنا دماغ ٹی چکر کیک کہ کنا موتان گڈ او امر مرور ہر انگ انور امر کٹو را وانت کنور۔  
 ای اسہ گڑ اس نے آن خواو تو خدا را انکار کپس۔ نی چڑہ و بندغ نئے اُس۔ کنا دکان  
 ایہن نا ئے دا اُرا ہم نما مر یک نی بس کنا کہنگان مست کنا زانیفہ ئے برام کننگ نا وعدہ  
 کر۔ او کنا چنا تا مکم مر۔“

”نی گنوک مسنس نا دماغ جا گہ غاف۔ اول تو نی بیدار مریسہ نے چڑامفک تو  
 اندا خاطر ان تینا دا بے معنی آپیتا تے اے“ استاد شکور اوڑا تر ندر سا پارے۔  
 ”نہ استاد نہ ای گنوک افٹ۔ ای گنوک اسٹ داسا مرگان مست ای سار کریٹ خدا غا ہر  
 کنے جو انوسکرات کس ایت۔ ای داویل تون کہنگ خواپرہ خدا را انکار کپہ دا اُرائنا او دکان  
 نا، نی کنا چنا تے قبول کر او فتنے تینا کر تا کہ ای اُسٹ جی اٹ کہیو“ رفیق خنتے ٹی  
 خوی نکاتے تو رسا پارے۔

”نا دماغ خراب مسنے چپ کر“ استاد شکور ولد اتر ندر مس۔  
 ”کپہ داوڑ استاد کنا دا پیتے ارف او کنے کہنگ کن اے ای نا دا احسانے محشر نا  
 میدان آہم یاد کروٹ۔ نے کنا ایلمی او کنا سنگتی نا قسم۔“

رفیق نا دا پیتا تے آن گڈ استاد شکور ہییت کتو ولے رفیق اونا خنتے آن پُہہ مس  
 کہ استاد شکور اونا پیتے موئی انکار کپک۔ داسا اودے وڑ نئے اٹ تینا زانیفہ ئے پُہہ کروئی  
 او سمجھا یفوئی ئے۔

چناتے اسکول آراہی کنگ آن گڈ ہر اتم رفیق ناز ایفہ اونا ماسا بس تو رفیق مالو  
آن تینے تیار کریس کہ او اینو تینا ز ایفہ ے تینا بیماری اولاعلاجی ناسی کیک۔ رفیق ہنچندہ  
کر ساختے شیف کرے او تینا بیماری اوڈاکٹر آتا ہر پتے بھاز سنجیدگی او حوصلہ ٹی تینا ز ایفہ  
ے سئی کرے۔

رفیق نابا آن اونا کھنگ نابنگ ناخبرے بنگان گڈ ز ایفہ ناخنتے آن خڑینکاتا  
نو کاب نس روان مس۔ رفیق ناخ لٹی دوتے شاغا او چیمانٹ نس خلک۔ ہو غنگ اٹ  
اُست نابو جھے ز نس کم کرے ولے جنوزانی او چناتا چوری متنگ نا فکر اودے اسہ بیل ٹی  
دیر کرے۔

ز ایفہ ناچپ متنگان گڈ رفیق تینا وٹ اودے پارے ”سلمہ! کنا اسہ کاریم  
نسے۔ ای نے پاو کیسہ تا؟“۔

سلمہ پالن انگا خنتے اٹ اونا خنتے ٹی غوراٹ ہر سا ”کل کاریمتے ناکیوہ نی بس حکم  
کر“۔

”اسہ وار قسم کن کہ نئے انکار کروں نئے سوال“ رفیق مونے شیف کر سا  
پارے۔

”کپرہ سوال او انکار ہم۔ نی پا“ سلمہ منہ خویک شولسا جواب تس۔  
”ناراض ہم مفروس کنے آن“ رفیق جوان اودے ہر کنڈان تیار کر سا اس کہ او  
انکار کپک۔

”مفرہ ناراض“ سلمہ اودے یقین تس۔

”کنے دا اٹ دے ناہہ نئے تغ بریک نئے سکون کہ کنے آن گڈ نما انت  
مروے۔ کنا چناتا انت مروے۔ ہر افتا فکر کنا اُست آمش آن بارتخو کے۔ ای انگان

مست نمے بد حالو حال نُسے ٹی انگل خواپارا، ای سوچا نٹ کہ۔۔۔ کہ ای۔۔۔ ای تینا مرگان مست نے طلاق ایو، تا کہ ناوا استاد شکورنا برام مرے۔“

رفیق نادا گپ آن سلمہ ناہو غنگ فوراً سلیس اواسہ عجیبو شکل نُس جوڑ کر سا پارے ”دانت ہیئت وئی کیسہ۔ ای نے آن طلاق بلیو پین برام نُس کیو۔ رسوائے جہان کر فیہ کئے۔“

”توبہ توبہ۔ دانت ہیئت نُسے وا، ای فقط خواواہ کہ ای سکون اٹ کہنگ کیو اونا اُرا آباد سلمہ ننا چناک کس نامحتاج مفس فی کس نامحتاج مفہ۔ ہندا خاطر ان ای دا گپے کریٹ۔ داسہ انکار کپہ کنا پیتے ارف دا کنا آخر کیو خواستے نے آن۔ کئے کہنگان مست خفا کپہ۔“

رفیق نا آخر کیو گپاک سلمہ ناٹپی آ اُسٹ آ تیر نُس خلکر۔ موٹو ہو غسا ہو غسا خنتے دیر کرے اور رفیق اُچھو جواب نُس تنو ولے رفیق اُچھو مس کہ اونا زانیفہ اونا آخری ہیئت آن انکار کپک۔

شام تون استاد شکور اُچھو زاری منت آن گڈ تیار کرنے کہ ایلو دے سُب اتون ملا نُس ہتیس ولدا اوکان گڈ جند تا شکور نااسہ ہیئت نُس ہم بنو۔

سُب منتگ تون سلمہ اُچھو سئی کرے کہ اونا آخری ارادے بچانو۔ اودا پیتے ہندو انداز نُسے ٹی پارے کہ حضرت عزرائیل اودے خصوصی مالوسی کرینے۔ پگہ مولوی صاحب بریک خدا را انکار کپس۔ سلمہ اودے خم کر سا آخا آخا کرے فریاد کرے پراد کرے ولے اوہمو اسہ ہیئت آسلوک اس کہ دا کنا آخری خواستے نے آن۔ کئے نامیت کپہ انکار کپہ، چپ کہ بس دانجے ختم کر۔



استاد شکور ایلہی ناخنئے کن مجبور مر ساملّا ے ارفے پیس ولد اسلمہ اُسٹ ٹی ماتم  
کر ساختے ٹی بیوسی تخسا بس اور فیک ناما سا تو س۔ ملّا ہڑ تو ماتا اجازت اٹ اوفا طلاقا تے  
ہلک او ولد اہڑ تو ماتے طلاق نامہ عا دستخط کرفے۔

تینا طلاق آن گڈ رفیق ملّا ے سلمہ او استاد شکور نا برام ناپارے تو ملّا جواب تس  
کہ سلمہ ناعدت آن گڈ بیشک او ہڑ تو ماک برام کنگ کیرے۔

ملّا نا انگان گڈ سلمہ خوی نکاتے خنتے ٹی پوشسا بش مس تو رفیق استاد شکورے  
جان فی جان سلمہ او کنا چناک پار ساخم کرے۔ او اسہ پین ہیٹ کس استاد ”کنا مار ہر اتم  
بھلن مس تو او دے پاس کہ تینا روزگار آن گڈ تینا فریشمنٹ کن ادبی و کاریم کر لیس تو  
ٹھیک نہ تو ادبی کاریم آتی تینا زندے خراب کپیس۔ او اسہ پین گپ کس کنا تنظیم والاتے  
دازبان نا خدمتگار آتے، اکیڈمی والاتے کنا برسی آپروگرام اکن لپیس۔ کس نا ضرورت  
اف کنے مرگ آن گڈیات کے۔“

شام نا نماز آن گڈ استاد شکور رفیق نا ہریفنگ کن بس تو او نا بنگ آن زکس  
مست رفیق ہمزاد دنیا ے اُسٹ جمی اٹ خوشی اٹ الاس او او نا لاش ناما سا ادبی  
بند خاک، شاعر اک، او نا مہرباناک او نا خیر خواک کل افسوس کن سلوک اُسر او او نا زبان او  
قوم کن کرو کا خدمتاتے یاد کریرہ او تینا زبان نا تاوان نا حسابے خلسا افسوس او ارمان ٹی  
کاٹم تے سر فیرہ۔

## ٹیپو

ای ہر سال اسکول ناچھٹی تے آخلق آبریوہ تو مئی آن دڑینگ تون کنا ہوش آ  
ٹیپو بریک اوکنا خنک نمب مریرہ۔ ٹیپو کنا چنکی ناسنگت اس۔ کنا ہمسراس۔ کنا سیخا اس۔  
کنا چراغ اس۔ کنا فوجی آکما نڈراس ٹیپو۔

پیہنارنگ، معصوما خنک، رعب دارانگا توار دلیرانگا رواج او متوسط انگا بالادتون  
ٹیپو خلق نا ایلوکل کچکاتے آن زیبا اوکل آن جتا اس۔ ٹیپو اسہ تیارو انسان کس اس۔ اورم  
کر یکہ ارغ کنگلک، دم کشا کہ خاچا کہ، گوازی کر یکہ، غسل کر یکہ، وخت وخت بیمار مسکہ  
وخت کس کئے کاریم کسے ٹی کمک ہم تسکہ اوکن تو مجلس کر یکہ کن تو چرینگ کہ۔ بس او نا مجلس  
انسان تا مجلس آن دیمہ جتا اس۔ انسانک زبان اٹ مجلس کریرہ او خنتے اٹ مجلس کر یکہ۔

ٹیپو ننا اراتون اوار او ارچا خلق نا خیر خواہ او وفادار اس۔ مچا خلق نا ذمہ داری او نا  
کو پے غاتے آ اس۔ خلق نا سہا دارتے آن ہلیس خلق نا مروتسکان داکل نا خیالے ٹیپو  
تخا کہ۔ ٹیپو ہفت سال دا خلق ٹی مس اودا ہفت سال ٹی ای قسم کنیوہ کہ ای اسہ شوک کس  
اسہ پشی کس خنٹوٹ کہ او نا خلق آن اسہ کپوت کس یا اسہ چک کس دڑے۔ مجال کس نا خلق  
ٹی پشی کس پھاش کروس یا شوک کس بروس۔ ایلو خلقا تے ٹی خلقیک پشی او شوکا تا دو آن تنغ

خنورہ۔ ہرن شوکس اُسٹ ناکڈ آن چکس یا مروکس دریکہ۔ پشیک مخلوق ناکپوتاتے  
 چٹ کریسرو لے نا خلق ناچکا ک، مروک اوکپوتا ک کل آن زیات امن ٹی اسر۔ نہ اوفتے  
 پیشی تا خوف اس نہ شوکا تا خلیس۔ صُحب آن شام اسکان چک او مروک اُراتا منج او خیرنا  
 وُپ آتے آ ترڈارہ او گوازی کریرہ۔ شام تون سیرتغ تینا کڈ آتے ٹی بسرہ او خاچارہ۔  
 کپوتا ک ہندن دے دے مچ آسمان ناکڈ ابال کریرہ۔ تار آتے تے تو سرہ دانہ کنگرہ چکر  
 کریرہ او شام تون بسرہ آرام کریرہ۔

کنے ٹیو ناکل آن زیادہ دوست بروکا گڑا اونا سمجھداری اس۔ خاموش مزاج نا  
 کچکس اس۔ ایلو کچکا تے آن بارسٹی بے وجہ نئے وکا کہ نئے پیشن تنخوکاران تے گند  
 کشاک او نئے بغیر اجازت آن اسہ گڑا کنگلکھ یا ارفیکہ۔ تانکہ ننا اُراغان کس اودے  
 ارغس تفرس او بینگنی آن کہسلکھ ولے پین تا اُراغان پین تا دو آن کتو کہ۔ ارغ نا  
 وخت مروکس تو پڑونک ناتالان متنگ تون او پُہ مسکہ کہ داسا اُراوالاک ارغ کیرہ تو  
 جندتا نئے آن بیست سی میٹر مرانا کہ تو سکھ۔ ای اونا ارغاتے اونا ماسا دریٹہ تسٹتہ تو کنے  
 معصوماختے اٹ اسہ نظر س ہر اکا او کنا منتواری ئے ادا کر ساتینا خنتے اٹ پاریکہ ”نا بھاز  
 مہربانی کنا ارغاتے پیس“۔

ارغان گڈ ٹیو اوکا بش مسکہ تینا کلنڈ آن دیر کنگلکھ اودیر آن گڈ اُراتا خیرا نا کہ  
 اولیٹا کہ۔ لیٹنگ نا وختا اورزا کا تینا خنتے نیم تر کر یکہ تاکہ دُزس اگہ بس تو او اسجھ کہ ٹیو  
 تنگانے۔ اُراوالاک ہر اتم خاچارہ تو اونا اُراتا خیرا و مون آن ساہداتا بی ناماسان کڈ آتا  
 رہی آن چکر خلسا صاف اسکان خیال داری کر یکہ۔

ٹیو نا ہوشیاری نا مثال س ایتو نئے کہ اگہ وخت س نا درستو بندرغ س ننا اُراتا

کنڈا بننگا خنوس تو ایلو کچکا تے آن بارمر آن بندغا وکتو کا بلکہ رم اٹ بسکھ اونا ماسا سلیسکھ  
او معصوماختے اٹ دلیری اورعب ناعکس ے اتسہ اسہ واراوڑن سوال کر یکہ  
”دیر اُس؟“۔

”انت کس خواسہ؟“۔

بندغ اونا سوالا تے پُہہ مروس تو جواب تننگ کن اُرا نا بندغ کسے نا پنے توار  
کر یکہ۔ اگہ آخا ٹپو نا سوالے پُہہ متو کہ یا اونا جواب نا تننگ ے ضروری سمجھتو کہ اوسیدھا  
اُرا کن سر ہلککھ تو داسا ٹپو ارامسہ واراوڑا وکا کہ او اودے خبردار کر یکہ کہ  
”ہفیس“۔

”ہفیس“۔

”پین مونی ہفیس“۔

اگہ اونا انکار آن باوجود کس مونی قدم ارفوسس تو داسا خنتے تینا خین کر یکہ او  
اودے تینا آوازاٹ خلیفیکہ

”انچررر رراچ“ خرررررر۔

”اچ“ خچرررررر۔

دا آخریکو وارنگ مسکہ کہ ”اڈ کرتا نکہ کسس اُرا نا تہہ غان بتنے نا تعارفے کن  
تو کتنے ہنداڑے سل۔ نہ تو داکان پدای نا شلوار ٹی تینا باے ہندن سخت کروٹ کہ یاد  
کروس۔ دا ہمو بندغ نا ہوشیاری اونا ذہن اس کہ او اڈ کرو س یا تینا شلوار کڈک  
کرفوس۔

ٹپو اسٹ سودا گرا یلو بخیرا تے ہیچ پا تو کہ۔ دا ارا بندغا تے آای اودے اسہ وار

ہم وکلنگ اوتر ندمنگ خٹو کہ اودا فتنے آن سوال کے یاد ادفتنے خلق ٹی الپ۔ اودے معلوم اس دافتا کاریم ہندا اُراتا مونا بنگ او منج آتیا تولنگہ۔ دافتنے آن بیدس ٹپوے جوگیک بھاز دوست اسر۔ جوگی تے کن دہنومہرئس کر یکہ کہ ہراتم جوگیک ننا خلق آبرو سرتو بغیر اجازت آن جوگی تون دوشہ ہلنگ کن سر ہلکک۔ ہمو فتنے اٹ شکار کر یکہ۔ جوگی تاسر نہ غاتے خفتور یکہ دوشہ غاتا چاپے ہرا کہ او جوگی تا اننگان گڈ ارا غا بسک۔

ٹپو او کنیاری خلق ٹی مثال کس اس۔ تیرمہ نادے ٹی صُحب تون ای او ٹپو ناوڑ آ انانہ۔ ای ہموڑے ناوڑ نا ڈپکا شنز آتا خیرے بالٹین کس دیریتخاٹ کوسے کشاٹ او غسل کریت۔ او ڈپکا سلوک خلق نا کنڈا ہرا کہ دہن مف کس بروے۔ کنا غسل آن پد ٹپو شنز کسے ناخیرہ سلیسکہ او ای او نا ذی آدیر شاناٹ او ٹپو تینا پڑہ غاتے بریفیکہ او سر ہلکک اُرا کن انانہ۔ او ہراتم ای سائیکل آماکاتے کن اناٹو او کن تون او اربسک۔ دیگر تو ای او عامر ٹپوے تین تو فٹبال گوازی کن ہم درینہ۔ ایرے ایلو خلق آتا کچکا ک ہم بسرہ ولے کس ٹی ہمت الو کہ او ٹپو نا مونا تینا لٹکے سرفوس یا نظرے بڑز کرو س۔ او خٹو ک ناٹھ خلق اسر اوکل خلقا تا کچکا تے ٹپو ٹپاس او فتنے دتر چر کر یس۔ او کچکا ک ٹپوے خنارہ تو خنگ تو اُستاک تالڑزارہ۔

اسہ وار ٹپو گروڈ نا پیشن آ سلوک ننا فٹبال میچے سیل کر سا اس کہ سمیع تینا پوسکن شار آن ہتو کا کچکے ٹپو آ ”ہش ہش“ کر یکہ۔ او کچکے سمیع شار آن ارا ہزار آ بلکوس۔ او خاص ٹپو نا مقابلہ کن بیٹس تہ۔ بڑز او بور او اولونو کچک کس اس۔ چہرہ تا گڈک آن بار اس۔ خنک تہ خمار خمار اسر۔ ای ہش ہش نا تو ارے بنگ تو گوازیے بس کریت تو سمیع کنے خنگ تون فوراً چیلنج تر سا پارے

”بروڑے“ ٹیپو بھاز جنگ کرینے۔ یلہ کرتہ اینو ہرن ارک ارپک نا کچکے کنا شیر ۔

ای اسہ نظرئس اونا کچکا ہراٹ تو کنے خٹک ار فے کہ دا پیر ہنگا جھوڑی آ کچک  
ئے کنا چست انگا نو جوان انگا ٹیپو تو جنگ تر فک‘ آ مخ۔ ای انکار کریٹ تو سمیع نامسخرہ او  
خٹنگ آک عامراٹ برداشت متوراو کنے پارے ”یلہ کر ٹیپوئے“۔

ای ٹیپو ناخ آدوے تینا تخسا اونا مٹھا اور تے خوشکاٹ تو او پُہہ مس کہ اونا یارنا  
عزت ناسوالے۔ نم یقین کیرے اے کچک دا اسکان اولیکو قد مے ارفتوس کہ ٹیپو جب  
ئس خلک او سمیع نابزرگ آشیر ناخ ٹی تینا تیز انگا نیش تے ہندن شانا کہ او بڑزا نگا کچک  
دڑدان دھنوپراؤس خلک کہ سمیع ناخنک خیسن خیسن مسراو اونا بچ انگا کچک جوان دمئس  
دانگ ایگ خستائے، وس کرے زور خلک ولے ٹیپو آن خلاس کنگ کتو تینے او آخر دم  
درے لگا ڈغارٹی۔ آخر ہندا مس کہ او بھلا کچک منڈوتیان بارخولوزہ خلک کہ۔ کنے عذاب  
بس تو ٹیپوئے توار کریٹ ”بس ٹیپو بس“۔

ٹیپو کنا توار تو کچکے یلہ کرے او یلہ مننگ تون سمیع ناشیر ہموکا شارنا کسرے  
ہندن ار فے کہ اودے آن گڈننے خلق ٹی او کچک ولد انا بچ نظر بتو۔

ٹیپوئے ریک اٹ اینگ نا بھاز شوق اس۔ ہرا دے عامر بچ آ رخت ئے  
تخوس تو او پُہہ مسکہ کہ عامر پاٹ کن کاتک۔ عامر پاٹ کن صُحب ناوختی اذان تے آسر  
بلکہ او ٹیپو اورٹون اوار بچ نارنداٹ انا کہ۔ ارا نن او مُسہ دے اینگ جنگل اٹ مسکہ۔  
ہموڑے عامر او بچ نا خیال داری ئے کر یکہ تینا شو قے پورا کر یکہ او ولد اعامر تون اوار بسکہ۔

وخت وخت ای ٹیپو نادامہر دا وفا داری اونا خلوصے یاد کیوہ تو اونا معصوما خٹک  
کنا خستے ٹی بریرہ او کنا خٹک دیر شولہ کہ دا بے زبان انگا حیوان انت ئسے کن نن کن داخہ مہر

کر یکہ؟۔ انت ئسے کن نناداخہ خیالے تھاکہ؟۔ انت ئسے کن ننے سیر تیغ خاچنگ کن جندتہ بھلان بے تیغ یختے ئی چکر کر یکہ؟۔ بیرہ ہندا وجہ غان کہ اودا اُرانا نمکے کنگوس۔ دا اُرائے تینا اُراناو ننے تینا سمجھا کہ۔ اوچتئی آن ہندا رے بھلن مٹس۔ نن کل اونا اُس اودا خلق ناس۔ واروار ماضی نادے تے یاد کر سا کنا اُسٹ پانک ای ٹیو آن معافی خواوسٹ اودے پاروسٹ کہ نن نامہرا و فانا لائق افن بلکہ نن نافر ت ناہم قابل افن۔ نے معلوم اف نے آن مُست دا اُرائی نالمہ رہیگا کہ۔ اونن تو اسہ چھو سال کس اوار مس ولدا ہرا تم نالمہ چنا خنا تو اودے بیچ مسٹر اسہ مار کس مس۔ اومار تہ نی اُس۔ داخوچتکو نازر کو پمبی و دوتک کس اُس۔ چرہ لَمہ ناخذتے لچوک اُس۔ دے ونن بس پال کنگوسہ او لَمہ نا پچھڈ آ لگاسہ دڑاسہ تینا ایڑتون گوازی کریسہ۔ آخر اسہ دے نن بے وفا غاک دا ظالمک ناہر بیچ انگایڈتے نے اونا لَمہ غان انداری کور ئسے ئی بند کرین اوشار آ راہی کر فین۔ انتے کہ اوسٹر اسر اونن مسٹر درکارالو۔ نن دا ظلم آن گڈ ہم حیا کتون۔ ننا ضمیر ننے ملامت کتو تو اسہ دے ناخستے آن چپ نالمہ ئے اے مون نا کڑی نادرخت ئی تقین اوشاٹ گن ئی شوٹ کرین۔ کنے دا اسکان نالمہ ناہموخوینکی آخنک یادو کہ او کہنگان مُست نناخستے ئی ہرا کہ او سوال کر یکہ

”نم کنے خلیرے؟۔ ہراچھو سال کس نما خیالدار ی ئے کرے۔“

”نم کنے کہسفرے؟۔ ہرانے اسہ دلیر و مار کس ودی کرے تس۔“

نم کنے ہمودو تے اٹ شوٹ کیرے ہراٹ اِرخ کنفیرے۔ وانا سناک وانا وفا نامہر دنیا غان جتائے نم بس تینا مفاد نایا ریرے۔“

کنے ہندا دے کن کنفیرے تو ریرے تاکہ ای نمے اسہ مار کس ایتو ولدا کنے شوٹ

کبو کہسفو؟۔“

ای ٹیپوئے پانگ خواہیٹہ کہ نالمہ ءے کہسنگ آن گڈن اودے ہومون نا  
ریک ٹی کھڈ کرین ہراڑے دیگر ناپاس آی اوئی گوازی کن انانہ۔ اوکنے ناہمودیک ہم  
یادو کہ نی پورا توکس تینا نالمہ ءے خلق ٹی اُرا اُرا کر سا پٹاسہ او ہر بندغ آن سوال کریسہ ”کننا  
نالمہ ءے خناس؟“

”کننا نالمہ خنک۔ کنے پا ہراڑ کنے؟“

ولد کنے خیال بس کہ اگہ ای تینا بندغاتا دا کافرا نگا اُستاتا کاریم نا ٹیپوئے سئی  
کروسٹ توانٹ ٹیپون تو اسہ دے کس پین اڈ کریک۔ انت او سننے معاف کریک۔  
کننا آخریکو ملاقات ٹیپو تون خدومس۔ اوکان گڈ ای خوانگ کن انانٹ او ہرا تم واپس  
بُٹ او مئی آن دڑینگاٹ تو ٹیپو کننا مونا بتو۔ کنے ہندا لگا کہ عامر تون پاٹ کن انانے  
ولے ہرا وخت عامر ءے اُرا ٹی خنٹ اوٹن ٹیپو نا ہر یفیٹ تو او کنے پارے

”ناننگ آن گڈ اسہ دے پشی کس اُرا ٹی سوتا گند آ پترینگا کس او ٹیپو نا خوف  
آن سوکس باٹی ارفیسس او اُرا نا بخاری ٹی ڈکاس تینے۔ ای اُرا ٹی پترینگاٹ تو نالمہ پارے  
سوک رکابی آن پشن تما سر ہراڑے ارے پشی کس درینے تہ ولے اُرا نا پشن آپٹیک ہچ  
اینو اسکان بتوسر۔ ولدا شام تون بخاری نا تہہ غان شہرہ نا تو اُرا کس مس تو معلوم مس کہ پشی  
ٹیپو نا ہڑز آن تینے بخاری نا تہہ ٹی ڈکانے۔ نن ٹیپوئے تو ار کرین تو ٹیپو پُہہ مس کہ پشی  
ڈکو کے۔ ٹیپو زوزو کٹ آ لگا کٹ آن دیوال آب چپ کس خلک اود دیوال آن کوئی آ۔ ای  
شیف آن بخاری نا تہہ غا پشی ءے خلیفیٹ تو پشی خوف آن بخاری نا ہڑز آن پیش تما او پیش  
تمنگ تو کوئی آن شیف جب کس خلک تو او نا ہلنگ کن ٹیپو او نا رنداٹ جب کس خلک او  
ڈعارا تمنگ تون ٹیپو نا راستیکو دو بند آن پٹا او ٹیپو نا خنک خل آن خرینکی مسر۔“



عامرنا ہیئت شروع کس کہ ٹیپو نادڑ دآن کنا اُست دڑ دآن اوخنک خویک  
آن پر مسر۔

”ولدا ٹیپو نادوئے دوائی کرین۔ زار چوبہ خلکن پی کرین۔ ٹیپو موٹو اُرا نا منج آ  
تموک دڑ دئی نالا کہ۔ اوہرا وخت دے ہشوس تہ تو لنگ لنگ کرسا دلّا تہ تاشیف نامب آ  
سر کر یکہ تینے اوہموڑے باخوئس کنتگکہ اوہوزے ڈغار آتخا کہ خنتے تر کر یکہ۔ دانیام اٹ  
ارا تو گدرینگا ولے ٹیپو نادو جوڑ متو۔ آخر باوہ اسہ دے ٹیپوئے علی شیر ناڈا سن ٹی سوار  
کرے او علی شیرے پارے کہ ٹیپوئے شار آ در اوہموڑے جاگہ کس یلہ کر۔ دا ٹیپو داسا ننا  
کاریم ناف۔ آخر ہندا مس ٹیپوئے سوار کریر او ٹیپو تینا بیوس انگا دیری آ خنتے اٹ نننے آ  
مسہ چار نظر ہر اولدا مونے تینا شیف کرے انا۔“

عامرنا گپان ٹیپو نارادا کنگ نا خبر آن کنا اُست تہہ ٹی فریاد کنگ اس۔ کنا سیدہ  
باوہ نا ظالمی او ٹیپو نا بیماری آن تر خنگ اس۔ واردا کنا ذہن ٹی سوال بسکہ کہ ٹیپو انگ نا  
وختا انت سوچ خلکنے۔ ننا باروٹ تین توات پارینے کہ نن اودے او نا بیماری ٹی برداشت  
کنگ کتون اوزوز و تینے آن مررا ہی کرین۔ داخہ مفاد پرست داخہ ظالم ان نن۔

ای مسہ تو خلق ٹی مسٹ اوہندا انتظار ٹی اسٹ کہ ٹیپو تینے ضرور اسہ دے کنا آ  
سرکیک ولے ای غلط ثابت مسٹ ٹیپو بتو۔ اوکنے سائس کہ داجار ٹیپو انت کسے کن بتو۔ ٹیپو  
تینا عزت او تینا خودداری نادو آن ولدا اُرا کان دا اُرا اودا اُرا والاتے آبسکہ ہراژن  
اودے بیماری نادے تے ٹی مڑار۔ دا اُراغان نننے آن غصہ کرو س تو ولدا ضرور بسکہ۔  
اٹ اواری اوڑا ترند مسٹ اودے اُراغان مڑھاٹ ولے او ولدا کنے آ بس۔ ولے داجار  
باوہ تو اودے صاف صاف پارے ”داسانی ان۔ نننے نا ضرورت اف۔ نننے مند و کچک  
کس تینا اُرا کن درکاراف۔“ اودہن انگاہیتا تے آ ارا غیرتی آ کچک ولدا بریک۔

ای دامنہ تُوٹی اسہ دے نُس ہم سکون اٹ گد ریفنگ کتوٹ۔ دے اون ٹیپو کنا  
 خفتا مونا بسکہ اوتینا معصوما خنتے اٹ کنے ہرا کہ۔ ہرا نا خنتے ٹی ہزار شکوہ او گلہ غاک اسر۔  
 ای اودے تو ارکننگ خواہسٹہ ولے اومو نے اڑسا کہ او خیر کریکہ انا کہ۔

داسا ہم کنا ذہن وارد ماکنے آن ہندا ہریفک کہ عمران نے امر آرام بریک؟۔  
 نے سمائے ناٹپوئے شارنا چناک دے اون ڈونک خلیرہ۔ اودے پھدین آسینا تے آن  
 مڑرہ نرفرہ۔ ایلو کچکا ک اودے نئے دپ نئے آن باخو سے ناکننگ کن الرہ نئے دیر نئے  
 کن۔ ناٹپو داسا شارنا لیلہ ٹی وکچک نُس مسنے۔ ناٹپوئے داسا کس تینا اراتینا خلق ناخوک  
 الپک۔ ناٹپو ہم داسا کس آن خوک مفک۔ اودے انسان نا ذات آن بد بریک۔ او  
 ہراڑے انسان نُس خنک ہموکا نرک۔

## ایلم ناہوشیاری

حاجی در محمد نا عمر ہفتاد او ہفتاد پنچ سال نا نیام ٹی اس۔ حاجی او حاجی نا زندگی ہڑ تو ماک آخری منزل آ اُس۔ دا زندگی ہزار ہا ویل او ہزار ہا گل او بالی تے آن تدیسس۔ او نا مسہ مسٹر او ارا مار برامی اُس۔ ارا مسٹر آن اودے چار شیطانو نو اسہ ہم اس۔ ماک مسنتے آن چنک اُس۔ بھلا مار آن اودے اسہ نو اسہ کس ہم مس ولے او نو اسہ حاجی در محمد آن زیات اللہ دے دوست اس۔ ہندا خاطر آن ارا سال نا عمر اٹ اودے حاجی در محمد آن پلا او تین کن درے۔ ایلو مار شش سال آن عمان ٹی۔ برام دے تا منہ تو متوس کہ پردیسی مس اودا ساکان اودے چنانا نعمت رسینکتوس۔ دا کل چنانا بھلن کننگ او فنتے برام تننگ او تینا نو اسہ غاتے تون گوازی کننگان باوجود ہم حاجی در محمد زندگی نا خواری اودا طویل انگا سفر آن دمدتوس۔

غلّی آرنگ لاغر بار نا ہائی ہراڑا صاف او متکن انگا چچاک ہندن حزگارہ دہنکہ متکو درخت نُسے آہتم نا پوسکنا پناک خر۔ خنک ورنائی نا بے تھی تے آن تہہ ٹی غت ہلکوسر۔ اودیدہ غاک کمزوری آن پالن پالن گرو شک تسرہ۔ پیشانی اودیر مروکا کلک آتے آ زندنا کوس آک صاف صاف مَر آن حزگارہ۔ توار چنکی نا بھاز انگا چہانٹ او چکیکرتا

تین اور رنائی ناغیر آتیاں زند اسس۔ لفظاک دوئی آن تا کرار اوسبک سبک پیش تمارہ۔  
 ہراوڑ اونا زند زندگی ناباسنادے تے آرنگ شولاسس ہندن اونا لُخ ٹی کروکا ہر  
 جوڑہ بے رنگ اس۔ داتو خدا ناخوف اونا نماز نا پابندی اس کہ اودا متکنا پچا تے سلیفیکہ۔ بور  
 انگا سدري دے اونی لُخ ٹی متنگ آن تر تقیسس۔ سدري نا تہہ ناجیب متکنا کاغذاتے  
 آن پر اس۔ اوپیشن نا اسہ جیب ٹی ناس دانی اوایلو جیب ٹی ارس او مزواک تنخوک اسر۔  
 کاٹم آتفوکا پیہن آدستار داسا شیر چائی رنگ انا س مُس۔ مُسہ سال مست تیرمہ ٹی ہلوکا  
 چپلاک شیف آن دیرا و بڑز آن مُسہ جاگہ غان گنڈوک اسر۔

حاجی در محمد نا پیرا نگا خستے ٹی مدام اسہ خوف او ہڑز کس گرو شک تسکہ۔ داکلوگی اودا  
 چچلی نا عمارٹ او سنجیدہ او خاموش اس۔ اونا وڑ نا بندغ داشار ٹی پین ہم بھاز اس ولے  
 بندغاک فقط اونا دروشم دستار او گنڈوکا چپلاتا ذکرے کریرہ او تین تون حیرانگی اٹ پاریرا  
 ”آخر وجہ انتے حاجی در محمد ہن غریب او بیوس ختنک۔ چنک آمار تاشش سال آن عمان  
 ٹی کاروبار یک۔ اوایلو ماریٹ نیاز احمد نادکان ٹی کاریم یک داکان بیدس حاجی نادا  
 حالتے۔ بچ کاٹم کمپک قصہ انتے۔“

حاجی ناہر ہمسرا وشار ناہر زینہ اونا زندگی آحیران اوسر گڑدان اس۔ ای منیوہ دائی  
 حیرانی نا بچو گپ کس اف۔ او بندغاتے پریشان متنگ نا ہم ضرورت الو ولے دنیا تو  
 ہندادے پارہ۔ زمانہ تو ہندابندغاتا پنے۔ اکثر نا بھلاک ننا سنگتاک یا نا محبوباک ننے پارہ  
 ”داوڑ کپہ دنیا انت پاروے۔“

”ای زمانہ غان باز خولیوا۔“

”جہان نابائے دے توروے۔“

او ہندادنیہندازمانہ او ہنداجہانے پارہ۔ حاجی درمحمدتینا زندا وزندگی ٹی خوش او خوشحال اس۔ اُرائی بزرگاتے آن باردے اون تینا کٹ آ تو لوک چلم کشاکش۔ چاکش کریکہ۔ کٹ آ تو لوک ہموکان اُراوالا تون مجلس کریکہ۔ اُرا نا تہہ ٹی دیوال نارہی آ وڑ وڑ نا پھل دیسیس ہرافتے دیرتسکہ جاگہ غا تا جوڑ کریکہ او تینا وختے تیر کریکہ۔

صُحب تو چاشت نا وختا بازار آ انا کہ سنگتا تون مجلس کریکہ دنیاے سیل کریکہ۔ اُرا نا سودا و سامان تے او نا مار ہلککہ پیسکہ۔ او پیراتینا سنگتا تا ختنگ کن دنیا نا خبر نا ہلنگ کن بازار نا دیدارے کریکہ۔ سیاست تون بھاز بھلوشوق کُس تخاکہ ولے ملک نا ہر لیڈر او عوام آن اُسٹ ایکیم کریس۔ چڑہ لیڈر او ملک نا حالت آن گلہ کریکہ۔ او ہر مجلس ٹی او نا آخری ہیئت ہندامسکہ کہ ”ننا عمر آخیر کرے ولے دالک او دالک نا لیڈر او حالتاک جوان متور دا قیامت اسکان مفسہ“۔

ہرا او نا سنگتا ک اسر او او نا ہیئت آ کاٹھے سرفیرے او غور کریہ ہرا کہ اودے درست کتورہ او نا دا گپ آپکنو بخشندہ کُس کریہ او اُسٹ ٹی حاجی نا ذی آ مسخرہ خلکُرہ کہ دا خازگی آ دستار او کشکو کا چیل تون سیاست نا پتے یک۔

حاجی درمحمد نا حالت آپریشان اسدے او نا خوک نا سنگتا ک تین تون فیصلہ کریہ کہ حاجی ءے پنت کُس اتین اودے پُہہ کین کہ دا حاجی انکا بندغ، دا بزرگا انسان، عزت دارا انکا زینہ نی امر دہنو پیچ او دہنو چیل کیسہ۔

دیگر نا اذان مس۔ جماعت مس۔ جماعت آن گڈ ہرا تم پیرانگا ک مسیت آن پشتما رتو او نا ہر مسٹ انکا سنگتا ک فیض احمد، ماسٹر رب نواز او حاجی سعد محمد، حاجی ءے تین تون مجلس کرسا فیض احمد نا دکان نا دریر۔ فیض احمد دکان نا تڑا غا چٹائی کُس تالان

کرے۔ سنگتاک تو سر توفیض احمد زُو زُو چا دانے خور خلک دیر آن پر کرے اوگیس آ  
ایرانی چابیٹ کرے۔ چار پیالہ سلّا۔ منہ گڑ گونی آن ارنے۔ تول ناوٹ اٹ گڑتے  
خوڑت کرے اخبار ناذی آتخا۔ اودم نَسے نا انتظار آن گڈ چاتے پس او جنتا ہم مجلس  
ٹی اوار مس۔

بزرگاک شروع نا اسہ اسہ پیالہ نَسے سیاست نا سر حال آ کٹفیر۔ اٹمکیو پیالہ تا  
شاعنگ تون حاجی سعد محمد ماسٹر رب نواز نَسے اندری اشارہ کرے کہ حاجی آن سوال کر۔  
ماسٹر رب نواز نَسے خوانندہ اس نَسے اسکول نَسے ناماسٹر اس۔ بس چٹکی آن کل  
اودے ماسٹر پاریرہ۔ او ہندا ماسٹری نا لقب آن ماسٹر آ تا ڈول گپ کر یکہ او ماسٹر آ تا انداز  
اٹ زندگدر بیفیکہ۔

ماسٹر پیالہ غان گلم نَس ہلک او حاجی در محمد نَسے مخاطب کر سا پارے ”حاجی  
صاحب! اسہ ہیٹ نَس کروئی نَسے تو۔ امید کینہ نی اُسٹ ٹی کپروس۔“  
حاجی در محمد گڑے بائی کر سا ”نہ ماسٹر انت نَس اُسٹ آ کروٹ پا۔“  
”اول تو ننا اُسٹ خوا تو کانے پان۔ ننا انت کاریم نن نازندا و نازندگی تون  
کاریم تورین ولدا سوچان کہ نا سنگت پاس ایلیم پاس کل نن اُن۔ نن نے پاپن دے  
پاروے“ ماسٹر ماسٹری نا شبوتے تر سا پارے۔

حاجی در محمد نا ضعیف آ اُسٹ زر نَس پین ضعیف مس او ہر مسٹ انگاتے آنظر نَس  
اڑسا کرا کرا پارے ”انت ہیٹ نَسے“۔

ماسٹر خنتے شیف کر سا ”حاجی! مچا شارے خبرے کہ نا اسہ مار ابراہیم عمان ٹی  
کاریم کیک۔ او جوانو کارو باری و بندغ نَسے۔ نما ارا نَسے خنتگان او نا کارو بار نا ہم اندازہ

مریک ولے ہر اتم نے آنظر تہمگ نادا بے رنگ آ دستار کشلوکا سدھی متکنا چچاک اودا گنڈوکا چچلاک خن ٹی بریرہ تو اُسٹ اٹ ارمان تون اوار اسہ سوال کس ہم ودی مریک کہ آخر وجہ انتے؟۔ سو ب انتے کہ حاجی در محمد تینا مارنا خیر آ داخہ بیوس او غریب جوڑے؟۔ حاجی در محمد ماسٹرنا سوال نابنگ تون ہندن مس دہنکے کس اونا گٹ نارغ تے آ نت تخر۔ اُسٹ تا سینہ ٹی دک دک شروع کرے۔ او خوف او خلیس آن دروغ ترسا پارے ”ماسٹر! او بے غیرت کنما ماراف۔ او خبر دار آ سندہ اونا او کنا پنے اسہ جاگہ غابلس۔ اونا او کنا باوہ ماری شش سال مالو پٹا۔ او تینا لمہ نامار مرو۔ تینا ایلیم تا ایلیم مرو۔ تینا ایڑتا ایلیم مرو ولے حاجی در محمد ماراف۔“

حاجی نادا غصہ او گپ آ ماسٹر فیض احمد او حاجی سعد محمد کل خنتے اُسٹ ایلو آ کٹار او حاجی سعد محمد ہمت کر سا سوچ کرے ”آخر وجہ انتے؟۔“

”وجہ ئے کنے آن سوچ کپہ۔ بس گم کر او بے غیرتے“ ہندا خس پانگ تون حاجی در محمد بش مس کہ فیض احمد دو ٹی تا ہلک او ولد از نڈ فنی تا۔

حاجی نازنڈ فنگ تون فیض احمد ناخنک خوینکی مسر او پیرانگا دوئی ئے لڑزیفسا پارے ”بختا وار داخہ ضد کپہ۔ ای نے آن بار اُسٹ ہڑدے مار تون جنگ کریٹہ۔ ہر وخت پٹ ولعت کریٹہ۔ ترند مٹھ اوڑا کیرنگ تٹھ۔ آخر ہر از دے دُز آک چار پیسہ کن دریرتا تو کنے تینا آجی او بے وقوفی نا احساس مس۔ کنا حال ناختنا مونا اس اودا سا ہم نا مون ٹی ئے۔ داپنوکا دکان آن ای انت کس مچ کریٹ کہ او فنی ایتوسٹ او تینا مارے آزاد کر فوسٹ۔ انا، ہمو مار او آخرا لاش تا کنے آ بس ”ہندا خس پانگ تون فیض احمد خوک کس خلک ہو غنکہ شروع کرے۔“

فیض احمد ناہو غنگ او اونا مارنا غم آن کل چپ او نا شاد مسر۔ مچہ خاموشی آن گڈ  
 حاجی سعد محمد حاجی در محمد ناخنٹے ٹی ہر سا پارے ”نن نے آن نا او نا مارنا ناراضگی نا وجہ ے  
 سوچ کنگ خواپانہ۔ بس ہندا خس پانہ کہ انت ناراضگی کس ارے مر کرتا۔ ختم کر غصہ ے  
 تینا۔ قتل کردا انا ے ہرانے نا پردیسی آمار تون گپ کنگ کن الپک۔ او نا راہی کرو کا پیسہ  
 غاتے اٹ تین کن تچ بل۔ پوسکنو دستار کس بل۔ سدري کس بل تین کن۔ جوانو ساختی و  
 چپل بل اولدا اوڑ کن تینا اسہ زیبا و تصویر کس بل راہی کر۔ او ہم خوش مریک نا ہم اُست  
 سبک مریک۔“

حاجی در محمد ولد ابلش مس ابلش متنگ تون ترندی اٹ پارے ”ای او نا اسہ  
 ہشتانہ کس خواپرہ“ او گام کر سا سر ہلک اراکن۔

اونا انگان گڈ ماسٹر رب نواز پیالہ ے تخسا پارے ”دانا او مارنا تانیام ٹی بھلو  
 جھگڑہ کس ارے۔ داضدی دہن زو خوش مفک۔“

ماسٹر نا جواب ٹی فیض احمد تینا مارکن ہو غسا جواب تس ”ہندا ناراضگی نا وجہ غان تو  
 اونا مارش سال نا سے اُرا غا بننے۔“

اودے آن گڈ دامہ سنگت حاجی در محمد تون او نا مارنا باروٹ بچ ہیئت کتور۔  
 شارٹی داگپ مالو آن تالان اس ولد اودے آن گڈ داگپ چٹ پک مس تو اسہ وارولدا  
 تہو ٹی خبر ورد کرے اوکل کماشاتے کن دا خبرے سر کرے۔

خبر چکر کر سا کرسا دا اشار آن ایلو اشار آانا تو حاجی در محمد ناچنکا ایلیم دین محمد ناخف  
 آسر مس۔ دین محمد ورنائی ٹی تینا برام آن گڈ تینا ایلیم آن جتا مس۔ داسا او نا عمر پنجا  
 سال آن تدیس ولے ہاٹی اودوی ٹی دا اسکان ورناس۔ او ہرا تم سئی مس کہ ایلیم تینا مار



آن غصہ ے او مارتا ہندانا رانگی ناسوبان علاقہ غابفک اوڑکن پیسہ راہی کپک تو تین تو  
نیت کرسا پیش تہما کہ کا وایلم ے مار آن تا خوش کیو۔ اونا ذہن ٹی مالودا اس کہ بلکہ مارتانا  
صالح او بے وفائس مسنے۔ پیشن نادیر اثر کرینے اوڑا کہ باوہ کن خرچہ راہی کپک اودے  
مار پک ولے داڑے ہیت پین اس۔

صُحب تون چاشت ناپاس آدین محمد تنے ایلم ناراغا سر کرے۔ دیر او چامس تو  
ایلم ناکٹ آتو لوک پیتے شروع کرسا پارے ”نی کل آن مست داپای نانت مریوہ؟۔  
حاجی در محمد بشند ہس کرسا ورنڈی تس ”ایلم اُس کنا۔ ہمو ایلم اُس ہرازا ایفہ نا  
گپ آاڑائے جتا کرے۔ پین انت کنا لہ اس۔“

حاجی دین محمد بے عزتی آن چوؤ و آختے شیف کرے اودم نئے نا خاموشی آن گڈ  
ولداتینا تیزانگا دوئی اٹ گپے مونی درے ”ای نا ایلم اٹ تو داخہ وختان نی کنے انتے  
پاتنس کہ نی ابراہیم آن غصہ اُس۔ اونا راہی کروکا پیسہ غاتے آن تین کن ہیج ارفیسہ۔ ای  
تو سمجھا سٹ بلکہ اونا بودا ونا صالح مسنے نما خیا لے کپک۔ کنے انت سما اس داڑے حاجی  
صاحب غصہ نادستارے پیڑانے۔“

”تو داگپ نے آسر مس“ حاجی در محمد کراولہجہ سے اٹ جواب تس۔  
”امر سر مفک۔ سر تو مس ولے کنا اُست خرابے کہ داگپ کنے آبیگانہ غاتا  
کنڈان سر مس“ دین محمد غصہ کرسا پارے۔

”دانت ہیت نئے ہراڈن نی ناراض مریسہ“ حاجی در محمد ایلمے نواریفسا پارے۔  
”دا بھلو ہیت کس اف تو نی کنے راست راست پانی اوڑن انتے ناراض اُس۔  
نے رب نادروئی ے راست پاس“ دین محمد پارے۔

”توبہ توبہ واسکان چناتے آن بارقرآن اوقسم ایتہ۔ خیر فی ایلیم اُس تونے راست پاو۔ ہُرس پیشن آداپیتے کس تون پاپیس۔ راست دادے ای اوبراہیم ہیچ تینے آن غصہ اُفن۔۔۔“ حاجی درمحمدناہیت کٹھوس کہ دین محمد اونا گپے کاٹ کر ساختے نیم تر کر ساپارے ”امر۔ امرنی اونا راض افیرے؟“۔

”ہو ای اوژن ناراض افٹ۔ داکل اسہ دروغ نُسے۔ ای دنیاے ریفنگ کن داشاروالا تے ریفنگ کن دا گپے تالان کرفیٹ کہ ای تینا پردیس آنوکا مارآن غصہ اُٹ۔ کنادامتکنا دستار۔ کنادارنگ شولوکا پچاک۔ گنڈوکا چپلاک داکل دنیاے ریفنگ ناؤ۔ کنا مارکنے بھازدوستے اللہ اونا کاٹھے دراخ کے“ حاجی درمحمد ایلمے تسلی تر ساپارے۔

”دادروغ وشاروالا تے ریفنگ ناوجہ؟“ دین محمد ایلم آگوڑینکساختے کشسا سوچ کرے۔

”وجہ وجہ پین انت مرو۔ ہندابے مراد دُز آتا ہڑز آن اوفقا خوف آن۔ دے نا مون اٹ بندغاتے لکھ رُپی کن دُزرہ کہسفرہ۔ فیض احمد نامارے ہنداوجہ غان دریر کہ اونا باوہے دکان نُس ارے بس۔ سلیم ناباوہے دُزار کہ سلیم تون پیسہ ارے۔ حاجی برکت نا چنکا مارے واپیسہ غاتالالچ کن افیردریر۔ داکل دُزار پیسہ ہلکور اوہرا فک تنگ کتورتو بندغاتے کہسفر۔ ایلم داشار ٹی کل سئی وکہ ابراہیم عمان ٹی کاروبار کیک۔ داشش سال نا سسے کس کنے یا کنا چنکا مارے دز تنے توننا ہندا حال ناوجہ غان۔ کنا ہندا دروغاتے آن“۔

ایلم ناداہیت آدین محمد جک سلیمس اوبرونکا تے بڑزکوش تر سا جوڑتے اوار لچفسا فخری و ہنداز نُسے اٹ جواب تس ”سلا مے کنا ایلمے۔ واقعی ناہوشیار ایلم فی اُس۔ دادنیا اودا دُز آتا ہندا دوائے۔ گڑ ادا نا مطلب اونیکن خرچہ راہی کیک؟“

"ہو بلہ، ہر ٹو آراہی کیک۔ کن تون ہیئت کیک۔ دا اُراتا سامانک دا گڑا اک کل اونا پیسہ غاتا ہلوکو، حاجی در محمد ورندی تس۔

”گڑا ہراوخت بریک۔ انت پانک“ دین محمد سوال کرے۔

”گنوک مسنس۔ او برے داڑے دُزرتا۔ داسا او بفک اونا زانیفہ نا فیرا

بریک۔ ولد ازانیفہ تہ ہمونگ راہی کینہ۔ ہراوخت داجا گہ نا حال تاک جوان مسر گڑا پانہ تہ برک۔ انشاء اللہ“ حاجی در محمد جواب تس۔

دین محمد ایلم نا دانائی او اونا ہوشیاری نا دادے تس او ولدا سوارنا ارغان گڈ رخصت کرے انا۔

دانیام ٹی مُسہ دے گدرینگا تو اسہ دے خفتن نا نماز آن گڈ حاجی در محمد مسیت آن اراکن بتنگ ٹی اس تو اوقتا اُرا نا خیر آن مُسہ نقاب پوشو بندغ بٹراو حاجی نامونے ہلکور اوتینا ورنائی اوطاقت ناز وراٹ حاجی نالاغرا نگا بد نے خمب کریرا و باٹی تہ پچ کس تسراو دو تے تا سخت سخت توریرا و حاجی بے بڈ کریرا گڑی سے ٹی بٹیرا و سر ہلکر۔

## سردار ناشار

دا خلق سردار محمد امین نا خلق اس ہرا ”سردار نا خلق“ نا پٹ مشہور اس۔ ہرا نا وجہ دا اس کہ داسیرک انگا پٹے ہزار ہا میل اسکان پین اُرا الو۔ سردار نا خلق مُسہ جاگہ غا بشخوک اس۔ اسہ بُشخُکس قبلہ ناکنڈان اس ہرائی پست و اُرا اُسُر۔ ایلو اُراک واہندا اُرا تا چپکیو پارہ غا اُسُر ہرائی شانزدہ اُرا اُسُر او خلق نا مُسٹیکو آ حصہ دا اُرا تون مون پہ مون منہ کلومیٹر نا فاصلہ ٹی اس۔ ہرائی سردار محمد امین نا ہرا ہم اس۔ سردار نا جند سندھ ٹی رہیگا کہ۔ دا اُرا تے ٹی او نا بزغریگ محمد تینا چناتے تون جاگئی اس۔ سردار نا خلق نا کل اُراک چل و ہشت اُرا اُسُر۔ دا چل و ہشت اُرا مُست ریک اٹ آباد اُسُر۔ عمر کس ریک اٹ گدریفنگان گڈ او فنتے جاگہ سے آن خبر مس کہ پٹے ناوڑ کس خُتنگا نے تو آخر او ہندا ناوڑ کن مون کریر۔ داڑے بُسر تو معلوم مس کہ داناوڑ سردار محمد امین ناے بس ولدا وانا اجازت اٹ تینا گدانے ہنداڑے خلکُر۔ شروع ٹی منہ اُرا بُسر ایلو فلک انکار کریر کن ریک الٹنگ کپنہ۔ ولے آخر منہ ٹوٹی کل اُراک ریک آن بیٹ کریر او پٹے بُسر۔ ہندا ناوڑ او پھر نا ثواب اٹ تین کن اُرا تَقیر۔ مسیت کس جوڑ او تین کن چٹکو چٹکو باغیچہ ہم کریر۔ داڑے آباد منگان گڈ خلق والا کہ سردار نا اجازت اٹ او نا ملکا تا ماسہ تینکن ڈغا دوسنگ ہم شروع کریر۔

پھر اتا موسم ٹی سردار نا خلق جنت نا ٹلرئس معلوم مسکہ۔ پینکنا جھمرک خلق نا چٹکا  
 اراتا ذی آہندن خنگارہ دہنکہ لمہئس تینا پلوئی چناتے ڈھکہ۔ نم انگاریکا ک ریکا تا ذی آ  
 خرٹ نا گنیا باک، پوہٹنا شنزاک، پالٹیک ہندن زیب کریرہ کہ پری سے نازلفاتے ٹی گل  
 گلابا ک خلوک مریر۔ سیرک انگاپٹ نا پالنئی ناسہ جتا وزیبئس اس۔ دافتے آن چپ  
 ناوڑ نا منظر ہندنئس کہ مفت نا جام خفتے اسکان پُر مرے۔ دانوکا بی آدیتے ٹی نئے ناوڑ نا  
 گوازد درست مسکہ نئے ڈسکا ک۔ صُحب نا پاسہ ناوڑ آن دیر کروک آ تا نظارہ چٹ جتاو  
 رنگئس تسکہ۔ ہنشک اشر بیش تے سلواوڈوٹوک اوڈووتے ٹی خلوکا شپا لونک آک، دیر  
 ارفوکانا زورکا مسک۔ پھر اوآبادی ناوختا دا خلق صفا فردوس نا جنسارئس اس۔ نوکاب نا  
 دیک اشر۔ ہر اراٹئی لانداس۔ اسٹوپئس، دانکوبنگ اس۔ پیرانگا تا قصہ غاک اشر۔  
 مالداری اس، زمینداری اس۔ خرٹ نا پٹاک اشر۔ پدینا ریکا ک اشر۔ ہر کنڈا مخنگ اس ہر  
 کُنڈا روشن انگا چہرہ غاک اشر۔

بد نصیبی دا اس کہ دا خلق نا ہر خوشی پھر توں تفوک اس۔ ارا سال پدریہ پھر  
 کپروس تو چہرہ غاتے آن خوشی نارنگا ک بال کریرہ۔ ہر بندغ ناشاد او پریشان مسکہ۔ دا  
 خلق نا ہر بندغ نا جوڑتے آ فقط اسہ دعائس ورد کریکہ کہ خدا جان ناوڑے آباو کیس۔ ناوڑ  
 نادیرٹی برکت شاغس۔

کنا جوان یاد آبریک کہ او نیام ٹی چار سال پھر کتو۔ ناوڑ نا دیک ہم کٹار۔  
 ولد خلق والا ک سردار نا اراٹمیکو ناوڑ کن مون کریرا او دے ہم چھیر تو اوکان گڈاوتہ دیر  
 نارندٹی خوار چرینگا راو پند خلکراو کئے سمائے۔ خیرات ہمو پھر کن داخلے ہر سال دیر تسکہ نہ  
 تو دا خلق اسہ ارا ناوڑ ہرکان بس کریرہ۔ کنگ نا دیک، بے شولنگ نا دیک، ساہارتا دیک،

بگ نادیر اودا فتنے آن بیدس ملیشا والا کہ جتا بُسرہ تینا ٹینکی تے پُر کریرہ۔ اوسر دارنا ناوڑ  
ہم سر دارنا اُستان بار ختوک اس۔ اودے خدا دا خواہیمان کس تنوُسس کہ خلق نا ناوڑ ٹی  
منہ گھنٹہ خلفوس۔

ہر توماناوڑ نادیتے کُلفنگان گڈ خلق والا کہ ولداریک ناوون تے کن مون  
کریرہ۔ ہموریکا تانیا م اٹ اراہنیو دون اُسر ولے اووون تے اِسکان انگ بنگ آرا  
دے اِرانن لگا کہ داہم مجبوری آن انا رہ۔ اوچار سال خواجہ غاک تینا بچا تے بگ آن  
اڑسار کہ بغیر بچا تے آن دیر ہتکوک۔ ریک اٹ سفر متوک۔ ہرا بند غاتے بچ الوتو اودے  
آن اسے بند غ کس بچ والا تون ہما ہی کریکہ او تینا اسے ڈوئس دریکہ۔ خلق نا بھلا جوانی دا  
اس کہ دیر بیشک الوولے احساس چٹ بھاز اس۔ او ہر بند غ ٹی اس۔ دادیتے ہتنگان گڈ  
دا فتنے اُرا والا کہ تینا خواتے ٹی خزانہ غان بارڈ کارہ۔ فقط کتنگ کن استعمال کریرہ۔ او ہرا  
اُرائی مچہ بھاز دیر مروس تو او اُرا نا زالبولا کہ تینا دیتے اٹ تینا بدن تے پالیفیرہ۔ زینہ  
غاک تووون تے آن دیر ہتنگ ناوختا ہمیرے غُسل کریرہ بچا تے تینا سلا رہ۔ او دخت  
اوسالا کہ کنا ہوش آبریرہ تو کئے محشر نامیدان یاد بریک ہرانا ذکرے رب پاک کرینے۔  
بس دا پیرا نگا تا داک اُسر ابدال آتانیکی نیتی اس مالدار آتا خیرا تا کہ اُسر کہ خدا جان  
جھمرا تے راہی کرے خلق والا تے عذاب آن کشا دا ناوڑا تے پُر کرے۔

پارہ ہر تہاری ئے اسے روشنو صُحب کس ارے۔ خلق والا تا داعدابی بیوسی اوخواری  
تے ہم اسے آسراتی وُصُحب کس اس۔

اسے دے چاشت ناوختا پیہن اوڈبل سیٹر کس خلق ٹی پُترینگا او پُنتا تے آن ہر فسا آخر  
سردارنا اُرا نا مون آبریک کرے۔ سردارنا بزغریگ محمد تون ملاقات کس کریرہ۔ چائس گنگر

اوپاغان گڈ اسہ زیباؤ زالبول نُس اور اورنا ومار بیگ محمدتون اور خلق ٹی اُرا اُرا کنگہ شروع کریر۔ اوخلق ناہر اُرا غا اناہ۔ اور انا خواجہ اوچنا تا پنتے لکھارہ۔ خلق والا ک سوچ کریر تو معلوم مس کہ دا این جی اوز (NGOS) والاؤ۔ دا اسہ غیر سرکاری ادارہ سے ہرا غریب انگا بند غاتے اوویرانہ غا خلقا تے آباد کنگ ناسلسلہ نُس بنا کرینو۔ خلق والا تے آن کماش نُس دامہربانی ناسو بے سوچ کرے تو جواب تشر کہ دا گڑا تے اوفا ادارہ ثواب نا خاطران کیک۔ بس اوفا ورندی آن گڈ خلق والا ک کل سجدہ ٹی تمار او خدا نا شکرے ادا کریر کہ نی ننے آتینا فرشتہ غاتے راہی کریر۔ خلقی تے حساب کنگ آن گڈ این جی اوز والا ک بیگ محمدتون وعدہ کریر کہ بروکا یک شنبے نادے آ اوچا خلق کن راشن ہتور۔

این جی اوز والا تا انگان گڈ بیگ محمد زوز و سردارے پیغام راہی کرے کہ بردہنو قصہ سے۔ آخر ہندامس کہ این جی اوز والا تے آن مُست سردار صاحب تینے خلق آسر کرے اوخلق ٹی دا خبرے تالان کرے کہ داراشن والا تے سردار صاحب تینا خلق آراہی کریس۔ دا سردار نا پانگ آسوئر۔ سردار نا دا دروغ آن خلق والا ک بدتر سردار نا احسان مند مُسر او سردارے نیک دعا کریر۔ پھگہ کن صُحب نا ختی چار ڈاٹسن اوہے مُستنا ڈبل سیٹر سیفیر او سردار نا حولیلی ٹی سامان تے شیف کریر۔ دا خواجہ غاک راشن تا مشنگ شروع کر سا اُسر کہ سردار او فتنے منع کرے زنڈ فے۔ نھے قسمے نم دا گڑا تے دو خلیپرے۔ نُم مسافر و بند غ ہرے نم تو لبو چائس کنبو آرام کبودا فتنے نن تینٹ خلق ٹی بشخہ۔ این جی اوز والا ک سردار نا شکرہیے ادا کریر چائس گنکر او ولد اسر ہلکر۔

سردار صاحب بزغراو تینا گاٹ آتا کُمک اٹ بھلا بھلا لوتاتے نیمہ کر سا کرے۔

بُورائنت او برنج نالوتاتے آن کشسا کرے او تین تون ڈھکسا کرے۔ ایلو  
 ہراچنگا لوتا ک اُسراو فتنے آن کشتو او ہرا راکن اسہ سی سئس اسہ چا بوچ کس ارا دال شش  
 باکس اسہ سیر چھو لے کس تخسا کرے او بشسا کرے۔ ہرا گڑا تے سردار اڑسا او فتنے آن  
 گاڑی تے تینا پُر کرے او پچو کاتے ہموڑے بیگ محمد ناما سا ڈھکا او جنتا ولد اسر ہلک  
 سندھ کن۔

راشن تے خننگان گڈ خلق والا ک ہندن گلان مٹسر دھنک بھلا عیدے۔ نرینہ  
 غاک خُدا نا شکرے ادا کریر۔ زالبولا ک گداتے کاٹم آن شیف کریر او سردار نا عمر کن  
 دعا کریر۔

خلق ٹی منہ دانا وورنا اُسرا ہرا داراشن تا کنگ آن انکار کریر کہ داکا فرنا تروکو  
 راشنو اودا فتنے گنپسہ۔ بھازاک تین تون پریشان اُسرا کہ دا ڈبل سیٹر والا ک نابند غاتے  
 حساب کنگ کن بسو سُر دھن مٹ ننے دُز ورامر یکہ کن درور۔ ہر بندغ تینے آن ہیست  
 کس کر یکہ او خلق والا تے سوچ کسے ٹی شاعا کہ ولے داکان بیدس ہر نرینہ ہر زالبول ہر چنا  
 اُسٹ ٹی گل و بال اس۔

دادے آن گڈ مسہ تو گدرینگا کہ این جی اوز والا ک ولد اُسرا۔ گاڑی ہمو اول نا  
 ڈبل سیٹر اس ولے بند غاک اے الور۔ خلق آبتنگ تون سردار نا ہر فیرو لے سردار اوڑے  
 ساڑی الو تو ولد امنہ کما شو بندغ تو ار کریر او او فتنے پاریر کہ اودا خلق کن دما خلق کن گڑا اس  
 کنگ خوارہ۔ او فاما دے کنگ خوارہ۔ داسا نم کما شا ک پا بون نمکن انت خدمت کین  
 نئے انت کس درکارے نئے انت کس ضرورتے؟۔

خلق تادڑ دے کما شاتے آن زیادہ دے چا سکے۔ او تین تون دم کس پُس پُس



کریر ولد اسہ کماش کس عاجز انگ گٹ اٹ عرض کرے ”نن خلق ٹی اراؤن خوانہ۔ دا ناوڑ نادیک ننے بس کپسہ“۔ ہر اقا جواب ٹی این جی اوز والا ک بشتمدہ کر سا جواب تشر کہ او بھازر ودا خلق ٹی بورنگ کس خلور۔ کماشاک شروع ٹی حیران مٹر کہ دا بورنگ انت بلا نئے ولے ولد این جی اوز والا ک اوفتے پٹہ کریر۔ تو پیر انگاک خوش مٹر کہ بورنگ ہم دون آن باردیر تو کو گڑا سے۔ کماشاک ہر اتم خلق والا تے بورنگ نائی کریر تو خلق والا تا جوڑک بے اختیار کوش ہلکر۔

این جی اوز والا ک ولد اراؤن آن گڈ بٹر او بورنگ نا کاریمے شروع کریر۔ ارا مٹہ جاگہ دیرے چیک کریر او آخر ناوڑ ناماس نا جاگہ گئے گچین کریر او خلق والا تے پاریر کہ بورنگ گئے داڑے خلیہ۔ خلق والا ک ریکا تا چند او خوارے تے خناسر دا اراتا مون ناؤن کن بغیر اعتراض آن بغیر ہیئت نئے آن ہو کریر۔ کاریم شروع مس تو خلق والا ک صُحب او شام کاریمی تا ماسہ تو لوک تماشہ سیل کریرہ۔ بیگ محمد نایغام متنگان گڈ سردار ولد ارسیفہ او بتنگ تون بیگ محمد آثر ند مس کہ او بورنگہ داڑے انت گئے خلیفہ۔ او دا بورنگ گئے تینا ملکا تے ٹی خلیفہ۔ بیگ محمد ولد اسر دار گئے سمجھایفے کہ این جی اوز والا ک دا گڑاے منتورہ۔ دا جاگہ نادیر ہینے ہندا خاطر ان داڑے خلکر۔

بورنگ نا تیار متنگان گڈ این جی از والا ک اسہ سٹورج ٹینکی کس ہم جوڑ کریر ہرائی مٹہ نلکہ او اسہ نولہ کس خلکر۔ خلق والا ک بورنگ گئے اسٹا کتنگان مُست اسہ ہیٹ کس خیرات کریر او موناتے آسمان کن تشر دعا کریر کہ خدا جان نی ننا بورنگ گئے کامیاب کیس۔ بورنگ نا اسٹارٹ متنگان گڈ دیتاڑ برہ مس تو بورنگ نا نولہ غان خاص او ریک پیش تمسہ اس۔ ہراڑن خلق والا ک بھاز پریشان مٹر ولے برس برس آخر دیر صفا

مس اومنه گھنٹہ آن گڈ دیر ہندن مس دہنکے زم زم۔ ہنین آن ہنین صفا آن صفا۔  
 ہمودے نا چاپاک شام نا دھولاک، چُنا تا ترڈوکاک، بھلا غاتا لیکوک، او  
 خوشیک دنیا غان جتا اُس۔

صُحب تون دے نابش منگان مُست خلق والاک بورنگ نانولہ غا خنتے خلوک  
 انتظاری اُس۔ چُناک چنکا تے نلکہ غاتا شیف ے توروک دیر دیر کریرہ۔ خلقی تا ہجوے  
 خنکان گڈ بیگ محمد بورنگ نا چابی تے چرخ تر سابس او بورنگ ے اسٹارٹ کرے۔ دم  
 نئے آن گڈ بورنگ نا دیتا بُرہ مس اونولہ غان خلقی تا زندگی پھاش کرے۔ زندگی ے دُہن  
 صاف خنکا بیوس آخلقیک خوشی آن دیر پُر کنگ تون اوار خُٹیک ہم پوشار۔

بورنگ نا ذمہ داری بورنگ نا چابیک کل سردارے تنگا اُس۔ این جی اوز والا تا  
 وعدہ نُس کہ ہر تُو مُسہ ڈرم بورنگ کن تیل برو۔ او حکم دا اس کہ دے ٹی اِرا ٹیم بورنگ  
 اسٹارٹ کنگلہ۔ اسٹ صُحب نا ختی اسٹ بیگہ نا وختا۔

اِرا تُو این جی اوز والا تا پانگ نا مطابق بورنگ وختا اسٹارٹ او بند  
 مر سا کرے۔ خلقیک صُحب نا وختا تینا خوا ڈبو او دلاتے پُر کریرہ۔ ہرافتے اٹ او غسل  
 کریرہ، گڑ او چاہ کریرہ، چُچ سلا ر، تینا ساہدارتے دیر تُسہ۔ او بیگہ نا وختا ولد خالی آ  
 سموارتے دلاتے پُر کریرہ او خوشی خوشی سکون اٹ سیر تَغ خا چارہ۔ خلق والا تارنگ، او فتا بانا  
 طعام کل دادیتے آن بدل موسس۔

مُسْمیکو تُو نا شروع متنگ تون سردار او بزغرا ندیری اندری بورنگ نا تیل نا دُزی  
 ے شروع کریرہ۔ ہرافتے سردار شمار یکہ او سودا کر یکہ۔ دا دُزی آن گڈ خلق والا تے کن  
 بورنگ اسہ وخت اسٹارٹ کنگا کہ۔ خلقیک سو بے ہر فیرو سردار جواب تس کہ بورنگ

خراب مُسنے دامنہ وختان بھارتیل کٹیک۔ سردارناما سی داتیل تے آن پورا متو تو خوک  
ناملیشا والا تون سودا خلک کہ او فتا ہر ٹینگی ے دو صد پئی آپر کیک۔ اودے آن گڈ ہر ارا  
دے نازی آملیشا والا تا ٹینگی بسکہ او پر منگا ارا گھنٹہ خلک کہ۔ خلق والا ک سردار آن شکایت  
کریر تو سردار مومن آتا لہجہ ٹی ورندی تس کہ داملیشا والا ک ننا و نما خیال داری کن بسنو۔ اوننا  
داخل تو حق مریک کہ نن او فتنے دا بورنگ آن دیرایتن۔ نم پریشان مفسو دا خدا ناعت او فتا  
ٹینگی اٹ کٹیک۔ سردارنا جواب آخلقیک بے جواب مسر او چپ کریر۔

بورنگ نا خلنگان گڈ سردارنا خلق نا اراک و دھسا کریر۔ ہر دہ دوز دے آن  
گڈ منہ ارا ریک آن بیٹ کریرہ او سردارنا خلق آبسہرہ۔ سردار ہم خدا اغان خواسکہ او نا خلق  
بھلن مرے او نا پین بڑز امرے۔

داسہ دا خلق والا تے کن خدا اغان پدنا آسر این جی اوز اس۔ او فتنے نئے سرکار  
تون کاریم نس نئے ایلو سرکاری ملازم تون۔ وخت وخت داریک اودا پٹ و بیابان آتا  
نیام ٹی دا خلق آای غور کریٹہ تو کنے ہندن محسوس مسکہ کہ دا خلق اودا بند غاتے آن سرکار ہم  
بے خبرے ولے ہر اتم ووٹ اک مسرہ تو سردار تون منہ گاڑی دا خلق آبسہرہ او خلقی تے کن  
وارنس راشن کارڈ جوڑ کریرہ وارنس شناختی کارڈ جوڑ کریرہ۔ او ہندا ڈول ولد خلقی تا  
ووٹاتے ہلکرہ ہرانا بدل ٹی سردارنا نا وڑے منہ گھنٹہ خلفیرہ یا بورنگ کن منہ ڈرم تیل تسرہ یا  
پین چکلو کاریم نس کریرہ۔ گڑاسما تما کہ کہ سرکارے دا خلق آتا جوان سمائے۔

این جی اوز والا تا مہربانی اسہ وڑٹ برقرار اس۔ او ہر منہ تون نازی آبسہرہ او خلق  
کن گڑاس کریرہ۔ خدا چاہہ او فتا مقصد واقعی ثواب نس یا پین غرض نس۔ اولیکو بورنگ ے  
خلنگان گڈ اسہ پین بورنگ نس خلکرہ ہرانا ذمہ داری و اسردارے تنزگا کہ خلق خواجہ او اس۔

سردار نادوٹی چابی تابندگان اوانمست نامکار یک شروع مَسر۔ اوهمووڑتیل تے دُڑاکہ او سودا کر یکہ۔ ہموُمست ناڈول ملیشا والا تے آدیر بہا کر یکہ۔

داکان خلق نا آبادی ودھنگ اس ایکان دیر کم رسیدگا کہ۔ سردار آن سوال کنزگا کہ تو سردار تیل نا نیمون کر سا خلقی تے آن چندہ ءے شروع کر یکہ۔ خلقی تا پیسہ غاتے جیب ٹی خلککہ اوهمو خلقی تا بورنگ نا تیل تے واپس خلقی تے آسودا کر یکہ اوفتے دیر تسکہ۔

دارا بورنگ آن گڈ این جی اوز خلق نا چُنا تے کن اسہ عارضی وچُکھو اسکول کس ملا۔ ہرائی چُناک کچی آن چار جماعت اسکان خوارا رہ۔ ہرانا ماسٹر اول ٹی این جی اوز والا کس اس ولہ اسرار تینا سفارش اٹ تینا خوار زادہ ءے سندھ آن بٹنگا او چار ہزار آ اسکول نا ماسٹر خلفہ۔ داماسٹر نا خوانفنگان دُرست مسکہ کہ اسہ وار ماسٹر نا جندے تعلیم متنگوس جوان اس۔ خیر اسکول ٹی خوانفنگ تو الو مگر چناتا ہوش چپ اس۔ کچک جنگ متنگ آن، میٹل خوانفنگان، بیش شمتنگ آن اوفتے کن اسکول ناٹا آ صاف صاف تولنگ جوان اس۔

این جی اوز نا کاریتے آن گڈ سرکارے دیچہ امر دا خلق یاد بس کہ او نارخ ہم دا کُنڈ اتما۔ بھازا تا پانگ اس کہ سرکار نا اسہ پارٹی کس این جی اوز والا تا افسر کس بھلو پیسہ کس تسنے کہ داجار سردار نا خلق والا تا کل وٹا تے کنکن ہلیس۔ ایلو کُنڈ اُمخالف پارٹی نا جند تینے سردار نا خلق آسر کرے او خلق کن کاریسے شروع کرے۔ ہرائی کل آن مُست خلق نا کچہ انگا مسیتے پگا کرنے۔ ہسپتال کسے نا وعدہ ءے کرے او مستقبل نا پین قول او وعدہ کنزگا۔ خلقی تے ہیچ یقین الو کہ دابند غ تینا وعدہ غاتے پورا کرون کن ہسپتال کس کرو ولے ووٹ آتا وخت کس او ایلو پارٹی او این جی اوز نا کست آن دا پارٹی منہ ٹوٹی تینا وعدہ ءے

پورا کر سائے کوئی والا ہسپتال کس تھے اومون نے تاسر دارنا اُسے ناخوش کنگ کن ”سردار محمد امین ہسپتال“ نابورڈ کس خلک۔ ہسپتال نا تیار منگان منہ وخت گڈ اسے پیروڈاکٹر کس خلق کن مقرر کننگا۔ ہرا ہسپتال نا ہندا کوئی تے ٹی رہائش ہم کر یکہ او مریض آتے ہم ہرا کہ۔ سردار اوڈاکٹر نا سنگتی آن گڈ ہر تو ما تانیام ٹی اسے بزنس کس شروع مس۔ ہرا سرکاری آدوانیک ہسپتال کن بٹرہ او فٹے آن ڈاکٹر صاحب مریضاتے آ بہا کر سا کر یکہ او پیسہ غاتے سردار تون نیمہ کر یکہ۔

ہسپتال ناسی منگان گڈ خلق نا آبادی پین وڈھا۔

اسے دے ڈاکٹر صاحب او سردار نا مجلس مر ساس کہ ڈاکٹر سردارے مشورہ تر سا پارے ”سردار صاحب! اسے کاریم کسے نا پاوہ نے ہمودے کراوٹی پیسہ بھاز مر یک نے کن۔“ سردار پیسہ نا پین آختے کشسا ہر فے ”انت کس ڈاکٹر؟“

”نی دہنکہ اسے مٹی کس ہل تین کن، او دے خلق آن شار او شار آن خلق آچلیف‘ خلقیک شار انور ایکان سودا ہتور تینا فصلا تا گوٹھ او غلہ غاتے آن بہا کرو ردافٹے آن اوفا فائدہ مرواوانی او فٹے آن کرایہ ہل نے نا فائدہ رسینگک“ ڈاکٹر پارے۔

ڈاکٹر نا دا ہیبت آ سردار دستارے کاٹم آن کشا او پٹہ غاتے خور یفسا پارے ”ڈاکٹر صاحب ڈکال دُہنو کوٹھ التا نے کہ او بہا مریو لے شار نا سودا تے کن او شار نا پین کن مخلوق ضرور انوے بروے کسے سندھ ٹی مٹی کس ارے ای ہمودے ہتیوہ“۔

ارہا ہفتہ غان گڈ سردار نا مٹی بس او کرایہ تا ہلنگ سواری تے دنگ شروع مس۔ خلقیک صُحب نا وختی انارہ بازار آچکر کر یہ تین کن سودا ہلکرہ او شام تو مٹی ٹی بٹرہ۔ خلق نا داترقی آن گڈ سرکار نا نظر ٹی دا خلق جوان جاگہ کریس۔ ووٹ

والاک ہر پنج سال نازی آبسُرہ تینا ووٹ آتے ہلکڑہ او خلق کن کاریم کس کریرہ انارہ۔ خلق  
ٹی ہر مروکا کاریم نانیمہ فاندہ ے سردارتین کن ہلکک۔ سردارنا باجوان لگا سس او تینا جوفہ  
اوملاسی کن سرکار آن خلقی تے کن کاریم کرفیکہ او بھلا فاندہ ے تین کن خلکک۔

سرکارنا کاریم تون اواراوار این جی اوزنا ٹیکیک ہم شروع اُس۔ اسہ کنڈ اسرکار  
روڈ کس کرسا اس تو ایلو دو ے این جی اوزمیت کس تفسہ اس۔ سرکار بجلی ناکمبہ غاتے خلسا  
اس تو این جی اوز خلقی تے کن ناوڑ خٹنگ اس۔ اسہ دو ے سرکار ہائی اسکول کس ملسا اس تو  
ایلو دو ے این جی اوز کتاب بخشسا اس۔

مرسا مسادانیا م ٹی پست سال گدرینگ۔ سردارنا خلق انا بھلو شار کس جوڑ  
مس۔ ہرائی ماتے کن ہائی اسکول کس تفنگا، مسنتے کن مڈل اسکول کس ملنگا۔ مَسہ بورنگ  
خلنگا، چارناوڑ خٹنگا۔ فٹ بال نامیدان کس جوڑ مس۔ سردارنا ارامٹی لین آبسُر، پنج  
میت تفنگا، بجلی ناکمبہ غاک لگا، ٹیلیفون ناتارک خلنگا۔

داترقی آن گڈ سردارتینا چٹاتے سندھ آن بٹنگا او بیگ محمد آن اُراتے خالی  
کرنے او بیگ محمد تینا باوہ ٹی اُراتے کن سرہلک۔ اومسکین تون داخمہ پیسہ الوکہ تین کن ہندا  
شارٹی اُراتفوس اوسردار ہم کس اس داخس کتو کہ اودے ہنداڑے جاگہ کس ایتو۔

سرکاراوا این جی اوزنا کاریمتے آن فاندہ ارفسا سردارتین کن پنج دکان ملا۔ تینا  
بے تعلیم انگا مسنتے مسٹری آ اسکول ٹی باجی خلک۔ ماتے آن ارٹ ماتا اسکول ٹی ٹیچر  
خلک۔ مَسہ بورنگ ناتیل تادزی ے ہمووڑ برجانتھا۔ خلق والا تے آن چندہ ہلسا  
کرے۔ ہسپتال نادوائی تے آن بہا کرسا کرے۔ خلقی تاووٹ آتے کن پارٹی تے آن  
پیسہ کُسا کرے۔ این جی اوزنا کاریمتے آن تین کن منافع خلسا کرے او آخر ہندا پیسہ

غاتے اٹ ایلو بھلاشارتے ٹی تین کن اُرا ہلک۔ بھلو بھلو کارو بار شروع کرے او آخر تینا چُتاتے ارنے او تینا شارے اِلّا انا۔ او دا شارے تینا بھلا مارنا دو ٹی تس ہر ادے او ہر گڑاے مالور غامُسس او سردار نامار ہم باوہ غان بار جوفہ، دروغ، دژی، مگاری، فریب، سیاست ہر گڑا غان واقف اس۔

سردار ناسرداری آن بلیس اونا مارنا سرداری اسکان داخلقیک ہمواسہ وڑو۔ ای داسا ہم وخت وخت داپست و پنچ سال نازندگی آسوچ خلیوہ تو حیران مریوہ کہ داخہ ترقی آن باوجود اسہ گڑاُس ہم بدل متو۔ دا اسکان داخلقیک دے سُس دیرنا غم ٹی غمگین و تو دے سُس دوائی تا پیسہ غاتے کن پریشانو۔ دے سُس مئی تا کرایہ غاتے آن گلہ دارو۔ تو دے سُس دکان ناسامان تا قیمت آحیرانو۔

دا اسکان سردارنا منتے، دا اسکان ہمو ملاسی ے، دا اسکان ہمو بے تعلیمی ے، دا اسکان ہمو خواریکو۔ دا اسکان ہمو زلا تیکو۔ دا اسکان ہمو اللہنا پنے۔ دا اسکان ہمو نا وڑنا آسرا ے۔ دا اسکان ہمو بیوسیکو۔ دا اسکان ہمو لنگڑیکو۔

ہو اگہ داپست و پنچ سال ٹی اسہ گڑا اس بدلیگا تو او دا اس کہ ”سردارنا خلق“ انا ”سردارنا شار“ مس۔

## مسہ خوائے

خفو او ایٹک شبیر احمد ناہڑ تو ماشیطان انگاماک اسر۔ ایٹک نا عمر یازدہ سال او  
 خفو نا عمر نہہ سال اس۔ شبیر احمد او او نا چٹکا ایلم بشیر احمد دیئی ٹی رہینگارہ۔ بشیر احمد نا اسہ مار  
 کس اس ہر ا عمر ٹی خفو نا کچوکس اس ولے شیطانی ٹی خفو آن زیادہ شیطان اس۔ او نا اپنے  
 باوہ تہ دیئی نا بھلا شیخ، شیخ زاہد آن متاثر مرسا ”زاہد“ تحاس ولے خلق نا چنا او بھلا کل  
 او دے زادو پاریرہ۔ زادو او ایٹک کس تا اُراک اسہ جاگہ اسر۔ زادوکس تا اُرا تا مون ٹی  
 او فٹاشنکی کس او شنکی نا خیر آن ایٹک کس تا اُراک اسر ہر افتا خیر زادوکس تا اُرا تا مون کن  
 اس۔ زادو اولمہ تا تینے آن ارٹ اسر ہندا وجہ غان شام نا رخ نا کنتگان پد فوراً زادو او  
 لمہ تا خفوکس تا ماسا بسرہ او ہندا رے او فتون خا چارہ۔ خفوکس تون او او نا بلہ ہم رہینگا کہ او  
 ہندا سو ب کس کہ او نئے تہارمی آن خلیسرہ نئے جن آتیاں۔ خفو نا بلہ ئے او نا فشارک تینا  
 اُرا ٹی بھاز تنگ کریرہ اند او یل آن او نا مسٹر او دے تینا اُرا غا پیٹس۔

زادو او ایٹک تین کن بھاز مہر کریرہ۔ صُحب او شام او ار ریٹہ چلیفیرہ ریکا تے آ  
 کلٹی خلنگ کن انارہ۔ کچک جنگ تسرہ یا اُرا تا منج ئے چیدہ خلکرہ۔ او فٹالمہ غاک ہم تین  
 تون بھاز مہر او محبت اٹ رہینگارہ۔ دے نامون اٹ او تینا اُرا او سا ہداتے شون کریرہ او



شام توں اوار اسہ جاگہ تو سرہ چلم کشارہ او مجلس کریرہ۔ بلہ وخت نس اوفتا مجلس توں شرکت کر یکہ وخت نس تنیا تزنج بیگہ اللہ ے یاد کر یکہ۔ اوفتا دامہر اوسخاوت آن اوفتا ارغاک بھاز خوش اسر کہ اوفتا چنک اسٹ ایلو توں محبت کیرہ اسٹ ایلو نا خیا لے تخرہ ولے او ایلیمتے انت سہ نس کہ اوفتا چننا تانیا م نامہر اسٹ ایلو کن کرو کا محبت اوفتا رشتہ او ہمسایہ گری کل ے خفو نا کلڑ تنیا اسہ خوائے اٹ ختم یک۔

دیرے معلوم نس کلڑ نادا اسہ خوائے نا وجہ غان اوکا کا ناما کہ اوفتا لہ غاک تین تو جنگ لگرہ تینے پڑا او اسٹ ایلو آن مرک زند مریرہ۔

جنگ نا بنیاد دا گندہ فی نا آغاز کل خفو نا کلڑ آن شروع مس۔ خفو نس تا اراٹی کسے معلوم الو کہ خفو نا کلڑ خوائے بنگ شروع کرینے او ہرانا خوائے تے زادو انداری مچ یک او کنیک۔ اصل اٹ دا گراٹی زادو نا ہم غلطی الو۔ داشومی اودامکاری کل کلڑ نا اس۔ فساد نا جڑ تو دا کلڑ اس ہر ادا نہ او دیر خفو نس تا منج آ کنتکک ولے خوائے بنگ کن زادو نس تا شنکی ٹی انا کہ۔

خفو اسہ دے زادو نس تا شنکی نا خیر آن گدریگا تو کلڑ ہموکا چپ چپ شنکی نا کڑک آن پیش تما۔ خفو حیران مس کہ کنا کلڑ زادو نا شنکی ٹی انت کر یکہ۔ او شنکی نا تہہ ٹی انا تو شنکی نا کنڈا با جکو سے نازی آ خوائے نس تحوک اس۔ خفو خوائے نا ختنگ توں معلوم مس کہ دانمک حرام داڑے خوائے بک۔ او خوائے نا ر فنگ کن گیک کرے کہ یکدم او نا چالاک انگاذہن ٹی خیال بس ”اسہ وار ہڑکا۔ سیل تو کر دا خوائے تے مالودے مچ کرینے او کنتککے“۔ ہندا خیال توں او شنکی آن زوزو پیش تما او شنکی نا خیران ڈکا تینے۔

دم نسے آن پد ختک کہ شنکی نا درگہ ملنگا اوزادو مشی آ مون توں بس خوائے

مٹ ٹی کرے اوسیدھا بورچی خانہ ٹی پترینگا۔ زادو نادا حرکت آخو ناسینہ غان  
 موٹل کس پیش تما کہ لکڑ کنا، دانہ غاک کنا او خوائے تا زادو کٹیک۔ رم کرے اُرا کن او  
 ہکدم دڑ دآن لمہ اولہ ئے لکڑ نا بے وفائی او زادو نادُزی ناسئی کرے ولد اغصہ ئے تینا  
 پھدین کنگ کن زادو ناما سا بس۔ زادو چرکی آتچ آتون کٹ آتو لوک دا اسکان تینا  
 خوائے ٹی پلپل شاتوسس کہ خفو رکابی آدو بٹے او خوائے ارفے ترا۔ زادو ہو غسا  
 کیرنگ ترسا اونا رند ٹی سر ہلک۔ زادو مسکین درونا سے ہندا خوائے نا انتظار ٹی تو لوک  
 تینا معدہ ئے نوار یفیکہ۔ پین گڑ اس اونا بن آن انتو کا۔ اینو ہمو خوائے نادا اسکان باخو  
 کس اونا گٹ آسرم تو کہ خفو پشی آن بار خوائے مونا تا چور کرے۔ خفو رکابی دو ٹی اُرائی  
 پترینگا او کوئی نایام آچار زانو کرے۔ اونا خوائے ناکنگان مست زادو رسیفے او ہو غسا  
 تینا خوائے خواس۔  
 ”کنا خوائے ایت“۔

خفو ہم رم آن دم دریس تس تسہ اٹ جواب تس  
 ”امر و خوائے سے نا۔ داکنا لکڑ نا خوائے ئے“۔

زادو ”داکنا لکڑ نا خوائے ئے، ناشکی ٹی اس“۔  
 خفو ”ناشکی ٹی اس ولے کنا لکڑ بیٹہ“۔

زادو ”ناشکی ٹی ناکڑ خوائے ایتک نما تفک“۔  
 خفو ”نما لکڑ ہیچ خوائے بپک، دروغ تڑ“۔

زادو ”ناکڑ خوائے بٹک گڑانی مالوانتے ارفو سہ“۔

خفو ”مالو کنے معلوم الودا بے منت ناشکی ٹی خوائے بٹک، داسا ان خوائے ملیک“۔

زادو حیران مس داسا امر کیو، جنگ تو او خفو تو ن کنگ کتو کہ۔ خفو نا ہندا خرابی اس  
 او جنگ ٹی گٹ ہلککہ ولد اچ التو کہ۔ اسہ وار چد و تا ذی آخفو او زادو نا جنگ مس تو خفو  
 زادو نا کو پہ غان دہنو گٹ نس ہلک کہ زادو نا سل خفو نا دانتا نٹے ٹی خازہ انگا سو آن بارڈ ب  
 ہلک۔ ہمودے آن زادو فیصلہ کرے خفو تو ن جنگ کروئی اف۔ ہندا خوفان او پین گڑ اس  
 کنگ کتو کہ۔ تینا خوائے نا پلنگ نا ڈرڈ آن ہموکا درگہ ناما س آن مٹ نس ریک نا رنے  
 او خفو نا مونا تھو کا خوائے نا ذی آچٹ تس اونڑا۔

خفو نا مونا تیار بسو کا خوائے ریک آن پر مس او خفو نا خنک خڑ بینک آن۔ او نا لمہ  
 تندو ر آن بس تو خفو اودے ہو غسا سئی کرے ”زادو کچک کنا خوائے ٹی مش شاغا“۔  
 خفو نا لمہ ہوشیار و نیاڑی نس اس۔ اودے پنت ترسا پارے ”داعہ خوائے  
 کنگ ناشوقے نے تو نی او ایلم نا خیرات مہوتینا کلڑ نا خیا لے کبو“۔

زادو ایرے تینا لمہ ئے سئی کرے کہ خفو او نا خوائے اراغان دُ زادو رے۔ زادو نا  
 لمہ ئے علم الو کہ دا ہڑ دے نا خوائیک زادو نا اعہ بلکہ خفو نا کلڑ ناو۔ او او نا مار مفت ٹی  
 کیک۔ زادو آ ترند مرسا پارے ”نی بھلا مار تینا خوائے نا خیال ئے تھنک کپسہ“ ای او نا  
 لمہ ئے سئی کیوہ داسا چپ کا ہو غپہ“۔

زادو تینا او تینا خوائے نا بدلہ ئے ہلنگ کن صُحب نا ختی بش مس او شکی نا درگہ غا  
 بھلو قلف نس خلک۔ خفو ہم تینے زادو نا مقابلہ کن بیدار کریس۔ تُغان بش متنگ تو ن  
 کلڑ نا جاسوسی ئے شروع کرے۔ صُحب انا چاشت مس چاشت انا نیمروچ مس ولے خفو  
 کلڑ نا رندے التو۔ کلڑ ئے ہم خدا خلکو س پیشیم نا وختا خوائے تسکہ۔ اُرا والا ک ارغ  
 کنگر۔ بلہ اولمہ ابک ئے راہی کریرد خفو ے ہت ولے خفو اراکان بغیر خوائے آن

بسکہ۔ پیشیم ناوخت نس داڑے خھو ایڑے زادو ہڑتو ماک خوائے نا انتظار ٹی بینگن چکر کریرہ۔ اومعدہ خاک تاغریب نا کاٹم آن بارخل کنگ اسر۔

ککڑ نا خوائے نا بنگ ناوخت بس۔ ککڑ کل آن اندری چپ بس اوزادو نس تا شنکی نا کرک آن تہہ ٹی پترینگا۔ خھو شنکی نا خیر آو نا پیش تمنگ نا انتظارے کنگ اس۔ ککڑ خوائے تنگان پد کرک آن پیش تما تو خھو شنکی نا درگہ کن رم نس خلک۔ درگہ نا قلف آنظر تما تو کاٹم آن تہہ باف نس پیش تما۔ داصُحب نا خواریک دا بینگنی اولماسی اوزادو نا دا بھلا چالاکی۔ خھو سوچ خلک اگہ اینو زادو آن تینا خوائے التوٹ تو دا خوائے ولدا کنے ہچ ملپر و۔ انت نس کروئیے اینو کروئیے۔

ہندا خیال توں زادوے توار کر سا پارے ”زادو! برداشنکی ئے مل کنا ککڑ خوائے بیٹنے“۔

زادو نا آسٹ تو درو نا غصہ دا اسکان شیف تمسوس ایلو اونا اینو نا بینگنی دہن اراکان او خوائے ئے تسکہ۔ ہموکان تینا اُرا نا مومان ہکل کرے ”او کنا خوائے ئے۔ کنا ککڑ نا ئے“۔

خھو ئے جوان سما اس خوائے دتاے۔ زادو نا گپ آ غصہ کر سا ولدا کوکار کرے ”نا باوہ نا ئے۔ داسا ای تینا خفتے اٹ خنٹ کنا ککڑ ہندا کان پیش تما“۔

زادو ہم باوہ نا پین آ غصہ کر سا جواب تس ”بفرہ ملپرہ تا، انت نس کیسہ“۔ خھو مالو آن چالا کو مار نس اس۔ پُہہ مس داسا جنگ نا فائدہ اف۔ اگہ جنگ کریٹ زادو بدتر ضد کیک او شنکی ئے ملیک۔ خاموشی اٹ اوکان سر ہلک او انا لمتہ ئے تینا توار کرے۔ لمتہ تہہ بس اوزادو ئے حکم تر سا پارے ”بشہ شنکی ئے مل، ککڑ نا خوائے ئے ایت“

خفونالئمہ ناتو اتون زادونالئمہ کوئی آن پیش تہما اوفوئے مخاطب کرسا پارے  
 ”نے امر معلوم خوائے نما کلکڑناے داننا کلکڑنا خوائے نے، داٹ وختہ شنکی ٹی خوائے  
 ایٹک۔“

خفوشیطان انگا خنتے بیوس کرسا جواب تس ”تا تو ای صُحب نا سے تینا چک نا  
 رندے ہلکوسٹ۔ داسا مچے مست کنا جند خناٹ اونما شنکی ٹی پترینگا خوائے ہے۔“  
 خفونا جواب ٹی زادو ایکا اوار تہما ”لئمہ ای پنچ دے نا سے خوائے کنیوہ۔ اوداخہ  
 وخت بتو داسا اچانک اودے یاد بس اونا کلکڑ خوائے بٹک، دادروغ تڑک۔“  
 داجار خفو آن مست لئمہ تہ شروع مس ”زادوئے نے معلوم الوکہ ننا کلکڑنما شنکی ٹی  
 خوائے بٹک، دا تو خفو درونما شنکی آن پیش تمزنگا خنا تہ۔“

زادوئے بھاز برداشت متو۔ فیصلہ کرسا پارے ”بس ننا شنکی ٹی بیٹینے گڑا ننا  
 خوائے نے، اگر نما شنکی ٹی بے نماے، نما کلکڑے انتے پین تا جا گہ غاتے آخوائے بٹک،“  
 زادونا دا بے ادبی اوہم جوابی آخفونالئمہ نے خار بس ”ننا کلکڑنے آن بار سادہ  
 سے۔ نے آن بار دزئس اف۔“

زادونالئمہ ہر ادا ننے دُز پارے ”دُزاک نم اریرے زوراٹ شیرا کی اٹ پین تا  
 خوائے تے آلچیرے۔“

خفونالئمہ نے داہیت برداشت متو ”بس بس نیاڑی، پین نانس دانناؤ۔ ننا کلکڑناؤ،“  
 زادونالئمہ نے موقع کس ملا فوراً خفونالئمہ نے بے گشادی اونا بودی ناشغان  
 تس ”نی تینا کلکڑ کس سنبھا لنگ کپسہ۔ ننا کلکڑے انتے ہر جا گہ خوائے بٹک۔ داننا  
 کلکڑناے۔“

خفونالئمہ نے داگپ آبھاز غصہ بس اوخرینو جواب کس ترسپارے

”ناکڑنارے۔ ناجند نہ سال ٹی اچڑاکنگ کتوس۔ ناکڑخو اے ایک۔“

زادونالئمہ عاداہیت پونخ آن بار تخنگا۔ وترتہ لار کرے اوہنداڑتون دوتے تینا

خفونالئمہ ناجند اتے ٹی سخت کرے او جوان چند لیفے تہ۔ خفونالئمہ کوہنگا۔ زوزوتاونا

زان ٹی بایے سخت کرے اوتاونا ران آن دہنوگٹ کس ہلک کہ تا تو آ داغ کس تخنگا۔ لئمہ نا

چیہانٹ اودڑ دآن زادو خفونالئمہ ٹی ہلک اوبایے تالئمہ نازان آن مر کرے۔ جنگ گرم

مس۔ اسہ کڈالئمہ غاک تینے گٹار ایلو کڈا خفونالئمہ اوزادو تینے وتری کریر۔ داناحق تین تو

جنگ ٹی اسر تینے پٹار۔ فسادے بش کرو کا کڈو تو ایڑے دپ آباگلو تو عاشقی کر یکہ او

خاکہ۔ نیاڑی تا تو رتو ر او چنا تا کیرنگ آبلہ زوزو چڑی خلسا بس او پٹ او کیرنگ اٹ

خفونالئمہ نے جتا کرے۔ خفونالئمہ اوزادو خنار لئمہ غاک جنگ نے بس کریر او ہم تینے یلہ

کریر او جنگ خلاس مس۔ داتینا ارا ٹی پترینگا رے تینا ارا کن سر ہلکر۔

داجنگ آن گڈ خفونالئمہ او ایک تین تو فیصلہ کریر کہ تینا کڈو نے زادو کس تاشکی ٹی

خو اے بنگ کن الوئی اف۔ داسا کڈو نا جاگہ نے بدل کروئی نے۔

صحب تون ختی ہڑتو مایلمک کڈو نارندے ہلکر۔ کڈو ارا نا منج آچرخ کر یکہ او

ہڑتو ماک اوڑتون او ارکوسی کنگرہ۔ کڈو دپ کن سر ہلکہ او ہم دپ کن گام کریرہ۔ کڈو ایلو

چک تون خلق نا چکر کن انا کہ او ہم چکا تارند ٹی سر ہلکرہ۔ مرسا مرسا آخر پیشیم نا دخت

مس۔ کڈو حسب معمول شکی کن مون کرے تو ہنداڑتون ہڑتو مایلمک شکی نا خیران

دوتے ملا راو کڈو نا کسرے بند کریر۔ کڈو شکی نا کڑک نئے کن گیگ کر یکہ تو خفونالئمہ او ایک کڑ

کڑ کر سیاہو سے خلیفیرہ پترینگ کن التورہ۔ اسہ کڈو ان کڈو نا کڑ کڑ شروع کس ایلو کڈو ان

خفونالئمہ او ایک نا کڑ کڑ۔

ککڑ فریاد کریکہ ”کنے الیو نمکن خوائے کس ایتیوہ“۔

دا کا خفو جواب تسکہ ”نالئمہ ناجا گہ ٹی نے داشنکی ٹی خوائے بٹنگ کن ایوہ“۔

ہنداڑتون ککڑ ہڑتو ما ایلیم تے ریفسا کڑک نئے کن رم کرے کہ خفو ڈونک نُس  
خسا تو ککڑ خوف آن شنکی ناما سے الا او خفو نُس تا ارا کن مون کرے۔ خفو او ابک اونارند  
اٹ رم کریر۔ ککڑ موٹو سخت عذاب ٹی اس۔ تین تو سوچ خلککہ کہ خدا جان کنے آن دیچہ ہرا  
گنا تا حساب کنگنئے۔ داخہ عذاب ای سکون اٹ خوائے کس بٹنگ کپرہ۔ ککڑ مون اٹ  
رم نُس ایلیمک اونارنداٹ۔ ہنداڑتون ککڑ آن برداشت متو اورم اٹ خوائے تینا  
بٹے اودے تینا کشا کہ دافتنے آن کنا جان چٹا۔ خفو خوائے ناتمنگ تون بھلو مخنگ نُس  
خلک۔ زوزو خوائے ار فے اورم کرے لمہ کن۔

”لمہ! دانگ ہر دانگ ہر داننا خوائے۔ ای پا توٹ ننا ککڑ خوائے ایتک۔  
زادو کچک دروغ تڑنئے۔ زو کہ بس تین کن“۔

خفو خوشی آن اشتافی اشتافی پڑزونکے تالان کرے او ابک ہم ماسان تہ بس  
توس۔ خفو نا چہرہ غا ہندو خوشی نُس اس کہ فوجی نُس اولیکو جنگ آن سر سہی اٹ برے۔  
خوائے نا تخنگان پد خفو خوائے رکابی ٹی نیام آن بیمہ کرے۔  
”دانیہ نا، دانیہ کنا“ ابک پارے۔

تینا نیمہ غا جوان بے شاعا او اولیکو باخوئے باٹی کنگ تون خفتے تر کرے  
”ہممہ ہمہ ہمہ، انت و مزہ نئے“۔

خوائے کشفنگان گڈ رکابی ہڑتو مادوتے اٹ بڑزا کرے اودوئی  
رکابی نا نیام آتھا او جوان رکابی نابے تے چٹا ویش مس دلا تے کن۔

زاد و ایڑے ہر اتم شکنی ے ملا تو با چکونا ذی آاسہ خوائے کس تنخوک کس۔ خوائے  
 ناخنگ تون پُہ مس کہ داخوانیک واقعی خفو ناکلڑ نامسٹو۔ مجبوری آن ہموخوائے ے  
 ارفے او انا لَمہ ے تینا تس۔ او آخر کیو خوائے ے جوان اُسٹ نارمان اٹ کنگ۔  
 اودے معلوم اس داسا خفو کلڑ ے شکنی ناکنڈ الپک۔

اودے آن پد خفو او کلڑ نا ضد او مقابلہ شروع مس۔ دے کس کلڑ او نا خوفان ہندا  
 وڑرم اٹ خوائے تسکہ۔ دے کس عزت نا تینا بچفنگ کن تینا کڈ ٹی پترینگا کہ خوائے بیکہ۔  
 دے کس پاٹ تے ٹی پترینگا کہ ہموڑے خوائے تسکہ۔ خفو ہڑدے ہڑدے نا خوائے  
 کننگان سخت گلان اس۔ داڈکالی آخلق اودا غریبی ٹی ہڑدے سوارہ غا خوائے ناکنگ امیر  
 آتا خورا ک آن کم الو۔ خفو تینا لَمہ او بلہ کن باز مہر کریکہ ولے خوائے نا وختا مجال کس او بلہ  
 ے یالَمہ ے خوائے ناصلد کس خلے۔ تینا ایک اگہ اُرا ٹی مرو س تو اودے نیمہ کس تسکہ کہ  
 ایک اونا جاگہ غا ہرانا کاریمتے کریکہ۔ دا ہڑدے ناکلڑ ے ددیفنگ آن لَمہ تہ اٹ وار  
 اودے پارے کہ منہ دے کن کلڑے اونا کڈ ٹی بند کر۔ اسہ ارا وارتینا کڈ ٹی خوائے ایتر  
 ولد اہیل کیک چڑا ہموڑے ایک ولے خفو دا ہیئت آیقین کتو کہ۔ اودے خوف اس دہن  
 مف اوکانروے پین جاگہ کس خوائے ایتوے ولد اداے اونا جاگہ ے پٹہ۔

اسہ دے لَمہ نا بھازانگا پاننگان پد خفو کلڑے بچ اونا کڈ آن پیش تمنگ کن  
 التو۔ ٹیم او وخت نادراک اودے لکتو کہ۔ ایکہ نیاری ہم کننوس۔ داکہ بینگنی آن معدہ تا  
 وارد ما کلڑ نا خوائے کن گر گڑ کریکہ۔ خفو مالو آن بے آرام کس اس ادا یکہ اینو معدہ ہم  
 اودے تنگ کریکہ۔ وارد ما انا کہ او کلڑ ے بش کریکہ اوہرا کہ۔ کلڑ موٹو ہندن تولوک  
 مروں ہم او بسکہ بش کریکہ اوشیفے نظر کس شاغا کہ۔ کلڑ ہم عذاب ٹی کس تین تو فریاد کریکہ



”ہراڑے ارے داہے سندھی آباگوناحقا کو۔ ای او نا اُسے بھاز خراب کریسٹ داسا خدا  
کنے خفو کونا ظالم نادوتے آن عذاب کنتگہ۔“ دایوس داسکان ڈغارا تولتو کہ او پیگنا  
معدہ تون بسکہ او بڑ کر یکہ تنخاکتہ۔ خفو نا ظلم او ستم آن تنگ مرسا اسہ بھلو ڈر داو مصیبت  
نسے آن پد ککڑ خوائے تینا تس او تینے عذاب آن کشا۔ خوائے نارنگ تو خفو ککڑے  
آزاد کرے اورم کرے لمہ کن۔

خوائے ناگند تون ابک ہم رسیفے۔ خفو ایلمی نا لحاظ آن ہیئت کتو۔ ہر تو ماک  
کننگے شروع کریر تو خوائے نا آخریکو مسہ چار باخو بچا سرکہ ابکے خدا گمارہ یا خدا  
خلک بھلو باخوئس ار فے بائی کرے۔ ابک نادا بھلا باخونا خنگ تون خفو نامعدہ فریادئس  
خلک او غصہ غان رکابیے ار فے درگہ غان پیشن حسا۔ ابک حیران مس دادے انت  
مس۔ ہنداڑ تون خفو ہو غسا لمہے تو ار کرے ”دامزا پھڈ کنا کل خوائے تے کنگ۔“  
دانگ آن ابک صفائی تنگ شروع کرے ”دروغ ٹرک لمہ۔“

خفو مالو آن اوڑن بد بسکہ داسا او نادا دروغ آن پد بد تر خفو غصہ  
بس۔ اسہ ارا ہیئت متو کہ ہلکور تینے ہر تو ماک۔ ایہن تو طاقت او عمر اٹ ابک بھلا اس  
ولے خفو نا اُسے ٹی انتقام نا ناخر خیسن خیسن لمبہ ہلکوسس۔ ہلک ابک نا نا نگاتے ٹی او  
ڈغار آ بٹے۔ ابک نا تمنگ تون سوار مس ذی آتہ او دوتے تینا پڑہ عاتے ٹی تا شاغا او  
باے تینا سینہ عاتہ سخت کرے او اسہ جو انوتر ندو گٹ کس ہلک اوڑان۔ گٹ نادڑ دآن  
ابک نا تو ار آسمان آسر مس دانگ آن بلہ رم کرے ایکا لمہ تہ۔ لمہ نا کوئی ٹی پترینگ تو  
خفو ارا غان نرا۔ خفو نا اننگ تون ابک ہموڑے تینے ڈغار ٹی خوشکا کہ۔ دادنتا تانشا نک  
اودے زار چوبہ آن بار ہشارہ۔

لمہ تاخو ناخنگ کن اُرانا مونانظرُس شاعا تو بچ پچو الو۔ خو ہراریکا تے ٹی  
ڈوک اس کسے معلوم الو۔

شام نا اذان خوک اس۔ بلہ مصلہ غا تو لوک اذان نا انتظارے کنگ اس۔  
ابک اولمہ تا سہداتے کڈ ٹی بند کرسا ستر۔ زادوتینا لمہ ئے بیرم تا شاغزگا کمک تنگ  
اس۔ خو نا لمہ اوزادوُس تا جنگ آن گڈ زادو نا لمہ اوقا اُرانا بنگ او خاچنگ ئے بند  
کریس۔ داسا اومارتا موڑے کوئی ئے تہہ غان بند کریہ او چراغ ناروشنائی ٹی تین تو  
ہیت سُک کرسہ خاچارہ۔ خو نا بلہ اٹ وار زادو نا لمہ ئے زاری کرے کہ شامی تابو۔ زادو  
چنا سے تیا خلیک ولے او جنگ آن پداو کیرنگ آتیاں پداو ہراڑے بسکہ۔

اذان مس۔ نماز مس۔ ارغ نا وخت مس ولے خو نا درک الو۔ لمہ تا پریشانی  
آن ابک ئے بد دعا تسکہ۔ بلہ تارمئی نا خلیس او خو نا زنگ آن خدائے زاری کریکہ کہ  
زو اراغا سرکتہ۔ اُرانا اراچپ نا شاد تو لوک اس کہ خو جک انگا خو اُرائی پترینگا اولمہ نا  
خوف آن بلہ ناخیر آن ڈکا تینے۔

لمہ نا پٹ اولعت آن پد بلہ خو او ابک ئے مشورہ سُک ترسا پارے ”اینو آن پد  
اسہ دے کلڑ نا خوائے خو نا ئے او اسہ دے ابک نا ئے“۔ خو بلہ نادا مشورہ غا یکدم  
اعتراض کرے ”داوڑ متنگ کپک“۔ دامشورہ غان پد بلہ پین مشورہ سُک ترسا پارے ”بس  
گڑ ادہن کینہ پھگہ غان کلڑ نا خوائے تے کنوئی اف۔ داسا خوائے تے جمع کینہ۔ اسہ وار  
ہیت خوائے نا کچ جمع مسر ولد اکلڑ ئے خوائے تے آتولفنہ ولد ابڈ سُک چوری مریرہ وادا  
چوریک بھلن مریرہ اونمکن خوائے ایتہ“۔

ابک بلہ نادا مشورہ غا یکدم راضی مس ولے خو چالاک اس او پُہ مس داخہ

دے او بغیر خوائے آن گدر یفنگ کنگ کپک۔ بلہ نا ورن دی ٹی پارے ”ننے انت سما  
خوابک مادہ وچوری کشرہ یانزو۔ ای دامشورہ ے منپرہ“۔

خفو نادا اعتراض آن گڈ لّمہ خفو آ جوان ترند مس او تینا کنڈ ان آخریکو فیصلہ ے  
کر سا پارے ”پست دے نے آن صبر مفک گڑا دہن کردہ دے اسکان خوائے تے جمع  
کر دہ دے آن گڈ خوائے تے تینا بہا کراو ہمو پیسہ غاتے اٹ ایک کن اسہ چتکو مادہ و  
چوری کس ہلینہ“۔

لّمہ نا خلیس آن خفو دا فیصلہ ے خوشی خوشی قبول کرے۔ کلّ تینا کڈ ٹی خوائے  
تنگ نا عادی مس۔ خفو فیصلہ غان گڈ نیت کرے کہ داسادہ میکو دے آ خوائے تے مچ  
کروٹی ے اوکان مست ہچ کلّ ناماس آنوٹی اف۔

اولیکو سوارہ ے خفو حال بد حال بغیر خوائے آن گدر یف۔ اراٹمیکو دے ولدا  
بغیر خوائے آن ارغ کنگ۔ مسمیکو دے خفو آن برداشت متو تو کڈ آن خوائے کس دز آو  
لّمہ نا خوف آن زادو ناما سا انا او نا لّمہ غان خوائے ے تینا بسفے او ہموڑے زادو کس تا کو ٹی  
زادو توں او ار کنگ۔ خوائے نا کنزگان پد خفو اوزادو ولدا سنگت مسر۔

ایک ے خفو نا ذی آشک ارفے۔ خوائے تا حساب کنگ کن انا تو کڈ ٹی بس  
اسہ خوائے کس تخوک اس۔ او ہندا اسٹ انگا خوائے ے ارفے اولّمہ غادرے کہ خفو  
خوائے کس دزانے۔ ای ہم اسٹ کس کنیوہ۔ خفو شام تو سئی مس کہ ایلو خوائے ے ایک  
کنگنے تو پریشان مر سا سوچ خلکنگ شروع کرے او آخر ہندا فیصلہ ے کرے کہ داسادہ بن  
کروٹی ے دہ دے کن کلّ ے بی ٹی بند کروٹی ے۔ کڈ ٹی بند کریٹ تا تو کاتک۔ بی ٹی  
بند مرے جوانے۔

صُحبتون مالوبئی ٹی اسہ بھلوکڑمبوتاس نُس دیر آن پر کرے تنخا او اسہ بھلو تاس  
نُس دانہ اوارغ ناکرتے آن پر کرے۔ نیمروچ آن مست ککڑے ہی ٹی بند کرے او  
سیدھا زادو او اِبک ناما سابس اوفتے سئی کرے ”ای ککڑے دہ دے کن ہی ٹی بند  
کرینٹ۔ ہریرے ہی ٹی ملپیرے او اگہ اسہ خوائے نُس کم مس ای نمے اِپروٹ“۔ خفونا  
داحکم آ اِبک اوزادو کاٹھے ہو ٹی سرفیراوپین ہیئت کتور۔

دیک انسا کریر۔ خفو خوائے نازہیری ئے برداشت کرسا کرے۔ دانیام اٹ  
لمہ تاککڑ ناہر یفے تو خفو پارے ”دہ دے آن گڈ ککڑاوخوائے تاگپ مرو“۔

چار دے گدرینگار تو زادو او اِبک خفو تون مشورہ کریر کہ کان خوائے تے  
حساب نُس کین، ککڑ نادیراودانہ غاتے ہم ہرن ولے خفو انکار کرے کہ نہ دہ دے آن  
مست انوئی اف۔ دیراودانہ غاک تابھازو کپسہ۔ خدا خدا کرسا آخر دہ دے پورا مسر تو  
دہمیکو دے صُحبتون ختی زادو او اِبک خفو تے تیار کریر کہ کان ولے خفو چالاک نا ثبوت  
ترسا انکار کرے داسا اپنہ۔ ککڑ نا خوائے نا بٹنگ نا وخت پیشیم ئے نن پیشیم آن گڈ کانہ  
تا کہ دہ خوائے پورا مریر۔

ہر مسٹ انگا سگلتا ک پیشیم ناپاس آ خوشی خوشی خسا خسا ہی نادرگہ ئے ملار او ہی  
ٹی پترینگ تو ککڑ ککڑ۔۔۔ ککڑ ککڑ۔۔۔ ککڑ ککڑ۔۔۔ شروع کریر ولے ککڑ نا نیمہ غان ہچو جواب  
نُس بتو۔ ککڑ نا پٹنگ ٹی خفو نا نظر ہی نا چیکو کنڈا تما تو مسہ خوائے اسہ جاگہ تنخوک اسر۔ خفو  
ککڑ کن پریشان نُس او گنو کا تے آن بار ہی ٹی ککڑ ککڑ کرسا ککڑے پٹاکہ۔ ہندرا تون زادو نا  
نظر ہی نا نیام نا ککڑ آ تما۔ ککڑک ناماس ہمرنگ ککڑ نا پٹ اس۔ زادو خفو ہوغو کا گٹ  
اٹ تو ار کرسا پارے ”خفو! نا ککڑے پیشی درینے، داکڑ کے نی بند کتنوس، دانگر دا پٹاکوتا“۔

خفو ککڑ نا غم آن ہو غسا ہو غسا ہمو مسٹ انگا خوائے تے ار فے اوئی آن پیش  
 تما۔ خوائے تے اُراغا دنگ تون خفو بلہ نادوئی تس او جندتا بلہ نازان آکاٹھے تنخا اودرد آن  
 بلہے مچا قصہ ناسئی کرے۔

بلہ خفوے دلا سہ تر سا پارے ”دز خفو! ہرا ککڑے نی بے وفا پاریسہ ہرا ککڑے  
 ای فساد ی پاریٹہ ہرا ککڑ نالمہے زادو نالمہ تون جنگ تس اینو ہمو ککڑ ہنگ آن مست نما  
 خوشی کن نم کن اسہ اسہ خوائے الا۔ تاکہ نم ولد ا خوائے تے آجنگ کپو۔ تینا غلطی تے آن  
 سبق ہلبو، اسٹ ایلو نا قدرے کبو ہر ف دا اسٹ نا، دا اسٹ ایک نا، دا اسٹ زادو نا۔  
 داسا خوائے تے کنبوا و اوار گوازی کبو، مصیبت بش کرو کا ککڑ تو انا، داسا دعا کبو  
 تینے پٹ کرو کا ک خوش مریر۔“

## کٹ

برکت اللہ ارامیکو برام آن گڈ ہر اتم نوشکی آ بس تو پوسکنا زائیفہ گاڑی نادرگہ  
 ے ملنگان مُست برکت اللہ ے نقاب ناتہہ آن حکم ترسہ پارے ”ان اسہ وارے  
 زائیفہ ے تینا اراغان کش گڑا ای نا اراٹی نت تھوٹ“۔

برکت اللہ برام آن مُست پوسکنا زائیفہ تون وعدہ کریس کہ او اراغا سرمتنگ  
 تون تینا اولیکو زائیفہ ے طلاق ایٹیک۔ ہندا خاطر ان بغیر ہیبت اونیمون آن سیدھا اراٹی  
 پترینگ تون اولیکو زائیفہ ے مخاطب کر سا پارے ”بشہ نیاڑی ارف دامارے تینا او پیش تم  
 اراغان۔ کنا کنڈان طلاق اُس اسٹ اِرت مُسٹ“۔

برکت اللہ نا ہیبت تون منیر نا لُمہ غاغم تا گرو کا ک تمار۔ گٹ تا فور ابارس ہفت  
 حیران مس کہ خُدا نا دا عذاب ہرا کہ او امر بس۔ طلاق تو مس انا داسا برکت اللہ نا مونا  
 ہو غنگ او فریا دکنگ آن اَنت نس مسکہ۔ آخر مجبور مرسا ہو غسا او خو بیک شولسا تینا او منیر نا  
 چُچاتے پیٹی ٹی کرے او اسہ دوٹی منیر ے ارفے او ایلودواٹ پیٹی نا کڑی ٹی ہلک او پیش  
 تہما۔ او نا پیش تمنگ تون برکت اللہ نا پوسکنا زائیفہ گاڑی آن دڑینگا او برامی تا اندازاٹ  
 قدم ارفسا اراٹی پترینگا۔ منیر نا لُمہ ہندا سلوکا گاڑی ے دونا اشارہ اٹ تورفہ او سوار

مس۔ سوار متنگ تون ارمانی آختے بڑز کر سا خشک انگا گٹے پالفسا گاڑی والاے پارے  
 ”قاضی آباد“۔

قاضی آبادنا پنگ تون گاڑی والا سر ہلک۔

قاضی آبادے سرمنگ تون منیر نالمہ سیدھا ایلم ناتینا اراغانا اوانگ تون  
 ایلمے تینا سئی کرے کہ برکت اللہ پین برام نس کرینے او اے زانیفہ ناہتنگ تون کنے او کنا  
 چٹائے اراغان کشا۔ ایلم تا برکت اللہے پٹ کرے او اودے دلا سہ تس کہ خدا کل  
 گڑاتے جوان کیک فی پریشان مفہ۔

منیر برکت اللہنا اسٹ انگا ماراس۔ ہرانا عمر اراسال مسکہ۔ او مومن تینا دنیا  
 ٹی خوش اس۔ وارنس تینا مرضی اٹ مخا کہ وارنس تینا شوق اٹ ہوغا کہ اودے آنت سما اس  
 کہ اونا باوہ اونا نمہے طلاق تسنے۔ اودے آنت معلوم اس کہ خدا اوڑکن موئی امر و سفر  
 نس لکھانے۔ آخہ خوشی لکھانے آخہ غم لکھانے۔

منیر اولمہ تا اونا ماما انا سبھا ٹی زندگدر یفنگلہ شروع کریر۔ منیر نا ماما غریبو  
 بندغ نس اس ولے اللہ رب العزت دنیا نا ہر غریبے غیر تو عزت نا خزانہ عطا کرینے۔ تینا  
 ایڑ او خوار زادہ نا ہر ذمے داری او ہر حسابے بغیر سوچو فکر آن او بغیر مومن پر فنگان قبول  
 کرے۔ ماما نا محبت آن اونا تس آتے آن منیر نالمہے چو شکایت نس الوولے اودا ظالم  
 آزمانہ او نفسیاتی دور نا ہر رنگ آن واقف اس۔ او خدا خدا کریکہ کہ منیر زو بھلن مرے او  
 کاریے شروع کے تاکہ اونا عزت جاگہ غابرے او تینا ضمیر او تینا نظر ٹی تینے بیوس او چٹک  
 سمجھپ۔ چڑا ایلم ناخید او خواری نا اراغاتا کنگ اودے دوست الو۔ اونا زندنا آخریکو  
 مقصد ہندا اس کہ اونا گہنگان مست اونا مار بھلن مرے او کنگ شروع کے۔

دانیام اٹ شش سال گدرینگا۔ منیر غریب انگلہ کن اسے بھلواؤس مس۔ یقیناً  
 او جہان نانظر ٹی دا اسکان بھاز چناک اس ولے اسے غریبو بیوسو لہ سے کن ہشت سال نا  
 مارور ناو مار سے آن کم اف۔

منیر لہ نا حکم اٹ بازار نا ہوٹل سے ٹی کاریے شروع کرے۔ اودا نا زور کا بدن  
 او معصوماخن تون صُحب نا اذان تے آبش مسکہ او ہوٹل نا کاریے شروع کریکہ۔ رزان تا  
 سلنگ، رزان تا مچ کننگ، ترما ساتے پُر کننگ، ہوٹل نا رو فنگ، ارغاتا دنگ او فتا تر شاغنگ  
 دا کل او نا ذمے ٹی اُسُر۔ نن نا دہ بچہ اسکان او ہوٹل ٹی کاریم کریکہ۔ کاریے دم دنگ آن  
 گڈ ہرا تم اُرا غا بسکہ تو لہ نا زان ے سُر بچہ کریکہ او تنگان ہلککہ۔ اونا دمدر وکاخن تے  
 خنگ تون او نا لہ اللہ غان فریاد کر سا او نا باوہ ے زایفہ تون بد دعائسکہ او پٹا کہ۔

ہندا وختاک اُسُر کہ منیر اکثر تینا باوہ نا ہر فیکہ ہرانا جواب ٹی لہ تہ اُسُت نالاراٹ اودے  
 پاریکہ ”نی بے غیرت انگا برکت اللہ نا مار اُس، ہمو نا ظلم انگا برکت اللہ ہرانے اوکنے ننا اُرا  
 غان کشا۔ اللہ اودے بے اولاد کے۔ اللہ اودے خوار او ذلیل کے۔“

منیر تینا باوہ نا باروٹ داوڑ وپتا تے بننگان گڈ ہندا کوشش کریکہ کہ او تینا باوہ  
 ے اسے نظر اُسُ خنوس اودے ہر وس دا ظالم دا بے غیرت امر و بندغ سے۔ ہرانا خواہش  
 ے او تینا ماما تون ہم کرے او آخر ماما تا اودے اسے وار او نا باوہ نا دیدارے ہم کرنے  
 ولے ملنگ کن الیتو تہ۔

منیر باوہ نا خنگ تون لہ نا پتا تے یات کرے او باوہ غاتینا سُبک انگا خنتے اٹ  
 تینا غصہ ے کشا او خیر کرے۔ دا او نا اولیکو او آخریکو دیدار اس۔

شش تو ہوٹل ٹی کاریم کننگان گڈ منیر ہوٹلے الا او گیرج سے ٹی کاریے شروع



کرے۔ گیرج نا کاریم اودے ہوٹل نا کاریمان زیادہ دوست اس۔ اسٹ تو دائی اودے صفائی کروئی الوار اٹمیکو دا کہ گیرج صُحب ناہرے آملنگا کہ اوشام نا اذان تون بند مسکہ او مُسٹمیکو دا کہ جمعہ نادے آ گیرج آن چھٹی اس۔

گیرج نا کاریم آن او بھاز خوش اس۔ او بھاز خوشی او محنت اٹ کاریم کریکہ۔  
تینا لُمہ کن پیسہ مچ کریکہ او اوڑان نیک دعا ہلککہ۔

منیر تینا دا چُنکا عمر ٹی دنیا نا ہر خربنی او ہر رنگے درست کریس اودے معلوم اس مہر محبت، عزّت، مقام ہر گڑا پیسہ نا بننگان پد بریک۔

منیر صُحب اوشام اُستاد اتا غلامی ے کننگان گڈ اُرائی بادشاہ تے آن بار خاچا کہ او بھلو فخر ے اٹ بشندہ کرسا تینا ہر دے نا پنج رُپئی ے جیان کشاکہ اولُمہ غامور یفیکہ۔ او نا خنتے ٹی دلیری او خود داری نا عکس ختنگا کہ۔ او نا لُمہ خوشی آن اودے خُجب اٹ ہلککہ او اللہ نا شکر ے ادا کریکہ۔

دا دور او دا زمان نا تصویر ے مشی کرو کا ک نئے غریبا کونے کہ غربتی ے۔  
زمانہ ے رسوا کرو کا ک ہمو کم نسل کو ہر اتینا پیسہ او پیسی متنگ نارعبے نشان ایتہ۔ دا بد بختاک دادہ سال نا چننا ے ہم دا خس وار تہور کہ او تینا اُرا او تینا لُمہ کن جوانی اٹ عزت اٹ پیسہ نس کٹہ۔ سیرانگا پھڈے اُنت معلوم کہ خورک انگا پھڈنا غل امر مریک۔

منیر نا کاریمے منہ تُو متوسس کہ شار نا گمراہ او عیاش انگا گیرا کا ک اودے نظر ٹی خَلکر او تینا نفس نا خوش کنگ کن دانا زور کا چُننا بد نے تینا لنگڑا انگا خنتے ٹی شاعر۔ ہرا بندغ گیرج آ بسکہ تو ہیبت ہیبت ٹی یا تو منیر نا کلکا تے چکا کہ یا کاریم نا وختا او نا خنتے خوار یفیکہ یا تو اوڑتوں گپ کرسا او نا زانے تینا مڑدار انگا دوتے خوشکا کہ۔ بھازاک تو

زنوے تاتینا پنچہ غاتے خوشکارا او کرارو لہجہ سے ٹی پاریرہ ”اڑے چُکا اُستاد! ناتوریش دا اسکان بتئے۔“

منیر بند غاتا دو تے خُسنگان بیزار مُس و لے دا حیوانا ک دو تے مُریفنگان دم دتو مُس۔ آخر چٹ بھاز مجبور مُس تو گیرج نا کاریے والا۔

گیرج نا کاریم آن گد منیرے ماما تاتینا سنگت کسے نامنی تون کلینز کرے۔ منیر خوشی آن گل اوبال کس کہ او منی سے نا کلینز لگانے۔ اودے مالو آن بھاز شوق کس کہ او منی سے نا کلینز مروس۔ او منی نا چھت آ لگوک مرے او نا ذی خُج مرے پڑہ غاک تا منی نارفتار تون بال کیر۔ او ہر اتم منی اسپید ٹی مُس تو او چھت آن دُہینگہ او کھڑکی آن منی ٹی پُترینگہ۔ منی نا ڈنڈا غا سوار سواری تے آن کرایہ ہلے۔

منیر نا اُست کلینزی نا کاریم تون لگا مُس۔ دا کاریم اودے دے پدے آن وڑنگ اس۔ منی نا ڈرا یئور او نا مانا وجہ غان او نا بھاز خیالے ہم تَخا کہ۔ اوڑکن تینا چُنتا تے آن بار مہر کریکہ۔

منیرے منی تون مہ سال مس۔ او تینا کلینزی تون اَختہ شوق اٹ کاریم کریکہ کہ اچانک جوڑ آن جوڑ او نا لُمہ فوت کرے او منیر اُسہ بیل اٹ انا چوری مُس۔ باوہ نا کنڈان تو او مالو آن چوری کس داسا لُمہ نا کنڈان ہم چوری مُس۔ لُمہ نامرگ منیر آ بھاز بھلو بو جھ کس تَخا۔ دا وخت دا جہان اودا عمر اٹ چوری متنگ بھلو ویل کس اس۔ لُمہ نا دُرد آن منیر آخر ما غان اندری نوشکی لے الا او کراچی کن سر ہلک۔ ماما تا بھاز پٹا تہ ولے کسے سما لو کہ منیر کراچی کن اِنانے او کسے باور ہم بتو کہ کہ او کراچی کن کاتک ولے غریبی او بے لُمی دادنیانا بھلا اُستاد اکو۔ دا ہڑتو ما گڑاک اِنسانے ہر گڑاے ہیل ایتہ۔ دا چنناے ورنانا

طاقت ایترہ۔ دابے عقلے دانا کیرہ۔ داگنو کے ساری کیرہ۔ دابے حیائے حیائی کیرہ۔ داکمزورے طاقت وار جوڑ کیرہ۔ داخلو کے شیراک کیرہ۔ داکھورے خنی کیرا۔ دامندے نئی کیرہ۔ اوہندا فتا ثواب اٹ منیر ہم شاطر اود لیر اوور ناس مس۔

کراچی آبتنگ تون منیر ہوٹل آتے ٹی کاریم کس پٹنگ شروع کرے۔ اودے سما کس کہ دُہن انگا بھلاشارتے ٹی اودے پین جاگہ تو کاریم رسینگک۔ مس مہو ہندا عوامی آ ہوٹلاکو۔ منہ دے اون خوار منگ روڈ اتے آخا چنگان پداودے پنجابی سے نا ہوٹل کسے ٹی کاریم رسینگ۔ داسہ چنگو مٹکنو ہوٹل کس اس ولے بھاز جوان چلینگا کہ۔ منیر مالو آن ہوٹل کسے ٹی کاریم کرو س ہراڑن اودے ہوٹل نا کاریمک مالو آن بٹرہ۔ اونا کاریم او محنت آن اونا سیٹھ بھاز خوش اس۔

ارادے پد ریسہ صُحب نا ختی ہوٹل نا ملنگان مُست ہرا تم سیٹھ منیرے ہوٹل نا مونا ختا تو ہر یفے ”نی امر داخہ مالو بش مریسہ او بریسہ“۔

منیر ختے خوار یفسا جواب کس ”سیٹھ ای تو بچ اپارہ ہنداڑے ہوٹل نا مونا خاچیوہ“۔  
منیر نا کاریم اونا محنت آن سیٹھ مالو آن متاثر اس۔ اونا داچنکا عمر او بے اُرائی آن غمگین مر سا آخر سیٹھ اودے تین تون اوار کرے۔ سیٹھ نا اُرائی بغیر سیٹھ او اونا چنکا ایڑ آن کس آلو۔ او ایڑ او ایلم ہم چوری اُسر او شاہد ہندا چوری منگ نا ڈر کس کہ سیٹھ منیر نا خشک انگا ختا تا بے ارنگ کتو اودے اُراغا بیس۔

سیٹ ناچنکا ایڑ نا پین ”لاریب“ اس۔ او کراچی ایڑ پورٹ ٹی صفائی نا کاریم کریکہ۔ لاریب منیر کن بھاز مہر کریکہ او ہڑتو ماک اکثر تین تون تینا ڈر دا تے شیر کریرہ۔ او اوار تینا لُمتہ غاتے کن ہو غارہ او اوار او فتا مغفرت کن دعا کریرہ۔

منیر ہمو دے تے ٹی تین تون فیصلہ کرے کہ اودا سا پیری اسکان دا ہوٹل اودا  
اُراے اپرو۔ ولے شاہد خدائے دا گڑا منظور الو۔ او منیر نا تقدیراٹ پین بھلو خواری او  
پین بھلو سفر لکھا سس۔

منیرے ہوٹل نا کاریم اوکراچی نا موسم سخت دوست لگاس۔ صُحب تون وختی  
سیٹھ تون انا کہ او شام تو ہڑ تو ماک او اراغا بٹرہ۔ لاریب اوفتے کن چاہہ سیکہ۔ اوکل  
اے نن ناہرے اسکان تینا چنکا کوٹی ٹی تو لوک مجلس کریہ۔

لاریب منیرے بھاز پسند کریکہ۔ منیر نا ویرانہ غاخنک اونا چپ انگا طب اونا  
بز اگا بشندہ اونا گپ کنگ نا انداز کل لاریبے دیوانہ کریئر۔ اونا اُسٹ دے پدے  
آن منیر کن گوش کنگلک۔ ولے منیر تینا دنیا اوتینا سوچا تے ٹی اختہ اس۔

سیٹھ منیر نا مخلصی او ایمانداری آ داخدا اعتبار کریکہ کہ ہر ادے پین کاریم نئے  
اٹ انوس تو ہوٹل نا حساب کتابا تے منیر سنبھالا کہ۔ منیر ہم تینا اعتبارے برقرار خنک کن  
اودے بچ شکایت نا موقع تنوکہ۔

منیرے ہوٹل ٹی کاریم کنزگاشش سال مس۔ دا ہوٹل اودے اونا چند نا ہوٹل  
لگا کہ۔ لاریب او سیٹھ اوڑ کن اونا تینا ک اُسٹر اوفتے اوتینا سیال او قریب سمجھا کہ۔ ایہن  
ہم سیالیک مہر او محبت آن مریرہ۔

وخت وخت سیٹھ منیرے ہوٹل آن چھٹی ہم تسک۔ زیادہ تر اونا چھٹی تے  
لاریب اودے کراچی نا سمندر حدیقہ او بازار تے نشان تسک۔ چکر آن گڈ لاریب  
اودے چاٹ او موسوسہ کنفیکہ او شام آن پد ہڑ تو ماک مجلس او مسخرہ کر سا اراغا بٹرہ۔

لاریب تینا مچا زندے منیر تون گد ریفنگ خوا سکھ او ہر وخت خدا غان دُعا

کر یکہ کہ اونا برا مںیر تون مرے ولے مںیر تون برا مںرنا ہیئت کس اَس او مںیر تون تینا  
محبت نا اظہار کنگ کتو کہ۔

اَسے دے اُرائی تو لوک مجلس کر سا سیٹھ مںیرے مشورہ ترسا پارے ”مںیرا گہ  
نے تون پیسہ ارے تو او فتنے خرچ کنگان جوانے نی تینا شناختی کارڈے تیار کرف۔ دا  
شناختی کارڈ نے مونا بھاز کاریم ایتو“۔

مںیرے سیٹھ نادا مشورہ بھاز جوان لگا۔ دم کس سوچ خلنگان پد پریشان مرسا  
سوال کرے ”سیٹھ کنا تو عمر چکے شناختی کارڈ امر تیار مرو“۔

سیٹھ فوراً ورندی ترسا پارے ”او کنا ذمہ داری ہے۔ نی بس تینا باوہ نا پنے پائیکان  
کنے تمناے او ای نا شناختی کارڈی نوشکی لکھفنگ تو کپڑہ اتنے کہ کراچی ٹی تیار کپسے۔“  
مںیرا سہ وار سوچ خلک کہ سیٹھ ہے پاو کنا باوہ نا جا گہ غا کنا لمہ نا پنے لکھف  
ولے ولد اٹھیک پار سا گپے ختم کرے۔

مںیر نا شناختی کارڈ نا تیار مننگان گڈ لاریب ایلے تینا پارے ”ای مںیر کن  
ایئر پورٹ ٹی تین تون کاریم کس پٹیوہ۔ ای او ہڑتو ماک او ار کاریم کروں۔ او ٹی مںیرے  
پینٹ شرٹ ہم ایترے“۔

مںیرے لاریب نادا ہیئت سخت وڑا ولے او سیٹھ ہے تینا انگ کتو کہ ہندا خاطر  
آن انکار کر سا پارے ”ای دا ہوٹلے پینٹ شرٹ کن انگ کپڑہ ہرا کنے روزی نا خواجہ  
کرے۔ ہرا کنے نما سیخا او نما مہر آتے نصیب کرے“۔

مںیر نادا گپاتے آن پد لاریب بدتر اوڑکن گنوک مس۔ اودے عاشقانہ و نظر  
کسے اٹ ہرا او بخند کس کرے۔

منیر، لاریب نا بھارا نگا بشندہ او ہینا پیتا تے آن آخر محبت نا خوشبوئے محسوس کرے۔ اودے لاریب نامہراتے ٹی لاریب نا ڈھکوکا محبت نظر بس۔ ہراڑن او خوش ہم اس او خوفزدا ہم۔ خوش اودا گڑاغان اس کہ اودے تینا زندگی ئے ہنداڑے گدریفوئی اس۔ اگہ لاریب تون او نابرام مسکہ تودا کان جوان پین اُنت منگ کر یکہ۔ خوفزدہ اوسیٹھ ناکنڈان اس کہ سیٹھ اُنت سمجھوئے اُنت پاروے۔

منیر او لاریب نا اظہارے محبت آن گڈ لاریب تینٹ تینا ایلے سئی کرے کہ او منیر تون برام کنگ خوانک۔

منیر دا گڑاغان سخت حیران او پریشان مس ولے سیٹھ نارضا مندی او نا کل پریشانی تے مر کرے۔ منیر آن ہر فزگان پد سیٹھ ہڑتو ما تا برام ناتیاری ئے شروع کرے۔ غریب آپوری تا برام ناتیاری ہم اُنت کس خوانسکہ۔ لاریب تین کن جوڑہ کس چچ اوسنگار نا ہلنگ نا خواستے کرسا منیر زاری کرے کہ کان کن تون او ارشا پنگ کینہ ولے منیر انکار کرے کہ ای شر منگیوہ تینا مروکا زانیفہ تون تینا برام ناسا مان تا ہلنگ کن امر کا ولد اسیٹھ لاریب تون انگ نا فیصلہ ئے کرے تو لاریب منتو کہ ای امر ایلیم تون انگ کیوہ۔ خیر آخر لاریب مجبور مس او تینا بازار کن سر ہلک او منیر اوسیٹھ ہوٹل کن مون کریر۔

شام تو ہوٹل نا بند کنزگان گڈ سیٹھ منیر تون او نابرام نا پیتا تے شروع کرے کہ ایلو دے بیکہ تون نما نکاح ئے خوانفوہ ولدانما برام آن گڈ دا اُر اے ہم اُنتہ مچے بھلو اُر پٹنہ تین کن۔ منیر او نا پیتا تے آبشندہ کرسا اودے خوشی او خاموشی ٹی حقو رسا اس۔

اُر اغابزگان گڈ منیر اوسیٹھ ہڑتو ماک پریشان مسر کہ لاریب دا اسکان اُر اغابتنے سیٹھ اُر اے ارامسہ وار نظر آن کشا ولے نہ لاریب ناسا مانک خنگار نئے اونا

جند۔ وخت ہم تدیسس نن نایا زده متنگ اس۔ ہڑتوماتا اُسٹ خوف آن لڑزنگے شروع کریراواراغان گام کرسالاریب ناپٹنگ کن پشتتار۔ بازار آنا رتو بازار نانیمہ غان زیات دکا تک بندائسر۔ دکاندارتے آن ہر فسا بازار ناگلی تے پٹسانن نادو بچہ مس ولے لاریب خفتکو۔

آخر مجبور مرسا ہڑتوماک خوک ناپولیس تھانہ کن رُم کریر۔ ایڑے ہر فیر تو معلوم مس کہ اینو بازار ٹی شام نا نماز آن گڈ نا معلوم افراد آتا فارنگ آن ہشت بندغ کہسکو ہرائی مس ذالبول اونچ نرینہ اوارو۔ دا خبر ناسیٹھے مالو آن معلوم اس کہ اینو کراچی ٹی فارنگ مسے۔

پولیس نادا پیتا تے آن گڈ او ہڑتوما تابدن ناسیک انا او خنک تا خوف آن ڈک ڈک پیش تمار۔ سیٹھ گڑ اس پانگ کن گیک کرے کہ تھانہ نا آفیسر اونا پیتے کاٹ کرسا پارے ”نم دُہن کبو خوک ناسیفیل ہسپتال آچکرس خلبو۔ لاشاک ہموڑ کو اسے نظر کس ہر بوتنا نئے تسلی مریک۔“

آفیسر نا ہندا ہیئت تون ہڑتوماک ہسپتال کن رُم کریراوارا ہسپتال ناسر متنگ تون لاشا تا ہر فیرا و لاشا تے ٹی لاریب ناپٹنگ شروع کریر۔ اوقارنگ اوقا لڑزی آن ہندن لگا کہ لاریب یقیناً ہندا لاش تون اوارے۔

نرینہ غاتا لاشاک جتا وصف سے ٹی تخوک اسر۔ ذالبول اتا لاشا تے آن ارٹ نا موناں کفے ارفزگان گڈ سیٹھ او منیر تینا کاٹماتے کرا کراچپ اوراستے سر فیر تو ڈاکٹر مسٹمیکو میت نا موناں کفے ار فے تو ہندا ٹون سیٹھ چیمانٹ کس خلک اوگو ڈاتے تمار۔ منیر لاریب نا خاموش آچہرہ نا خنک تون ہو غسا ہسپتال آن پیش تمہ اور وڈنا رہی اٹرم

کر سا کر سا ٹرکا تا ماسا سر مس۔ اودے اَسہ گڑا نا خبر اَلو کہ او ہر انگ رُم کنگہ۔ ہر انگ  
انگہ او اَنتے ہسپتال آن پیش تَمّا اَنتے سیٹھ تے تینا اِلّا۔ ہنداڑتون صُحب نا اذ انک شروع  
مُسّر تو اونا ماسا سلوکا ٹرکا ک اداکان پیش تمنگ اُسّر کہ ہنداڑتون منیر بغیر اجازت آن ٹرک  
نَسے ٹی سوار مس اوچپ چُپ ڈرائیور نا ماسا تو س۔

ڈرائیور اوڑان شش ہفت وار آن زیات ہر فے ”ہر انگ کا سہ؟ ہر انگ انوئی  
نے نے ایلیم؟“۔

ولے اودا سوال تے آ فقط ہو غوکا خنتے اٹ ڈرائیور آنظر کس ہرا کہ اومونے  
شیف کریک۔ ڈرائیور اونا چچی آن بھارتنگ مس تو سر ہلک۔

صُحب ناخ انگا تہو مُر غنا کسرا کسرا نا خاموشی اودا خاموشی ٹی ٹرک نا تا تے تا  
اُستاتے صفا برف کریک۔ ولے داموسم اودا منظر ٹی ہم منیر نا اُست خاخر آن بارلار ٹی اس۔  
اونا خنتے ٹی سیٹھ ناچیمناٹ وارد ماچرخ کریک اودا نا ملی نے چکر ٹی شاغا کہ۔ ایکان پاننا  
خنتے ٹی لاریب ناچہرہ وارد مامون آبسکہ او مجا بدن تہ سیم سیم کریک۔ اودا خوف اودا درد آن  
وارد ما خداغان سوال کر سا اس ”خدا جان دا اُنت تقدیر نَسے دا امر و نصیب کس کسے تَسُنس  
نی۔ دا امر و بخت کس کنکن لکھا کس کہ ہر مہر کر دوائے کنا کسے آن مُر کیسہ“۔

بھلو سفر نَسے آن گڈ ہر اتم ٹرکا ک اڈ کریر تو منیر ڈرائیور تون او اڑرکان دڑینگا او  
اولیکو وار ڈرائیور آن سوال کس کرے ”دا ہرا جا گہ نے؟“۔

ڈرائیور جواب تہ ”سندھ“۔

منیر سندھ ناچہ بھاز وار بنگس ولے دا اولیکو وار کس کہ او سندھ آبس اس او ہم  
اَسہ ہند نو حال نَسے ٹی اَسہ دہنو وخت نَسے آ کہ اودے تینا چند نا تینا ذات نا سما اَلو۔



سندھ آبنگن گڈاوتینا دیوارِ غ کن محتاجِ مَس۔ اُخہ پیسہ سیٹھ ناہوٹل آن  
 کٹاُس اوکلے ہموڑے گیرام کرے۔ دُہن زوکاریم کس ہم اودے دوہتو کہ اوتینا پھڈ  
 ناہوشے چپ کرو س۔ تینا معدہ ناباے نفوس۔ آخر بھازتنگ او مجبور مَس تو پیر کسے نا  
 دربار آنا۔ او مَس تو ہمو درباری درباری تے آن بار وختے گدریفے۔ ہموڑے غسل  
 کریکے، چاکش کریکے ارغ کتنگلے۔ اسے پاس کس دربار نا صفائی کئے کریکے اودر بار آ  
 بروکاک اودے پیسہ ہم تشرہ بھازاک تینا ثواب کن اودے کُچ ہم تشرہ۔

منیر نادڈ دہرا تم زکس کم مَس۔ او اُسٹاٹ بیدار مَس تو دربار آن پیش تما او  
 سندھ نابازار کن مون کرے۔ ہوٹل او گیرج آتے ٹی کاریم نارندٹ چکر خلنگن گڈ بیوس  
 انگاختے اٹ بیزار مرسا سندھنا زمیندارا تے کن مون کرے۔

موسم ہم زمینداری ناس، زمیندار اک نہرتے آن تینا ملکا تے دریتنگ اسر۔  
 منیر اوفتے کاریم کن سوال کرے ولے زمیندار اک اونا عمر او اونا بارن انگاجسم آن  
 اودے دازمین تے بھلوڑ مے داری تنگ کتورہ۔

اودے داخدر خوار او بزاگ خنگ آن پدا آخر خدائے ہم اوڑا عذاب بس۔ اونا  
 ذی آمہربان مرسا اودے اسے زمیندار کسے نابز غرتخے۔

منیر او زمیندار نانیام ٹی گپ پک مَس کہ فصل نا آخر ٹی سہ یک منیرے  
 رینگو۔ داٹن بیدس زمیندار اونا کُمک کن اسے بندغ کس پین بیس ولے منیر اودے  
 واپس راہی کرے کہ اودا ملک نابز غری ٹی پین کسے شریک کپک۔

ملکا تا بارنگن گڈ زمیندار مَسے گوئی غلہ نا لیس۔ ہرا فتنے منیر او زمیندار  
 ہڑتو ماک لنگارنا ذی آروش بندز ندوک ارادے او ارازن ٹی دسیر۔

اوکان گڈ منیر ولد اتنیامس۔ غلہ غاتا پھاش کنگ نا انتظار شروع اس۔ منیر پائی  
وِگیڈ نَسے ٹی تموک صُحب او شام زمین نا خیال داری ٹی لکوک اس۔

شش ٹو آن گڈ غلہ غاتے خنگ تون منیر ہندن خوش مس کہ اونا چٹاک ورنہ  
مَسُو۔ لائی گراک بُس تو اَسہ جوان چُستو لائی گر کس منیر تین کن اڑسا۔ ولد اہڑ تو ماک دے  
اون نامحت اٹ پینگنا پُوشکنا پٹ ے سیر کو پٹ کس کریر۔

غلہ غاتے جوہان کننگان گڈ لائی گر تینامسہ گونی ے ار فے او خیر کرے انا۔  
تریشل نا وخت بس تو منیر اوز میندار تینا حید و خواری نا خوشا غاتے تریشل  
کرفنگ شروع کریر او تریشل تون او ارمفت خوش آک ہم رسیفیر۔ ہرا خوشہ تریشل نابا  
غان تما کہ اودے او تین کن مچ کریر۔

تریشل آن فارغ منگ تون تریشل والا نا بٹھے تَسر او غلہ غاتے گونی تے ٹی  
کریر باتے تالفیر تھار۔ پگاتے برکی تے ٹی جمع کریر او ہموڑے جک قطار نَسے ٹی خلکر۔  
گونی تے حساب کننگان پد منیر ے اونا حساب اٹ پانزدہ گونی نا غلہ تما  
ہرافتے خنگ تون منیر نادا ہفت ہشت ٹو نادم کل کشنگا۔ او تینا غلہ غاتے جتا کننگ کن  
کیک کرے کہ ہنداڑ تون زمیندار تینا منہ بندغ تون او ارمیر ے غلہ غاتے آن مَر کرے  
اودھمکی تس اودے اونا غلہ غاتے آن جواب کرے۔ غلہ غاتے آن جواب مننگان گڈ  
منیر نادتر باف کرے۔ داخواریک اودا زلالٹیک دامحت آک دا کل مش تا مَسر۔ ہندا  
سوچ تون منیر زمیندار نا زچک آدو بٹے اودو بٹینگ تون ہڑ تو ما تانیام ٹی جنگ شروع  
مَس۔ منیر تینا کس اے چار بندغ اَسر۔ جوان منیر بیو سے پٹار دتر چر کریر۔ جنگ مَرغن  
مَس تو خلاص کنگ کن جُوک نا بندغا ک رم کریر۔ منٹ زمیندار او اونا بندغا تے توریر جتا  
کریر او اَسٹ کس منیر ے گر کرے او منیر ے قرار کریر۔

کاٹھے تادیر شاغ تو بائس ناتا دتر بند مس ولدا جندے تادیر گٹھے تو منیر زکس  
دماغ ناکنڈاں پھدین مس۔

دم سے ناچچی آن گڈ منیر آن ہر فیر ”نہ کہ غلّہ غاتے ناتھو؟“۔

منیر کاٹھے آن ٹی سرفے۔ ولدا ہر فے ”نے امر معلوم“۔

منیر نا جوابے ترسا امبل پارے ”داحرام خور ہر سال ہندن کیک۔ ہندا وجہ  
غان داجا گہ نا آسہ بند غ کس اوڑتون کاریم کیک“۔

منیر چپ کر سامونے شیف کرے تو امبل اودے مشورہ ترسا پارے ”ایلم نا  
مدتے آسہ بند غ کس کنگ کیک“۔

منیر یکدم مونے بڑا کر ساہریفے ”دیر؟“۔

”دافا سردار۔ نی ہموڑا ان تینا بزغری اودا بے غیرت نا بے غیرتی ناقصہ  
کر اوضورت نامدتے کرو“۔

منیر مجبور اس۔ نئے پین کسر کس بچا سس نئے اوڑتون داخہ پیسہ کس کہ اودا غلّہ  
غاتے تینا خید او خواری تے ہنداڑے اوس اوس۔ او فوراً بش مس تو امبل اودے  
تورے اوسردار نا جاگہ او کسر نا رماغا۔ ہنداڑتون منیر نا ذہن ٹی گڑا اس بس تو ہریفے ”ایلم  
بادینی تا سردار کس داڑے مرو؟“

املبل ہکدم ورنڈی کس ”جی ہو ایلم سردار علی مردان نا آسہ اُرا کس ہندا مون نا  
شارٹی لے۔ خیرے؟“۔

”ہندن سوج کریٹ“ ہندن ہریٹ۔

منیر اوکان سر ہلک او جوان سوج خلنگان گڈ آخر تین کن کسر کس کشا۔ سردار نا

اُراغا اینگان مُست اِرا نِ ہموڑے مسجد نُسے ٹی گدریفے تو مسٹیکو دے پشیم نانا نماز آن گڈ  
 جُوک نا خلق نا اسکول کن مون کرے۔ اسکول نا پشیم آسلوک چنا تا چھٹی نا انتظارے  
 کر سائس کہ چھٹی نا گھٹی نا لنگ تون چناک گیٹ آن پشیم تون منیر چنا تا نیام آن اُسہ  
 بڑو چنا تئیں ماس آتوار کر سا پارے ”ایلم! کنا اُسہ کاریم نُسے۔ ہندادے ثواب اٹ  
 تینا کرنا بھاز مہربانی مرو“۔

”جی ایلم! آنت کاریم نُسے؟“۔

منیر ”کنے خط نُس لکھوئی ہے۔ کنا چند بے تعلیم نُسے اُٹ“۔

”امر و خط نُس؟“۔

منیر ”خط ٹی لکھ! ای سردار علی مردان اُٹ۔ ناز میندار نُس کنا بندغ“ منیر برکت  
 اللہ“ نا غلہ غاتے تورینے۔ ہموڑے واپس کیرے یا کنا چند بریو۔ بس ہنداخس لکھ“۔

بڑو اِنکا طالب بستے کوپہ غاتے آن شیف کرے۔ کتاب او قلم نُس کشا او  
 منیر نا خطے ہموڑ لکھا او دوٹی تاتس۔

منیر گلان مرسا بشندہ نُس کرے او شکریہ ہے تا ادا کرے او سید ہاز میندار نا  
 سردار کن مون کرے۔

بھلو سفر نُسے آن پد ہرا تم سردار نا اُراغا سر مَس تو سردار نا چوکیدار گیٹ آن خط  
 ہے ار فے تہہ ٹی راہی کرے۔ نیم گھنٹہ نا انتظار آن گڈ سردار او دے تہہ ٹی بنگلہ اوز میندار  
 کن ہم پیغام نُس راہی کرے۔ ارا گھنٹہ نا صبر آن گڈ زمیندار بس تو سردار ترند مَس  
 پارے ”نے شرم بفاک پین نا حقے کینسہ۔ دامار کو نا قوم نا سردار خط نُس راہی کرینے۔ اگہ  
 صُحب اسکان دانا حقے حقوس تو کنے آن گلہ کیس نہ پین“۔

زمیندار سردار ناخوف آن لڑ سا پارے ”اونا حق تنخو کے صُحب تون برے دے  
تہ ہندا خس پانگ تون زمیندار کرا کر اپیش تہما تو منیر ہم اونا رند ٹی سر ہلک۔

اونن ے خوک نامیت ٹی گدریفنگان پد منیر صُحب تون وختی گاڑی کس  
ار فے۔ زمیندار آن غلہ غاتے تینا ہلک اوبازار ناگنڈ اپیش تہما۔

غلہ غاتے سودا کرے پیسہ غاتے جیب ٹی خلک تو اچانک اودے خیال بس کہ  
اوتینا سردار آچکر کس تو خلہ۔ اوڑ تون ملاقات کس کے بلکہ سردار اودے کاریم کس ایتر۔

سردار آسر منگ تون منیر اودے تین تون مرو کا قصہ نا پارے اوسردار آن  
معافی خوا کس کہ نا پین نادروغ کس تڑیٹ۔ سردار اونا قصہ غا بھاز مخا اودے شاباشی  
کس کہ ہراوڑٹ اوتینا حقے ہلکنے دا اسہ گچیو مثال کسے۔ منیر ہر اتم کاریم کسے نا طلب  
کرے تو سردار تون او وختا پین کاریم الو تو اودے تینا باڈی گارڈ خلک۔ منیر خوشی خوشی  
دانو کری ے قبول کرے۔ تو فک کو پے غا شاغہ اوسردار ناماس آسینہ ے پھدام تر سا ڈڈ  
آن ڈڈ سلیس۔

منیر سردار نا سیخا آن باردے دے مچ اوڑ تون ہمارا ہی کریکہ۔ سردار ہرانگ  
انوس اوسردار تون اواراس۔ دے کس سردار تون مجلس آنا کہ۔ دے کس دعوت آ۔ دے  
کس فاتحہ سے آ تو دے کس برام کسے آ۔ دا اونا زندگی نارائمی کو جوان انگا وخت اس۔ اولیکو  
وخت تو ہمواس ہرا لاریب تون گدرینگا۔

منیر ہفت تو سردار تون مس۔ اسہ دے سردار تینا چناتے نوشکی کن درسا اس تو  
منیر ے ہم تین تون ار فے۔ منیر نوشکی آواپس انگ خوا تو کاو لے سردار نا ہیبت آن انکار  
ہم کنگ کتو کہ۔ آخر سردار اونا چناتے تو ہمارا ہی کرسا نوشکی کن سر ہلک۔

نوشکی نے سرمنگ تون اراوالاک سردار اوانا زانیفہ غان منیرنا ہریفیر تو سردار  
جواب تس ”منیر جان ہندا نوشکی نامار نے۔ برکت اللہ بادی نی نامار نے۔ داساشش تونا  
سے نن تونے۔“

سردار ناداہیت سردار نازبان آن پیش تمنگ تون تہونا کوپہ غاتے آسوار مس  
اواخر تہونا کمک اٹ مچا نوشکی ٹی خوشبو آن بارتالان مس۔

ہرا تم برکت اللہ سئی مس کہ اونا مار سردار نا باڈی گارڈے۔ داسا ہندا نوشکی ٹی  
نے تو ہوا سہ دے ٹی لنگ لنگ کرسا تینے سردار ناما سا سر کرے۔ سردار نا اراغا سرمنگ  
تون برکت اللہ سردار نا مونا بوڑہ نس خلک اولڑز وکا دوی اٹ سردار تون مخاطب مرسا  
پارے ”سردار صاحب! ای بنگٹ کنا مار نے تونے خدا نا پٹ اودے کنے واپس کرای  
مچا عمر اونا انتظار ٹی دے تے شام نن تے صُحب کرینٹ۔ سردار صاحب اودے کن تون  
راہی کر۔ ای تینا دا پیری نا آخری دیتے اوڑ تون گدریفنگ خواہوہ۔ اودے خدا دا نوشکی آ  
سر کرینے نہ تو ای اودے ہرا ہرا جاگہ غاتے آپٹٹ۔“

برکت اللہ نا پیتاک ہرا ڈول ٹی اُسردار اونا جندا و خس پیرالوکا۔ واہم سردار اونا  
مارے تین تون زبردستی توننگ کتو کہ۔

منیر نے تو ارکننگان گڈ برکت اللہ نا نظر اوڑا تما تو خوی نکاتے پاک کرسا بش  
مس اومنیرے خُجب کرے۔ جوان ہرے اسکان منیرنا کوپہ غاتے آخو ینک شولا۔ منیرنا  
پیشانی آن دروت ہلک۔ باوہ ناشفقت او مہراٹ آخر منیرنا خل انگا اُست نے موم ہتی  
آن بار دیر کرے۔ اودا دے منت اونا واریفنگ اٹ راضی کرے اوسردار نا اجازت اٹ  
تینا اراغا دے۔

اُراغا سرمنگ تون منیر نارٹھی لُمہ منیرے بخیر کرے۔ اونا ایڑک اوڑکن محبت نا محل آتے تعمیر کریں اودے مہر تشر اودے باوہ ناز ہیری نا احساس تشر اوڑکن باوہ نابے چینی او بے صبری ناقصہ غاتے کریر۔

منیرے عمر نئے آن پد خدا نادانمت نصیب مَس کہ اودے مار پارو کو ارادوی آن بیدس ایلم پارو کو چار دوئی پین ملار۔

اوتینا کہو کا لُمہ نا پیتا تے یاد کنگ آن سوچ خلک کہ اے ظالم انگا باوہ امر داخہ مہروان مَسے۔ اے نیارٹی کہ اونا لُمہ اے اونا اُراغان مڑا اینو ہمو نیارٹی نامارے تینا مار پانگے۔ دابا باوہ نامہراک دالمہ نادُروت آک مفت ناتو افس۔ او جوان پہہ منگ اس کہ اونا باوہ تینا مَسن تا ذمہ داری تے تینا پیر انگا کو پے غاتے آ ارفنگ کپک۔ اگہ اودے مار کس مروس تو اوقیامت اسکان کنے واپس تینا اُراغا ہتو کہ۔ داکل مہراو محبت، داکل جی او جانیک دروغ و۔ دا اونا باوہ ناسیاست نئے کہ ای اوڑکن اونا زانیفہ کن اونا مَسنتے کن کٹ کیوروزگار کیو اوقا ضرورتا تے پورا کیو۔

دا کل گڑا تے پُہہ مَنگان بیدس ہم منیر او اُراے ایتو، دا ظالم او مطلبی انگا باوہ غان نریو۔ آخر تین تون فیصلہ کرے کہ اوتینا زندے دا اُرا نا ضرورت او فرما شتے کن ندریک ہرانا وجہ اونا باوہ ناکزور انگا خنک اُسر ہرافتے اودا پیری ٹی دا تہار انگا دنیا ٹی انگ کتو کہ۔ ہرانا وجہ ہمو ایڑتا بے سیک اُسر ہرافتے اوقا لُمہ او باوہ نا گناہ تون چو تعلق کس الو۔ اودا ذمہ داری تے دا وجہ غان ہم قبول کرے کہ دنیا ٹی اے تینا غلطی نا احساس مرے کہ او ہر اذالبولے دا اُراغان مڑا فے اینو ہمو نامار اونا پچھدے خوافتنگہ۔

منہ دے مہمان تے آن بار گدریفنگان پد اُسہ دے برکت اللہ منیرے پُہہ

کر سا پارے ”مار! ای اناٹ پیر مٹ۔ ای ناو ناٹمہ نا خطا وار اٹ ولے کئے دا ہم یقینے  
 کہ نی کئے تینا او تینا لٹمہ ناکنڈ ان معاف کروس۔ مار داسا دا ارا نا دا پیر انگا باوہ نا دا پیر انگا  
 لٹمہ نا دا جوان انگا ایڈ تا زندگی کن نے گڑ اس کروئی مر یک۔ داسا دا ارا نا کٹوک فی اُس۔  
 ننا پھڈا تے خوا فوک فی اُس۔ ننے دنیا محتاجی آن مُر کرفوک فی اُس۔ ننے عزت نازند  
 کس اوسکون نا موت کس ترفوک فی اُس۔ خدا رانے تینا اِپس، ننا وسیلہ ننا اُمید فی اُس مار  
 فی اُس۔“

منیر مُسہ چار وار کاٹھے شیف بڑ سُر نے تو برکت اللہ لڑوکا دوتے اٹ کرار  
 کرار کاٹھے تا ہلک او تینا سینہ عاتخا۔ کاٹمان تا دروت کس ہلک او نیک دعا کر سا پارے  
 ”اللہ نے ہفت پُشت اسکان حُر ن کے اللہ پیر او جُرجینہ کس نہ محتاج کپ نے۔“

مُسہ دے آن گڈ برکت اللہ منیرے تینا سنگت کسے نا مار تون تفتان آ راہی  
 کرے۔ تفتان ٹی منیرے جوانو کاریم کس ملا۔ ہراٹن او ہر توتینا ارا والا تے کن تونا  
 دو انزدہ ہزار رُپی راہی کریک۔ ہرا پیسہ عاتے اٹ او نا باوہ تینا زانیفہ اوسنئے خوشی خوشی  
 بھلن کریک۔



## اَسہ رنگ

اکبر نابرام ناششمیکو سال اس۔ اونا زایفہ ے تینا خاسپر او ہجراتا تے آن  
ہزار ہا گلہ غاک اُسُر و لے اودا کل شکوہ او گلہ غاتے تینا خل انگا سینہ ٹی دُفن کریس۔  
اُسٹ ٹی ناراضگی آن بیدس اوزبان ناترکاتے ملتو کہ۔ داجتا و ہیبت نُسے کہ اواکبر ناغیر  
موجودگی ٹی تینا ہجرات او خاسپر آتون بھاز وار جنگ اوبدکلامی کریس۔ دامنه تو آن  
او ہر گڑاے ہر غمے اُسٹ ٹی قید کریکہ۔ داسامنه وختان او انتظاری اس کہ اکبر سعودی  
آن برے تو اودے اونا ایلیم تا گلہ غاتے ایتو۔ داجاہل آتون بابائی تنگ او جنگ آن  
انت حاصل۔

اکبر نابنگ آن گڈ اونا تینا دا بے علم اوجاہل آ ایلیمتے کن اوفتا چناتے کن ہتو کا ٹیکی  
تے، کروکا مہر آتے، دے وُنن مجلساتے مسخراتے خنکاتے خنگ آن گڈ نعیمہ پُہہ مَس کہ  
اکبر ناتینا ایلیم او ایلیم ناچناتے کن محبت زرس ہم کم متنے۔ داسا ای اوڑتون اونا ایلیم تا گندہ  
ٹی تے اچھ قسم اوفر آن ارفسا بیان کیو اوکنے آیقین کپرو۔ داسا دا بے رنگ آ خلق اودا  
جاہلاتے آن پنچنگ کن کنے پین کسرُس کشوئی تمک۔

اکبرنا تینا ایلستے کن زہیری سیال او قریبا تے ختنگ ناملاسی تینا مُلک او فصل آتا  
سیل ریکا تاجکڑ ناوڑ نادیدار شکارنا شوق او دوست آتا مجلس نازہیری او محبت ہر اتم زر کس  
کم مس تو نغمہ اسہ شام کس خاچنگ نا وختا او ناسینہ نا خملی آ پھاتے ٹی تینا فیسلین اٹ  
چرپ مروکا اورتے خوشکسا پارے ”ای ہیت کس کیوہ۔ او کنا ہیت نانیام ٹی ہیت کپس۔  
ہراوخت کنا گپ چٹ کٹا گروانی تینا فیصلہ ے ایتس۔ ٹھیک ے۔“  
اکبر ”ہو۔“

”ہیت دادے ای دامنے تو آن سوچ خلسا اٹ کہ نازند، نائمہ او باوہ نازندنا  
کا کا تا او نانا ماما تا کل نازند ہندا بے رنگ آخلق او ہنداریکا تانیام ٹی گدرینگا۔ پیرہ غاتے  
آن ہلیس اینو اسکان نم مسوڑے ہندا بچ او میٹل تا مالداری مسنے یا نما ختکا وہ غاڈ غارتا  
حسابی آفصلاک مسو۔ کنے سمائے کنا باوہ ہم ہندا پٹ اوریکا تے ٹی مس و لے آخری  
وختا ہوشیاری کس کرے کہ تینے دادنیا غان ہزار سال پدسلوک انکا خلق او داریکا تے آن  
زو کشا او اشار آانا۔ ہر س تنگان ہلوس“ نغمہ مونے اکبرنا کنڈا کر سا سوچ کرے۔

اکبر آسمان آہر سا ”آخاسمائے کنے۔ نی ہیت کر۔“  
”ای داپانتک۔ ای داگڑاے ہم منیوہ اینو ننا باوہ مسکین نا ارا ٹی مسٹ ناوڑ  
مال آف۔ مسٹ ناوڑ اوڑ کن غلہ بفک۔ اونا پن ناختر ناڈ غارک انار سیر کوپٹ مسر  
ولے داکل گڑا تا قربانی ٹی او اسہ ہند نوگڑا اس کرے کہ اینو او دے ہر بندغ شاباشی توں  
اوار او دے اونا شاطری آداد ایتک او اونا مغفرت کن دعا کیک۔ اونا دامثالی آکاریم  
تینا دا خلق نا انگ اس۔ اینو باوہ نا ہمو ہوشیاری نا وجہ غان کنا اسہ ایلیم کس نوشکی نا  
گورنمنٹ اسکول کسے ٹی ماسٹرے۔ او تو نا بیست و پنج ہزار رپئی تنخواہ ہلیک۔ ہمو باوہ نا

دانائی ناسوبان اُسے ایلیم کس واپڈائی ڈی پی اونا عہدہ غا کاریم کنگہ۔ ہرا کہ بھلا ایلے  
 عاقل خان اونا ورنائی نئے آن بار ہندامشے ٹی گدرینگا کس۔ اسکول او تعلیم آن  
 محروم سلیس۔ شارنا ثواب اٹ تین کن تینا چٹا تارزق کن اُسے بھلوسہزی نادکان کس  
 ملا نے اواللہنا فضل اٹ جوان کٹک کٹیک۔ کنا جندباوہ نا گچینا سوچ نا وجہ غان بی اے  
 کریٹ۔ اینو شارٹی مسٹ تو اسکول ٹی معلّمہ کس لگا۔ ایلو چٹکا ایڈ او ایلیم کنا داسا میٹرک  
 نا امتحانے تنگو۔ دا کُل گپا تا مقصد دادے نن داسا فقط ای او نی اُفن۔ نننے ارا چنا  
 ارے۔ نافرہض مریک نن او فتنے اُسے جوانو زند کس اُسے روشنو مستقبل کس ایتن۔ ہراڑکن  
 نننے اوار سوچ خلوی مریک او فیصلہ کروئی مریک۔ داباروٹ تینا چٹا تا مستقبل کن کنا  
 ذہن ٹی کسر کس کنے نظر بریک ہراڑکن نا مشورہ درکارے۔ سوچ دادے اگہ نن داخلے  
 اِن او تینا شارنا کوئی تے آکان تو نننا چٹا تا زندا وفتا بروکا وخت یقیناً شاد اورشن مرو۔ ننا  
 چٹاک ایلو چٹا تے آن بارمونی انور آباد مرو۔ شارٹی جوانو تعلیم کس حاصل کنگان گڈ  
 جوانو سرکاری و نوکری کرور بھلو تنخواہ بلور۔ دافتنے آن بیدس نی تین کن ہموڑے  
 کاروبار کس کنگ کیسے۔ تینا خواری نا پیسہ تے اٹ مٹ دابارنا ڈغار تے پگ او پالن او  
 تمغ کروں، اُن ت پاسے؟“

اکبرے زانیفہ نا پٹاک با مقصد او بھاز جو ان لگارو لے او داباوہ پیرہی آجا گہ  
 ے، تینا ایلیم تے تینا دا دواٹ تفوکا اُراتے دازیبا انگاریکا تے نوکاب نادیتے انگ ناچو  
 داکان مُست تینا زنداٹ سوچتو کس۔

”پٹاک نا کنے وڑار۔ نا سوچ کنے دوست بس ولے داخلق داریک دانا وڑاو  
 تینا داملک آتون کنا اُسے بھلور شہ کس ارے۔ ای دافتنے امر انگ کروٹ۔ ولے گپ ننا

پُچھتا تے تو ای قربانی تنگ کن حاضر اٹ۔ بس اُسہ وار ای غلام اللہ تون مشورہ کیو  
اودے سئی کیو۔ او انت پاکہ، اکبر کرار ولجہ سے اٹ ورندی تئس۔

”کنا چچ کاٹم تمپک نے دا بے رنگ آخلق نا انت کس دوست ہے۔ چڑا دنا  
مُجا کو۔ زندگی ہنداریکا کو۔ ہر سال ہندا لوڑ دا نگا دیکو۔ نی کان اُسہ وار رنگی اشارے خن  
اے رنگا تے سیل کر۔ ہر صُحب جتا و رنگ تے۔ ہر شام جتا و شام تے۔ دے پدے آن  
ترقی منگلہ۔ دے پدے آن رنگا ک ودھنگو، نعیہ محبت نادوی اٹ جواب تئس۔

”داسا آرام کین۔ صُحب تون ای صلہ کیو گڑا نے پاو، اکبر پیٹ ختم کر سا پارے۔  
اکبر نادا ہیئت نعیہ غان برداشت متو۔ یکدم مزاج تا خراب مَس او تین تون  
سوچ خلک کہ ای اونا زانیفہ اُٹ او کن تون مشورہ کنگ کپک۔ عمر مُج بس ایلم تا غلام او  
ایلم تا باوہ جوڑے۔

ہندا تون دُوے تینا اکبر ناسینہ غان ارفے۔ مونا تینا کملے شاعہ او غصہ غان  
خفتے تر کرے۔

صُحب تون غلام اللہ مجلس مجلس ٹی نا وڑنا کنڈا دسا اکبر اودے نعیہ نا کروکا  
ہر پیٹ لفظ لفظ ہیئت با ہیئت سئی کرے ولدا او اڑن اونا صلہ نا طلب کرے تو غلام اللہ فوراً  
پُہ مَس دا کل نعیہ نا اُسہ پوسکُنو چم بازی تے اونس ایلم تے جتا کنگ خواک۔ غلام اللہ  
تین تو سوچا اگہ او اکبرے اونا زانیفہ نادا سیاست اودا نا وجہے پارے تو قصہ پین خراب  
مریک۔ اودے اُسہ خیر نا ایلمی و مشورہ کس تر سا پارے

”کنا مشورہ غان مُست نازانیفہ نا پیتا تے آن پچ اگہ ای داپا وای نا انگاراضی اُٹ تو  
نی کنے آن سوب کس خواہ۔ اگہ ای راضی مریو تو اوڑکن ہم نی وجہ کس سوچ کیسہ۔ دافتے

آن بیدس نی کنے شار آبیت کنگک ناسوج کر پئس تو کناپتناک ہو آو آخانیا مٹی و۔ نی تینا  
چُنا تے خوانفنگ نانیت اٹ کاسہ تو ای نے اڑسنگ کپرہ انتے کہ دا خلق نا اسکول او  
اسکول ناماسٹر آتا حال نامون ٹی وے ولے ای داپاواگہ نے تینا چُنا تے خوانفوی وے تو  
نیاز وے (اکبر نا بھلامار) تینا الہ نا اُرا غار اہی کر۔ داسا چار سال نامار سسے نم کن زہیر ہم  
کپر وے۔ ہموڑے تینا بلہ توں مرے ماما توں خوانہ۔ سلیس امتیاز (اکبر نا چُنا کار) نا  
گپ تو او ہراوخت بھلن مس اونا خواننگ نا ہم سوچ خلیہ۔ اِراٹمیکو آ خانگنگ ناسوب  
دادے کہ شار آانگ خلق آن اُرا دیرہ بیٹ کنگک آسانو کاریم سس تو آف۔ بیٹ کنگک نا  
مطلب فقط تینا کوئی تے بدل کنگک نا پین آف۔ شار بھلومہ داری بھلوخرچہ خوانک۔ نا  
شش تُو نا چھٹی سس ولدانی اناس تو اوفتا خیالے دے کروے۔ شار نا حالتاک ہم نے آن  
چپ افس دے نامون اٹ دُزیک مریرہ۔ خیر دُزی او شار نا حالتاک داحہ ضروری افس  
اوفتا ذی آگپ مرے ولے دا گپا تے آن بیدس خدونی دا اُراتے پگ و لیپائی کر لیس۔  
اے پکا انگا کوئی آ دنیا نا پیسہ غاتے خرچ کر لیس۔ داشش ہفت ساہار اِرا چُج اے  
مُلکاک دا کلے دے سانوبے دے سنبھالو۔ دوانا او شار نا ڈغارے ہلکس۔ اوٹی اِرا نیم  
تعمیر مرکوکوئی و۔ او کوٹیک اسہ وارنے اٹ جوڑ خوارہ ولد ارجلی اودیر خوارہ۔ دوانا اسہ جوانو  
ٹینکی سس خوانک۔ درگہ تا ہم سڑانے او بدل خوانک۔ پنچ فٹ والا دیوالاک ہم بڑز خوارہ۔  
دافتے آن پدشاری سس مریرہ تو شاری وچوچ کروئی تمک نے۔ دامشی آدلاک کارہ  
فرج بریک۔ داچُنکا گیس او بار نا پانک ختم مریرہ چھولا او سلنڈر بریک۔ دارف او  
نُخاریک تُویرہ الماریک بریرہ۔ چُنا تا اسکول نا پیسہ غاک اوفتا خرچہ غاک دا کل خالص  
پیسہ اٹ مریرہ دا بھلوزر سس دیرہ نے آن۔ داڑے پین آف تو چُناک نا ناختنا مونا ٹو۔

پیسہ کس کٹہ تو اسے بخش کس تاختی سوری سے کن جمع تو کنگ کیسہ۔ پین ہیت ای کنگ خواہرہ۔ کنے انت کس جوان انت کس خراب لگا کہ ای تینا حقے ادا کریٹ نے پارٹ داسانی اونا زایفہ تینا فیصلہ تے تینٹ کبہ۔ غلام اللہ نادا سنجیدہ اور است انگاپتا تے آن گڈ اکبر خاموشی اٹ کاٹم شیف کرے۔ دوانا ہڑتو ماہلمک ناوڑ ناڈپوکا تو لوک دیرے سیل کریر ولدہ بش مٹر اور اتے کن سر ہلکر۔

شام تو اکبر نعیمہ غلام اللہ نا کرو کا پتا تے آن سئی کرے تو نعیمہ ہے الو غلام اللہ ناریشہ کوی۔ اسٹ تو او مالو آن اکبر نا ایلیم او او فچا پتا تے آن بیزاری اس۔ داسا اودا جاہلاتے انگ نا فیصلہ تے کرے تو او ولد او نا سادہ انگا ر غے پچنگ شروع کریر۔ دوئی آ طنر ناقطرہ شاعسا بائے چوٹ کر سا پارے

”بس نی ہندن ہندا اوڑ ایلیم او دا خلق نامتا تے ٹی عمرے گد ریف۔ انسان پیسہ کس جوڑ کیک جوانوز ندسے کن۔ تینا پھوکا زندے آگڑی کنگ کن ولے نی۔۔“ داخہ پانگان گڈ نعیمہ چپ کرے۔ اکبر ہم جواب ٹی چچ پاتو۔

اسہ گڈ زایفہ نا پتا ک اونا ضد اس ایلو کنڈا بھلا ایلیم نا ہننا مشورہ خاک اُس۔ دا کہ چتا تا مستقبل ناغم ایکہ ایلیمے انگ ناویل۔ اکبر ہر نیمہ غان پریشان او سرگرڈان اس۔ ہندا گپ او ہندا مشورہ تون ٹوئس پین گد رینگا تو آخر اکبر زایفہ نا فیصلہ غا راضی مس او شار آ انگ نا تیاری تے شروع کرے۔ بچا تے بھلا ایلیمے تس کہ نی سنبھال تا او ہیٹ او میٹل تے تینا خلق نا کھر ٹی شاعہ۔ ایلیمک ہم پین بھاز ہیت کتور او جوان پُہہ اُس کہ نعیمہ اودے داسا داڑے الپک۔ دا ہم اللہ نا شکر اس او شش سال داڑے گد ریف نہ تو او اویکو سال ٹی ننا ایلیمے پلا کہ۔

اکبر تینا خاسپر تا ٹمک اٹ نوشکی نا اُراتے جوڑ کنگ نا کاریے شروع کرے۔ دیوال بڑز مس۔ کوٹیک جوڑ مسر۔ بجلی نا تار اُراتا وارنگ، ٹینکی اودیرنا بندوبست کننگ۔ ضرورت نا گڑاک ہلنگار او ایلو سلوکا کاریک ہم مرسا اُسُر کہ اکبر داد محمد ناٹریکٹرے او فیروز نا ڈاٹسنے کرایہ کرے۔ اُرا نا کل ضروری آسامانٹے ٹیلہ ٹی لوڈ کرنے۔ ایلم او نشاتے رخصت کر ساتینا چتا تون ڈاٹسن ناسیٹ آسوار مس اوسر ہلک شارکن۔

اکبر نا انگ آن گد غلام اللہ حمد اللہ اوسمیع اللہ اُراتا مونا مجلس کر سا اُسُر کہ حمد اللہ تینا بھلا نشارے مخاطب کر سا پارے ”نشار! ای اولیکو دے پاریٹ دا خواندہ غا باجی نن تون اُسہ دے کس اڈکپک۔“

داکان سمیع اللہ نا زایفہ ہیٹ کس کرے ”جوان مس انا۔ دا ہڑدے ہڑدے نا شر اتیان نا جان چٹا۔“

غلام اللہ نا بھلا مسر تینا کٹ آتو لوک ہموکا توارے کرے ”نعیمہ نا خلق او نا بند غاتے آن اولیکو دے آن خوش الو۔ چڑاکنے پاریکہ دا نمازند نسے۔ داخہ بے رنگو دنیا ای ہچ تینا زنداٹ خنٹ۔“

غلام اللہ چلم نا کش کس ہلسا ”ایکان امر کس۔ بس خیال کیرے داہتاک اکبر نا خف آسُر مفس۔ ای خواپرہ او تینا زایفہ نا گندی تے آن واقف مرے او اونا اُسٹ خراب مرے۔“

اونا جواب ٹی زایفہ تا ورندی تس ”ننے پین کاریم اف۔ کار ہموگ اکبر نا خیراٹ شارنا دیرے گنیر چپ کیر۔“

حمد اللہ ایرانی ناپیالے دُغار آتخسا ”داچُنا تا خوانگ ناکل گپاک دروغ  
اُسَر اونا اصل مقصد تینا اُمّہ غان خوک مُتنگ اس۔“

پُوسکُنا اُراتا جوڑ مُتنگ چُخکا ایڑ او ایلُم ناموجودگی بھلا ایلُم اونشاتا انگ بتنگ  
شارنا تہو اُمّہ غان خوک غلام اللہ او ہجر اتا تا مڑی داکل خوشیک نعیمہ نارنگ اولجہ زہیا او  
شاداڑ سا سُر۔ مَنہ دے ٹی خلقی آ نعیمہ خلق نا گودی آن انا شارنا باجی مَس۔ اکبر تینا ایلُم او  
تینا خاک نامڑی آن ناشاد او پریشان تو اس ولے زانیفہ اگہ اَرغ نادو آن خوش مرے تو  
او ہراڑے اَرغے مونجا الک۔

اکبر نا زندہم شارنا رسم اودود آ تاوڑٹ زو بدل مَس۔ صُحب تون وختی بَش مَسکہ  
داش نا اَرغ او ملائی ٹی نیاری کریک۔ استری آپچا تے لُخ ٹی کریکہ او بازار کن راہی  
مَسکہ۔ بازار ٹی عاقل خان نادکان ٹی عاقل خان اودے وڑوڑنا سر حالاتے آ مجلس تسکہ۔  
شارنا گپ او کارو بارنا پتاک مَسُرہ۔ دوست آ تون ملاقات مَسکہ۔ چاشت نا وختا وخت  
نَس عاقل خان ناماس آن سبزی نَس ارفکہ یا وخت نَس سُو نَس ہلککہ اودکان نا چوٹو تون اُرا  
کن مُون تسکہ۔ جندتا ہموڑے عاقل خان نادکان ٹی چاکش کریکہ او عاقل خان آن  
پنت او نصیحت ہلککہ۔ اَرغ نا وخت خوک مَسکہ تو بازار آن دیتخہ فروٹ ہلککہ او کرا کرا سر  
ہلککہ اُرا کن۔ ارغان گڈ دیتخہ آرام کریکہ اودے دیگر ایش مَسکہ او ولد بازار کن رُم  
کریکہ۔ شروع شروع ٹی اودے بازار نا انگ وڑتو کہ ولے دا تو شارنا دوداس کہ اُرا نا  
نزینہ غاک صُحب تون ضرور بازار آ حاضری نَس ایترہ۔ ہموڑٹ شام کن گڑاس ہلککہ او  
مجلسے تینا کریکہ اودکان تا بند متنگ تون چُنا تے کن گام کریکہ۔ شام تو خاسپک تینٹ سالم  
نا مجلس آبشُرہ۔ ہموڑے ایڑ نا اُرا ٹی اَرغ کنگرہ۔ ٹی وی ہر ارہ۔ او ٹی وی ہر سا ہر سا  
سالے کارو بار کنگ نا مشورہ تشرہ۔



اسے دے ماسٹر صاحب (نعیمہ ناایلم) نا اُرا ٹی شام کن کدو بیٹ کریئر۔  
ماسٹر نے وا کدو آن بد بسکے۔ زرس سوچ خلنگان گڈ ایڑ نا اُرا غاسا لمے مشورہ تنگ نا  
نیون اٹ سر کرے تینے۔

سالم نا اُرا ٹی بینڈی کریئر۔ جوان بینڈی تے آن سیر پھڈ مس تو ارغان گڈ  
تینا معتبر انگ انداز اٹ سا لمے مشورہ تر سا پارے ”اکبر جان! ای استو بھاز سوچ خلنگٹ  
کہ نے کن ہراوڑ نا کاروبار جوان مرو۔ آخر کنا ذہن ٹی کاروبار بس ہرانے کن بھاز  
فائدہ مند مرو۔ بس اونا شروع کنگ کن نے توں ہموخہ پیسہ مرے۔ نے سائے ننادا بے  
عقل انگ مخلوق لکھ نا کاروبار بس شروع کے تو وہ لکھ نا فائدہ خوانک۔ کاروبار نا اصول  
دادے کہ اتھ پیسہ شاغس ہموخس بریک۔ داڈ غار نا مثال ٹی اُخس دانہ کڈ کر لیس  
ہموخہ بوج خڑو۔ ننادا اشار ٹی داوختا جوان انگ کاروبار کنا نظر ٹی پر چون نا کاروبارے۔  
پر چون نا دکان بس مرے۔ اودکان نا شروع ٹی کم از کم وہ لکھ نا سامان بس تحنگہ۔ ولد امنہ تو  
کن دا پیسہ غاک بند تو مریرہ ولے منہ تو آن گڈ نی بس تماشہ سئل کردا دکان امرنے  
کن پیسہ مچ کیک۔۔“

ماسٹر صاحب نا ہیئت دا اسکان کٹو سس کہ نعیمہ ایلم نا مشورہ غان متاثر مرسا  
اکبرے ماسٹر صاحب نا ذہانت نا توں اوار تینا ہوشیاری نا ثبوت تر سا پارے ”بلکل ایلم“  
کنا ذہن ٹی ہم ہند اس کہ دا علاقہ ٹی پر چون نا دکانک بھاز کامیاب مریرہ۔

ماسٹر صاحب ولد اتینا پیسے شروع کرے ”جی ایڑ! بھلو فائدہ بس ارے دا کاریم  
ٹی ولے دا کاریم کن اکبر نا چند نامتنگ چٹ ضروری ہے۔ اگہ اوسعودی نا کاریسے انگ  
کپک تو ہند نو بند غ بس دکان ٹی سلفہ ہرا تینا رزق توں نما ہم خیر خواہ مرے۔“

ماسٹر ناگپاتے آن اکبر نادماغ ٹی سوال کس ودی مس۔ ”ماسٹر! بازار ٹی نظر شاعس تو پر چون نادکانک چٹ بھارو، اوقاتا جمائیگو کا دکانتے ٹی ننادا پوسکنا دکان کاریم کرو؟“۔

ماسٹر صاحب یکدم ورنیدی تس ”بلکل اکبر جان! نادکان بھار جوانی اٹ چلینگو اوداڑ کن کل آن بھلا فاندہ نے ناڈاک ناکنڈاں رسینگو۔ کنا خیال پانک اوڑے دا وختا پیست اُرا آن زیادہ ہندو اُرامرور ہر اوقاتا بندغا ک پیشن نامکاتے ٹی کاریم کنگو۔ نے تون درستی راستی ناوجہ غان اوکل نادکان آن تینا کھاتہ غاتے ملور۔ دوانا داڑے اٹھ سیال اوعزیزو۔ کنا اٹھ دوست و قریب۔ نا اُخس درستی ودا کل نادکان آبرور۔ دافتے آن بیدس ایلو بندغا ک نادکانے خنور نے کن رم کرو“۔

آخر ماسٹر صاحب نا مشورہ اکبرے دوست بس او ماسٹرے جواب ترسا پارے ”ناہیت اوگپاک کنے پسند بئر۔ بس ای منہ دے سوچ خلیو تو ولدانے تون دکان ناباروٹ پین مشورہ ہلوٹ“۔

ماسٹر صاحب فخری ویشند ہس کرے او اُست ٹی خوش مس کہ سالے کنا کروکا پیناک دوست بئر۔ بینڈی نابدلہ زوتنگہ۔

ماسٹر صاحب آن پد ہر اتم نعیمہ نا واپڈ او الا ایلم سئی مس کہ سالم کاروبار کس کنگہ تو فوراً شام نا وختا ایڈنا اُرا غاسر کرتینے۔ ایلم نابنگ آن ایڈ اُرخ اٹ کلٹو نا سوہلے۔ او آچار گوشت او برنج آتے ایلم کن بیٹ کرے۔ اُرخ مس تو اُرخ آن گڈ فروٹ نا طشیاک بئر۔ فروٹ آتے کنگان گڈ داسا ایلم ناہوشا بس کہ سالے کاروبار کن مشورہ ہم تروئیے۔ کاروبار نا سوچ کنگ نا جواب ٹی ہرا وخت اکبر اودے ماسٹر صاحب نا مشورہ

غان سئی کرے تو دا ایلیم تینا بازار او عزتے بڑز کنگ کن یکدم ماسٹرنا پارو کا کاروبارے رد  
 کرفہ اودو تے ٹٹو پیپر آخسکسا جواب تس ”اکبر جان! نی او ماسٹر ہڑ تو ماک سادہ و بندغ  
 ہرے۔ کنے سمائے پر چون نا کاروبار ٹی بچت ارے ولے دا کاروبارنا شروع کنگ کن  
 اسے جو انو دکان سے ناتخنک کن نے کم از کم پانزدہ لکھ رپی ناضورت تمک۔ دکان نا  
 رُوب او ناپن شروع ٹی بڑز امس تو او فتاحیات بڑز سلیک اگہ شروع ٹی مخلوق دکان آن  
 گڑاتے آن متاثر متو ولدا اتس کوشش کنگہ بچ مفک۔ او وڑ ہرس تو ملا خیر محمدے ہم  
 پر چون نا دکان کس ارے دے دے مچ گڑتے آن ہیٹل بال ایٹک۔ اے نما ڈاک والا  
 شیروے ہم دکان کس ارے۔ دکان نا سامانتے آن زیادہ او نا طول ناوز نا کو۔ دکان تخنک  
 نا مقصد ا ف ارا گونی گڑ ارا تیلو رامنہ تیل کس خنی شکر منہ ڈبہ صرف او اسے اسٹول کس  
 تخ زونڈ۔ پر چون نا کاروبار ٹی بھلو پیسہ کس بند کروئی تمک دو نا بھلو سگ او طویلو انتظار کس  
 کروئی مریک۔ او دا ارا گڑا غان اسے گڑ اس نے تون اف۔ نی ماسٹر والا کاروبارے ذہن  
 آن کش۔ ای نے کن اسے جو انو نا وڑ نا کاریم کس سوچاٹ۔ نی دہ سال آن زیاتے  
 سعودی ٹی ڈرائیوری کنگ اُس۔ گاڑی تا باروٹ معلومات ہم ارے نے۔ داڑن بیدس  
 کنا اسے سنگت سے عزت اللہ او ہندا گاڑی تا کاریے کیک۔ نی اوڑ تون او ار مر ولدا  
 ہڑ تو ماک او ار گاڑی ہلبو سودا کبو۔ گاڑی نا دھنوکا رو بائسے کہ ہر ادور مرے ہر اسال مرے  
 امر و حالت مریر ہر بندغے گاڑی ضرورت مریک۔ ہر ارا خواجہ گاڑی کس خوانک۔ نی او  
 عزت اللہ ویش افغانستان آن گاڑی بنگو او داڑے بہا کبو۔ ہر گاڑی آنے کم تمہ چل  
 ہزار جوانی اٹ تمک او دا چتکو رقم کس افک۔ دا کاروبار اٹ نما جند ہم گاڑی نا محتاج  
 مفیرے ہڑ تو جتا و گاڑی سے ٹی سوار مرچلیف۔۔۔“ ایلیم نا دا گاڑی والا ہیٹ انیمہ ناخن

ٹی یکدم پیٹھو صاف اوگاڑی کس بس ہرائی اوتینا چٹا تون سوار چکر خلسہ کس۔ ماسٹر والا  
بیٹا تے گیرام کرساز وزوتینارائے کس

”دادا سا جوانو کاریم کسے نہ تاوان ناخوف نئے پین خواری۔ ای تو پاوہ نے کن  
ہندا کاریم چٹ جوائے۔“

ایڑا وایلم تامشورہ اوپیتا تانیام اٹ اکبر مسکین معصوم آچناغان باروار کس دا ایلم نا  
پیتے ارفیکہ وار کس ایلو ایلم نا۔ آخر دا ایلمے ہموڑا و جواب کس کس ”نا پاروکا کاروبار تو واقعی  
پرچون نا کاروبار آن جوان لگک۔ خیر ای تینا کنڈان سوچ خلیو ولد ادا باروٹ نے تو  
مزید گپ کروٹ۔“

واپڈا والا ہم کامیابی نا بخشندہ کس کرے کہ سالم کنا پاروکا کاروبارے پسند کرے اور خصت  
کر سا خوشی خوشی سر ہلک اراکن۔

اسہ دے عاقل خان نادکان ٹی تو لوک اکبر او نا ایلم تامشورہ عاتے عاقل خان  
ئے سئی کرے تو عاقل خان آڈ غار گٹھ۔ زوزو چوٹوئے تینا گرسی آزونڈ فے او اسٹولے  
اکبر نامو نا خلک او نظر کس دکان آن پیشن ہرا۔ نظر نا اڑ سنگ تون اسہ جگئی و مخنگ کس خلسا  
اکبرے پارے

”چٹ سادہ اس سالم! ہندو ارا بندغ آن مشورہ ہلکنس اسٹ اسکول ناچار  
دیواری آن پیشن دنیا نا اسہ گڑاس جھننے تو ایلو بجلی ناتار تے آن بیدس اسہ گڑاس پتیک۔  
کاروبار نا سوچ کروئی کس نے تو کئے آن سوچ کروس کہ کاروباری و بندغ کسے اٹ۔ پانزدہ  
سال آن ہندا بازار او ہندا کاروبار تانیام ٹی زندگدریفینٹ۔ داڑے نئے پرچون نا کاروبار  
جوانے نئے گاڑی تا۔ پرچون نا کاروبار نا پاو تو کنا پھل دنا عرب نامون انگانیک انگا

بندغاک افس کہ توج وام دیر او آخر ٹی ناحق ادا کیر۔ نہ کننا پھل نہ۔ داہمو بندغا کو ہر اچھا سال وام درو رو لے رپ پی کس تفرور۔ دوانا ناوڑا نگا بندغاک سیالی او ہمسایہ داری ناخستہ کن وام تنگ آن انکار ہم کپسہ او منہ سال اٹ برباد مریرہ۔ حاجی نصرت منہ سال مُست پر چون نادکان کس ملا۔ سیال او بیگانہ ہر بندغ کن کھاتہ ملاوام تس ولے آخر آچل پنجا ہزار نا سامان وام درو کاک ہزار پانزدہ صداٹ تینا وامتہ خلاص کریرہ۔ بچت او فائدہ بھاز مرنا ہیئت کسے داسیالاک ہندو تواتان کس ایتور نے کہ زندج ماسٹرے پٹوس۔ سلیس گاڑی نا کاروبار تو ویش او افغانستان نا کسرے دے پٹک۔ ہر بندغ تین کن تینٹ ہمیکان گاڑی ہتیک او داڑے چلیفک۔ دادہ او پست ہزار نارنداٹ ناتینا وختہ ضائع کر نہ تینا پیسہ غاتے۔ اگہ واقعی کاروبار کتنگ خواستہ تو ای نے اسہ کاریم کسے ناپا وہ۔ بس ولد اسم اللہ کرے۔ اکبر بیوس خاصہر تا دو آن ہفت حیران کس کہ دا انت قصہ منگہ۔ ہر ایلیم جتاو کاروبار کس پانک۔ او ہر ایلیم ایلو ایلیم نا کاروبارے ہندن بیان کیک کہ اُسٹ خوف آن تہہ ٹی لڑک۔ کپ خدا اشارے سرگر دان کرے الا ننے۔ عاجزا نگا طبیعت او بیوس انگا لہجہ ٹی عاقل خان نا گنوک انگا خستہ ٹی ہر سا سوچ کرے ”گرانی تینا مشورہ ئے ایت۔ اودے ہم خفتورن؟“۔

عاقل خان، داسیاست دان او سخت سر انگا بندغ تینا دکان نا سڑوک انگا مرچاتے کسے مفت تفک او واہراڑے دُہن آسانی او مفت اٹ تینا لکھ آتا مشورہ ئے تسکہ۔ یکدم پیٹے اڑسا پارے ”کننا پھل“ دا گپاک داڑے مفسہ۔ داسا کننا ہوش دانگ آن گراک آتو نے اینگان نیتون مرے دُن مجلس مزہ کپک۔ ای شام تون ہموڑے نا ماس آبرو اولد اہموڑے دانا ذی آگپ مریک۔“۔

اکبر بیوس اس ”مرے جوان“ پارسا بش مَس اوسر ہلک اُر اکن۔

اونا اننگان گڈ عاقل خان اسٹول آن بش مَس او چلا کی وُ بختدہ کس کرسا تین  
توں پارے ”ماسٹر او اے واپڈا والا نامشورہ غاتے پتنگ کن سُو او برنج کیسہ۔ ننامشورہ  
غاتے ننادکان ناچاتے اٹ خواسہ دُہن امر مریک وا“۔

شام نا بیدیر او برنجاک داسکان تیار متوسر کہ عاقل خان ناموٹر سائیکل نا پڑہ  
مَس۔ زرس دنیا ئی وُ مجلس کننگان گڈ ارغاک بُسُر۔ پلیٹ آک سنت نامطابق صاف  
کننگار۔ سُوک چونڈ نگار۔ برنجاتا نیمہ کننگا نیمہ سوتا وجہ غان بیدیری مَس۔ بوتل ملنگا۔  
بوتل آن گڈ عاقل خان گاڑیہ کس خلک۔ پڑزونک ترشا غنگا۔ فروٹ آک بُسُر۔ فروٹ  
آک کننگار تو فوراً سبز چانا پانگا۔ عاقل خان چاہ ناسخت شوقی اس۔ تانکہ چاہ ناپیالہ اونا  
مونا پُر تخوک مفروس او ہیئت کننگ کتوک۔ چاتا بتنگ تون داسا عاقل خان ایڑاوسالم نا  
حاضری ٹی تینا بھلنی اودانائی نا بھوتے ترسا پیتے شروع کرے۔

”کنا پھل! نی کل آن مست داپانے تون بینک اٹ داوختا آتھ پیسہ مرو؟“۔

اکبر حیران مَس دادے انت بلا خلک زایفہ نامونا دُہن سوال کیک۔ پیتے  
چپ ترسا جواب ٹی سوال کس کرسا سوچ کرے ”نی اسہ وار تینا کاروبار نا پاگڑا ای نے  
پاودہ کہ اخس ارے یانہ؟“۔

عاقل خان ہراکا دُہن واڑو مناکہ اونا بھلا مقصد اکبر نا خزانہ ے تول کننگ  
اس۔ ”نی تینا بجھے پاگڑا ای نے پاودہ؟“۔

اکبر پُہ مَس داجاہل ضد آتسے دُہن کنے الپک ”شش لکھ مروے“ دروغ  
ترسا پارے۔ حالانکہ اونا اکاونٹ ٹی پانزدہ لکھ اُسُر۔

”شش لکھ‘ شش لکھ اٹ دا کاروبار تو مریک ولے اوخس جوان مفک۔ لیکن

شروعات کن جوانے۔ دا کاریم ارے شاپنگ سینٹر نائے۔۔۔۔۔“ شاپنگ سینٹر نا لفظ  
توں نعیمہ ناخنک چراغ آن بار روشن مَسر۔ شاپنگ سینٹر یعنی زالبولی آگڑاک۔ نن  
شاپنگ سینٹر کس ملان تو زالبولاتے ٹی داگپ عام مریک کہ باجی نعیمہ شاپنگ سینٹر کس  
ارے۔ او ای تینا پسندنا ہر گڑا ارفنگ کروٹ۔ نعیمہ ہندا خیالاتے ٹی ڈب ہلکوس کہ  
عقل خان تینا پیتے برجہ تحسا پارے

”شاپنگ سینٹر آک دا شارٹی داوختا بھاز چلنگرہ‘ او ہرا شاپنگ ملنگا نے  
کامیاب مَسے۔ تاوان نا تو ہیج سوال ودی مفک۔ نی تینا شاپنگ کن کراچی آن سامان  
ہت او داڑے اگہ مناسبو قیمت نَسے اٹ بہا کیس تاہم نی ہیج نقصان خیروس۔ داڑے  
اسکول آتے ٹی داخہ مَسر خوانپسہ اَنخس شاپنگ آتے آن شاپنگ کیرہ۔ اَنت پاسہ گڑا؟“  
اکبر کاٹھے سرفسا ”داہم جوانو مشورہ نَسے۔ کنے پین سنگت کس ہم اَسہ وار  
شاپنگ سینٹر نا مشورہ تس۔ خیر گڑا داسا بھاز وخت پوک کپن زوزو کار یسے شروع کین۔ نی  
بھلو دکان کس پٹ۔ اَسہ ذمہ دارو چالا کو بندغ کس ہر او اوڑتون او ار شاپنگ نا سامانتے  
بٹلف۔ کنافیراغان چٹ کم بچانے ای ہفتہ سے آن گڈ سعودی کن کاوہ۔ ایڑے فیزارے  
تینا خلیوہ۔ مَنہ وام دارو او فنتے آن پیسہ غاتے تینا ہلیو اگڑا ولد ابر یوہ۔ او وخت اسکان دا  
اُرا او کاروبار ہڑتو تا تازمہ دارنی اُس۔“

عقل خان سر سہی نا بشندہ کس کرے خوشی آن پیالہ ئے چاہ آن پُر کرسا ”نی  
چٹ پُٹا کس۔ نی بس پیسہ غاتے کنے آسر کرولدانے کاریم آف۔ نا واپس بنگ اسکان دا  
شاپنگ سینٹر ئے ای اَسہ مثال کس جوڑ کیوہ۔“

اکبر شاپنگ ناز ر آتے عاقل خان ے تنزگان گڈ غلام اللہ ے تینا انگ ناسی  
کرے تو اونا رخصت کن گل ایلمک تینے سر کریر۔ اوقا مرنزگان بیدس اوقا مہر اومجبت ٹی  
چو کی کس ہم بتوس۔

غلام اللہ کس تابننگان نعیمہ تینا مونے ترشہ غا۔ فقط دروغ نا تبسم اونا بنا مہرے  
قائم تہ کہ اکبر پھہ مف کہ ای اونا جاہل انگ ایلمتے تینا ارا غا روادار اف۔ اکبر ایلمتے آن  
بھاز گلہ کرے کہ اونا شار آبننگان گڈ خلق آن کس اونا ارا غا بتو۔ کس اونا سوچ آبتو۔ عاقل  
خان ملک اوسا ہدارتا نیمونے کرسا ایلم نا گلہ ے مر کرے۔ حالانکہ اصل وجہ دا اس او  
ایلمک جوان چائسرہ کہ اوقا انگ نعیمہ ے دوست بفک۔ گڑا ائے تینا عزت او استاتے  
خرب کنگ کن اونا ارا غا کان۔ اکبر نا انگان گڈ ایلمک غڈ و آ ماتے تا ارا رادروت ہلسا  
تینا خلق کن سر ہلکر۔

نعیمہ نا چڑکا ایلم او ایڑ اکبر نا انگان ارادے گڈ تینا بستہ او کمبل آتے بڈ کریر او  
ایڑ نا ارا ٹی پترینگار۔ ہرانا اصل وجہ دا اس کہ او ہڑتو ماتے اے چڑکا کوٹی تے ٹی جاگہ  
الو۔ اسے عمر کس او ایڑ او ایلم دالان ٹی چاچگان وختے گدریفیسر۔ ارا نامسہ کوٹی اسر۔  
اسے عاقل خان قبضہ کریس۔ اسٹ ماسٹر نا اس اسٹ واپڈ او الانا۔ لمہ تا ہموڑے  
اوفتے تون دالان ٹی خاچا کہ۔ نعیمہ بھاز منت اوزاری کریتہ وے او خلیس آن بتو  
کہ دہن مف کنا انگان گڈ نشاک کنے دوانا ارا ٹی اپرور۔ اکبر ے نعیمہ سئی کریس  
کہ اوشام انتا تینا خلیک تو ہندا خاطر ان چڑکا ایلم تا اوفتے تون رہینگ۔ ہراڑن اکبر  
بھاز خوش اس۔ او ایلم آن بغیر بھلا ایلمک ہم ہر اسے ارادے نا ذی ایڑ نا دعوتے  
کننگ کن بڑہ۔ عاقل خان فقط ہمودے ایڑ نا ارا غا انا کہ ہرادے ایڑ کن اونا ماس



آن سبزی اپنروس۔ اوپہ مسکہ ایڈ اینوسو کرینے۔ نعیمہ نائمہ مسرٹ ناخننگ کن بسکہ ولے ارغان پدرخصت کریکہ اناکہ۔ دافتنے آن بیدس نعیمہ ناہمسٹک ہر اتم بٹرہ تو مٹھائی شنگر کیک او سوسہ تخنگا کہ۔ شاپنگ سینٹر آن مفت ناشاپنگ مسکہ۔ نعیمہ تین تو اوارتینا ایڈ کن وڑ وڑ ناچچ او بنگڑی ہلکہ۔ اکبر ناغیر موجودگی ٹی جوان عیش او عیاشی اس۔ اوہرا گڑا کن اکبر خلقے الاہرا گڑا نا نیمون اٹ نعیمہ نوشکی آ بس او گڑا نا کسے ہوش الو نئے نعیمہ نئے نئے اونا امو ایڈے ہرا وڑتون اور ہمو اڑائی اس۔ او گڑا چٹا تا خواننگ نس۔ چٹاک اسہ دے اسکول آ اناہر ارادے انتورہ۔ اوفقا خواننگ نا کسے پرواہ الو۔ نعیمہ ہندا گڑا غان خوش نس کہ کنا چٹاک شار ٹی خوانرہ۔ انت خوانرہ اتخس خوانرہ دا گڑا تون اودے کاریم الو۔

اکبر نا واپس بنگک اونا فیزاوام دار آ تا انکار نا وجہ غان تا خیر مس۔ شروع نا ٹوٹی اوہر ٹو ارا کن بیست ہزار رپئی راہی کریکہ۔ دونا نا خرچہ غاک بھاز مسر تو سی ہزار راہی کر سا کرے۔ آخر ارا نا خرچہ چل ہزار آ بس تو اکبر نعیمہ غان چل ہزار نا حسابے خوانس۔ ہرانا جواب ٹی نعیمہ تینا خاسپر آتے رسوا کنگ کن اوفقا عزتے کم کنگ کن دروغ تر سا پارے ”دا چل ہزار نا نیمہ تو نا ایلمتے آخرچ مریک۔ ہر ہفتہ اسٹ نس تا تینا چٹا تون بریک او ہفتہ نس اڈ کیک۔ کنے مجبوراً اوفقا خذ متے کروئی مریک دونے فی ناراض مریسہ“۔ اصل اٹ اکبر نا اننگان پد خلق آن اسہ بندغ نس ہم نعیمہ نا ارا غا بتوس۔

ہرا کہ اصلی حساب نس او اکبرے تنگتو کہ۔ میمہ پیسہ غاتے تینا ایلمتے کن کباب کریٹ۔ تین کن پچ ٹسٹ۔ لمہے خرچہ ٹسٹ۔ ہمسن تے کن دعوت کریٹ۔ فضول خرچی کریٹ۔ دا گڑا تے اوپا تو کہ۔

اسٹ تو خلقے الٹنگ نا پشوانی۔ ایلو دا فضول نا خرچہ غاک۔ مُسٹیکو پردیس نا خواری۔ چار میکو مستقبل ناغم۔ دا کل گڑا تے آن اکبر نا پریشانیک دے پدے آن وڈھسا اُسّر

وخت کس کہ بھاز انگا سوچا تے آن بھاز پریشان مسکہ تو خلق آ غلام اللہ تون ہیئت کر یکہ۔ اوڑن سوچ کر یکہ امر کنا چناتے آ اناس امر اُسّر۔ شاپنکسیئر امر اس۔ خلق والاک امر۔ ملکاک امر۔ تو غلام اللہ دروغ تڑسا جواب تسکہ ”منہ دے مر یک کئے شار آن بٹ۔ غڈوک نا جوان اُسّر۔ چڑا بس خوانارہ۔ دکان نا ہم جوان اس۔ عاقل خان ٹیٹ سنبجالا سس تا“ واد اپناتے بتگان اکبر نا اُسّت مچہ خوش مسکہ اوسکون کس ملاکتہ کہ ایلیم تون ہیئت مس۔

دانیام اٹ یک او نیم سال گدرینگا۔ اکبر سعودی ٹی خوار تموک خواری کشاکہ۔ اُرانا خرچہ غاک۔ ایکاتینا چند نا خرچاک۔ فیہر غاتا مسئلہ غاک۔ پردیس ٹی کاریم ناعلت۔ ہر کند ان ناشاد او حیران اس۔ دا ویلاتے ٹی اُسّتے باش کنگ کن تینا خلقے یاد کر یکہ۔ فصلاتے ماراکہ۔ ایلیم تا مہر آتے یاد کر یکہ۔ اے وختے یاد کر یکہ کہ تونادہ ہزار نعیمہ اوچناتے اٹ کٹورہ۔ تیرمہ مچ کویک گلو او کوٹخ غاتے آن پُر اُسّر۔ چلہ مچ لاند او تریت اس۔ ہموزند عجوزند کس اس۔ بچاک اُسّر۔ بچک اُسّر۔ ریکاک اُسّر۔ خلق کس مجلساک اُسّر۔ نئے پیسہ نا ہیئت کس نئے پیسہ نا پریشانی۔ داسا بس فضولی خرچیکو۔ عمکو پریشانیکو۔

شام نا وخت کس۔ پھر نا ڈبرہ ڈبرہ اس۔ سعودی ناروڈ آک غریب نا کاٹم آن بارچرپ چرپ اُسّر۔ اکبر تینا گاڑی ٹی سوار ٹرپ کس ریاض آڈنگ اس۔ گاڑی نا شیشہ

غاک بُڑا سُر۔ ٹیپ ٹی شاغو کا عالم مسرور ناریل اکبر نادرداتے کم اوز ہیری ے زیات  
کننگ اس۔ واردم آپر دسی تے تو ار کر سیا پاریکہ  
”پردیسی زوبر، ای زہیر اٹ زوبر  
بن دادو حالاک

تنیا تدپسہ دا تو سالاک

پردیسی زوبر، ای زہیر اٹ زوبر۔

داہیتا تے آن دا تو ار آن بتر اودے نعیمہ اوچٹناک تا یا د سُرہ۔ تنیا چٹنا او علاقہ ناسو چاتے ٹی  
ڈب او گاڑی ناسیٹ آمیت آنبار سوار اس ہرانا خنک تو ملوک اُسُر ولے ہچ کس خنکو کہ۔ او  
ہندا سوچ او خیالاتے ٹی آختہ کس کہ مون نا گاڑی بریک کرے تو او بریک ہلنگ کتو او ٹاکہ  
مس گاڑی نا تامون نا گاڑی نا خیر ٹی۔ اے گاڑی نا پٹہ او نا گاڑی نامون ناشیشہ ناکل ٹکر  
اک اکبر نا کاٹم او چہرہ ٹی ڈب انا تو او ہمو جاگہ غاتینا سیٹ آسوار اسہ دم تون ساہ تس۔  
ہریمہ ہر کند قبرستان آن بار خاموش کس بس ٹیپ ٹی شاغو کاریل ہمو وڑ شعر خلک لکھ  
”داجار ہتم ٹی ابا بروے

پردیس آن تنکن ٹیکی ہتوے“

صُحب تون اکبر نا مرگ نا حوال علاقہ غاسر مس تو نعیمہ تون او ارا کبر نا ایلمک کل  
گنوک او جیری مسر۔ ہو غسا فریاد کر سائینے شار آسر کریر۔

اکبر نا میت علاقہ غاسر مس۔ میتے غسل تسر تو جنازہ ے شار ٹی خوانار۔ ولدا  
میت ے ارفیر او خلق آدریر او آخر لحد ے بند کریر۔ قبر ے تاؤم تسر او اکبر ے دنیا نا غمتے  
آن آزاد کریر۔ اکبر نا فاتحہ ے گدریفنگان گڈ نعیمہ شار کن سر ہلک۔

اکبر نامرگ آن شش ٹوگدر یتکتو رکہ نعیمہ او اونا چٹناک چٹ تنیا مسر۔ خاسپک تو مالو آن غصہ اسر۔ ایلمک انارتر۔ ایہن ہم دا خورک انگا رانی داسا اوانت نئے کن اڈ کروسر۔ دا ارانے او امر کریرہ ہرائی نئے سوکس نئے برنج نئے سموسہ۔ چڑا خاموشی اس۔ ہو غنگ اس۔ بیوسی اس۔ لنگڑی اس۔

عاقل خان ہم شاپنگ سینٹرے بہا کرے اوشش لکھنا سامان تا حساب اٹ پنجا ہزار نعیمہ ئے تس او ایلو فتنے تاوان نا پٹ تنیا جیب ٹی خلک اور خصت کرے۔

نعیمہ نامہروانا ایلمک پُہہ مسر کہ داسا ایڑ جنوزان او غریب مسنے۔ داسا او فتنے کن تیارو بوجھس مرک۔ او فتنے آن خرچہ خوانک۔ او فتنے آن مدد خوانک۔ او دادور ٹی بندغ تنیا سیچائے تین تون چادے تختنگ کپک۔ دا ایڑا او اونا چٹاتے امر سنبھالور۔

سال نس متو کہ نعیمہ او چٹناک تا رپی رپی نا محتاج مسر۔ ایلمک او کان انار۔ لمہ تیٹ تنیا نشا تا محتاج اس تنیا مرک کن دعا کر یکہ۔ او بیوس مسر کن انت کس کنگ کر یکہ۔ ہمسک او کا خلتو رہ۔ شاپنگ ہم بند مس۔ اکبر نا جمع کرو کا کل زر اک شاپنگ او اونا سعودی نا وام او اونا فضول انگا خرچہ غائیٹی اناسر۔ اکبر انت انا کہ او فتنے آن زندگی انا۔

اسد دے غلام اللہ ناز ایفہ غلام اللہ ئے اکبر نا ایلمی نا قسم تر سا شمار کن نعیمہ او اونا چٹنا تا ہنگ کن راہی کرے۔ او فتنے خبر تما سس کہ نعیمہ او چٹناک تا سخت بد حالو سخت عذاب ٹی و۔ غلام اللہ کہو کا ایلم ناخستہ کن مجبور مس او اونا نعیمہ او چٹنا تے او ضروری آ سامان تون خلق آپس۔ نشاک او نا گوتی ئے صاف کریر۔ ارانے تا جوڑ کریر۔ کا کا ک ایلم نا چٹاتے سینہ ٹی خلکر۔ منہ دے آن گڈ غلام اللہ بچاتے تا واپس کرے۔ ہیٹ او میل تے تا

کھر آن اڑسا۔ اکبر ناڈ غارتے ہم تینا ڈ غارتون د سنگہ شروع کریر۔ ہر حساب اٹ نعیمہ او  
تینا ایلم نانا زکا ماتا ضرورت آتے پورا کر سا کرے۔ اوفتے زرئس ہم بے باوہ ئی نا  
احساس متنگ کن الیتو۔

اسہ سال ئی نعیمہ او اونا چناتا عزت اورنگ واپس جاگہ غا بس۔ او ہے مُست نا  
بے رنگ آخلق او بے رنگ آ بند غا تا قدر نعیمہ ئے معلوم مس۔

او پُہہ مَس کہ داخلق ناریکا ک مریر لوڈ د انگا دیک مریر دانا سا ہدارک مریر  
کرڑی او شدکا ک مریر کچہ انگا کوٹیک مریر یا کہ اونا سادہ انگا بیوس انگا بند غاک مریر دا مچا  
عمر مچا زند اسہ رنگ ئی و۔ او فک تا قیامت اسہ رنگ اٹ سلور۔ دا شارنا اُرا شارنا بازار  
شارنا حالات، شارنا ایلم، شارنا ایر، شارنا ہمسن، شارنا ہمسرا و شارنا ایلو بند غاتے آن بار  
رنگ بدل کپّہ۔

## پیرہ ناہج

دسمبر نا توئس۔ آسمان ئے جھمرک تینا بغل ئی ہر نیمہ غان گرفت کریسر ہر افتا  
وجہ غان چُج درست متو کہ کہ صُحب نا وختے پیشیم نائے یاد یگرنا۔ داوخت پڑی پڑی کرسہ  
ئس۔ دا پڑیک کہ مَشْتِے آتمارہ تو اسہ نمی و گندئس بش مسکہ اوسکون ئس بشخا کہ۔

پڑی تا سوبان تہو ہم تنخ چکا کہ اود ہنو تیز و پھدینو تہوئس اس کہ سیدھا روے  
سر مسکہ اوحاضری تسکہ۔ ای ہوٹل نا باغچہ ئی سلوک فضل نا انتظارے کنگ اُسٹ۔ ننادو  
نیم تُو نا چھٹیک شروع مسوسراو کئے دنگ کن بنگ اس۔

جوان زرئس پڑی تاشیف تمنگ نا انتظار کنگ آن گڈ آخر فضل بس تو ای زوزو  
ہوٹل نا تہہ ئی رم ئس خلکت اوتینا بیگے ارفیٹ ہرا دے ای مالو آن تیار تخاسٹ اوئسٹ  
فضل تون گاڑی ئی سوار مسٹ۔

داکان مست ہر چھٹی تے آچا نہہ دو نیم تُو نامرو سربا پانزدہ دے نا فضل ہروار  
کنے مئی یا بس ئے ئی مون تسکہ ولے داجار اونا جندے ہم نوشکی کن بروئی ئس تو او بازار  
آن سفر کن دینخہ مالہ اوتینا اراکن پین سوداار فے۔ ای تین کن تینا پسند نامنگ پلی ہلکت

ولدا ہموکان بازار آن سیدھا نوشکی کن سر ہلکن۔ پشیم نا وخت اس تقریباً نن نوشکی آسر  
مسن، نوشکی ناموسم ہم تیخ اس ولے کوئے نا کچ الو۔

اودے ای نوشکی ٹی گدریفیٹ۔ کن تو ہوٹل نا پیسہ غاتے آن شش صد رپی  
نا کچ بچا سر ہرافتے اٹ ای اراکن دیتھ سبزی اوتینا پسند نا گجر ہلکٹ ولدا تینا چنکا ایڑ  
فریزہ کن ناز کو بوٹ ہم ہلکٹ کنے معلوم اس دا پھر ناموسم ٹی نا خلق بھارتخ مریک۔ تو  
فریزہ دا بوٹاتے نت ٹی کرو ہموڑے چوٹ چوٹ مرسا چرینگو ولدا تینا کل آن زیات  
دوست انگا بلہ کن ہم گڑا ہلکٹ۔ انت انت ہلکٹ اوڑ کن ای نمے پارہ دوئے نم تینا بلہ  
غاتے کن ہموڑ و ہلیرے۔

دا کل گڑاتے ای ارفیٹ عیسیٰ چاہ والا مٹی ٹی تینا سیٹ آتخاٹ ہرادے تین کن  
مالو بک کریٹ۔ مٹی نا کرایہ ئے ہم مالو ادا کریٹ دا وختا کنتون شست رپی نا کچ  
بچا س تو نوشکی نا بریانی تازہیری ئے مرکنگ کن فوراً بریانی والا ناخو کا اناٹ او پست  
روپی والا بریانی کس خلکٹ۔

ولدا ہموڑے مٹی ناماسا چکر خلسا تینا خلقی تون گپ او مجلس کرسا وختے تیر  
کریٹ۔ آخر مٹی ہم تیار مس او سر ہلک ڈاک کن۔  
پشیم نا اذانک شروع اسر کہ مٹی ننا اراتا خیر آبریک کرے۔

ای تینا سامان تے ارفیٹ اراٹی پترینگاٹ تولمہ او بلہ پوسکن مٹی نا تو آجک  
مسوسر تو لوک اسر۔ کنے خنگ تون بلہ معصومو بخشندہ کس کرے اوتینا مہرنا کلامے پارسا ”اللہ  
خیرات مسٹ“ او ہڑتو ما دو تے تینا مریفے کنے معلوم اس کہ کنا کاٹم کن مریفینگہ ای سیدھا  
کاٹھے موئی کرسا اونا دو تے ٹی ٹسٹ تو ارامسہ زہیری نادروت ہلک ولدا لہمہ دوے کنا ہلک  
اوا ای ہموڑے مہمانتے آن بار بلہ ناماسا تو سٹ او اوڑ تون مجلس شروع کریٹ۔

لمہ انا پاٹ پیس اسٹوپے لگھے او چا دانے بیٹ کرے۔ بلہ ناشوق شیر چا نا  
 ایرانی کس او کنے سما اس کہ لمہ ے سیاہ چا نا ایرانی دوستے۔ ولے او ہڑتو ماتے معلوم اس  
 کنے بورہ ناشیر چا دوستے ہندا خاطران لمہ زوزو ہٹے بیڑے او بورہ نا چا کس بیٹ کرے۔  
 ای بلہ غان خلق، خلق والا تا، باغچہ نا، مر و تا حالے ہلسہ اسٹ او بلہ کنے حوال  
 تتنگ کس کہ باغچہ ے دا کان مست ہج دیر متنے داسا پھرنا موسے اللہ دیرے بھاز یک۔  
 او کنے نورک نا سانگ نا ہم سئی کرے کہ او نارشتہ خاران والا سے تون مسنے۔ ای فریزہ نا  
 ہر یفیٹ تو پارے ”صبیقہ کس تے آانے“۔

ولد از کس مونجا مر سا کنے حوال کس کہ اسہ دے لمہ نامرو تا کنڈ نا بانا ہلنگہ گیرام  
 کریس صاف تو معلوم مس شکو ارا چوغڑ درینے۔ ہندا خبر تون کنا مون گلو تی مس او تہہ  
 ٹی اُسٹ ٹی تینا مرو تے کن دم کس ارمان کریٹ۔ ولد فریزہ نا حوالے ترسہ پارے کہ  
 ”دے کس چنا تون اسکول آکا ہک او ارادے چھٹی یک انپک“۔

اون حوال آن پدا ی تینا حوالے لتٹ کہ ہوٹل ٹی ننے چڑہ دال کنفرہ چا ہندو  
 ایترہ کہ صفادیر و بس دے اونن خوانفرہ چٹ عذاب کرینونے۔ ثواب ہندا یخا تا کہ چھٹی  
 کس ملک۔ او کان گڈ مچہ لمہ تون مجلس مس تو کنے سئی کرے کہ ”مامانا عطاء اللہ بسنے، فلحال  
 اینگ نوشکی ٹی ے۔ بنگلن ان کہ منہ دے آن گڈ بریک“۔

ای ماما کن بھازز ہیری اسٹ اودا حوالان بھاز خوش مسٹ او ہندا خوشی آن ولدا  
 بلہ کن مون کریٹ کہ کنے خرو د کس ایت، بلہ تینا معصوما بشندہ ے کرسا پارے ”پیٹی ے کنا  
 خوک کر“۔

ای پیٹی ے ماسا تہ پیٹتو تینا مرغنا پیست ٹی دودر سا چابی ے کشا پیٹی ے ملا



اوکنے مچو خرو دس کشتس۔ بلہ نا واحد انگا نواسہ ای اسٹ ہر ادے بلہ مچو خرو دس تسکہ ایلو  
کلے کپو رینگا کہ۔

صُحب تو وختی ای او بلہ باغچہ کن مون کرین۔ بلہ تینا بورا نگا چڑی ناکمک اٹ بنگ  
اس۔ ای بیل کوڈالے گر کر سا اناٹہ۔ باغچہ نا خنگ تون اسہ وار کنا اُسٹ شولنگا کہ اے خڑنا  
باغچہ انا سس خسکو پٹ نس مٹس فقط ہومونہ کری ہر مالوار فیسر تینے ہمو تینا وڑٹ اسر۔  
بلہ ے ہموڑے کری تاشیف آ تولیفٹ او چند کنا ارا بار نو کڑدہ جوڑ کریٹ  
ولدا تسلی تٹ تا کہ داسا ہر صُحب تو اسہ کڑدہ نس تیار کیوہ او جھمر تا بنگ تون تینا بلہ کن  
باغچہ ے ولدا سیوہ۔ کنا ہندا گپ تو بلہ تینا معصوما بشندہ ے کرے اونن زرس ہموڑے  
مجلس کرین ولدا ارا کن مون کرین۔ ناسر متنگ تون لمہ طال چاہیٹ کرے۔

ارادے پین کنا ہندا وڑ بلہ او باغچہ تون گدرینگار۔ صُحب نا باغچہ ے بیرفینہ  
ولدا ارا ٹی مجلس کرینہ۔ بیگہ نا ای او بلہ فریزہ ے ریکا تے آدرینہ۔ بلہ اولیکو خامہ نا خازہ  
انگار ریکا تے آتو سکہ ای او فریزہ وانا ناچٹ بھلا تہو خلوک ے لگانا او ہموڑے جُپ خلکنہ  
خانخورو گوازی کرینہ ولدا فریزہ ے راہی کریٹہ کہ لمہ ے پانن کن چانس کر چاتے ای  
او فریزہ بلہ ناما سا تخانہ پیالہ غاتے مشتے ٹی ڈب تسنہ چاشا غانہ ولدا ہرے اسکان بلہ نن کن  
وخت ناقصہ غاتے کریکہ او ای او فریزہ غور ٹی خف تورینہ۔

جمعہ نادے اس ای جمعہ نماز آن بسٹ تو کن تو او ار جھمر اک ہم آسمان آر سیفیر او  
مچا خلتے سیجا کریر۔ جھمر تا سیجا آس کہ پنگن مراسس ہموخہ زوز وخلق والا کہ تینا گڑاتے  
اراتے ٹی تخسا اسر۔ شام نا اذان آن زرس مُست ہو رہ غاتا تو ار شروع مس۔ گروکا تاخن  
خلنگ نا بنامس۔ ہنگ ہنگ تون یکدم آسمان نا باخو نا باغان بار ملنگا، گڑادہ نو پھر نس  
کرے کہ پٹاک کل دیر مسر بار ناریکا ک پالن پالن نم جوڑ مسراو نا باغچہ نا تیار کروک انگا

کڑدہ غاک دیر آن پر مسر۔ ہر بندغ گلان اس ہر چنا خوش اس ہر کندا خننگ او بشندہ  
غاک اسر۔ بلہ نامعصوم آتبسم اونا جوڑتے آن زرس ہم مرمتوکہ۔

صُحب تو ختی خلق نا چناک پالن آریکا تے آہندن مچ اسر دہنکہ موریناک  
شیراغنے مچ مریر۔ ای بلہ غان اونا بیماری نا ایکسرے کس ارفیٹ مون ٹی تا چکو چٹ کس  
تفیٹ اورم کریٹ چناتے کن کنا اودے ریکا تے آلفوشتی کنگ اٹ گدرینگا۔

داوخت آپراڈ کریس ولے آسمان آجھمراک ساڑی اُسر۔ بخ تینا زوراو  
طاقت ٹی ارفیسس تینے۔ ہج حاجت الودیگر آن گدکس اُراغان پیش تموسس اوایہن ہم  
دا تہارمہ ٹی کس اراگ انوس۔ ای دے آن بارنوپاٹ پر غاٹ ولد اشامٹو اسٹوپ نا  
ماس آن مرمتوٹ۔ بس ہموڑے لمہ اولہ تون مجلس کریٹہ یا بلہ کن تینا اسیشل انگا خوراک  
بسیٹہ (ہمونوشکی آن الوکا گجراتے) اسٹوپ نا استے ٹی ڈم تٹہ ولد اہرے آ کشاٹہ تہ  
چچا تے تہ چاقو ٹی صاف کریٹہ اولہ تے تٹہ۔ گڑا بلہ خلکن خلکن خلاسا کہ او تینا معصوما  
بشندہ تے کرساکنے نیک دعا کریکہ۔

ہندا ڈول منہ دے پین گدرینگا تو اسہ دے صُحب تو ماما عطاء اللہ بس۔ دا ارا  
تاریخ او ارا دے کس کنے ہج معلوم الو۔ ماما عطاء اللہ نابزنگان ای بھاز خوش اسٹ۔ دے  
آن ماما عطاء اللہ تون سنگت اسٹ او شام تو مجلس ناوختا بلہ نازان آسر جہ کریٹہ اونا سنگت  
مٹہ۔ صُحب ناما ماما عطاء اللہ نسک تو شکار کن پشتمارہ تو ای او فتنے تو او اسر ہلکٹہ۔ شام تو ماما  
علی مردان ماما عطاء اللہ نا مجلس آ بسکہ تو ننا اُرا ٹی خننگ، مسخرہ او شوغل نامیلہ لگا کہ۔ اوکل  
گپ کریرہ ای ہموڑے تو لوک بس مخاٹہ او چاکش کریٹہ۔

اسہ دے شام ناہرے اسکان مجلس چکا تو صُحب تو زوراو بد حالی سے اٹ ای  
باسنا کاسی آلیپ تے نج آن تینا ارفیٹ بش مٹہ۔ جھمراک نیام آن سیم مسوسر دے

پہاش کریس ولے تیخ ہمو وڑتینا مدار ٹی اس۔ ہمولڑ زیفوک انگا تھو چکا کہ۔ ماما علی مردان ناشنکی ناما سا جوان پزور وڑتس دیر تنگ اس۔ کنہر فنگ آبلہ کہ دے مونا تو لوک کس پارے ”داما عطاء اللہ ناخوے۔ دادے سال کسے آن زیات ماما نا علی مردان سانبا س۔ اینو داسال لاند کیرہ تہ۔“ لاند نابنگ تون کنا اُسٹ شوطار خلنگہ شروع کرے۔ خوے دیر تنگان گڈ ماما علی مردان شنکی نامبا تڑے۔ ننا خلق ناما لدر ننا ماما علی مردان اس۔ ساہداتا تڑنگ او فٹے سنجانگ داکل گڑا تے ٹی او ماہر اس۔ ایلوک ہم کم بھاز چائسہ ولے اگہ اوساڑی مرو س تو ایلوک تینے پدی کٹارہ۔ خو نا تڑنگان پدای او خلق نا چٹاک خو نا کاس تے کو آن۔ ہنداڑ تون لمہ انا میٹل تا گیر آن بارو ہودش کس، خوے آہنی او بانز کسے ٹی غت تسر، ہودشا آتے ہشدگان گڈ خوے خاخرنا ذی آتخار۔ دا ہودش اک خوے جو تسر۔ خو ناسل خیسن اومون اڑسا تینے ولد خوے شیف کنزگان گڈ اوڑا دیر شاعار ولے داسانت فاندہ اوما لوآن ہشدگاس ولدای او ماما علی مردان بانز کس ہیسن اُرانا نیام آکھڈ کس خٹان او بانزے جب کرین ولدہ ماما ر فے تینا استادی اٹ لاندنا کل ہڈا تے کٹا او لاندے خالص سواو چر پی کس کرے۔ ننے آن پدلمہ لاندے بے او مصالہ کرے، گڈ کسے ٹی پیڑاوشنکی ناتہہ ٹی متا نانج آتختاہ۔ شام نا نماز آن گڈای او ماما لاندے بیرک آن بار بڑز کرین او بانزے درنجانہ ولدہ کوڑا آتے بندغ کسے نا کچ بڑز بانز آتقین تاکہ پشیک لکنگ کپس۔

ماما عطاء اللہ خوشی آن وارد مالاندے ہرا کہ او بانز ٹی پیڑو کا چٹے چیک کریکہ کہ دہن مف چٹ سست مروے۔ تیخ ہم زوراک اس۔ ماماے ہم اُسٹ آرام تنوک۔ بس منہ دے آن گڈ لاند آن چکو چر پی کس ارفیر او ماما نا شام کن بیٹ کریر۔

شام تو ماما علی مردان ہم بس گڑا ای بلہ لمہ او ہڑ تو ماما مک لاندنا جوان مرّہ ے  
 بلکن۔ فریزہ ے لاند دوست الو او ہموڑے گڑ اس کٹنگ او خاچا۔ صُحب تو وختی ای اولمہ  
 لاندے ولد اشیف کرین۔ کنے جوانو کاریم کُس رسیگا سس دے آن لاندے لمہ ناکمک  
 اٹ شیف کریٹہ او شام تو ہڑ۔

چاشت ناپاس اس لمہ اُرانا کاریمتے ٹی اختہ اس۔ ای او بلہ دے مونا تو لوک  
 مجلس کرینہ۔ مجلس انت او تینا ہزاری آتہیج ے بٹسا اللہ اکبر سبحان اللہ خوانا کہ ای او ناسا  
 تو لوک تینا سانیوٹپ ناٹن تے صاف کریٹہ کہ اچانک نصرو (نا خلق نا بجکت) ہُچ کُس  
 معار کر سابس۔ ہُچ لاند والا باز ٹی تھے تو بلہ نا نظر ہُچ آتما او نظر نا تمنگ تون خوشی آن او نا  
 تنک انگا جوڑک کوش ہلکراو چڑی ناکمک اٹ زوزو بش مس او ہُچ ناداپارا یپار آن چکر کُس  
 خلک او ہموڑے تین تو ہرے اسکان خیال کُسے ٹی گم ہشتندہ کرے ولد بس تینا جاگہ غا  
 توس ولے نظر تا ہُچ ٹی خلوک اس۔ نصرو ناک لُچ غاتے ٹی لوڑوک اسر، سموار آن نت  
 سلانگان گڈ او ہم بس ناسا تو س او تیٹ لمہ ے پارے ”گنج بخت! ہمے پوڈری والا شیر  
 چا تاں کیس اسپیشل والا“ او تیٹ تینا ہیئت آ زور آن مخنگ کُس خلک ای ہم وڑتون او ار  
 مخنگ کُس خلک۔ نصرو اولیکو بندغ اس ہر ادے پوڈروالا چا دوست اس۔ اودا پوڈر آتے  
 لمہ ڈھکاسس ہم اوڑکن کہ بغیر اوڑان دافے پین کس کنتوکہ۔

بلہ ناخنک ہُچ ٹی سخت اسر او جندتا خدا چاہنہ ہرا سوچ ٹی گم اس۔ خیر تینا  
 سوچان زکس آزاد مرسانصرو آ مونے کر ساہر یفے ”پوسکن سال آباد متنگہ وانی ہُچ اُرا  
 غایس الہ؟“۔

نصرو آدینکی آناس دان آن ناس کشہ او بائے پُر کر سا جواب تس ”بلہ سال تو

آباد مریک ولے ریک اٹ دهنوخ نُسے اوھوھوھوھو۔۔۔۔۔ او نما دا پُچ بلیف نُس اندا  
خلیس آن ای دا پُچ نُسے کڈن کریٹ ایسٹ کہ دا پُچ زاماروے بگ آن تہل تموے  
جاگس ہینوے اوخ آن جڑ تا کہوے، او تینا ہیٹ نا ختم منگ تون نصر و ولد تینا مخملہ  
خلک او ای ہم اوڑ تون مخمک نُس خلکٹ۔

پُچ نا بلیفی نا پنے بلہ ہندا خدر خوش مس کہ زو زو پست ٹی دو درے او  
خز نو داسپاک نُس کشا او داسپاک نا گرنگا تے ملا او تہہ غان تا پنجا رُپی کشسا نصر و کن  
مریفے۔ نصر و پنچائی نُسے بلہ نادو آن ہندن پلا دنکہ زور اورا نگا شیر چکا شیر نا باغان خزے  
پلے۔ بلہ نصر و تون مسخرہ کر سا پارے

”ای پُچے خناٹ خوش مسٹ کہ نصر و تینا بلہ نا پُچ نا خیا لے تنخانے جوان خوا فینے تا ولے دا تو  
بلیفی آن دُہن نُسے۔“

بلہ نادا گپ آنصر و بھلو مخمک نُس خلک او او نادا مخنگان ثبوت رینگا کہ او بلہ نا پُچ  
نا خاص خذ متے کتنے۔ نصر و نا چاک بسوسر پیالہ نُسے تینا جوان پر کرے او اشتانی اشتانی ارا  
مُسہ کلم آن پد بلہ نا جوابے تس ”بلہ ای کل آن زیات نا پُچ نا خیا لے تنخانٹ ولے نے تینٹ  
سمائے اٹ سال آن ڈکال اس“ نصر و نا ہیٹ کہ ای انتظار اسٹ کہ مخملہ تینا خلے گڑا ای  
ہم ختو ولے بھاز ہو شیار نُس کنگ نا وختا پُچ مختو کہ۔

چا کنگان گڈ لُمہ پلاسٹک نُسے ٹی دیتخہ پوڈر بورہ او چا نا بوچ تھے او نصر و نُس  
تو نصر و بغیر خدا حافظ کر سابس مس او سر ہلک انا۔

ای بلہ نا حکم نا مطابق پُچے باز آن ملاٹ او گیر ٹی یلہ کریٹ۔ دم نُسے گڈ اناٹ  
ماما علی مردان نُسے سئی کریٹ کہ نصر و بلہ نا پُچے پُسنے نی بردیتخہ ہڑ دا و اجوڑ کراوڑ کن۔

ماما ہکدم کن تو بس اواسہ وار بچے جوان سیل کرے نظر آن کشتا ولد ادیراوبے  
کریتہ۔ ولدا کنے پارے ”داسا بور سیر کرے۔ گیر ناباے ہلیس ای کاوہ کنے کاریم  
ارے شام تو بریوہ گڑا۔“

پیشیم آن مست ماماعطاء اللہ شکار آن بس تو نظر تہ بچ آتما۔ بچ نادیدار آن گڈ  
بس اُرائی ولدان کل اوار ارغ کنگن اور ارغ آن پد ماما بچ ناہر یفے تو بلہ بچ اولنرونا  
حوالے لے۔

بیگہ ناپاس نس کہ ولدا پھر شروع مس۔ مروا وکٹراک تینا کڈ آتے کن رم کریر۔  
کنے بلہ رعناما کہ زوزو بچ آجل نس شایہن تو خلق نا ایلوکل بچ آک بغیر جل آتیاں تینا  
گیر اتے ٹی سلوک اسرولے بلہ تینا بچ کن مہر کریکہ دا بچ اودے بھاز دوست اس۔ بس  
اونا خاطر ان ای بچ آجل نس شاناٹ۔ او ولد اشام کن دوانا لاند آن بیٹ کننگا۔

لانڈکنگ آن پد ہڑتو ماما ک ای لمہ او بلہ کل مجلس کر سا اُن کہ ماماعطاء اللہ  
اچانک بچ ناسودائے بلہ تو ن خلسا پارے ”لمہ! دا بچے تینا کنے ایت؟“

ایہن تو لمہ غاک تینا چناتے کن ہر گڑاے قربان کیرہ ولے بلہ بچ اُچاٹس  
دوست اس دانا اندازہ نم داڑان خلنگ کیرے کہ بلہ ہکدم تینا معصوما بشندہ تو انکار  
کر سا پارے ”دا بچے ای کسے تفرہ“

ماماعطاء اللہ ولد اپارے ”نی امر کیسہ دا بچے۔“ کنے ایت تہ ای جوان خد متے تا  
کیوہ تینا مل والا مشن آمون ایتوہ تہ۔

بلہ ولدا انکار ٹی جواب لے ”آخا مار دا بچے ای تینے آن مرالپرہ۔ دادے  
ہنداڑے نصر وخوا فک او ہر مسہ چار تو نازی آخلق نا ناوڑا بگ تو بتیک ای تینا بچے  
خنگ تو کیوہ۔“

ماما عطاء اللہ نے خبر مس کہ بلہ تینا بچے بھا کپک ہندا خاطر ان داجا ربلہ نے  
لاچ ترسا پارے ”لمہ نے سمائے دا بچ نابلہ ٹی ای نے انت کس ایتو؟“۔

بھلا ولد ابشخندہ کرسا ورندی تس ”ای اسہ گڑاس خواپرہ مار“۔

ماما علی مردان ناست ٹی سوال ودی مس کہ عطاء اللہ انت کس ایتک بلہ نے۔ تو  
اوہر یفے ”نی اتس آہلیسہ بچے نے۔ مطلب انت کس ایتسہ لمہ نے؟“۔

ماما عطاء اللہ کاروباری تاوڑ ٹی جواب تس ”اتس کہ نی اولمہ پارے“۔

ماما علی مردان بلہ غان ہر یفے ”جی لمہ اتس کیسہ بچے تینا؟“۔

بلہ ولد اہموتینا معصوما بشخندہ نے کرسا پارے ”ای دا بچے بھا کپہ کنامار“۔

بلہ نادا بشخندہ غاتے آن کنے ہندن لگا کہ کہ اودا سوال آن بھاز چڑک کہ اگہ  
کس اونا بچے خوائہ ولے واہم ہر وار او محبت اٹ جواب تسکہ او بشخندہ سے تون انکار  
کر یکہ ولے دا گڑانا احساس ماما عطاء اللہ نے الو۔ زرنس چپ کنگان گڈ ماما عطاء اللہ  
ولد اماما علی مردان آن ہر یفے ”نی مالدارو بندغ نسے اُس۔ بچہ بلکنس، بچہ بھا کرنیس، نی  
انت پاسہ دا بچ اتس خنک“۔

ماما علی مردان لمہ غانگہ نسے کرے تو لمہ کنے آن بار چپ تو لوک تماشہ سیل کنگ  
اس۔ لمہ نے اشارہ کرسا پارے ”گنج بخت چلمے پڑ کر“۔

چلم ناسا مانک ہموڑے اُرائی اسر۔ لمہ چلم ناشاغنگ ٹی اختہ مس تو ماما علی  
مردان زرنس سوچ خلنگان پد جواب تس ”ارالکھ“۔

مامانا جواب آ ماما عطاء اللہ خنک کس خلسا پارے ”ارالکھ۔ ختو لمہ مردوں انت  
پانک۔ جند تینا زانیفہ کن شست ہزار لب تس داسا کنے ارالکھ آ بچ کس ایتک“۔

مامانا دا ہیبت آ کل خنک کس خلکیرہ بلہ بشخندہ نسے کرے۔

ماما علی مردان ماما عطاء اللہ ناوردی ٹی جواب ترسا پارے ”اِرا لکھئے داسا  
نے لوک اس ملک۔ ای نے بلیفوچ کچھ کسے کن داخس پاریٹ۔“

ماما عطاء اللہ اوماما علی مردان نادا قیمت وڑتو، بلہ ناکنڈا ہر سا پارے ”ای پین  
سودا س خلیوہ۔ لہمے پچا ہزار رپئی نقدا اتیوہ او جندے تہ جج کس کر فیوہ۔“

ماما نادا سودا چٹ پوسکنو سودا س اس۔ داسودا کلے وڑا۔ ماما علی مردان اولمہ  
یکدم راضی مسرو لے بلہ نارنگ مچھاڑ سا تینے۔ نئے ہشتدہ کرے نئے گڑ اس پارے۔

ماما علی مردان تینا معلومات نا خاطران ولد ا ماما عطاء اللہ آن ہر یفے ”داج  
ہندا خہ اڑزانے کہ فی دن پاسہ۔“

ماما عطاء اللہ جواب تس ”جج آخس آ مرے ای کر فیوہ۔ پچا ہزار رپئی ہم اتیوہ  
بس اوراضی مرے۔“

علی مردان بلہ بے ہر سا پارے ”عیش کر لہمہ پچا ہزار ہم ایتک نے جج ہم  
کر فک نے۔“

بلہ غان برداشت متو تو ماما عطاء اللہ ناکنڈا بیوس انگا خنتے اٹ ہر سا پارے ”جج  
کرفسہ گڑا ہندن کرف چکا مارا س۔ ولے ای جج نابدلہ ٹی پچھئے تفرہ۔“

ماما عطاء اللہ حیران مس داسانت پاؤ خیر صفائی ترسا جواب تس ”فی اندھ پچھئے  
کنے ایت ای بہا کیوہ تہ یا اسٹون بدلیفو تہ گڑا ولد ا ہمو زراتے اٹ نے جج کر فیوہ۔  
بیت اللہ نے نشان تر فیوہ۔ ہندن اراکان کن تو داخہ زرارے۔“

بلہ ولد اتینا ہشتدہ تون انکار کر سا جواب تس ”بس گڑا لے جج۔ ایہن ہم  
ای بیت اللہ نے ہڑدے خنیوہ۔“



ماما حیران مس۔ ولد اہرینے ”امرلمہ“۔

بلہ نا پیٹی ہموڑے او ناما ستخوک اس۔ چابی ے پست آن کشا او پیٹی ے ملا۔  
دخس پٹنگ آن گڈ کنا خیسن آ کیمرہ ے ہرا دے او (دور بین) پاریکہ۔ ہرا کیمرہ ے  
تا تو جیلہ کنکن حج آن ہیٹس ہمودے کشا اُرائی مالو آن پیہنو گولوریل کس شاغوک اس  
اوداریل ے بیت اللہ حجر الاسود حاجی تا صفا مروا او منہ پین فوٹو کشوک اسر ماما کن مریفسا  
پارے ”دائی خنیوہ تہ۔ دائی حج ہندن خنتنگ کہ بندغ ماسا تا سلوکے“۔

ماما عطاء اللہ دہن انگا کیمرہ غاتے مالو آن خناسس تو خٹنگ کس خلسا جواب تس  
”دائی ہنگ پین اے وڑ پین۔ نی کاسہ حج کیسہ تونے حج نا ثواب ملک۔“

بلہ ے ماما دہنو فیصلہ کسے ٹی شاغاس کہ حیران اس انت پاو۔ اسہ کنڈان حج  
اسہ کنڈان ہج و لے آخر کیو فیصلہ ے کرسا بلہ جواب تس ”ای ہج ے تفرہ۔ نی تینا ہچاتے  
کہسفیس داسا دادے ہم ہلیسہ کہسفہ۔ او ای داعمروے دالنگ انگانت تو اراکان حج  
کننگ کروٹ۔“

خیر ماما آخر مجبور مس او چپ کرے۔ پگہ لمہ ہم بلہ ے پُہم کرسا پارے ”اگہ  
حج کن دیک نے تو ایت ہج ے تینا داسا داعمروے امر کیسہ ہج ے۔ حج نا پین موقع ملپک  
نے ولدانا“۔

ولے بلہ کنا سنگت کس کنے آن بھاز ضدی کس ولد امنٹو۔

صُحب تو پھر سلیس تو بلہ انا ہج نا گیر ناما سا خازہ انگا ریکاتے آتوس او ہموڑے  
ہج ے سیل کرسا خیالاتے ٹی گم مس۔ دم کسے آن گڈ ماما علی مردان بس ہج ے ڈلہ کفے  
ولدای تینا شوق کن ہج ے معار کرسا دریٹ ناوڑ آدریٹسٹ او ولد ایٹسٹ تفیٹ تہ۔

ماما عطاء اللہ تینا شکار تو ناختہ اس لمہ اُرانا کاریم تون۔ ای او بلہ ہج نا خدمت ٹی۔

بلہ ہڑ دے چُچے سیل کر یکہ اوتینا تجربہ ناذریعہ اٹ کئے پار یکہ ”بس ہندادہ  
دے ئی چُچ پینگ“۔

ای بلہ نادا گپان پین خوش مُٹھ او پین چُچ ناخذمت ئی لگاٹ۔ منہ دے پین ہندا  
وڑ گدرینگا تو اسہ شام کس ای بلہ او اماک ہرے اسکان مجلس کرین تو صُحب تو کناخنک چُچ  
ملنکتور۔ ہر اتم سا کر یٹ تو نیمر وچ نا پاس اس۔ موسم سخت بخ اس۔ اُسٹ ہچ خوا تو کہ بش  
متنگ کن بس ہموڑے لیپ ئی لیٹوک اُسٹ کہ لمہ اُرا ئی پترینگا تو کئے ہر سا پارے  
”بشہ ان جڑوک رے خن“۔

جڑوک ناپن تو ای اُلن انگا لیپ رے ہندن حساٹ دہن کہ بلہ نا تیرمہ والا گد  
مرے ہر ادے او کنا ذی آپال فیکہ شاغا کہ۔ ای رم اٹ گیر ناما سا اناٹ تو ماما علی مردان  
آستونک آتے لانچوک چُچ ناما سا سلوک اس۔ بلہ ہموڑے تہہ ئی گیر ناد یوال ناما سا  
تو لوک ہیئت کر یکہ۔ دیرتون ہیئت کر یکہ انت ہیئت کر یکہ واللہ عالم۔

ای جڑوک آن خوک مرسا اونا دیدار ئی اختہ مُٹھ۔ جڑوک نازر کا کاسی آبدن  
تو مُٹھے آتموک اس۔ نئے کئے درست کر یکہ نئے پین کسے۔ لمہ تا مسکین مہر آن بوزہ  
رے تینا جڑوک نازی آتخا کہ او گند کشا کہ۔

کئے بھازار مان او غصہ بس کہ ای انتے ہرے اسکان خاچاٹ، چُچے پینگ آ  
خفتوٹ ولے ارمان آن زیات کئے خوشی مس کہ آخر کنا انگان مست جڑوک بس۔

جڑوکے سیل کننگان گڈ ای اناٹ چاکنگ کن تو لمہ پیالہ سے ئی کئکے خروال  
بیس ہرافتے کننگان جڑوک کن کنا محبت پین زیات مس۔ اودے آن پدای او بلہ بس  
جڑوک ناچوکیدار مُسن۔ صُحب او شام ہموڑے گیر ناما سا اُس۔ او ہموڑے تو لوک تسبیح  
بیٹیکہ او ای اونا ناما سا تو لوک وار کس تین تو چد و خلکٹہ وار کس مُر آ نشانہ کس تخاٹ او بلہ ناما سا آن

تینا غلیل ٹی خلکٹہ۔ ماما علی مردان دے ٹی ارامسہ وار بسکہ بچے بے تسکے نن کن بچے بے بیڑیکہ جڑوک بے ہڑفیکہ ہانٹلاے تاتفیکہ اوانا کہ۔

ای جڑوک نا خوشی آن تینا چھٹی تا حسابے گوہاسٹ۔ ہر اتم خوڑتی اٹ حساب خلکٹ تو معلوم مس کہ کنا چھٹی تے آن بیرا ارادے بچانو۔ بلہ بے سئی کریٹ تو کنا انگ نا خبر آن بھازنا شاد مس کہ آخر جڑوکے بے ددیفوکہ کاتک۔

آخری شام اس۔ ای اسٹوپ ناما سا تو لوک سبز چاکش کریٹہ۔ ماما عطاء اللہ ولدا ہمو سر حالے ہلکوس کہ بچے بے کئے آبہا کر۔ اگہ بچے تفسیہ تو جڑوک بے کئے آ سودا کرو لے بلہ ہمو تینا معصوما بختندہ بے کریکہ اوکاٹے آخہ ٹی سرفیکہ۔ خاچنگان مست ماما عطاء اللہ کئے پارے ”صحب تو مئی ٹی انپیس ای نے نوشکی اسکان دیوہ۔ پگہ دیکر تون سر ہلینہ“۔

ای خوش مسٹ کہ صُحب ناوختی بش مننگان تو بچاٹ ولدا خوشی آن کئے تغ بتو تو لمہ ناما سا تو سٹ اوڑان ہر فیٹ کہ ”بلہ انتے بچے ماما بھاکپک۔ قصہ انتے؟“۔  
لمہ کرار کرار پارے ”دا بچ نا پیرہ نا بنیادی آ بچا تے آن آخر کیو بچے۔ ارا بچ پین اسر اسٹ بے ماما عطاء اللہ منہ سال مست تین کن ار فے ولدا بھاکرے۔ اسٹ ریک ٹی کہسک۔ داسا ہندا آخر کیو بچے۔ نا بلہ نا پیرہ نادا آخر کیو نشانی بے تفک“۔

ای بلہ نا ضد نا وجہ بے پُہ مسٹ تو لمہ بے ماما نا ضد نا سوبان ہر یفیٹ کہ ”ماما انتے داخہ زاری کیک بلہ بے۔ بلہ تو او دے مالو ہم آخا کرے“۔

”داسا خاچ پین وخت کس پاوہ نے“ لمہ پارے۔

بس ای ہم مجبور مسٹ خاچاٹ۔ صُحب تو وختی ای باغیچہ غاناٹ ڈغار نمب اس

تو مہ چار کڑہ بلہ کن دیٹ۔ اُسٹ ٹی پاک دیٹ، اُسٹ ٹی بیڈی، اُسٹ ٹی ساگ ایلو یاداف کنے آنت دیٹ۔ ولدا اُرا غا بٹ تو ماما عطاء اللہ اوبلہ گیئر ناما سا تو لوک اسر۔ ماما عطاء اللہ کنے توار کر سا پارے ”درفریزہ ہے ہت۔ نا و فریزہ اوبلہ نا فو ٹوتے ہلیو“۔

فو ٹو ناپن آ ای رم کریٹ فریزہ ہے پیٹ ہر اسکول آ انتوس تو شرمندی آن اُرائی ڈھوک اس۔ ولدا ماما کننا اوفریزہ نا فو ٹوتے ہلک۔ اوکان پد کننا وبلہ نا فو ٹوتے ہلک۔ ولدا بلہ نافر مائش اٹ چچ نا ارامسہ فو ٹوک ہلک۔

دیگر آن زرس مست ای او ماما عطاء اللہ کلے رخصت کرین تو بلہ پیٹی ہے تینا ملا او اربار نو خرو دکشا کنے تس او اسہ خرو دس ماماے۔ ماماے خبرس کہ بلہ عمران کن بھاز مہر کیک۔ ہندا خاطر ان سوال کتو کہ کنے انتے اُسٹ۔

گاڑی ٹی سوار منگان مُست ای ولدا اسہ نظر کس جڑوک ہے ہراٹ تو او ہم کنے رخصت کنگ کن مالو آن جک سلوک اس۔ خفتن آن مُست ای او ماما عطاء اللہ نوشکی آسر مسن تو شام تو ای ماما عطاء اللہ کس تا اُرائی مُست ولدا اوکان صُحب تو وختی کو بیٹہ کن سر ہلکٹ۔ پیشیم آن گدا ی ہاسل آسر مسٹ تو ہاسل نا پترینگ تون کنا خنک خویک آن پر مسر۔

مہ تونا کچ گدرینگا سس کہ اسہ دے ہاسل نا طالب کس کنے توار کر سا پارے

”ان میڈم خوانک نے“۔

ای رم اٹ میڈم نا مکتب آ اناٹ تو فضل میڈم ناما سا تو لوک اس۔ ای میڈم آن اجازت ہلسا پترینگاٹ او اخلاق آن میڈم آن زرس مُر سلیٹ تو میڈم کنے فوراً حکم تس کہ ”ان چچ ارف تین کن ہفتہ سے کن چھٹی اس“۔

ای چھٹی ناپن آن بے کچ خوش مسٹ اُسٹ خواس کہ بس ہندا جوڑہ تون پیش

تموولے حیران ہم اُسٹ کہ چھٹی انت نُسے کن رسیگا۔ فضل انتے سُننے؟۔ اووختا نئے ای میڈم آن ہریفنگ کریٹہ نئے فضل آن تو اجازت ہلساتینا پچاتے ہرفیٹ او فضل تون پیش تہاٹ۔ جوان ٹکرس اینگان گڈ کنے اُسٹ وار تو تو فضل آن ہریفیٹ ”میڈم کنے انت نُسے کن ہفتہ سے نا چھٹی تس؟“۔

”ماما عطاء اللہ دئی کن ایتلہ او پارے عمران ئے ہتو رخصت کیو ہندا خاطر ان نے دنگ اُٹ“ فضل جواب تس۔

”ماما تو دئی کن کوٹہ غان کاتک گڑ اجندہ ہندا کان انتے ہتو ای ولدا ہریفٹ ”داڑے بروس تو اسہ گھنٹہ سے کن خنا کہ نے۔ داسا عیش کر ہفتہ سے نا چھٹی ملانے“ فضل پارے۔

ای اُسٹ او چہرہ ہڑ تو ماتے اٹ خوش مسٹ کے ہفتہ سے نارہائی رسیگا۔ فضل گاڑی نا چلیفنگ ٹی او ای تینا سوچاتے ٹی اختہ اسٹ کہ کاوہ بلہ ئے او بلہ نا جڑوک ئے ہم خنہ۔ داوخت اسکان تو جڑوک ہم بھلن مَسُنے۔ کنے کل آن زیات جڑوک نا دیفنگ دوست اس ہرا تم نرا کہ تو ہندن لگا کہ کہ ربڑی و گیندس ٹپا کنگنے وار کس چپ اکاتک وار کس راست آ۔

شام نا اذان ناوخت اس نن نوشکی آ سر مسن تو فضل پڑول والا غان گاڑی نا ٹینکی ئے پُر کر ساکنے پارے ”انت پاسا داسا سر ہلین عیسی چاہ کن یا پھگہ صُحب تون۔ داسا کان تو گھنٹہ سے ٹی سر مرینہ“۔

کنا اُسٹ تہہ ٹی خوشی آن کوش ہلک کہ عیسی چاہ کہ کا نہ او ہم شام نا سفر ٹی ہرا کنے بھاز دوست اس۔ شام تو سفر ہم گونڈ مریک اودا کنا ذاتی و تہر بہ کس اس۔

”بسم اللہ کریم“، فضل نے پارٹیٹ۔

فضل ہم بھار سوچ خلتو اوسر ہلک۔ گھنٹہ کس مس یا متونن عیسیٰ چاہ غاسر مسن او ہراتم گاڑی ننا اراتا ماسا انا تو مالو آن اوڑے چار پانچ گاڑی سلوک اسر۔ اراتا مونا اسہ بھلو غالی کس تالان اس ہراڑے دہ پانزدہ زینہ تو لوک مجلس کنگ اسر۔ ای حیران مسٹ کہ مامعطاء اللہ نارخصت کن دابند غاک عیسیٰ چاہ غانت کن بسٹو۔

فضل گاڑی نے زرس مرسلیفے او کنا دڑنگ آن مست پارے ”عمران! استو شام تو بلہ خاچگان گڈتغ ٹی فوت کرے“۔

اوناد خبر تون کنانت تا کیر غان گاڑی بال کرے کنے ہندن محسوس مس کہ ای تو لوک تو لوک زور آن ڈغار ٹی لگاٹ۔ بلہ نامعصوما بشندہ یکدم کنا خنتے ٹی بس تو کنا خنتے آن خڑینکاک بیدس اجازت آن راون مسر۔ ای جوان ہرے اسکان ہموڑے گاڑی ٹی ہو غاٹ۔ ہراتم خڑینکاک خنتے ٹی باریسر تو سیدھا ہمو تینا اولہ والا کو ٹی پترینگاٹ ہرائی ارا نیار ٹی تو لوک چلم کٹھارہ او بیرک ہم تالان اسر۔ ہرافتے آمسہ چار چنا خاچوک تنگان اسرہ۔ ای ہموڑے خاموشی اٹ چناتا ماسا تو سٹ اولہ نایا داٹ ڈب ہلکٹ او کنے چچ خبر تمعو ای ہراتم ہموڑے تنگان اناٹ۔

صُحب تو سما کریٹ تو کو ٹی کنے اولہ نایا داتے آن بیدس کس الو۔ ای ہموڑے گم سم تو لوک ہرے اسکان بلہ نامتکن انگا گپاتے یاد کریٹ ولدا کو ٹی آن پیش تماٹ تو ہمو استونا جاگہ عادا اسکان زینہ غاک تو لوک مجلس کنگ اسر۔ ای خاموشی اٹ شپاد کو ٹی آن پیش تماٹ کہ چپلاتے کنا اسٹ مالو آن ننتے ٹی خلکوس دریس خدا چاہہ دیر۔

کل آن مست بلہ نا اُسٹ نا ٹکر ہر او دے کل آن زیادہ دوست اس ہموچُ نا  
 ختنگ کن گیر آ اناٹ ولے گیرے ویران ختنگ تون کنا اُسٹ ہزار ٹکر مس او نا گمان آن  
 اَسہ بھلو بو جھنس بس کنا است آتخنکا۔ ای حیران مسٹ کہ بلہ ناچُ او جرؤک ہڑتو ماک  
 ارا نگ انار۔ ای افسوس نا دنیا ٹی اختہ اُسٹ کہ لمہ نا تو ار خفتے آ سر مس ای چک خلکٹ تو  
 دوتا اشارہ اٹ کئے تو ار کرے۔

ای اُرائی اناٹ تو لمہ گونی آن نت ارفسا او ہو غو کو لہجہ سے ٹی پارے ”عمرو! بلہ نا  
 انا۔“ ہنداڑ تون ختے آن خوی نکاک پھر آن بارٹپا کریر۔ لمہ ئے ہو غنگا ختنگ تون کنا  
 ختنگ ہم تمب مسراو ہمت کرسا ہریفت ”چُچ ہرا دے آلہ؟“۔

”نی تول چاہیوہ نے کن بریوہ“ داخس پار سالمہ پیش تما او ای ہموڑے کو ٹی ٹی  
 چا تا انتظار ٹی تو سٹ۔ دم سے آن پد لمہ چاہ دان دو ٹی بس او چاتے کنا موننا متخا بخاری  
 آن پیالہ کس شیف کرے تس کئے تو ای ہریفیٹ ”لمہ! بلہ بیمار کس انت؟“۔

لمہ خوی نککی آخن تو ورندي تر سا پارے ”بیمار الو۔ دے آن کن تو مجلس کرے۔  
 دیگر نا چا کتنگ ولدا انا گیر نا ما سا ہموڑے تو لوک ہرے اسکان ہونا والا در بین ٹی جج نا  
 فوٹو تے سیل کریکہ۔ ولدا شام تو پیرہ ئے نا مارا او ارمان کرے کہ او نا امانتے انتے تسٹ  
 داڑے خیالے تہ کریٹہ۔۔۔“۔

ای لمہ نا ہیست ئے کاٹ کرسا پاریٹ ”دیرے تس بچے؟“۔

نے سرکننگ آن پد ماما ناعطاء اللہ منہ دے آن گڈ ولد بس او تین تو اوار چُ نا  
 فوٹو تے ہم پیس۔ ہرافتے بھلن بھلن صاف کرفیسس۔ ہموکلے بلہ ئے ناتس ارادے  
 ہنداڑے مس او آخرے ولد ابلہ ئے ناننگ کرے کہ بچے کئے ایت ای ہمو پیسہ غاتے ٹی

باوہ کن مطلب نا پیرہ کن مسیت کس تفوہ۔ بلہ پیرہ او مسیت نا پین آ مجبور مس بچے مامائے نا  
تس او جڑوک بغیر لمہ غان اڈکتو کہ او دے ہم ماما نا درے، لمہ پارے۔

”ای نے آن اسہ وار مست ہم ہر بیفٹ نی جواب قوس۔ اینو کنے پاکہ ماما  
بچے امر کر یکہ۔“ ای ہر بیفٹ۔

”ماما نا بچہ تصور کس اف دا کل ناما می نا لچیکو او نا شیطا نیکو۔ او نا بن آن نوشکی ٹی  
ارغ انتو کہ نا بلہ ئے انتے بچ کس ارے او او فتے اف۔ ولدا بچ نا ہیٹنگ آن پین او نا  
سینہ لا کر یکہ کہ انتے نا بلہ پال کٹیک“ لمہ جواب تس۔

”ماما انتے داخہ کست کر یکہ بلہ تون؟“ ای پار بیٹ۔

”واحسد او دا کستا ک ناودی متنگان مست ناؤ۔ اے وختا نا مامیک عیسی ٹی اسر  
ہر دے نا بلہ تون جنگ اس۔ ہندا خاطر ان تو ماما نا نوشکی کن درے تا مر کر بیتہ ولے او نا  
کست ایڑے ہم کٹو، لمہ جواب تس۔

”اچھا۔ ولدا انت مس؟“ ای ہر بیفٹ۔

”ولدا بس بلہ نا تینا جاگہ غا خا چا او ای ہم خا چاٹ۔ صاف تو بش مسٹ تو بلہ نا  
خا چوک اس۔ ٹوہاٹ تو سما کتو۔ سرفیٹ تو معلوم مس فوت کر یے،“ لمہ ہندا خس پارے او  
او غسہ بش مس انا۔

لمہ نا اننگان گڈ ای ہموڑے چا کنسا اسٹ کہ کنا نظر بلہ نا پیٹی آ تما۔ ای پیٹی ئے  
ار فیٹ او کوئی نا نیام آ تختا ہراڑے دے نا روشنائی تماس۔ پیٹی ئے بلہ نا چنکا نازر کا  
قلف خلوک اس۔ ای رم اٹ اناٹ لمہ ناما سا او چابی نا ہر فیٹ تو چابی ئے لمہ بلہ نا پست  
آن کشاس تینا پست ٹی تماس۔ چابی ئے تس تو ای ولدا رم اٹ بسٹ بلہ نا ٹینی آ پھلی آ



پیٹی ے ملاٹ تو پیٹی ناتہہ بلہ ناخرزاندہ غاتے آن پر اس۔ کل آن بڑا اسہ بورو جرسی کس  
 کوروک تخوک اس ہر ادے بلہ بچ بینو کہ ولے پیٹی ٹی سنبھالا کتہ کنے خدارد کپک پیرہ نا  
 جرسی اس۔ اونا شیف آ اسہ متکو شال کس تخوک اس ہر ادے اکثر پیرہ تینا کو پہ غاتے آ  
 شاغاکہ۔ شال ناما سا اسہ مچہ اسیلو پلاسٹک کس اس ہرائی اسہ پین گرنک تروکو پلاسٹک کس  
 اس اودے گند کشاٹ تو پکی نا گندے کریکہ۔ خدا چاہہ انت نا پکی اسر۔ اسہ پین گڑو  
 پلاسٹک کس تخوک اس ہرائی وامتکو چنکو چوربتی کس تخوک اس ہرا چوربتی نامدات پیرہ شام  
 تو پیش تما کہ داہمو چوربتی اس۔ اسہ بھلود سپاک کس اس ہرائی قرآن نا شہید مرو کو آیات  
 اسر۔ او پیٹی نا اسہ کنڈا منہ خرود او منہ خنی شکر ہموڑے پیہنو پیچ کسے ٹی تفوک اسر۔ اسہ  
 پلاسٹک کس گولی او شربت آن پُر تخوک اس ہرائی بھازا شربتاک بے میاد اسر او بھازا  
 گولیک تینا خانہ غاتے آن پیش تمارس ہندن لگا کہ پیرہ نا وخت نادوائی و۔ داڑن بیدس  
 پین بھازا گرنگاک تخوک اسر ہرافتے ملنگ ای ضروری سمجھوٹ۔ پیٹی نا با غا تہہ نا  
 کنڈا ان اسہ چنکو خانہ کس جوڑ اس ہرائی پیرہ نا اسہ چنکو تصویر کس اس او ایلو ہمو تصویراک  
 اسر ہرافتے ماما عطاء اللہ صاف کرفیس۔ ای پیٹی ے بند کنگ اسٹ تو کنا نظر پیٹی نا  
 مون نا کونہ غا تما ہراڑے کنا خیسن آ کیمہ یا بقول بلہ نا کنا در بین تخوک اس ہرائی ارا  
 مسہ بھلو فوٹو چپی خلوک اسر۔ ای فوٹو تے در بین آن کشاٹ تو بچ نا فوٹوک اسر۔ ہمو بلہ نا  
 بچ نا ہرافتے ماما ہلکوس۔ بلہ حج والا فوٹو ے کشاس او تینا بچ نا فوٹو تے خلکوس ہرانا  
 خنگ تون کنا اُست بورہ کس خلک۔ ای ہو غسا بچ نا فوٹو تے در بین تون ہموڑ پیٹی  
 ڈھکاٹ او پیٹی نا با ے تفیٹ او خڑینکا تے تو پیش تماٹ۔

## آخر کیو خط

سردار صاحب ای دیر اُٹ ونا مسٹر اُٹ؟ دا گڑا کنا خیال پائہہ لازمی اف۔  
 اگہ واہم نم ضروری سمجھ رہے تو دا گڑا نا ورندي ہندا دے کہ ای اسہ بلوچ مسٹر کسے اُٹ اولفظ  
 بلوچ تینٹ ہر گڑا نا معانی ءے بیان کیک ولے کنا پین تون اسہ پین لفظ کس ہم اوارے۔ او  
 لفظ مسٹرے۔ اوننا راج ٹی دا لفظ نا مطلب ءے کہ ای بلوچ نا گنگ انگا بے زبان انگا،  
 کھورا نگا، کھرا نگا، گنگ انگا او باحیا انگا مسٹرے آن اسہ مسٹر کسے اُٹ۔

کنا دا پیتا تیان نم پریشان مفا بو او خدا نے پریشان کپ۔ پریشان تو ای اٹ پریشان تو  
 رحیمے ءے نماز ہن کئی دا سوال برو کہ دارحیمہ دیرے۔ اودا ہم سوچ خلورے ای دیرے۔  
 دا خط نا نوشتہ کنگ نا وجہ انت ءے؟۔ نما ہر سوال نما ہر خیال جائزے۔ ای نما ہر سوچ نا  
 جواب ءے ایتو ا۔ جواب آک بھاز تو کل آن مست ای تینے آن شروع کیواتا۔

کنا پین۔۔۔۔۔ خیر کنا پین داخہ ضروری اف کہ ای تینا پین نا ذکر اٹ نما وخت  
 ءے ضائع کیو۔ ای شار گندا وہ نارہنکو کسے اُٹ۔ او ہندا اشار نا مستنا کالج ٹی لیکچر انا  
 عہدہ غا کاریم کیوہ۔ منہ سال مست کنا باوہ جان نا حکم اٹ کنا برام مس او کنا ارغ ماشاء

اللہ پیسہ کی و بندغ کسے۔ نم سوچ خلورے کہ دا انت ہیئت کس ای لکھانٹ۔ انت ای تینا ارغ نا دولت ناصفت ئے کنگ اٹ؟۔ یا نما مونا تینا پیتے با اثر کنگ کن نمے تینا پیسہ کی متنگ نا رعب تنگ اٹ۔ نہ بلکل نہ۔ دا تو ہمو جوابے ہرا دے کنا باوہ جان کنے پارے۔ ہرا تم ای اودے ہر فیٹ کہ کنکن رسال ہتوکا دانرینہ اخس خوانانے؟۔ دانا تعلیم احسے؟۔ تو کنا باوہ جان بھاز خراٹ ہندا جوابے تس کہ دا بندغ تعلیم تواف ولے کار و بارنا لحاظ اٹ بھلو پن کس ارے۔ بھلو اُراس تارے۔ مسہ چار گاڑی ارے تا۔ کنا باوہ نادا جواب آن گد کنا مچا خا ہوت اسہ کنڈان مس اوای اسہ کنڈان او آخر کنا برام اسہ دولت مند و زرینہ کسے تو ن مس۔ تو داسا نم تینٹ پابوای تینا ارغ نا تعرف ٹی انت پاروسٹ۔ ہندا خاطر ان ای دا جملہ ئے استعمال کریٹ۔ خیر دا تو بس کنا تعرف کس ولے دا خط ٹی ہرا مسئلہ نا ذکرے او ویل او مسئلہ کنا ف۔ حقیقت تو دادے کہ دا خط کنا ف۔ دا خط تو رحیمہ ناہے۔ دا خط نا مقصد تو رحیمہ نا کمک کنگ ئے۔ کمک انت بس اودے چٹکو جواب کس تروی ئے۔ اوتا نکہ دا جوابے نم تنترے اودے اوکنے ہڑ تو ماتے تسلی ملپر۔

داسا رحیمہ نا باروٹ نمے پاو تو رحیمہ نا ہمسایہ ئے۔ کنا ارغ کس تا اُراتون مومن پہ مومن اوفقا اُرائے۔ اسہ چٹکو مسہ کوئی والا حویلی کسے اوفقا۔ ہرا نادیا لاک کچہ انگا خشت اٹ تفکو۔ حویلی ٹی اسہ کنڈا دیتھہ باز نو پاٹ تمانو۔ اسہ کنڈا اوفقا تندورے۔ او اسہ کنڈا بند کس کھڈے ہرائی اوتینا پیشے تفیہ۔ عمر تاپست و چار سالے۔ چہرہ صورت او بالاد ٹی ماشاء اللہ پری کسے۔ اُرائی او تینے آن مسٹ و۔ لمہ باوہ او اونا جندے۔ رحیمہ نا باوہ تینا اُرا نا چلیفنگ کن بازار ٹی بیش ریڈی کس چلیفک۔ دا بیش ریڈی اٹ اوتینا اُستخوی او ارمان کس تو پورا کنگ کپک۔ بس ہندا خہ خواری او کوشش کیک کہ اونا زایفہ او اونا مسٹرنا

پھڈا وادفا عزت اوچنکا چنکا فرما نشاتے پورا کنگ کے۔ رحیمہ نالمہ عمرنا حساب اٹ بزرگی نامقام آسر مٹنے ولے غریبی اودے اونا پیری او بزرگی نا احساس متنگ کن الپک۔ اودے اونن ضعیف انگاختے اٹ سیلہ پر یکک او خلقتی تے کن تچ بے ہلیک۔ رحیمہ مسکین تینا ہوشے چپ کنگ کن صُحب شام اُرا نا کاریمتے تو تینے آختہ کرینے ولے بد نصیبی آن اُرا ہم ہندن چنکے کہ اوئی ضرورت نا سامانک ضرورت آن ہم کم و۔

رحیمہ نابا وادھہ غریبے۔ اونا نالمہ آخہ بیوسو نیاڑی نئے اودفا حساب ٹی ای سوچا سٹ کہ رحیمہ ہم اوفتے آن بارزند مچ خواری تے ٹی خواری کشا و پیشانی نا لکیرتے آن گلہ کرسا کرو ولے دیرے سما اس اونا زنداٹ اونا بخت اونا صیب اٹ اسے پینگنو جھمرس برو۔

سردار صاحب رحیمہ نُس تا اُرا تا خیر آن اسے اُشکنو گلی نئے۔ اودا اشکن انگا گلی ٹی مسہ درگہ و۔ اسٹ جمیلہ نُس تے ایلوملا حنیف نا اُراے او مسٹکیو وکیل جابرنا اُراے۔ وکیل جابرنا پنے ای اکثر تینا اُرخ آن بنگوسٹ۔ کنا اُرخ او جابر بھاز خو کنا سنگت و بلکہ اسر۔ جابر نالمہ اوبا و دوا زندہ سال مست گاڑی نا ایکسڈنٹ نئے ٹی فوت کریر۔ اوتینے آن تینا اس۔ اوتینا تینا اُرا ٹی رہینگا کہ۔ اسے خلق او اسے گلی نا ثواب ٹی وکیل جابرنا نظر رحیمہ غا تماس۔ امر تماس؟ ہراوخت تماس؟ داگڑاے توای سوچ کتوسٹ۔ ہیبت دادے کہ اور رحیمہ نئے خناس او خنگ تون رحیمہ اودے دوست بٹس۔ ہرانا ذکرے اوکل آن مالو کنا اُرخ تون کرے او کنا اُرخ کن تو۔ دانیام ٹی ارامسہ تو گدرینگتو سر کہ کنے خبر ملا وکیلجا بر رحیمہ کن رسال راہی کرینے۔ وکیل جابرنا رسال اینگ رحیمہ نا اوالا تے کن بھلورشتہ نُس اس ولے داکان بیدس رحیمہ نابا وادھہ شروع ٹی دارشتہ غان انکار کرے۔

اودا انگارنا سوب اوتینا حیثیت نا نیمون ٹی پیش کرے۔ نئے تو سمارو کہ  
 وخت نا پیرانگا بندغا کہ او خاص کر غریب انگاک ہے چیرگیج اونت والا مثالے دا  
 اسکان گیرام کتنو۔ رحیمہ نا باوہ صاف صاف تینا پیتا تے کرے کہ ای بیش ریڑی  
 چلیفو کا غریب دے نا ارا صد مٹہ صدر پئی کٹو کا بندغ تینا مسٹر نا برامے اسہ خواندہ و  
 وکیل نئے توں ہراڑے کنگ کیوہ ولے اونا دا پیتا تے آن بیدس وکیل صاحب نا ہنین  
 آ پیتاک کنا ارغ نا پٹہ کنگ اور رحیمہ نا لٹہ نا بھاز انگا اصرار اودے بھاز ہرے  
 اسکان تینا گپ آ سنگ کن الیو ر۔ آخر ہندامس کہ رحیمہ پنجا ہزار نالب ٹی وکیل  
 صاحب نا ارائی جوڑمس۔

رحیمہ نا دابرام آن اخس کہ اونا لٹہ باوہ خوش اسر ہموخس ای اسٹ کہ اللہ اونا  
 نصیبے جوان کرے اوجوانو سیر و ارا سے ٹی برامی مس۔ رحیمہ نا خوشی تے آن گڈ ای تینا زند  
 اوزندگی ٹی اختہ مسٹ۔ دانیام ٹی مسہ چار تو گدریتکتو سر کہ رحیمہ ولد تینا ارا غا بس۔ ای  
 گلان اسٹ کہ دیدنی بسنے۔ اونا خوش آمد آ اناٹ اوڑ توں مجلس کریٹ اوہم کن تو بھاز  
 جوانی ٹی گپ کرے ہر پیتے ہشتندہ کر ساکنے ورنڈی تس۔ داکان گڈ رحیمہ نا تو پورا مس  
 ولے نئے جابر اونا رند ٹی بس نئے کہ رحیمہ تینا ارا کن مون کرے۔ آخر کنا سوج کنزگان  
 گڈ کنا ارغ کنے پارے بر کہ رحیمہ نا ارغ اودے طلاق تسنے۔ دا جواب آن اوّل تو کنا  
 ہوش پرینگا۔ کنا بار نا خنتے آن خڑینکا کہ ہندن یلہ مسر دہنکے کنا ارغ کنے طلاق تسنے۔ وا  
 ہم اگر کنا ارغ کنے طلاق ایتوسس ای داخہ پریشان اونا شاد متوٹہ دہنکے رحیمہ کن مسٹ۔ دا  
 تو اسہ بیوسو غریبوسٹر نئے ناطلاق اس۔ پگہ کہ تا کنا بھاز انگا ضد آن تنگ مر سار رحیمہ کنے  
 تینا قصہ نا پارے تو کنا بدن نا پٹاک خاخر ہلکر۔ سردار صاحب دا قصہ زے زکس غوراٹ

خوائس اوا گہ وخت مس تو دا خطے اسہ ارا وار پین ہم خوائس۔ دا خط سوالی و خط نئے۔ دا خط  
نمے آن جوابے خوانک۔

رحیمہ نا پیتاک داوڑا سِر کہ ”برام آن گڈ کنا زندگی بھاز جوانی او بھاز محبت اٹ  
گدرینگسا اس۔ اسہ دے ای اُر اے روفسا اسٹ کہ درگہ نا تو ارمس۔ اُر اٹی کس الوکیل  
کاریم آنا س۔ ای درگہ ے ملاٹ تو نرینہ کس سلوک اس۔ کنا نظر نا تنگ تون ای تینے  
درگہ نا خیر آڈھکاٹ او ہر بیفٹ ”ایلم! دیر اُس؟“۔

جواب بس ”کنا ایڑ! ای سجاد وکیل صاحب نا سنگت نئے اُٹ اودے تو اربو“۔  
”ایلم! وکیل صاحب داڑے آف“ ای پاریٹ۔

کنا جواب آن گڈ او ولد اجواب تس ”ایڑ! گڑا ہرا وخت جابر بس پاستہ کن تون رابطہ کے۔  
اللہ حافظ“۔

سجاد نا اینگان گڈ ای ولد اتینا کاریمے ٹی آختہ مسٹ۔ شام تو جابر بس تو اریغ  
آن گڈ تینا کیس نئے نا کاریم ٹی آختہ مس۔ ای ہم مدد روک اسٹ کاٹے مخاٹ تنگان  
ہلکت۔ کنا چٹ ہوش آن انا س کہ اودے او نا سنگت نا پیغاے تروئی ے۔ دانیام ٹی  
مسہ دے پین گدرینگا کہ اسہ دے ولد او نا ہوسنگت بس۔ وکیل اُر اٹی ساڑی الو۔  
درگہ نا پیش آن ہمو مالو نا پیتاے کرے انا۔ اودے ای بھاز شرمندہ مسٹ کہ امرای  
داخہ غیر ذمہ دار متنگ کیوہ۔ ای وکیل نا بے صبری اٹ انتظار ٹی اسٹ کہ او برے اودے  
ہندا پیغاے ایتو۔ وکیل بتنگ تون کئے آن مست کئے آن سوال کرے کہ دا اُر اغا نرینہ  
کس بئے نی کئے پاتنس۔ ای جواب تسٹ کہ ہو ای نے سئی کنگ خواہسٹ و لے کنا  
ہوشان انا۔ او پین ہیت کتو او ولد اہر یفے ”اٹ وار بس؟“۔ ای جواب تسٹ ارا وار۔

کننا پیتان خار کُنسا پارے نی امر اودے اُرائی اِلّاس؟۔ امر اُو اُرائی پترینگا؟۔ نے شرم  
 بتو کننا غیر حاضری ٹی داوڑ و حرکت کیسہ؟۔ ای او نا لہجہ او پیتاتے آتینا خوی نکاتے تو نگ  
 کتوٹ او ہو غسا جواب تَسٹ اللہ نا قسم دا اُرائی بغیر نے آن کس بتنے۔ قرآن پاک نا قسم  
 دا پیتاک دروغو۔ ولے او کننا پیتاتے آیقین کتو او بدتر ترند مر سا جواب تس دروغ مرو سر تو  
 نی کنے مالو پاریسہ۔ دروغ مرو سر کنے گلی والا کسئی کتو رہ۔ دروغ مرو سر او اڑمکیو وار  
 بتو کہ۔ ای فریاد کریٹ صفائی تَسٹ ولے او کننا اسہ پیتے ہم بنو او تینا آخری پیتاتے  
 کرے کہ ای اگر خواہ تو نے قانون نا حساب اٹ جیل کرفنگ کیوہ ولے ای بلوچ و  
 نرینہ سے اُٹ۔ کنے تینا غیرت او تینا عزت او آبرو نا احساس ارے۔ داسا نی چپ  
 چپ دا کان پشتم او تینا باوہ نا اُر اغان۔ ننا فیصلہ دے داسا ننا سردار کیک۔ کننا انگان  
 مست بلکہ کنے مڑنگان مست کنے ہندو جملہ کس پارے کہ کننا است تہہ ٹی بور بور مس او  
 ای تین کن مٹ کس مش مٹ۔ کنے پارے کہ دا کل کننا خطا کس کہ ای باغیچہ نا گلاباتے  
 اِلّاٹ پوڈگل نا کنول آدو تھٹ۔ کنے اینو معلوم مس نم غریبا ک عزت او غیرت اٹ ہم  
 غریبو اریرے۔ اوکان گڈ ای اُر اغان بسٹ تو ہفتہ سے آن گڈ سردار بہشت اللہ تینا ارا  
 باڈی گارڈ آتو ن بس اُرائی تو س او باوہ دے نئے ہیئت کسے کن اِلّا نا سوال کسے نا موقع  
 تس نہ پین۔ اُر او الاک ہم بیوس اسر کہ سردار نا مونا داسا انت ہیئت کین انت پان کس  
 جواب کس ایہ اودے خلق آن مڑنگ نا دھمکی ایتک۔ چا کُنسا کش کر سا سردار ننا فیصلہ  
 دے بنے۔ اودا دنیا نا او لیکو کیس کس ہرائی اراٹمکیو فریق آن اسہ سوال کس ہم کتکتو۔ بس  
 فیصلہ بنفنگا او ہم ہندو لہجہ اولفظاتے اٹ کہ او نا ہو جندنا گارڈاک تین کن شرم نگارن تو  
 مالو آن کھسکسن۔ سردار نا لفظاک داوڑ اسر ”نختو بے غیرت انگا باوہ۔ نی او نا بے باک

انگا مسٹر کنا او کنا خلق نا، کنا بیہن آ دستارنا عزت نابلہ غاتے ارفیرے۔ کنے ایلوسر دارتا مونا رسوا کریرے۔ ای خواہو تو نغے داسا داکان مڑیو ولے ای داخس ظالم کس افٹ۔ دا ہیٹ پک مٹنے نا مسٹر تینا ارغ نا غیر موجودگی ٹی پین نرینہ سے تون اُرائی اِرا وار تینا مٹنے۔ دانا مطلب ے نی جوان چاوس۔ نا مسٹرے طلاق تو ایہن تنگا۔ داسا مارنا عزت اونا آبرو کن نے مٹہ لکھ رُپی میعار تروی ے۔ اوہم اِرا تو ٹی۔ ایہن تو اسہ تونا وخت کس ولے کنے نے آ عذاب بریک۔ نا مسٹرنا بے حیائی ٹی نا بھلو قصور کس تواف بس ہندا خاطر ان نے اِرا تو نا وخت رسیدنگ۔ ای اِرا تو آن گڈ بریوہ او میعارنا پیسہ غاتے ارفیوہ۔ خدا حافظ۔ سردار نا اننگان گڈ ای لمہ او باوہ کل مسہ دے اسکان بندانگا کو ٹی خویک شولان ہوغان۔ ای تینا بے گناہ ٹی اودا بھلا رسوائی کن ہوغانٹ۔ باوہ تینا غربی او مٹہ لکھ رُپی ناجع کنگ کن خویک شولانے۔ لمہ اسہ خن آن کنا نصیب ایلوخن آن تینا ارغ نا بخت کن فریاد کرینے۔

رحیمہ ناپالن آخنتے آن اونا بارنا جوڑتے آن اونا بے وی ناداستان بنگان پد ای اونا خنتے اٹ ہنگ کٹوٹ او ہو غسا اُرا غا بٹ۔ شام تو تینا ارغ تون وکیل اوسردارنا قصہ ے کریٹ تو اوارمان کر ساکنے پارے کہ دامیعار نامٹہ لکھ رُپی آن بیرہ لکھ کس وکیل ے ملک۔ پنجا اونا لب کس او پنجا میعار۔ ایلو ارا لکھ رُپی ے سردار بہشت اللہ تین کن ہلنگہ۔ اودا فیصلہ ے سردار خاص پیسہ غاتے کن کرینے۔ جابرنا مشورہ بس اودے طلاق تنگ نامٹس۔ دایلو گپاک میعارنا پیسہ غاک رحیمہ نا عزتے تار تار کنگ اونا باوہ ے بے غیرت پانگ داکل سردار بہشت اللہ نا تینا کرواک مسٹو۔ سردارے وکیل نا طلاق نا پرواہ کرینے نئے رحیمہ نا نئے اونا باوہ نا غربی نا۔



سردار صاحب دامن رحیمہ ناداستان۔ ای داخلے بھار مجبوری آن گڈ نے آ  
 لکھائٹ ڈارٹن بیدس کن تو پین بچو کسرئس اف۔ ای رحیمہ ناباوه نادے اون ناخواری  
 اونالئمہ نا صُحب اوشام نا هو غنگ اور رحیمہ نا بے بسی او اونا پھڈئی بھلن مروکا چنا کن مجبور  
 اُٹ۔ نہ کنے ٹی داخہ وس ارے کہ سردار بہشت اللہ تون جنگ کیونہ داخہ طاقت کہ ای  
 جابرے انسانیت نادرس ایتیو۔ کنا دوتے اٹ ہندا خط نا لکھنگ ہرے بیرہ۔ ہندا بھلو  
 گڑ اسے۔ ای نے آن خواست کیوہ کہ فی دا اُراے رحیمہ نے اون مروکا چناے عزت نا  
 گداو چا در بیٹف۔ اونا عزت اوناپلوے ولد او دے عطا کر۔ او دے انصاف ایت۔

او گڈ سٹی سوال کس کنگ خواہوہ کہ دنیا دہن انگا موقع غا عدالت آتا درگہ  
 غاتے ٹکیفک ولے نن عدالت اوسرکاری کیس تا پین آن خلیہ او داخدر بیوس اُن کہ سردار  
 نسے آن ذلیل منگان ایلوسر دار آن مدخوانا۔ کنے نے آن مدخوانگ آشرم ہنگلہ ولے  
 ای امر کیونن عرب افن کہ قاضی نسے ناماسا کان او انصاف خواہن۔ نن انگریز افن کہ  
 قانون نا اُراغا کان۔ نن بلوچ اُن اوننا بخت اونصباک نناؤ کھ او ویلاک نا خوشی او بدیک  
 کل گڑ اک سردار آتا فیصلہ او فتاکم اٹ مسٹو۔ کنے دا معلومے سردار اتے ٹی سردار ارے  
 او ہندا گڑ انا امیدا اٹ ای نمے رحیمہ نا غم آن سئی کریٹ او کنے یقینے کہ نمے تینا غیرت نا  
 ثبوتے ایتورے اور رحیمہ نا فیصلہ کن موئی برورے۔ ای داخلے پین سردار نسے آہم لکھنگ  
 کرپیٹہ ولے ہرا غیرت نن نماخن ٹی نماپن ٹی او ہرا یقین نن نما زبان اونما خاندان آ  
 ارے پین کس آف۔ رحیمہ نا عزت تون اوارا اور سردار اتا عزت ہم نمادوٹیے۔

## بے غیرت

عاقب تینا اُرا نا مونا گلی ٹی بے تابی اٹ اصغر نا انتظارے کر سا اس۔ پڑہ  
 غاک مون مون چرپ، ریش کوٹ، تنک خٹو نو رنگ نا پیچ اونٹے ٹی خیسو رنگ نا  
 پڑٹ پیناس۔

اوگلی ٹی نیمسرک سلوک وارد ما گھڑی ے ہرا کہ اوچک خلککھ گلی نا سند آ۔  
 جوان دم نئے نا انتظار آن گڈ اسہ شیر چائی رنگ نا گاڑی نُس بس مونا تہ سلیس۔ عاقب  
 گاڑی نا درگہ ے زوزو ملا سوار مس او اصغر آ خفتے کشسا پارے ”یار اصغر دا خہ ہرے۔  
 داسا مچہ تیز کاس کہ دہن مف گدرینگوے“۔

اصغر بغیر بیتان گاڑی ے گیر ٹی شانا اوسیدھا گلی ٹی چکاتے۔ ٹکڑس اینگان پد  
 اصغر گاڑی ے گلی سے ناما ساسلیفے ہڑتو ماک دڑینگا راو گاڑی نا مونا سلیر۔

دم نئے آن پدھو گلی آن ارامسٹر پیہو تچ بستہ غاک کو پہ غاتے او فتاماس آن  
 مونک شیف گدرینگار۔ دامن تا گدرینگان عاقب نا چہرہ غادہ نو نورانی ورنگت نُس بس  
 دہنکہ گنہ گار نُس تق ٹی بہشت نا منظر نُس خنے۔ اصغر نا جوڑتے آ ہم اسہ عجیو بشخندہ نُس

ناگمان بس او گرو شک تنگ شروع کرے۔ مچہ سلنگان گڈ ہڑتو ماگ گاڑی ٹی تو سراوگلی  
آن پشتتار۔

عاقب نا جوڑک بے اختیار کوش ہلسا اسر۔ اصغر عاقب ے زرس خوڑتی اٹ  
ہرا او پارے ”آخر اٹ وخت اسکان؟۔ دامت ے پین منزل ارے یا بس ہندا  
منزلے؟“۔

صائمہ نا خنگان پد عاقب نا درٹی عاشقی آزمراج روانی کرسا ئس فوراً وندی ترسا  
پارے ”جانی! منزلاتا کنے سما ف ولے داخس پانگ کیوہ کہ عشق ناکل آن مقدس انگا  
منزل ہندا دے۔ ہر عاشق ہندا دعائے کیک کہ دا منزل نا عمر اخس وڈھے ہموخس  
جوانے“۔

اصغر چککو خنگ ئس غلسا ولدا سوال کرے ”نا مطلب دادے کہ ای نے ہڑدے  
اُراغان نارنیو داگلی آہیو نی صائمہ نا دیدارے کرولدانے سرکیو۔ داوڑ عارضی سکون او  
خوشی تو نے نصیب مریک ولے اودے تینا کنگ نا سوچا ئس یا آخا؟“۔

عاقب دا ہیئت آ زرس خاموش مس او جوان سوچ خلنگان گڈ ولدا مونے  
تینا اصغر نا کنڈا اڑسا پارے ”یار او کنا زندگی ے۔ اگہ او کنا متو تو کنکن بیرہ مرگ  
سلیک ولے ہندا غم کنے ہم کُسا کیک کہ ای اودے امر تینا کروٹ۔

ای اینو اسکان اوڑتو تینا مہرے پھاش کنگ کتو تینا اُرا والاتے امر  
سئی کروٹ؟“۔ عاقب نا دا سوال اصغر ے کین تہا۔ ہرانا جواب ٹی ہڑتو ماگ چپ  
کریر او پین ہیئت کتور۔ چککو چکر ئسے آن پدا صغر ولدا ہموگلی ٹی گاڑی ے پتریفے  
ہراکان عاقب ے ارفیسس۔ عاقب نا ہوش دا اسکان صائمہ نا ہموچوٹیل ٹی بندی

اس ہر او نا پیہنا تنگ انگا گد آن خنکا کہ۔ اصغر گاڑی نا سلیفنگ تون ”عاقب! ای نے داسا ہنداڑے دڑ فیوہ کئے انوی کنکن جاسم انتظار کنگتہ“۔ عاقب جاسم نا پین آن زرس حیران مس او حیرانگی ٹی جواب تس ”نا او جاسم نا سنگتی دے پہ دے آن زیات مننگہ خدا خیر کے“۔ اصغر او نا دا ہیبت آخنک کس خلک او کرار ولجہ سے ٹی ورنندی تس ”اہلکم! دا ٹی فائدہ تو ناے۔ جاسم صائمہ نا کا کا نا مارے۔ اخس ای اوڑ ان خوک مریوہ ہموخس نے صائمہ غان خوک کیوہ۔ نی ہم بر سنگت مرکاریم نا آسان مریک“۔ عاقب راستیکو دواٹ گاڑی نا درگہ ے ملا او خنتے اصغر نا خنتے ٹی خلسا ”یار! اوڑ تون کنا بچ دتر لپک“۔ اصغر یکدم جواب تس ”دہن پا پہ یار دا دتر ہم ہمو دترے ہر نا دتے چوشانے“ او زور آن مخنک کس خلک۔ عاقب گڑ اس پانگ ٹی اس ”عاقب جان بس اللہ کمک نا شام تون خنہ تینے“۔ اصغر ہنداخس پارے او سر ہلک۔

شام ناٹھہ بچہ کس کہ عاقب آستا بیٹھک ٹی عاقب او اصغر تو لوک چا کنگرہ او ٹی وی ہر ارہ کہ اصغر پیالہ ے بوز آن شیف کر سا پارے ”انت سوچا س گڑا؟“۔ عاقب ”انت کسے نا؟“۔

اصغر ”کمال کیسہ یار صائمہ نا پانگ اٹ۔ ارا والا تون ہیبت کر بلکہ راضی مری“۔ عاقب پیالہ ے پُر کرے او باسن باسن گلم کس ہلسا ”یار ارا والا ک تو راضی مریہ۔ ننا ارا والا ک او صائمہ کس تا ارا والا ک اسٹ ایلو فتنے آکارہ بریرہ۔ لمہ تینا مجلس ٹی اکثر صائمہ نا صفتے ہم کیک“۔

عاقب نا دا ہیبت آ اصغر نارنگ مچہ اڑسا تینے او گلوٹی مرسا ہرینے ”گڑا مشکل انتے؟“۔

عاقب ناشادو بشندہ کس کرسا ”داہمو مشکل ہر امشکل نے ہچ متنے اللہ نے شان ہم تفتہ“۔

اصغر پیشانی نے کوس کرسا ”مطلب“۔

عاقب ”مطلب روزگار۔ کنے صد فیصد یقینے کہ صائمہ نابا وہ تینا مسٹرے ہمو وخت اسکان کنے تفر و تانکہ ای تین کہ کاریم کس خنتٹ“۔

اصغر ”ہو“ داگپ توارے ولے یارا گہ او فتار ضامس تو نغے سانگ تو ایتورا گہ برام دن روتور۔ اگہ اُست تاخواتو تو نے خبر تو مریک“۔

اصغر پیالہ نے تینا طشت ٹی مسن تخسا ”سئی پاسا یار دا بوج ہم اُست او دماغ آن کم مرو۔ بس پھگہ ای ہر حال ٹی لمہ تو ن گپ کیوہ“۔

اصغر سگریٹے لگفہ جوان منہ کش کشا ولد ایش متنگ تو ن پارے ”جانی! داسا ای اناٹ پھگہ بریوہ ہمو وختا“۔

عاقب بیٹھک نادر گہے ملا اصغر پیشما گاڑی ٹی سوار مس او سر ہلک۔  
صُحب نایا زردہ بچہ کس کہ عاقب گلی ٹی بیر فوک سلوک اصغر نا انتظارے کنگ  
کس۔ اصغر مونو گاڑی سے ٹی بس عاقب نامونا سلیمس شیشہے شیف کرسا ”انت ہنگ  
اُس۔ بر سوار مر؟“۔

عاقب گاڑی ٹی سوار مر سا ”ای سوچاٹ پین کسے دا دنا گاڑی ہے؟“۔  
اصغر سر ہلسا ”یاراے گاڑی ہے ابا دریس تو داداے ارفیٹ۔ اچھا ہمو گلی آ  
کان؟“۔

عاقب چہرے تینا گاڑی نا آدینک ٹی ہر سا ”ہو بریک تو ہمو گلی آن ولے سما

اف زو بروئے یا ہرے کروئے۔ اکثر جمعہ نادے تے آ او جاسم نا ایڑ تون اوفا اراغا  
کانتک۔“

اصغر ”عاشق نارند ٹی نن پیر مسن بھازا نگا انتظار آ تا کنگ آن۔“

عاقب چٹکو جٹنگ کس خلصا ”پیر تونے بھازا نگا مسک کرینو نا عشق ئے ملامت  
کہے۔ نی اونا ہمسن کن انتظار کر۔“

اصغر ”ہمس کن انتے۔ نن ہم صائمہ کن انتظار کینہ۔ اودے انت سمائے اونا  
عاشق ہر اسٹ ئے۔“

عاقب بشندہ کرسا ”سما تو اودے مالو آن ہم اس۔ اینو تو چٹ پک مرک۔  
اینو یکہ تو لمہ اسک انسا وراغے تار سال۔“ ہندا ہیبت تون بشندہ کس عشق نا شار آن بال  
کرسا بس اوپراک آن بار عاقب نا جوڑ تے آ تو س۔

اصغر حیرانی اٹ عاقب ئے ہر اوکرا کر پارے ”واہ یار بھلو ہمت کس کرینس  
اوہم وختی صُحب نا۔“

عاقب ”ہمت کنے ٹی الو۔ بس ہمون اپیتا تے آن ہمت ودی مس داسا دعا کر خیر  
نا حوال کس برے۔“

عاقب او اصغر گاڑی ٹی تو لوک مجلس کرسا اسر کہ جاسم او صائمہ ہموکا تدر۔  
عاقب نا نظر صائمہ غاتما ہموپہینا پچاک۔ تنگ انگا گد۔ ریشمی زلف نا چوٹیل۔ نظر  
حیا نا وزن آن تینے ڈغار آن بڑز کنگ کتو کہ۔ چپی کلک تا دے نا تمنگ آن پین  
گرو شک تسک۔

جاسم غور ٹی گاڑی آ ہنگ ٹی اس۔ او اونا خفے آن غصہ مر آن نظر بسک۔

عاقب ناخنک صائمہ غاقلوک اسر او جاسم ناظر گاڑی ناشیشہ غا۔ اوفا تڊینگان گڈ اصغر  
ہم سر ہلک۔ اصغر عاقب ۛ اُرانا تاما سادڑ فے اوسکولہجہ سے ٹی پارے ”انت خبر کس بس  
کنے خبر کس۔ او اینو نے بروئی ۛ ننا بیٹھک آ۔“

عاقب گاڑی نادر گہ ۛ بند کر سا ”انشاء اللہ اللہ کمک۔“

خفتن نا نماز آن گڈ عاقب اصغر آستا بیٹھک آ سر کرے تینے۔ اونا چہرہ خوشی  
آن شابیت مٹس۔ خنک زم زم آن بار صاف اسرہ۔ بشندہ تو اونا پالنا جوڑتے آن  
ثابت سلوکس۔

بیٹھک ٹی دا اسکان تو لٹوس کہ اصغر ہر یفے ”حوال ایت امر مس؟“۔ عاقب  
ہم حوال تنگ کن بیقرار اس۔ ”اینو شام نا نماز آن گڈ لٹہ اسک بٹر تو حوال تسر کہ اور سال  
آن بھاز خوش مٹو اوفتے دارشتہ قبولے۔ یار اوفتا خوشی نا اندازہ داڑان سامریک کہ اوہمو  
وختا ہو کریر۔ دا کل نا وجہ غان کننا یار نی کہ پاتوسہ ای قیامت اسکان اُر والا تون گپ  
کننگ کتو ۛ۔“

حوال آن گڈ عاقب گلاسے دیر آن پر کرے او اسہ گلم ٹی کش کریتہ ہراڑن  
ہندن لگا کہ دادیر الورا ونا بے تا بیک اسر ہرا فتے اینوش کرے۔

عاقب نا حوال آن اصغر چٹکو بشندہ کس کرے اوسلوک سلوک جواب تس ”بھاز  
خوشی مس یار۔ اچھا کنے انوئی ۛ اسہ بھاز ضروری و کاریم کسے ٹی جاسم نا کنڈا۔ نے  
کسری دڑ فیوہ ہموکا۔“

عاقب ”دہن اچانک۔ نے کاریم اس تو گڑانی پاروس یارای بتو ۛ۔“

اصغر بیٹھک نادر گہئے ملسا ”نہ یار نے بروئی تو اس حوال تنگ کن۔ او  
پھگہ تسلی اٹ مجلس کینہ۔“

ہڑتوماک گاڑی ٹی سوار مسر عاقب تینا اُرانا ماسا ڈینگا او اصغر گلی ٹی سدھاپیش تہما۔  
ہفت ہشت دے نیام ٹی گدرینگارو لے اصغراو عاقب ناملاقات ولد امتو۔  
سانگ آن گڈ عاقب اسہ وار ہم صائمہ ئے خنگ کتو۔ مست اصغر دریکہ تہ داسا تینا او  
شرمینگا کہ اوگلی ٹی سانگ کتو کہ۔

عاقب دے ٹی اراو ارا اصغراستا اُرانا گانا کہ ولے ہروار اسہ ورنڈی ئس رینگا کہ  
کہ ”اصغر جاسم تون اِنانے دا اسکان بیتے۔“

عاقب ئے نا اُرائی توہان بسکہ نہ تینا گلی تے ٹی۔ بس اصغر ناباروٹ سوچا کہ کہ  
انت مس اچانک۔ اُرانگ اِنانہ۔ دا بے غیرت انگا جاسم تون اودے انت کارم تہما نہ کہ  
چٹہ اوڑتوں اوارے؟۔

عاقب نا اُست جاسم آن ہمودے آن پٹاس ہرادے شارٹی حوال ئس  
عام مس کہ جاسم تینا سنگت ئسے تون اوار تینا مانا موٹر سائیکلے اوفقا اُرانا دزانے۔ او  
اکثر تین تو پاریکہ ہر ابند غ تینا سیالانا متواو کناہرا کا مرو۔ دا خیال آن گڈ او تینے جاسم  
آن مر کرے۔

او تین تو سوچ خلک کہ جاسم اصغر تون ہندا خاطر ان چکر کیک کہ اصغر  
ازگار سے نامار ئسے۔ اودے اوڑتوں ضرور جو فہ ئس ارے نہ تو اصغر تون اونا انت  
سنگتی ئس گوینگانے۔

شام نا تقریباً دہ بجے ئس کہ عاقب آستا اُرانا پیشن آہارن ئسے نا تو ار مس۔



عاقب درگہ ءے ملا۔ گاڑی ناتہہ نالائٹ خلوکس او اصغر دونا اشارہ اٹ عاقب ءے  
توار کرے۔

عاقب گاڑی ٹی توس تو اصغر گاڑی ءے مچھ مونا درے او گاڑی ءے بند کرے۔  
عاقب تینا مونے اصغر کن اڑسا ”ہر انگ اُسہ یار۔ اٹ وار نارنداٹ  
بُٹ ولے نی اُس کہ اسہ دے ہم مون کتوس“۔

اصغر نامون دڑاس۔ خنک تہ مایوسی آن پراسر۔ جوڑک تا خشک مسوسر۔ دم  
کس سوچ خلک ولد عاقب ءے ہر سا جواب تس ”یار! اختہ اُسٹ“۔  
عاقب ءے اصغر نامونان سہما تہما کہ اصغر پریشانے ”گپ انتے یار داخہ  
پریشان ختگسہ“۔

اصغر ”یار پریشان تواریٹ ولے انت پاؤ اراکان پاوئے“۔  
عاقب ”اللہ خیر کے یار نی پا آخر گپ انتے“۔  
اصغر ”گپ۔ گپ دادے یار۔ نہ نہ ای نے پانگ کپرہ“۔  
عاقب ناچہرہ تر متنگ اس ”نے قسمے یار پا، انت مُسنے“۔  
اصغر ”یار گپ، گپ کناف“۔  
عاقب ”گڑا دنائے“۔  
اصغر ”اوصا۔۔۔ صائمہ نائے“۔

صائمہ ناپن نابنگ تو عاقب نارنگ اڑسنگا۔ چرخ کس تس تینے او مونے تینا  
سدھا اصغر کن ترسا سوچ کرے ”صائمہ صائمہ نانت گپ کسے؟“۔  
اصغر ”یار! نے یادے ناہر ادے سانگ مس نی ننا بیٹھک آبُٹس شام توای  
نے پاریٹ کہ کنے کاریم سے ٹی انوئی ءے؟“۔

اصغر ہیت کنگ اس کہ عاقب ”ہو ہوا دے نی پاریس جاسم آ کا وہ“۔  
 اصغر نامون ہر ہیتان گڈ پرسا اس رنگ تا گاڑی نالائٹ آن بار نیم پوشکن نیم  
 بیہن مر سہ اس۔ توارٹی تا کینی ودی مر سا اس۔

”ہو ہمو دے نے سر کنگان گڈ ای اناٹ جاسم نا ماسا تو جاسم کنے  
 پارے۔۔۔۔۔“

عاقب ”انت پارے؟“۔

اصغر ”کنے پارے کہ نی کنا سنگت اُس۔ عاقب نا سنگتے تو کنا حق مر یک نے  
 تہار می ٹی شا پر۔ کنے گڑ اس ہیت کروئی۔ ای نے پاوہ نی عاقب ے پاتا کہ پھگہ نا  
 دے نی کنے آن گلہ کہ“۔

عاقب نا اُس ت نا دھڑکنک تیز مر سا اُس ”انت پارے او پتے پایا“۔  
 اصغر خنتے عاقب نا خنتے ٹی خلسا ”ہیت دہنو سے کہ کنا با گیر کپک ولے امر کیو  
 نی کنا سنگت اُس نا اُس ت نا پر غنگ کنے قبولے ولے نا ز ند خراب مرے دا گڑا  
 ۔۔۔۔۔۔“

اصغر نا ہیت خلاس متوس کہ عاقب نیام اٹ تیز ولجہ سے اٹ ”دا پتاتے  
 لے یار ہیت انتے زو پا“۔

اصغر ”ہیت دادے کہ جاسم پارے صائمہ او وڑ و مسٹرکس اف ہرا وڑس نم پہہ  
 مریرے“۔

عاقب نا خنک خیسن مسر۔ بدن ٹی تا لار و سمندرکس بش مس ”انت مطلب دا  
 ہیت نا“۔

اصغر خنتے شیف کرے اوکرا کرا جواب تس ”صائمہ ناعادتاک خرابو“۔

دا جملہ ناہنگ تو عاقب ناخنک دتری مسر۔ لار کرو کا سمندر سینہ ٹی اُسٹ  
 ے تا چارمہ کنڈان گیرہ کرے اودوئی نا خا خراٹ جواب تس ”او بے غیرت دُزنا  
 ماردا پیتے کرے نی بنگوس تے وابٹس کئے سئی کرلیس۔ اونا بلہ غاتے ای داسا  
 ارفیوہ“۔

غصہ نا وجہ غان عاقب نا بدن لڑزا کہ۔

اصغر نگاہ ے بڑز کرسا ”داخل ای ہم بے غیرت کس اٹ کہ اونا ہیئت آ  
 یقین کرو سٹ“۔

عاقب خارٹی ”گڑا داپیتا تے کن تو کنگ نامقصد؟“۔

اصغر ”ہر اتم اوداپیتا تے کرے تو ای اوڑا ترند مسٹ جوان بے عزت کریٹ تہ  
 ولے ولدا کنے چپ کروئی تمہا ہر اتم او کنے فوٹو تے نشان تس“۔

عاقب نامغز کاریسے انگ ٹی اس بدن ناتہ لڑزنگ ونگ کس۔ فوٹو تاپن آن  
 بدتر چٹ ابکہ مس ”امر فوٹو؟“۔

اصغر استیکو جیب ٹی دُوبے موبائلے تینا کشا موبائل ٹی فوٹو تے پس او  
 مرلیفے تا عاقب کن۔ عاقب موبائلے دُو آن تا ہلک خنا کہ صائمہ نا کاٹم پاشے خنک تہ  
 ترو۔ او اسہ سڑجہ سے آ اونا کاٹم تون او ار جاسم نا کاٹم تخو کے۔ اسٹ الو آن ہندا خہ خلو کو کہ  
 دمہ غاک تا اسٹ ایلو نابائی کارہ بریرہ۔

فوٹو ناہنگ تون عاقب نا بدن نا پٹاک جک مسر حیداک رخسار آن تاریرٹ  
 کرسا اسر۔

اصغر دوئے تینا مریفے، فوٹوے تینا شست اٹ چکیو کنڈا حسا تو پین فوٹوئس  
بس ہرائی صائمہ راستیکو دوئے خاچو کے جاسم اونا خیر آلیٹانے اودوتا صائمہ نازان آ  
تخو کے۔ عاقب ناخنتے آن خوینکا ک ڈک ڈک آتمسا اسر رنگ تاخینس پوٹکن مرسا  
اس۔ اوموبائل دوئے ٹی تا سرفی کس جوڑ مسک۔

اصغر دومر یفے موبائلے کرار کرار دوئے آن تہ کٹھا اوز مولجہ سے اٹ پارے  
”منہ پین فوٹو ہم ارے ولے نے ٹی داخہ سگ اف کہ نی ہنگ کیس تہ۔ موبائلے جیب ٹی  
شاما اوچپ چپ تو س“۔

عاقب تینا جاگہ غالاش آن بارتھے بدن نہ حیداتے ٹی پالس۔ اُسٹے تہ  
لارا نگا سمندر پو غ کس کرے۔ چٹاک تاپت جوڑ مسر۔ اوخنک تا دتر تفریر۔

اصغر ماسا خاموش تو لوک اس کہ دم کسے آن گڈ بغیر ہیئت اوتوار آن گاڑی آن  
ڈیٹلہ درگہ لے ملا اوسدھا اُرائی تینا پتہ یزگا۔ اصغر ہم تینا گاڑی ٹی کرا کر خاموشی اٹ گلی  
آن پیشتمما۔

چار میکو دے کس کہ عاقب اُراغان پیش تمسوس۔ اصغر ہم دا چار دے ٹی اسہ  
وارا وناخنک کن بتو۔

اُرائی انت کس۔ اُرا والا ک انت کیرہ۔ اوانت کٹیک انت بینک۔ اسہ  
گڑا سے نا عاقبے ہوش الو۔ اونا ذہن اوناخنک اونا اُسٹ کل صائمہ ناہو تصویر اتے  
ٹی گرفتار اسر۔

عاقب نا دا حالت آن اونا لمہ سخت پریشان اس۔ ہڑدے اوڑان ہر یفیکہ  
ولے عاقب ناباغان اسہ لفظ کس ہم پیشتمتو کہ۔ آخر لمہ نا بھارا نگا اصرار آن گڈ عاقب لمہ

”اے تینا پارے“ اگہ کنا حالے جو ان خواہے تو کنا او صائمہ ناسانگ اے پر غبو۔ کنے آن  
پین ہر فیرے خدا را۔“

عاقب نالمہ ہفت حیران اس کہ داسانگ اے امر پر غبو۔ اگہ او وجہ اے ہر فیر  
توانت پارون۔ ایلو کند امارنا ناشادانگا چہرہ اس ہر اوڑان برداشت متوکہ۔

خیر ارادے آن گڈ عاقب نالمہ باوہ اے تہ مون تس۔ باوہ تا صائمہ ناباوہ تون  
گپ کرے اودے وڈنسے اٹ پہہ کرے۔ صائمہ ناباوہ پہہ مرو کو زینہ کس اس۔ مچہ  
است تہ خراب تو مس ولے آخر متا اوسانگ اے پر غار۔

اصغرے داحوال سر مس تو یکدم گاڑی ٹی تینا سر کرے تینے او عاقب اے پیش  
آبٹنگا۔ عاقب اے خنا تو دلا سہ تس تہ کہ ”کنا یار جوان مس اللہ ناعز تے بچھے۔ مسٹر بھاز  
مریک نی تینے پریشان کپس۔ ای داسہ کاوہ زو بروٹ نے آ۔“

اودے آن گڈ بیس دے پین گدرینگارے اصغر بس نئے پین کس۔ اسہ دے  
جاسم ڈبہ کس ہیننی سر کرے عاقب استا اراغا۔

عاقب نالمہ ہر فیرے تو پارے ”صائمہ او اصغر ناسانگ نا خوشی نا ہینیکو۔“

شام تو عاقب اراٹی سئی مس تو کاٹم آتلا کس پٹا۔ ہمو وختا سر ہلک اصغر استا ارا  
کن۔ ایڑے سر مس تو خنا کہ پوسکنو موٹر سائیکل کس اصغر استا بیٹھک نامونا سلو کے۔ جاسم  
نادوٹی پوسکنو چابی دان کسے ہراٹی موٹر سائیکل نا چایک خلکو۔

عاقب کل قصہ اے پہہ مس کہ دا کل بے غیر تی اصغر نارے۔ صائمہ مسکین دا  
گڑانا علم ہم مفرو کہ اوتق ٹی مسے تو جاسم دہنوفو ٹوہلکے۔

عاقب اصغر ناماسا انا خنتے خنتے ٹی خلک اوخرینو لہجہ سے اٹ پارے ”اللہ ناوڑو

سنگت دشمنے ہم تف۔ او پین ہیئت کتو واپس سر ہلک اراکن تینا۔

اصغر آعاقب ناداہیئت چو اثر کس کتو۔ جاسم عے عاقب ناداہیئت آخنگ ہلک

اوبشخندہ کرسا اصغرے پارے ”سئی پانک یار ناوڑ و سنگت اللہ کسے تف۔“

داہیئت آ اصغر ہم بشخندہ کرے او جواب ٹی پارے ”اونوڑ وسیال خدا کافرے

ہم تف۔“ او ہندا گپ آہڑ تو ماک مخنگ کس خلکراو بیٹھک ٹی پترینگار۔

## کنا چالاک

”داٹیم کسے بتنگ نا۔“

”السلام علیکم۔“

”وعلیکم سلام! ای نے گڑ اس ہر یفیٹ۔“

”انت کس؟“

”انت کس۔۔۔۔۔ ٹیم آکس ے؟“

”او کہ نا پمسی دو آتفو کے او انت پانک۔“

”دادے اے۔ نی جواب ایت اٹ ومٹ داوڑ کروس؟“

”داوڑ کروس۔ انت کس ای کریٹ؟“

”اچھا نے معلوم اف۔ ای نے پاو نی انت کس کریس؟“

”نی پاپیسہ گڑ ادہنکہ ہمسایہ غاتے بش کراو پار۔“

”بس ہم جوابی کن جوان اُس۔“

”نی کہ جواب تفسیہ۔“

”کن تو نے جواب تنگ ناو اس اف۔“

”گڑا سوال انتے کیسہ؟“۔

”سوال دڑ دآن کیوہ“۔

”انت دڑ دس وانے ارے؟“۔

”نی اراٹی مرکہ نے کنا دڑ دنا سمانے“۔

”ای اراٹی مسٹ تو ارا خولجہ ننے اسہ تُوٹی اراغان مڑو“۔

”او مڑے یا مڑپ۔ ای ضرور دا اراغان نروٹ“۔

”ہو، گڑا ارانگ انوس“۔

”سمندر آ کاو، ریکا تے آ کاوہ، ہرانگ کا ونا انت کس“۔

”کنا پنت کس کہ دالمک ٹی ریک اف“۔

”صُحْب او شام دا خون ٹی بند کئے انت معلوم دالمک ٹی انت ارے انت اف“۔

”ہو، تو نی چچر اخنس“۔

”نا ثواب اٹ بغیر تنیائی او خاموشی آن اسہ گڑاس کنے نصیب متے“۔

”عیش کرنی، خاموشی عبادتے، تو لوک تو لوک ثواب کٹنگ اُس“۔

”عبادت نانے ضرورتے دروغا ک نام مریرہ“۔

”دروغ۔ ای واہر ادے دروغ کس تڑیٹ“۔

”نی کنے تڑیس دا اراٹی دفن کر لیس“۔

”کنے داخہ زور یاوس ارے کہ نے تڑیو؟“۔

”مطلب زور مس نے تو تڑسہ کنے؟“۔

”نی تو پار لیس نی دفن اُس نے انت تڑوٹ“۔



”دفن تو ای اریٹ دا جہنم ٹی۔“

”بند اُس تو پیشن ان۔“

”پیشن انت۔۔۔ داسا باکنا گندہ کانک۔“

”نا باہر ادے صاف انا نئے۔“

”چالا کی کپہ بھاز کنا موڈاف مسخرہ نا۔“

”ناموڈ تو ہر وخت جنگ نا ئے بس۔“

”کنے جنگ ناشوق اف نی مجبور کیسہ۔“

”ای نے انت ئسے کن مجبور کرینٹ وا؟۔“

”آخانی داپا، دا وخت ئسے اُرا غابتنگ نا؟۔“

”دا وختا اُرا غابفر انت اسکول ئسے آکاؤ۔“

”اسکول انوس فی دہن بد اخلاق متوسہ۔“

”نے آن بار آن؟۔“

”بس نا ہندا بیتا تا وجہ غان تو کنا اُست آٹا لموٹپ ئس بٹنے۔“

”ٹوئس مست کنا بیتا ک نا اُستے پھدین کریرہ داساٹپ ردفرہ؟۔“

”ٹوئس مست فی ہم تو کنا ماس آن سر تو سہ داسان نیمہ کیسہ بریسہ۔“

”کنا ارادے ناہرے کنگہ جنگ عظیم ئس کرلیں فی۔“

”تا تکہ ناوڑا نگا اٹلر کونا ارغا ک دادنیا ٹی اریرہ اُرا ٹی جنگ عظیم مریک۔“

”اودا جنگا تے شروع کرو کا ک ناوڑا نگا زانیفہ عاکو۔“

”کناوڑا نگا زانیفہ ناداسگ ارے کہ نے تو ٹوئس گدریفہ۔“

”راست پاسہ پین نُس مروس عمر نُس گدریفیکہ اوہم خوشی خوشی اٹ۔“

”خوشی تے ناؤ وآن کس خنوے۔“

”بس بس بھازہیت کپہ داسا۔“

”اچھا! داساہیت ہم کپہ؟“

”آمرے کر۔“

”آخا کپہ۔“

”آخا کردنئے کئے آرام ملک۔“

”۔۔۔۔“

”۔۔۔۔“

”۔۔۔۔“

”الہ چپ کر لیس؟“

”شباباشہیت کر۔“

”فاطم؟“

”ہو کر؟“

”کرنا پیرا نکالمہ مرے۔“

”او مالوآن کرے۔ اچھا، گڑا جنگ امر کٹو داسا؟“

”کنے واپس راہی کر ملک کن۔“

”ملک کن؟“

”جی ہو ملک کن۔“

”نے ای راہی کیو تو خلق والا کسوا کیرہ کئے۔“

”نی رسوا مرلیس یا مفسس۔ ای گنوک ضرور مریوہ۔“

”ہچ مفک نے بس نی تینا مسئلہ ناپا آخر مسئلہ انتے کہ داخہ چٹنگ اُس؟۔“

”کنا مسئلہ نی اُس۔ ناہرے نابنگلہ۔۔ کئے تینا انگلہ۔“

”ای کاریم نئے کن اناسٹ ہمو وجہ غان ہرے مس۔“

”نا کاریمک ہچ کٹنور۔ درویشیم توہرے کرلیس اینوشام تو۔“

”بس اینو کاریم کٹا دو اناہرے مفک۔“

”ہرن۔ دا انت کاریم نُس اس آخر؟۔“

”ناوڑناس الو۔“

”داسا کئے آن ڈھکسے؟۔“

”نے آن ڈھکپڑہ تا، اذا البولی و کاریم نُس اف، بس۔“

”ایلو فک تینا ہر پیتے تینا زانیفہ تون کیرہ ولے نی۔۔۔۔“

”ہمو فتا وجہ غان تو اینو دنیا پر بادے۔“

”دنیا او فتا وجہ غان آخانما وجہ غان کہ مکر او فریب کیرے۔“

”مکرتون اوار زانیفہ تے کن مہر ہم کینہ۔“

”ہو، نی داسا مہر ہم کیسہ؟۔“

”الہ دامہر افس انت و؟۔“

”سیاست و۔“

”اچھا، ای سیاست کیوہ؟۔“



”انت؟“۔

”نی دادنیا ناکل آن جوان انگا ارغئس“۔

”او تو کنے معلوم ے“۔

”امر معلوم ے نے“۔

”نی پارلیس“۔

”ہر اوخت؟“۔

”داسہ“۔

”اوو، کنا چالاک“۔